

文庄集

夏竦

文碩閣

wenshuoge.com

目录

关于我们	4
提要	6
原序	7
卷一	9
卷二	19
卷三	28
卷四	35
卷五	41
卷六	47
卷七	54
卷八	57
卷九	62
卷十	69
卷十一	76
卷十二	81
卷十三	86
卷十四	93
卷十五	98
卷十六	102
卷十七	107
卷十八	113
卷十九	119
卷二十	123
卷二十一	129
卷二十二	134
卷二十三	138
卷二十四	144
卷二十五	149
卷二十六	153
卷二十七	157
卷二十八	160
卷二十九	166
卷三十	173
卷三十一	177
卷三十二	185
卷三十三	189

卷三十四		193
卷三十五		200
卷三十六		204

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部三

提要

文庄集三十六卷 别集类二【宋】

【臣】等谨案文庄集三十六卷宋夏竦撰竦有古文四声韵已着录其集本一百卷宋史艺文志着录今已不传兹据永乐大典所载兼以他书附益之尚得诗文三十六卷竦之为人无足取其文章则词藻赡逸风骨高秀尚有燕许轨范归田录青箱杂记东轩笔录中山诗话玉海困学纪闻诸书皆称引之吕祖谦编文监亦颇采录盖其文可取不以其人废矣集中多朝廷典册之文盖所长特在于是所载事迹如太宗为京兆尹时召见魏咸信事在乾德五年而史以为在开宝中澶渊河清见底事在端拱元年而史以为在雍熙四年竦之直集贤院以献文得官而史以为自通判召入凡斯之类皆足以订宋史之讹他若李昉之追封韩国公王曾之为兵部郎中鲁宗道之为给事中任中正之为右谏议大夫史皆失书凡斯之类亦足补宋史之缺盖托克托等年远传闻不及竦纪录时事为得其实也集中表奏有代王曾王旦寇准诸人作者考之史传竦在洪州能断妖巫毁淫祠仁宗时增设贤良等六科复百官转对置理检使亦皆竦所发好水川之事议者归咎韩琦竦於任福衣带中得琦檄奏之明其非罪则竦虽巧伎较之丁谓王钦若辈尚稍稍有间故正人尚肯假手揜抑或为所笼络当时尚未遽悟其奸也竦学赅洽百家及二氏之书皆能通贯故其文徵引奥博传写者不得其解往往舛讹今参考诸书为之是正各附案语以明之其不可尽考者则姑仍其旧从阙疑之义焉乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

文庄集原序

繇文章取贤科位宰执流风遗烈光华休畅在汉有之公孙季以慎厚而饰儒雅通于治道在唐有之裴寛中以峻整而持法度协于柄用在本朝有之郑国文庄夏公以哲父而经文武穆于天紼是皆为当世伟人表的于後公孕?之精降崧之灵洞九流之指归漱六艺之腴润年甫及冠业已大成于时章圣皇帝罢兵和戎留好典籍物色遗逸寤寐峻良始辟六科亲策多士公试三千言于政事堂遂敷秘廷对清问天子擢以优等声光四驰褒渥有加方朝家拥瑞物兴礼文参夷丙之御访鬼神之本公番直儒馆屡赐延见形容上德时奏赋颂洎通衡石之擘数夸美于丞辅会诏诸儒辑君臣故事分厘部类公譔别序为多复预编修国书仁庙启藩在潜命公傳以经义兼筦牋记极一时之选乃陟词掖入禁林鼓动雷风藻泽谟训朝廷大典册多属于公公亦感慨荣遇摅发渊蕴及毗宰政建言复制举以取宏博之彦复百官转对以通下情置理检使以逵冤滯时论翕然又以三长之笔克就信史及退释重任服在大僚宝元中种羌畔换西鄙不靖公以兼备之材签拣素定拥旄推轂付以专阃既而起居兵间以新书李法从事尝奏议边十策多蒙施用经略怀来卒柔异俗于是佩相印冠枢廷荒大国之封峻常伯之秩虽宠灵绸繆而益怀惊畏学士杨公察草麻制谓仲尼不容周公胥怨岂得其时而未尽其志耶然烜赫隆盛弥四十年以文致身稽古之力其极矣哉自公出处中外勤劳王家大编鉅轴襞积私楮岁月其逝弗皇缀缉纸蠹墨蔑颇有坠逸公既薨而嗣子亦谢世元孙尚书比部郎中伯孙倭故吏工部郎中张君宗益秘阁校理裴君煜彙次遗集成百通後数载见俾序之公尝论文以气骨为主诋时辈所作如绣屏焉于书无所弗通以至阴阳律历隶古之学莫不兼总以为天下之乐无如黄卷中也属思深湛构词致密泚翰就简甞涂不已归于至当乃可尤善章奏铺赋颠末言详意尽盖会萃衆说而掇其真粹包括曩制而丰其条干如至音纯绎金石奏于宗庙华采灿烂黼黻施于象服後之学者鑽仰之范模之景山学海可得致欬宋敏求谨序

有宋文庄夏公挺生于祖宗朝其文温厚谨严发乎性情而动有典则如文靖李公文正王公之在朝一时化之风声气俗讵无叔季浇漓之习其间琢句警联嘉言说议脍炙人口至今不絶而尤工于表章制诰虽使琳琅常杨复生未易遽出其右信矣文章之与时俱高也邈游学时得公牋表一通于都市固已玩之有日常恨未睹其全比倅江夏遇湖北漕使直合公之宗支也适兼郡印盖尝从容语及遂蒙出其家藏凡百卷以示因付镂工以广其传工既告毕于是属邈序之邈常窃笑文人之裔秘其家集为私淑之计一遭变故已亦不能有之?覆见有于人甚者灰于劫火靡有子遗卒之其先无传焉使闻兹举顔其厚矣廼不辞而僭书之绍兴庚申上巳左奉议郎权通判鄂州军州兼管内劝农营田事江邈谨序

文庄集原序考证

第一页後八行 按宋史仁宗本纪天圣七年闰月复制举六科复字原本讹作後今改正

第二页前四行 李字原本讹作季按汉书胡建传黄帝李法注云李者法官之号搃主征伐刑戮之事竦传言治军尤严敢诛杀即序中所云也今改正

卷一

钦定四库全书

文庄集卷一 宋 夏竦 撰制

兵部侍郎赵安仁可尚书右丞制

勅国家祖功宗德丕显於大猷广记备言允资於实学属成书而奏御宜加等以推恩具官赵某性尚淑均仪操温重有淳正之德服於搢绅有雅奥之文表於台阁自顷参朝政首譔信书屡易岁时备观良直况宣明於先烈宜峻异於宠章特进秩於中台实陞荣於右辖肃兹六职更励乃诚可

左谏议大夫充集贤院学士孙仅可给事中余如故制

勅国家覃庆汾睢逮兹六稔庶官考绩咸叙其劳眷乃侍臣宜加宠异具官某行明识成於夙龄丽藻清冠我时彦而自谏垣引籍僊殿兼荣于彼藩宣奏课而连最审兹邦宪处法以甚平绩用居多岁月滋久俾擢居於琐闥用特聳于朝荣往践厥官更图来效可枢密直学士右谏议大夫任中正可给事中余依旧制

勅汾睢均庆积有岁时考课最於官司已陟明於羣吏眷繁剧於京府宜疏宠於侍臣具官某学识该通器致宏远积纯粹之性怀干裕之材而自入直枢廷兼荣谏省藩宣巨屏惠抚於黎蒸尹正中畿肃清於豪右惟积劳之滋久宜信赏之有加特进秩於琐闥俾增崇於密侍荷兹宠异无怠乃诚可

右谏议大夫参知政事鲁宗道可给事中余如故制

勅朕绍隆景业大庇中区实赖股肱之臣燮和天地之道务在尊宠式表眷怀具官某神稟岳灵气载弦直文章雅正道艺深明方重敢言忠厚无间简自先圣辅予冲人不吐刚而茹柔常疾非而甄善倡率羣后翊赞正司洽兹重熙莫匪嘉绩宜升劳於琐闥示嘉宠於黄扉更赖尽规奉若时命可

翰林学士左司郎中知制诰李维可中书舍人余依旧制

勅国家五坛布庆六载于兹庶位陟明久从於鈎校近臣凝绩特举於徽章以尔具官某瑞世明姿庆门华绪立言以道无外獎之勤虚已待人有不疲之鉴而自陞华禁省列职中台夙夜浚明得大夫之体训词深厚合王者之言而星火屡改於新阳车服靡登於旧数是用简自朕意俾图尔劳宜正秩於纶闥用增荣於密侍膺兹异选更励乃诚可

祠部郎中李湘可依前祠部郎中充三司度支副使制

勅度支之职懋迁有无食足货通具有前训故其副贰尤在得人以尔某勤瘁首公端和毓性频繁事任履历岁时朕昨以洙泗名区真灵所降钦修靖馆茂集鸿禧方总均输罄宣懿力宜副版图之任庸旌干裕之材更励乃诚以称朕意可

侍御史黄昭益可刑部员外郎充三司户部副使制

勅朕观在昔量能授事地无旷土邑无游民今之会府寔领其政为之贰者甚难其人以尔某为学该明资性温重而自飞英宪府澡行朝伦擢从金谷之司授以藩宣之寄思虑深远政治寛平蔼然休声達於朕听是用宠以郎选俾赞计臣更务竭诚以荅殊獎可

工部郎中兼侍御史知杂事赵积可依前工部郎中充三司盐铁副使制

勅谨正铁官修举盐?民不加赋经用益饶必得其人以贰厥职以尔某操履温肃志尚端平方面均输勤劳於漕事宪台杂治审克於爰书俾佐计臣必有嘉效勉思尽瘁以称朕怀可

太子右赞善大夫监通济粳米第一仓李明可殿中丞余如故制

勅某等国家分命攸司大校羣吏及劳而赏惟恐後焉以尔等勲荫起家文辞中选励精官次率职宾筵善最有闻考覆斯允或升华中御引籍东朝或述作兰台参丞棘路并为清举勉称朝荣可

大理寺丞白波发运判官王直可守殿中丞制

勅某等夫发辰中御画诺春坊并预通闰尤为妙简以尔等艺文秀峙政治寛平连最有闻在勤可纪宜陞朝着以励缙绅勉罄乃诚荷兹殊獎可

太子洗马知陵州军州事楚用和可殿中丞余依旧制

勅某等竭心从政洁已在公积有岁月之劳登於考课之制中御司卫超进属丞往钦厥官无忝朝命可大理寺丞同判永兴军张保雍可殿中丞余依旧制

勅某京兆旧区实屏西夏惠绥之政方倚於忠贤倅贰之材甚艰於选授以尔韵宇淹粹学问该明自佐于蕃常闻竭虑宜丞中御之府仍赞司雍之臣更务首公以荅朝獎可

太子中舍监建州造茶兼买纳茶务余良孺可殿中丞余如故制

勅某国家以封域之广命中都官出干外事三载有成就加爵秩欲其昭劝之速也尔等早列

闺籍闲练国章往佐牧民之官或领摘山之务阅阅来上岁月当迁中台望曹东序显秩泊丞属於御府皆仕进之荣涂差赏尔劳以观来效可

东头供奉官合门祇候王怀忠可内殿崇班依旧合门祇候制

勅某早列官常洊经事任岁时滋久劳効可嘉特疏宠於近班仍兼荣於上合勉思勤瘁以荅甄明可

翰林院艺学殿中丞同正蔡齐古可依前殿中丞同正充翰林院待诏制

勅汉金马有待诏之臣备清问侍从之职唐禁林有执艺之士陈太古雅正之声朝廷因之并建其选以尔具官某早工絶技克畅治音宜书岁月之劳式獎均调之业往阶显秩无忝隆恩可

秘书省著作佐郎知蜀州晋源县事张锡可太子右赞善大夫余依旧制

勅某等明经中选敏学登科竭节効官在公凝绩攸司大校赏典并行是用进秩上台升华中御或飞荣於鹤禁或佐局於兰台各励乃诚以荅朝獎可

秘书省著作佐郎知蜀州永康县兼兵马监押任文素可太子右赞善大夫余如故制

勅某等国家考课绩差善最所以辨百工之能求四方之政者也以尔等早中朝选恪居官次勤宣干力修奉彝章岁月贸移职用备举攸司大校信赏并行引籍外台振纓中御泊春坊之画诺皆仕路之美迁更务夙宵无忝恩獎可

大理寺丞李象之等可太子中舍余依旧制

勅某等经术该通吏能干敏振纓理寺陟状甚明结綬宾筵荐章交上或陞华於鹤禁或佐职於棘卿各示甄陞勉思自效可

大理寺丞充三门发运判官钱智周可太子中舍余依旧制

勅某等国家以功诏禄以能奠食申明善最之格旌辨勤劳之臣所以劝天下以至公也尔等各负吏能屡分朝命竭心从政洁已在公美课有闻赏典斯在宜进铜扉之职或参棘路之荣更务聿修以永终誉可

大理寺丞知绛州翼城县姜矜等可太子中舍余依旧制

勅某早践官荣克彰干力及有考核引对轩墀宜用陟明以旌勤効或青闱振藻实践於朝闺

或棘路陞华共评於李法勉膺甄獎更励夙宵可

太子中舍张行简并可旧官制

勅某等早列官荣遽丁艰疚孝惟不匮诚合终身礼有外除固难过制宜还官秩俾遂资忠可

工部郎中张士逊可户部郎中直昭文馆充壽春郡王府官制

勅朕以爱子膺封建之礼慎选端士以辅导之俾其居处出入之际闻忠孝方正之言故朕久思其人未易轻授自非耆重孰副柬求以尔具官张某资性淑均理尚清简纠弹宪府漕挽外台端懿之风硕茂斯允以尔具官崔某业文甚雅守道不回引籍谏垣励精史局老成之德慰荐良多是用简自朕心命之王府第进左民之秩或兼上馆之荣尔其祇荷宠章协宣懿效?讽礼谊以臻於道予有望於汝也可【案真宗本纪大中祥符九年正月壬申以张士逊崔遵度为壽春郡王友故制词有具官张某具官崔某之语乃制词既明列二人而制题则举张遗崔殊为踈略又考遵度本传真宗祀汾阴之岁命为左司谏七年降为右正言踰岁复秩九年命与张士逊并为王友改户部员外郎则知遵度之为王友时以左司谏而加员外郎也但无别本可据姑仍其旧附记於此】起复云麾将军解州刺史本州团练使郭崇仁可检校工部尚书加食邑二百户制

勅国家奉帝真之徽称展郊庙之盛容禔福縣区推恩有位具官某威英御衆智勇出人学茂兵铃识通民政而又常参密命久奉戎昭功着边陲家传勲戚其或入奉朝请分刺藩宣任团结之崇资奉防秋之重寄克宣懿力绰有休声方霈纯禧宜隆异数或增荣於视秩或加赋於爰田洎登馭贵之阶并示畴庸之典各思况瘁以荅宠灵可

起复云麾将军解州刺史充本州团练使郭崇仁可落起复授金紫光禄大夫余依旧制

勅某彝鼎传勲诗书稟训早列通侯之贵遽衔陟岵之哀爰及外除宜加茂宠俾进阶於三品仍视秩於六官益隆团结之荣更励夙宵之节可

给事中钱惟演可工部侍郎制

勅国家雕壤均恩积年滋久羣吏大校鲜有陟明眷惟迓臣宜用加宠具官某丰规曠古雅望冠时尽瘁夙宵克宣於干力周旋清要咸服於懿文况其世有大勲纪在王府顾久居於琐闥宜擢贰於冬卿钦践厥官以副朕意可

翰林学士给事中知制诰陈彭年可工部侍郎余依旧制

勅朕以颂次先猷总裁大典诞播无疆之美实资命世之才式庆成书宜加茂宠具官某清徽曠世景行服人闲练典章周旋要近辨礼乐升降之数敦训辞深厚之?明识远猷藹於时望而

自铺观注记紬绎信书约五始之旧文宣两朝之鸿烈时乃之力朕甚嘉之宜擢貳於冬卿用增荣於禁省服兹休命更竭乃诚可

翰林学士工部侍郎知制诰晁迥可刑部侍郎余依旧制

勅国家颂次祖宗之典允资硕茂之才既紬绎以成书实精研之备至宜推异渥式獎名儒具官某局致渊通资气淳素樞深厚之学藻润於训词敦栖约之风静一於流竞表仪羣士茂耸明姿而自总缉旧章编研史策历年滋久宣力居多宜擢貳於秋卿俾增辉於内禁勉膺宠眷无怠钦承可

给事中参知政事张知白可工部侍郎加食邑五百户食实封貳百户制

勅国家奉天尊道茂集於多仪论德第功诞均於纯锡眷惟良弼宜耸朝荣具官某字韵中深志尚栖约总生人之嘉秀蹈先哲之高衢内阁陞华竭诚而备问外台执宪正色以在公简自朕心俾参柄用清机足以照理奥学足以询谋一德惟新九功咸序而自荐灵辰之实号奉真祖之丕称登徽謚於太宫报繁禧於阳位讲求故实赞相盛容陟降无违声名允穆时乃之力朕甚赖之特擢貳於六卿用加崇於四近仍增食赋并示徽章噫隆器大名务从於褒异密谋潜虑实伫於将明勉罄远图共熙至治可

枢密副使礼部侍郎晏殊可刑部侍郎余如故制

勅内枢之重密命是资允赖忠贤参综兵要眷惟勲旧宜峻等威具官某道艺该明资性方格自怀名教之乐淡於荣进之涂简自先朝列於储案辅朕初载克畅於大猷登汝近司愈昭於懿德宜进天台之秩用增机轴之崇更伫訏谟启迪予志可

起居舍人知制诰判昭文馆盛度可工部郎中余依旧制

勅国家均庆颂祇之宫多历年所大校羣吏之治咸叙其劳在於侍臣宜有殊宠以尔具官某周才敏用奥学雄文演润之词日彰深厚之美铨衡之任时推平允之材久次近班弥昭令望宜正名於郎位俾增美於掖垣更务诚明副兹甄獎可

刑部员外郎知制诰新知扬州王随可工部郎中余依旧制

勅某朕魏睢覃庆多历年中外庶官已从考陟左右近职宜有褒优以尔早列纶闱出司留龠能以寬政惠兹蒸人方别寄於藩条宜特隆於郎选伫闻治迹以称朕怀可

翰林学士主客郎中知制诰王曾可兵部郎中余依旧制

勅均庆隆睢岁时滋久陟明羣吏甄獎居多眷惟清近之臣宜茂褒优之典具官某韵宇宏远

资气淑均洁已无瑕早励怀霜之志当官有守克彰匪石之心自振藻於禁林实飞英於儁域
年华屡改时誉弥芳宜进秩於中台俾增辉於内省佩服优宠更务夙宵可

职方员外郎阎仲卿可屯田郎中知耀州制

勅某资性矜严当官尽瘁洊更事任屡易岁时将涖近藩对於便坐俾正握兰之秩用增分虎
之荣善爱吾民以荅殊宠可

刑部郎中充龙图阁待制查道可右司郎中余依旧制

勅朕自祗荐坤灵洊历年所考陟载行於庶位甄陞宜厚於迓辰具官某性本温良识惟清逵
回翔近署克遵慎密之规典掌攸司允着公勤之绩蔚有词藻颂其声明久稽茂恩未副朝论
特进中台之秩式增内阁之荣更励诚明表予眷待可

三司盐铁副使刑部员外郎段曄可吏部员外郎余如故制

勅国家覃庆汾睢于兹六稔庶官大校咸用陟明繁剧宣劳特宜疏宠具官某等操履端肃器
局淹通贰乃计臣度兹邦赋笼山泽之利公家之用咸充积岁月之勤鈎考之文未至用特进
於赏典俾俯劝於能臣祇荷宠章更思况瘁可

王旦弟度支员外郎判国子监旭可尚书司封员外郎余依旧制

勅某上帝降衷赉予良弼交修封祀之典宣臻揖让之治佑我鸿业格於皇穹哀哉云亡追悼
何已眷乃同气素有令名避金谷之要司总胶庠之学馆赏延之宠宜异於常勉继前修式光
华绪可

屯田员外郎同判定州张戢可都官员外郎余如故制

勅某朕以郡县之治责在庶官三年有成急於加赏故有就进爵秩以劝勤劳者也以尔业文
中选厉节首公关决郡条熟习吏事有司会课善最居多建礼增荣命数滋重勉思干裕以荅
宠灵可

屯田员外郎监荆南盐麴商税务陈易从可都官员外郎余如故制

勅某等有虞氏之制三载考绩黜陟幽明朕举而行之以劝臣下以尔等服勤官次各有吏能
校课最於攸司上闕阅於宰府宜进文昌之秩或升中御之丞各荷宠灵更图来效可

新差荆湖北路提点刑狱太常博士江嗣宗可屯田员外郎余依旧制

勅劳臣不进材臣不劝故朕宣明考绩甄序流品以尔具官某等服勤官次引籍朝闺绰有政能多历年所爱观陟状用锡宠章司舆建曹垦田列职台郎之选於是为优勉竭乃诚无忝休命可

太常博士知广德军陈覃可屯田员外郎余依旧制

勅某等古者以尚书郎主屯田积谷之事以充经用国家颇重其选未易授人今尔等辞艺该明吏事周敏任劳可纪会课居多以升厥官更伫来効可

太常博士知眉州刘忠正可屯田员外郎余依旧制

勅某等汉魏以尚书郎主垦田虞衡之事分曹建礼职亦甚重以尔等清洁秉志勤劳首公或守郡坤维或详刑岭表皆以吏课列於有司考核以闻陟明斯在第陞华序用劝朝伦钦践厥官更思况瘁可

太常博士充秘阁校理韩羲可祠部员外郎余如故太常博士胡淳可屯田员外郎制

勅文昌政化之本台郎要近之官傥非时材曷称朝选以尔韩某艺文深厚躬博雅之姿胡某吏理精详怀清白之操并处曲台之秩或参秘馆之荣第课当迁赏劳斯在宜分曹於建礼俾应宿於太微勉励清修无忝朕命可

国子博士侯自成可虞部员外郎制

勅某奥学名家周才干裕洵更事任克着勤劳宜自成均俾参郎选分曹建礼实总虞衡足谓美迁勉思尽瘁可

太常博士朱頔可屯田员外郎制

勅某懿文中选庆胄承芳竭志临民荐章交上勤心厘务美课居多考绩攸司引对便坐简自朕意俾图尔劳或超践於天台或第陞於棘路各钦异渥共励乃诚可

太常博士卢宗可屯田员外郎制

勅太微积星蔚为郎位选授之际所宜得人以尔某早业懿文世蹈方谷曲台引籍列郡班春奏最居多考课斯允是用擢之省局实掌公田钦践厥官无忝休命可比部员外郎通判泉州徐仲翔可驾部员外郎制

勅汝承荣闺籍通守泉山奏课攸司备观於干力畴劳省局宜进於望曹善抚远民以称朕意可

監察御史知陝州軍府事李階可殿中侍御史余依旧制

勅某分陝奧區介於司雍控引川陸蕃輔京師共治之臣甚難其選苟得良牧何吝寵章以爾
文藝優深識度宏遠頻繁事任淹歷歲時潔已臨人在公正色滑鄭之治民甚便之宜進榮資
俾臨劇郡必有嘉効以稱朕知可

前侍御史呂言并可旧官制

勅某等早通閨籍遽執親喪欲報之哀固云罔極免懷之制蓋亦難踰宜及外除還其旧秩更
思移孝以永揚名可

秘書省著作佐郎鄭隨可秘書丞制

勅某中秘屬丞右文清選以爾早登榮級屢奉官箴有司疇勞便殿引對授以斯職實踐朝闈
尤為異恩勉圖來効可

光祿寺丞朱正辭可秘書省著作佐郎制

勅某著作之局頒次信書妙簡清材以佐郎選惟爾先正頃在禁林奉身自高朕甚嘉賞果有
令嗣克紹清聲飾吏以文首公為操當其考績是用陟明往踐厥官勉圖來効可

前泰州軍事判官試大理評事趙定可秘書省著作佐郎制

勅某茂蘊時材勤宣干力歷年滋久奏最居多引籍芸局陞華月寺第勞而授無怠欽承可

前興州軍事推官桑衍可秘書省著作佐郎制

勅某著作之廷昔為史局佐其郎選必簡賢勞今某早擢科名當參幕畫勤勞匪懈稱荐居多
宜有甄陞以勸清慎可

前保慶軍節度推官趙應言可秘書省著作佐郎制

勅某朕博選羣材并建衆職有善可賞未嘗遺之以爾榮名詞科從事戎幕當官有守潔已無
瑕擢自羣倫必有招勸中秘之屬選授甚清更勵乃誠以荅休寵可故司空致仕贈尚書令追
封韓國公李昉孫男昭邈等可試秘書省校書郎制

勅某在昔乃祖克享隆名良規未改於正司茂烈尚藏於盟府屬均鴻慶宜齒後昆勉膺試吏
之榮無息亢宗之志可

秘书省校书郎制【原本阙除授人姓名】

勅某策名桂籍试吏芸局求归养於兰陔已屡迁於主簿览守臣之列奏知尔父之有瘳俾再践於初筵仍就趋於近郡用旌孝则以伧忠规可

内殿承制合门祗候吴元庆可供备库副使制

勅某轩墀之列诸使为优推选贤能以贰其职以尔生於鼎族早佩官箴岁月屡迁勤劳匪懈宜有加赏俾预近班祗荷宠灵勉思况瘁可

南作坊副使钱守吉可供备库使制

勅内外诸司分置使领轩陛之右秩甚优殊以尔某局致渊通仪范端肃服勤官次屡易岁时况其世有茂勲书在盟府宜推恩典俾正职名勉罄乃诚更图来效可中允知荣州公孙仪可太常丞余依旧制

勅某等竭虑首公勤心干裕有司较其课最宰府详其阅阅名在赏格朝命是行或引籍曲台或发辰中御各钦茂渥更励乃诚可

殿中丞新差通判石州和郁可太常博士余依旧制

勅某等引籍朝闕服勤官次考其课最时用陟明或命秩於曲台或陞华於中御各膺茂典更励乃诚可殿中丞知开封府司事参军杨佖可太常博士余依旧制

勅某朕并建衆职分义中区念勤简劳惟恐不及以尔懿文中文选亮节首公识度清和操履方雅考其底绩合预陟明曲台礼官举以授尔噫天府浩穰牒诉倥偬纠绳之重尔方居之勉宣令猷以荅殊獎可

前太常博士任中行可太常博士散官制

勅某懿文中文选干力首公擢倅浩穰徧游肯綮方展投虚之刃遽貽藉藁之愆属兹均禧特从牵复勉图况瘁以荅朝荣可

殿中丞通判河南府王正伦可太常博士制

勅具官等虞舜陟明之典成周鈎考之法朕总而行之以辨羣治尔等懿文中文选茂学承家咸奉官箴并成吏课宜有甄赏式劝勤劳训礼曲台详荆棘路各钦异渥共励乃诚可

太常寺奉礼郎任同可旧官服阙制

勅具官执丧之礼式及外除掌礼之司所宜复序恪居乃职无怠资忠可

文庄集卷一

卷二

钦定四库全书

文庄集卷二 宋 夏竦 撰制

卫尉寺丞赵鼎可依前尉寺丞兼宗正寺主簿制

勅某国家率陶唐先亲之典右宗周宫正之任妙选同姓以备属僚以尔早着吏能克勤官守俾兼勾稽之阙更观夙夜之勤可

故守太尉尚书令王旦男大理评事雍可光禄寺丞制【案王旦传旦薨後錄其子弟侄外孙门客常从授官者十数人此制云矧保家之令嗣泊犹子之惟亲即传所云錄子侄事题中举子遗侄当有脱漏】

勅某等朕得良相登翊大猷擢士以公处身以约四近之位万方是毗国之彝章岁有勲?每自谦抑罕欲奏言及此云亡深用伤悼矧保家之令嗣泊犹子之惟亲咸有懿文并承清德宜推延世之赏式彰有後之荣各务进修承兹闕闕可

将作监丞知大宁监张师顔可大理寺丞余依旧制

勅某袭庆德门隶官缮监周旋事任縣历岁时考绩有闻赏劳斯在参丞棘路更厉乃诚可

前衢州军事推官范谓可大理寺丞制

勅范谓尔久列初筵克陈婉画荐章交上考绩攸同棘路属丞畴荣而授更思况瘁以答殊荣可

前京兆府观察推官冉宗元可大理寺丞制

勅某朕每临便坐亲对羣吏至於盱眙以观其能汝早列宾筵克明政事宜从简擢以懋勤劳往丞理官勉副殊獎可

大理评事秘书校理通判渭州王夷简可大理寺丞余依旧制

勅某陇阪故区西陲要郡汝关掌其政干力有闻考秩将终边臣奉请俾加荣於棘路仍典校於秘文式遂借留更观来效可

前权知单州团练推官厅公事沈泽秀州録事参军郑知白并可大理寺丞制

勅国家克谨铨筦澄鉴品流妙择时材分综羣务以尔具官郑某监司慰荐綽有政能具官沈某閎閱具存迄无痕累简自朕意俾图尔劳往丞理官无替厥命可太常寺奉礼郎监滨州盐酒税务陈崇德可大理评事余依旧制

勅某等素擅艺文早籍黜?并登仕路各着吏能勤劳有成考较惟允第加宠擢用示陟明勉称厥官以永休誉可

太常寺奉礼郎裴德輿可大理评事制

勅某早承华绪式奉多仪爰考践扬颇彰劳効宜特陞於棘路俾共献於丹书勉荷宠章无忘祗慎可

太常寺太祝董仲容可大理评事制

勅某承荣华绪效职曲台勤劳在公考课斯允宜备理官之属共详丹笔之文更务矜修以永休宠可

殿中丞熊自成可国子博士制

勅某等朕懋建庶官分义九域简其勤劳急於劝赏孜孜旰食甚於臣下之求爵秩也以尔等属言治经各中科级当官厘务并有能称建礼迁曹上庠引籍陟明之典於是为优勉罄乃诚以副清选可

知饶州乐平县杨简除国子博士制

勅朕方崇长学校所以加惠诸生甚渥也则朕教事其间宜得名士尔简蚤有贤誉不求闻达徒劳县章益务持养是以不俟满岁俾长胄子岂惟诸生又以为善类劝也可

诸王宫教授兼国子监说书制

勅某朕躬训宗枝幼皆向学思得儒者受之以经以尔备职均庠励精弦诵特陞荣於祝史俾善诱於缣緡宜竭乃诚以答休命可

新除秘书少监致仕胡旦男叔彩可试将作监主簿制

勅某乃父材名甚茂疾疹久婴爰列奏封恳辞荣宠方遂奉身之请特丰延世之恩试吏起家尔当自勉可太府卿权西京留守御史台裴庄孙男令孙可将仕郎试将作监主簿制

勅某尔父官重月卿任分乌府适属均恩之际亟陈谄厥之诚宜升试吏之荣俾遂起家之志

慎初之训尔其念之可

河东转运副使太常博士王平弟弁可将作监主簿制

勅某尔兄往临大卤实掌飞乌爰拜露章具陈友爱宜锡起家之命俾参试吏之荣当慎厥初以永休宠可故兵部郎中知应天府兼南京留守司王勗男太庙斋郎晦可将作监主簿制

勅具官某汝父挺生德门艾服王政近付留龠往厘南都遽兹沦亡深用嗟悼特宜延赏式燕後昆勉励厥修以隆华绪可

故光禄卿沈继宗次男试将作监主簿惟恭可守将作监主簿制

勅某世济德芬间藉勲久参试吏方属均恩俾正职名更思兢慎可

堂後官主客员外郎提点五房公事刘明恕可朝请大夫加轻车都尉制

勅国家奉天尊祖祿鬯升禋继毕盛容诞均繁祉眷兹硕望宜霈渥恩具官某器度清和志尚冲粹博通儒训详练明经而自率职相庭兼荣郎位总辖尤重奉号令以无违勤旧有闻历岁时而滋久矧在卜郊之始务严置蕝之仪书诏尤多礼文为盛尔并提纲领无爽规程时乃之功深用嘉赏贵勲荣级并示褒优勉罄乃诚永荷休宠可

堂後官大理寺丞张仁惠等可加轻车都尉制

勅某等国家荐宝号於帝真集上仪於郊庙诞推异渥式獎能臣以尔等清慎修身端和毓性该通庶务闲练旧章自恭事於槐庭常服勤於芝检详明率职尽瘁首公属兹均庆之辰并进书勲之籍荷兹獎饰更厉乃诚可

刑部员外郎兼侍御史知杂事吴夷简可朝奉郎加上轻车都尉制

勅国家荐灵宸之宝号奉真祖之鸿名登徽謚於太宫报繁禧於阳位休嘉总至庆赐方行况在能臣特隆异数具官某仪范清肃性尚淑均昭曠世之丰规萃高门之积佑周旋徽序祇慎官箴慰荐之章交於公府敏学之誉溢於朝闺俾杂治於宪台实勤宣於令望侍祠之际率职兹恭宜进阶资仍迁勲级勉修懿德以称朝荣可

枢密直学士河北都转运使工部侍郎李士衡可中大夫上轻车都尉制

勅国家荐号密都钦柴泰時神欢洽茂大庆方行乃眷近臣特隆异数具官李士衡秉节高亮资气淑均德茂芝兰志怀霜雪竭心披艺奥蹟以研几正色首公雍容而干事而自枢庭入直起部升华朔野而南荣河以北委之漕事克有风声经用羨饶庶吏清肃方均灵浸并锡徽章

勉罄乃诚以答朝獎可

右千牛卫大将军致仕蒋文肃可加食邑制

勅某国家奉天尊祖祿鬯升禋诞霈鸿禧周于有位以尔等资性沉毅茂略渊深祇慎官箴频繁事任而能览止足之分敦避让之风致政公朝升荣近卫属此均禧之始宜推加赋之恩荷此宠灵勉自颐养可

大理评事杨球可卫尉丞制

勅某早阶仕路各奉官常考绩攸司勤劳可纪升荣卿寺禄秩为优更务首公以答明赏可

大理评事唐均可卫尉寺丞余如故制

勅具官某等夙承勲绪久践仕涂吏课有成朝赏斯举震维引藉实拟於上台环卫陞荣最亲於中禁勉服休宠无怠厥官可

利州路转运使工部郎中吕言可刑部郎中余如故殿中丞同判邓州朱正基殿中丞知华州华陰县事杨政化并可国子博士余如故太子中舍知越州余姚县事韦觉可殿中丞余如故制

勅国家引一代之材布四方之政省録勤吏日简朕怀以尔某等性蹈谦雍治中寬猛往监司於郡国或抚养於黎蒸咸能首公克底成绩建礼司刑之重东庠讲学之荣洎中御之属丞皆上台之清举第劳而授惟政是繫无替厥官以忝予命可

都官郎中知邢州严颖可职方郎中余如故荆湖南路转运使职方员外郎康孝基可祠部郎中余如故太常丞同判福州王渚可太常博士余如故太子中舍知郢州平陰县事陈保和可殿中丞余如故制

勅国家尊右文治重爱生民以台省之要官厘郡国之衆务疾非甄善唯恐後焉以尔具官某等心识甚明材用尤备考其官阙各有事功宜举成科并增显秩尔其除烦就约徇公灭私免继前修无替朕命可

祠部郎中知宣州江嗣宗可度支郎中余如故屯田郎中知临江军熊同文可都官郎中余如故太常博士知岳州张稹可屯田员外郎余如故国子博士知荣州赵喻可虞部员外郎余如故殿中丞知富顺监朱良治可国子博士余如故太子中舍同判眉州文可观可殿中丞余如故制

勅郡国朝廷之屏翰牧守生民之父母教化所自选授惟艰劳之不图吏将安劝以尔具官某

等践履方格文割详明或处千里之师或贰诸侯之治爰考官阙率如风謠宜即所居第进荣秩夫清约可以行已寬厚可以安人勉逮前良无替朕命可

金部郎中知洛州李文着可司勳郎中余如故太常博士同判苏州李意可屯田员外郎余如故殿中丞同判汾州马张可太常博士余如故殿中丞同判鼎州甄化基可国子博士余如故太子洗马知汝州襄城县事乘允恭可殿中丞余如故制

勅朕懋建郡吏分干中区赏以及劳爵以序德以尔等矩度修絜文理精详考闕閱之积勤讫更痕殿量功次而差授并用甄陞勉图後勲以永终誉可

唐南东路转运使司封员外郎李适可工部郎中职方员外郎知鄂州高慎交可屯田郎中秘书丞知岳州临湘县事张惟諤可太常博士秘书丞知洪州丰城县事孟虚舟可太常博士太子中舍知信州上饶县事贾守文可殿中丞太子中舍同判信州张同文可殿中丞殿中丞知白州刘宗谅可国子博士大理寺丞知宣州宣城县事查庆之可太子中舍卫尉寺丞知湖州乌程县事方仲弓可大理寺丞制

勅国家敦厚治本重惜生民以台省要官长州县衆职复東良儁式备监司勤之可图宠尔殊等具官某等志尚清约事任颇繁往干漕挽之权或分守宰之寄风謠载举善最有闻并书厥劳第增乃秩勉遵寬大之诏称兹褒异之恩思齐古人以永休誉可

殿中丞田庆余譚雍并可国子博士太子中舍毕从善可殿中丞太常博士同判扬州吴待问可屯田员外郎余如故太子中舍知汾州平遥县事李永世可殿中丞余如故卫尉寺丞知淄州淄川县事李庭坚卫尉寺丞监温州前仓镇茶盐酒税务向约并可大理寺丞余如故制

勅以禄诏爵以德懋官顺考旧章无尚於此以尔具官某等政体勤晓风行洁清宜録乃勲通增尔秩式旌课最昭劝官师服此朝荣更当自竭可

屯田员外郎同判池州萧玠可都官员外郎余如故虞部员外郎知蔡州张用可比部员外郎余如故虞部员外郎知慈州刘余庆可比部员外郎余如故殿中丞同判镇戎军田士亨可国子博士制

勅国家顺天制官敷求民瘼量能授爵崇属时材具官某等吏事修明风迹沉厚允怀清约之节不持刻敝之文及此第劳所宜差赏勉图堪副无忝朕恩可

国子博士知资州高绘可虞部员外郎余如故太子中舍知福州吉田县事沈亢可殿中丞余如故制

勅具官某等庸蜀奥区瓯闽剧县往厘民政各奉官箴宜升建礼之曹式丞中御之府或旌美课以劝庶工可秘书丞同判延州刘讷可太常博士余如故太子中舍知扬州天长县事徐善

宝可殿中丞余如故殿中丞楚继芳可国子博士权御史台推直官殿中丞戴融可太常博士余如故著作佐郎充北宅诸院教授王式可秘书丞余如故制

勅具官某等或详晓政经或兼该学术服勤官次第课可嘉进秩朝闕宠章斯允更图来効以答茂恩可殿中丞同判单州窰处约可国子博士余如故太子中舍同判夔州李惟寅可殿中丞余如故制

勅具官某早引闕籍往貳郡条议法尚寬持心近厚特书课第并进官荣善抚蒸人以称朕意可

殿中丞新差同判鄂州令狐頌可国子博士余如故太子中舍新差通判洋州魏瓘可殿中丞余如故制

敕武昌江汉之冲沔阳边要之重今得闕彦往貳郡廷宜简前劳以劝来效具官令狐頌博文好古践履方廉具官魏瓘饰吏首公志尚清约并有名迹洽于风謡东庠儒雅之迁中御丞佐之选各钦厥职式副朝荣可殿中丞知河南府王屋县事吕荀可国子博士余如故太子中舍知青州千乘县事郭长吉可殿中丞余如故制

敕具官某等或引籍朝闕或飞荣储案出为宰字善抚黎蒸会课当迁推恩颇厚勉怀清约无忝甄陞可李遵可洮州刺史充保顺军节度使制

敕临洮奥区河湟近服久被朝化屏兹西陲乃眷忠臣俾分邦寄以尔某直方毓性英勇冠人倾金石之心仰尊於王略励雪霜之节屡效於忠规是用简自朕怀擢居戎阃槐庭视秩赐八柱之贵勲茅土疏封峻三品之荣宠兼官宪府颁赋爰田便繁渥恩度越伦等罄竭诚信保宁塞垣勉守令名副兹旌赏可

侍卫亲军马军都虞侯桂州管内观察使桂州刺史郝荣可荆州刺史充安国军节度观察留後加食邑五百户食实封二百户制

敕节制兵戎廉察藩翰并司留务允谓隆恩以尔具官某早着事功久司兵要威名克着功次当迁宜靡限於彝章俾特陞於显秩更宣忠力以副朝荣可

三司户部副使礼部郎中李及可吏部郎中充淮南转运使制

敕货食之府条政实繁久貳厥官宜有加宠以尔某等雅尚冲邃茂学兼该各以时材称兹剧职勤劳斯久甄序宜优俾超踐於台郎仍分总於漕事勉思竭虑以答异恩可

转运使并加阶勲制

敕国家荐有帝之号奉尊祖之名絜裸玉於太宫展钦紫於阳位诞均纯赐以宠能官以尔具官某等性尚平夷器能秀峙或振纓学馆茂发於懿文或引籍朝闕勤宣於干力而自总司漕职恪守官箴慎罚以寬能体好生之德笼材有道曾无刻下之烦庆赐方行阶勲第进无忘刺举以答宠甄可

右谏议大夫分司西京宋惟干等可中大夫进封开国伯加食邑制

敕国家荐号帝真展采郊庙眷惟有位咸霈鸿恩具官某等亮节清规懿文茂学或早游清贯秩亚於地官或屡展干才任隆於谏省或正握兰之秩或居象月之崇或分务於西都或奉身於私第皆着老成之德允昭静一之风属此均禧所宜疏宠增劳勲品益赋圭田暨加馭贵之阶并示优贤之典钦兹朝命更励乃诚可故知古州向光璫男守玠可银青光禄大夫国子祭酒兼监察御史武骑尉知古州军州事制

敕某汝世荷朝荣夙怀忠节特允边臣之请俾分列郡之权宠数有加国章斯重益输丹款以答隆恩可殿中丞李周士可太常博士通判秦州军州事余依旧制

敕某官某朕申命攸司鈎考羣治赏之小大必及於荣以尔清白承家儒雅饰吏历年滋久奏最居多奉常礼官汉唐重选以旌汝效足表异恩可

秘书丞张慎言可太常博士知房州制

敕某房陵旧区其地岩险授之以政尤在得人以尔学古効官懿文节政屡更年龠克守官箴善最居多考校惟允宜隆朝序俾奉藩条噫急吏缓民所至皆治正心洁已不令而从蚩蚩之氓皆朕赤子善加爱育无忝朝荣可

青州司马于佑之可青州长史制

敕某等早预官荣式貽公宪属兹寬宥咸与惟新勉膺迁予之恩更励省循之志可

鈎容直制撰应奉文字孙渥可将仕郎守卫州参军依旧祇应制

敕某环卫之师实有武乐汝早为其属造彼优辞颇积岁时未预官牒爰加散掾以赏厥劳更务竭心庸资献曲可

怀州武陟县尉张知至可光禄寺丞监西京洛河抽竹木务制

敕某朕得良弼参秉大鈎密议賛於帝谟清德溢於民听殊伦之宠予何吝焉宜从一尉之资擢预九卿之属仍移近任用表异恩可

陇州团练使知雄州高继勲可连州防御使捧日天武四厢都指挥使知瀛州军州事及管内劝农使充高阳关驻泊兵马钤辖制

敕三军之重四貉是威妙柬忠勤总司管府以尔具官某频繁事任详练边机武节方严兵谋沉密宜正防秋之任俾司扈蹕之师更务训齐称兹选授可

澧州进士王宥孚可守本州助教制

敕某刻心文史励节邱樊积有岁时达于闻听宜遂起家之望用敦养素之风祇事郡廷无忝朝命可

唐晋国公裴度五代孙坦可郑州助教制

敕某在昔乃祖实相有唐殲厥凶渠尽力王室岁月滋久功名愈高朕历选忠良想见风采爰访枢近得其後昆特霑朝恩以劝来者可

河阳中州习学究朱允修可将仕郎守孟州助教制

敕某等或学校诸生或乡闾着姓能散私廩赈彼饥民以财发身亦可嘉也具有赏典今举而行各荷宠荣无忘兢畏可

天雄军习三传王范可大名府文学制

敕某汝占籍侯藩潜心经业能以私廩佐于公家赈尔乡民济其艰食宜升郡塾以獎能诚更务矜修以永休宠可

故保平军节度使同中书门下平章事驸马都尉魏咸信可赠中书令制

敕国家褒崇密戚伤悼茂功中铉聯荣久参於眷倚西台正位早极於追旌具官某文武兼资箕裘济美受勲於怀衽稟命略於庭闈博通礼乐之原周知教化之本而自降殡鲁馆推轂汉坛出总藩条入陪鼎席勤王之业纪在太常体国之忠书於甲令方全飨用之福遽兴愍遗之哀特加右相之崇用极惟亲之赠英魂不昧尚服宠灵可

故守司空兼门下侍郎平章事王钦若可赠太师中书令制

敕国有元老遂阶成勲天乎难堪曾不愍遗特稽殊等之礼用章亏体之哀故具官某峻极降神生民总秀逮事先帝久服大僚勒封岱宗偃仆师节辅致鸿业格于皇穹肆予冲人灵承景命实赖尽之力绍隆累盛之基及兹云亡深用哀悼尚父维师之重周官内史之崇并刻密章以付幽窆死且不朽永贲忠魂可

故贈侍中楚昭輔贈中書令制

敕朕昨者荐玉真區觀風近甸眷興王之旧壤懷佐命之勲臣存則懋延賞之恩沒則峻追榮之典具官某端介自守沈鷺有謀早事先朝罄輸亮節嘗總司夫樞務實備竭於忠屬茲均慶之辰宜霈漏泉之澤西台重地右相崇資允極哀榮永昭幽窆可

甘州外甥回紇汗王伊魯格勒可特進懷寧順化汗王制

敕王者孝治萬方蓋重展親之典恩加羣后務昭崇德之矧在吾甥久綏遠略特舉褒優之命用伸眷倚之懷具官某茂烈傳家英威服衆智慮深邃詳練於武經志行直方克敦於臣節而自撫臨西夏屏翰中原允彰保塞之勲特茂勤王之業仍遠修於職貢是愈見於忠誠實簡朕心特隆朝獎進褒功之懿号兼馭貴之殊榮夙越等威用旌忠毅噫山河誓寵朕務在於推恩金石盟心爾無忘於報國終始一志以保令名可

西蕃首領帕克巴可銀青光祿大夫檢校國子祭酒兼監察御史武騎尉充本族軍主制

勅某性稟忠純志懷剛果來歸德化達朕听闻宜霈殊恩以旆忠效可

文莊集卷二

卷三

钦定四库全书

文庄集卷三 宋 夏竦 撰

制

李氏可才人制

勅某谦祗率礼端懿传芳自恪奉於宸闈实洊更於岁龠久播柔嘉之誉宜推甄獎之恩俾陞
嫔侍之荣用劝肃恭之德钦兹宠渥更励夙宵可

保大军节度使同中书门下平章事钱惟演妻清河郡夫人张氏可追封郇国夫人制

勅良佐奋庸极文武之隆器小君啓国显山河之盛仪非畴大功孰预兹典具官某妻方江起
咏照史知言珩璜节於步容苹藻恭於祭制生彼勲绪俾予柄臣斗极枢机尝对宣於密命文
昌将相实并应於列躔是增石窀之封益表鹊巢之德永宜象服以称徽章可

故信都郡王德彝妻东平郡夫人刘氏可追封萧国夫人制

勅国家追宠茂亲已疏於显爵褒崇内馈特举於徽章式推漏壤之恩用正从夫之典具官某
妻某氏秘仪景胄作合懿藩奉苹藻之多仪体山河之盛德披图问礼观史求箴鷄鸣宣辅佐
之勤鹊巢怀均壹之美降年不永遗范传芳宜开大国之封俾极小君之贵告於兹岁尚此宠
灵可

枢密副使工部侍郎任中正母万年县太君刘氏可进封太原郡太夫人制

勅朕询求硕德参总枢衡庶政实繁方深於倚赖母仪尤重宜示於褒崇以尔具官母氏端肃
成规雍和毓性择隣以处着慈训而有方鸣玉而朝率礼经而无怠诞生间杰副朕畴咨宜开
列郡之封用正小君之位有家之庆无尚於兹可

赠镇南军节度使王中正妻吴兴郡君施氏可特进封渤海郡夫人制

勅追旌懿德已隆兮阃之恩眷乃中闱宜正从夫之典具官王某妻某氏柔仪祗肃士族辉华
动遵鸣佩之音不失采蘋之职训内则之礼表式於外姻鉴鷄鸣之诗儆戒於君子成其高尚
之节享兹存没之荣方衔恤於帷堂特疏封於列郡钦膺徽序无怠乃诚可

侍卫亲军马军副指挥使保顺军节度使彭睿妻荥阳郡君郑氏可进封彭城郡夫人制

勅斋坛进律方增虎旅之权石窳疏荣宜表鹊巢之德具官某妻珩璜节步诗史照言作伋宝臣总司馭骑文昌着象甲令书忠实开大郡之封用示小君之号勉修闕则以称徽章可

枢密副使礼部侍郎晏殊妻江夏郡君孟氏可进封钜鹿郡夫人制

勅洪惟有帝梦賚忠贤式登用於近司宜宠褒於内饋具官某妻保阿承训图史照言法容润於山河体柔洁於苹藻伋予良弼翊我大猷近入奉於中参已载頒於象服宜举从夫之典更开列郡之荣勉荷宠章称兹徽序可

左谏议大夫参知政事王曾妻江夏郡君李氏可进封陇西郡夫人制

勅朕询求人望参掌国钧垂拱无爲方倚成於万务疏封示宠宜特异於中闺具官某妻某氏婉嫕流芳柔嘉毓性奉苹繁之职务极於齐庄照图史之规动遵於法度伋我良弼茂此嫔风属兹任德之辰宜举从夫之典小君进号近郡疏荣更肃柔仪副兹异渥可

给事参知政事张知白妻太原郡君王氏可进封琅邪郡夫人制

勅朕大庇怀生勤求至治爰得良弼方贊於近司乃眷中闺宜隆於徽序以尔具官某妻某氏谦祗率礼懿淑传芳稟嘉庆於华宗茂嫔风於鼎族克谨采繁之职不忘照史之规配我名臣貳此柄用夙夜儆戒谅增内助之劳汤沐疏封宜进小君之号更思辅佐以答恩荣可刑部侍郎参知政事陈彭年妻南阳郡君樊氏可进封南阳郡夫人制

勅朕穆卜忠贤协宣政治鸿钧播物方伋於嘉猷石窳疏荣宜隆於内饋以尔某官某妻某氏承徽令族观戒女图动止有严不变珩璜之节肃雍成裕克恭苹藻之仪伋我良臣成兹懿范宜正小君之位实开列郡之封更率谦祗副兹宠饰可

侍卫亲军步军副指挥使建武军节度使夏守贊妻进封郡夫人制【郡名原缺】

勅维彼元戎式建灵台之节眷兹内饋宜增石?之封具官某妻钟鼎传家山河着德采繁率职佩玉节音作伋将臣载司禁旅是举从夫之典特疏列郡之荣钦奉宠灵以称徽序可

河北都转运使枢密直学士工部侍郎李士衡妻安吉县君雷氏可进封冯翊郡君制

勅国家事天尊祖并荐鸿名裸鬯钦柴继成大庆方推恩於密侍宜流宠於闺门具官某妻某氏率礼公宫奉嫔冠族采繁承祭务极於齐庄观史照言动遵於法度辅佐君子爲我良臣入直枢庭出司漕事忠规载罄时誉弥优属方霈於纯禧宜特褒於内饋左冯奥壤进啓郡封更蹈谦祗以膺徽宠可

侍卫亲军步军副都指挥使建雄军节度观察留後管勾步军都指挥使公事彭睿妻北海郡

君郑氏可进封荥阳郡君制

勅礼成阳位泽浹区眷惟将帅之臣宜茂闺闈之宠以尔具官某妻某氏照言图史率礼保阿承祭公宫时中於四德作嫔茂族爲宪於六姻宜增列郡之封益表从夫之贵可

侍卫亲军马军副都指挥使彰德军节度观察留後管勾马军都指挥使公事杨崇勲亡母京兆郡太君王氏可特追封广陵郡太君制

勅穆卜阳郊式展钦柴之报眷惟良帅方深濡露之思是用追荣俾昭遗范以尔具官某母照言图史率礼保阿蹈苹蘩柔洁之规怀山河容润之德生兹令嗣爲朕宝臣勇略冠於六师威声震於四貉宜旌慈训进啓邑封永贲前奄尚兹休宠可

侍卫亲军步军副都指挥使建雄军节度观察留後管勾步军都指挥使公事彭睿亡母河间郡太君刘氏可特追封宣城郡太君制

勅薪樗盛节聿成飨帝之仪介胄纯臣宜重显亲之典具官某母承荣鼎族率治公宫特生材贤爲朕心膂敦诗书而讲艺比金石以输忠宜进郡封式昭慈范隆恩不朽永贲重泉可

左骐骥使入内都知澄州刺史张景宗母追封琅邪县太君王氏可追封冯翊县太君制

勅国家事天尊祖祫钦柴鉅典交修繁禧均被眷惟近职时乃信臣实怀顾复之慈宜峻追旌之典具官某母某氏秘仪素里垂范通门观史照言既族姻之爲宪断机喻学果似续之其昌生此令人际予亨会当腹心之重委茂忠孝之纯诚享斯列鼎之荣每极履霜之感鸿恩方霈遗范是褒进开大邑之封用极漏泉之宠贞?不昧尚服徽章可

诰

前泰寧军节度副使成昂可太府少卿致仕诰

勅某方州庶务重烦耆年朝命特行则有贰军之授引年请老则有致政之荣尔适被宠恩遂陈奏列从人之欲朕何吝焉俾贰春卿甚优常等荷兹渥綍勉自养颐可

尚书祠部郎中胡旦可银青光禄大夫行秘书少监致仕诰

勅国家大庇中区实右文治思皇多士粉泽时政况夫披艺该洽属言典要之臣故当宠异而优假之以尔具官某学必博经文皆约史早冠羣彦声华籍甚爰在西掖诏令敏贍久次於外朕常念之而疾疹所婴封奏来上辞语恳激览之依然特迁三品之阶仍副中秘之任服此荣宠勉自养颐可

东染院副使李继源可左领军卫将军致仕诰

勅李继源自列轩墀屡更事任载观封奏恳叙高年特迁环卫之资俾遂奉身之请服此荣宠勉自养颐可演州团练使右领军卫大将军李延渥可左卫大将军致仕诰

勅某宣力军和分荣使竹泊婴霜露之疾优以环卫之资而医砭未平岁华遽改爰達诚於封奏愿致政於公家且进秩於鷹扬俾奉身於私第荷兹休宠更务养颐可

诏

赐玉清昭应宫使王曾等诏

勅王曾等省所奏遇朕乾元节集闕宫道衆於明庆殿开启朝真礼念道場一月祝寿録功德疏二道上进事具悉卿等总司靖馆祇率真科以予诞育之辰罄乃斋明之恳启清场於琳殿宣秘蘊於琅函集福眇躬列诚封奏载惟忠恪尤切叹嘉故兹诏示想宜知悉

赐四宫观使王曾等诏

勅王曾等省所奏伏遇天祺节集闕宫道衆就紫微殿转念真经圣号祝寿写録到功德疏二道上进事具悉卿等恭司靖馆肃奉真仪属首夏之初辰实受符之纪节祇率焚修之衆广宣微妙之文罄乃精诚祝予凉德载惟爱戴弥切叹嘉故兹诏示想宜知悉

又

勅王曾等省所奏爲朕本命之辰就本命殿开启灵宝道場三昼夜设醮二百五十八分位及礼念真经圣号祝寿録功德疏一道上进事具悉卿等总司靖馆循举僊科属予元命之辰祇率栖真之士夙陈醮席刻诵宝文既善颂以咸周爰露章而列上眷惟忠恪良切叹嘉故兹诏示想宜知悉

赐诸路节察防团刺史诏【进长寧节功德疏】

卿素蘊忠规早隆朝寄属母仪之诞节修佛宝之胜因只贡疏文祝延寿纪副予孝爱深用叹嘉

赐河阳三城节度使夏守恩乞上寿不允诏

勅守恩省所奏爲乾元节乞朝覲事具悉卿久陟将坛式临边阃属朕诞生之日愿陪会见之班委师律以方严镇塞垣而尤重难徇封章之请但嘉爱戴之诚所请宜不允故兹诏示想宜知悉

赐河阳三城节度使并代州马步军都总管夏守恩乞归本任不允诏

勅守恩省所上表臣齿髮渐衰心诚稍惰乞垂圣念许覲阙庭傥未允朝天且乞归本任事具悉卿逮事先朝素怀方略并护诸将往镇边陲遽请覲於中都洎求还於本道倚威名而方重赖屏卫以尤深难徇所陈当体兹意所请宜不允故兹诏示想宜知悉

口宣

赐契丹回使副至班荆馆御筵口宣

有勅卿等远戒輶车来修邻好已成仪於岁聘方引导於都门宜赐宴筵宠兹行迈

都城门外赐保大军节度使同中书门下平章事钱惟演御筵口宣

有勅卿寄重藩垣任兼文武协兹良日将首征途宜赐饯筵式彰异礼今差某官某赐卿御筵想宜知悉赐契丹贺乾元节人使至班荆馆御筵口宣

有勅卿等肃将聘礼来庆诞辰言涉修涂式臻候馆特颁宴赐用示眷怀今差某官某赐卿等御筵想宜知悉班荆馆赐契丹贺长寧节使副御筵口宣

有勅卿等来奉隣欢肃将信币适臻都輦将锡宴筵眷惟涉远之勤用表示慈之礼

天雄军赐贺乾元节人使御筵口宣

有勅诞辰斯届隣好弥敦卿等远奉輶轩来修聘礼宜颁宴劳式表恩勤今差某官赐卿等御筵想宜知悉

赐宰臣王曾御筵口宣【玉清昭应宫礼上】

有勅畴咨台席昭事真祠惟置使以尤崇宜示慈而特异体兹注意谅洽多欢今差某官某赐卿等御筵想宜知悉

赐贺乾元节人使回至班荆馆御筵口宣

有勅卿等来修聘礼允备多仪属輶馭之言旋命都门而饮饯用申恩礼当体眷怀今差某官某赐卿等御筵想宜知悉

赐契丹贺乾元节使副回至雄州白沟驿御筵仍传宣抚问口宣

有勅卿等载涉归途已臻隣境冒兹炎燠谅叶安和特推慈惠之私用表恩勤之意今差某官某赐卿等御筵想宜知悉

赐契丹贺乾元节人使回至天雄军御筵口宣

有勅卿拭玉成仪展輶戒道属兹炎律载涉修岐特赐宴筵用昭厚意今差某官某赐卿等御筵想宜知悉赐契丹贺乾元节人使至瀛州御筵口宣

有勅卿等来庆诞辰聿成聘礼眷言旋轸将及隣封载惟戒路之勤宜举示慈之典今差某官某赐卿等御筵想宜知悉

就驿赐契丹贺乾元节人使朝辞御筵口宣

有勅卿等恭持信币已達隣欢将整轺车言旋驿道宜申宴赐用表眷怀今差殿头陈延達卿等御筵仍差枢密副使张士逊押伴想宜知悉

玉津园赐契丹贺乾元节人使弓箭御筵口宣

有勅卿等方居候馆属此暇辰特命射侯庶其观德仍举匪颁之式用昭眷异之恩已差枢密使武寧军节度使守司空检校太师兼侍中鲁国公曹利用押伴兼赐卿等弓箭御筵想宜知悉

赐枢密副使充祥源观使张士逊礼上御筵口宣

有勅卿任崇机轴职奉灵祠爰协良辰式颁公宴膺兹异礼谅洽多欢今差某官某赐卿等御筵想宜知悉

批答

赐枢密使曹利用等批答

省表具知翼翼名都肇基盛业煌煌灵物擢秀上冬卿等弥纶大猷感召嘉瑞既考祥於连叶乃称庆於露章将顺备形嘉叹无已

赐枢密使曹利用等批答

览表具知象日南都兴王吉壤属就盈之良月秀彼茁之灵芝爰示中枢共观嘉瑞遽传芳於史谍用称忭於宸闱言念恪恭岂忘叹尚

賜宰臣王曾以下批答【賀正月三日壽星見又於十二日再見】

省表具知履端巧歷淑氣起於東郊觀象靈台祥星耀於南極叶長寧之誕節實萬壽之元符
載省封章請書惇史允賴將明之德聿昭孝愛之誠其在嘆嘉無忘寤寐所賀知

賜宰臣王曾以下批答【賀壽星】

覽表具知木正司方疇人觀象告維南之暉烈昭有極之常符卿等協輔重雍燮和元化爰陳
瑞奏只達宸闈會逢誕育之期且獻壽齡之祝深爲愛戴尤切嘆嘉所賀知

賜樞密使曹利用等批答

省表具知淑氣布和啓夏正之首序祥星垂耀屬文母之誕辰允爲壽考之符實冠纏離之瑞
眷惟樞近只列奏封詳觀順美之辭深體愛親之志其於嘉尚寤寐增勤所賀知

賜樞密使曹利用等批答

賢表具知青律布和壽星垂象騰烈輝於南極符至治於中區卿等登翊鴻樞招來上瑞因靈
台之列奏由車府以露章援茂實於典經歸美祥於帷幄載嘉忠恪嘆尚寧忘所賀知

賜宰臣王曾以下批答【爲宣示南京芝草】

省表具知商丘畫壤鴻業肇基忽騰菌蠢之英實總紛紜之貺歸於布政之府表乃致治之功
遽推美於藐躬請傳芳於惇史載嘉忠恪宜徇奏陳

賜宰臣王曾以下批答

覽表具知維彼名都挺生靈卉詳觀圖牒之記最近天人之符卿等斟酌化源招來瑞命乃歸
功於帝室愿垂裕於圖書恭覽奏封良增愧尚

文莊集卷三

卷四

<集部,别集类,北宋建隆至靖康,文庄集>

钦定四库全书

文庄集卷四 宋 夏竦 撰表

贺老人星表

臣某言伏覩司天台奏老人星见於丙位者虚皇辅德垂象着明式瞻有烂之辉允叶无疆之壽照临所及庆拊惟深中贺伏惟皇帝陛下恭已临人斋居访道参侔开闔包举艺文体虞舜之蒸蒸绍宣於先宪法周文之翼翼对越於景灵授仙籙於禁门接真游於秘殿拥灵休而益茂布仁泽以惟寬函夏同文天人交际以是上穹凝命南极呈祥应春律以腾辉直天弧而绚彩寔睿算延洪之应及庶民康阜之休臣等幸遇昌期叨尘近职奉羲和之奏式表於殊祥考甘石之经弥增於率舞愿书青简永播鸿休恳至欣荣倍百伦等

贺昭应宫成表

臣某言良辰协吉恭馆告成凡在照临率同庆拊中贺伏惟尊位皇帝陛下寅威体道慈俭时中顺乾则以推仁奉先猷而追孝至诚以临亿兆洁志以奉灵只由是景命昭通真图申锡授太元之神策式集於皇仪侔曲密之仙都肇营於秘宇度鸿龐之久制鳩瓌异之伟材揆日出以辨方候定中而经始尊三清之正位载严真祖之庭范二后之睟仪爰设百灵之象罄钦崇之精意极神丽之宏规工有技而咸程物有珍而必效式属仲冬之序聿成大壮之功洒宸翰於银题繁禧沓至列荣班於金匱鸿庆方隆臣限守官曹恭刊帝籙顾莫陪於着位但俯积於欢心拊蹈之诚复异伦等

圣驾离京次日上第一表

臣某等言伏以奉祠方泽将奠於黄琮案御清畿初张於翠盖望徐銓之效驾历吉日以布和中谢恭惟尊位皇帝陛下膺千载之期御元气之辩总集瑞命已仪炳於灵篇咸秩无文遂躬修於毖祀矧省方之伊始谅储祉以无疆

第二表

臣某等言伏以百神率职方祀於地只五辂鸣鸾式遵於时迈中谢恭惟皇帝陛下绍休圣绪茂建民中兰叶献图已勒封於岱岳黄云覆鼎更昭荐於汾脰窃惟三辰之祈俯经千里之甸赖一人之有庆固万祥之毕臻

第三表

臣某等言今月二十六日入内侍省内侍高品谭元吉至伏蒙圣慈特传宣抚问者翠盖时迈将毖祀於汾阴使者星驰遽侧聆於天语俯炳丹青之旨如亲咫尺之顔中谢伏念臣某等幸遇会昌久尘禄位属省方於睢壤俾留镇於都畿虽比屋之民富庶而既教揭法之地桴鼓而不鸣岂兹禱昧之能治此浩穰之俗纵虔遵於训典庸莫副於倚毗恭惟皇帝陛下文致时雍德膺天庆静则合宫衢室垂衣裳而向明动则温洛荣河授龟龙之荐瑞已垂鸿於阳祉遂昭事於柔只盖致孝於两仪亦祈民之百谷垂圣心於覆露軫臣下之勤劳臣等未效涓尘特邀眷待王言所被与华袞而同褒睿旨初闻共阳春而交感誓罄匪躬之节上酬不报之恩

第四表

臣某等言伏以肃若旧典肇禋明神祀方泽之皇只望属车於驰道臣某等恭惟尊位皇帝陛下重光御极上圣膺图方展仪於河汾盖推功於天地风后陪乘羽卫由是纂严苍灵奉涂福祿以之攸降

第五表

臣某等言伏以毖祀高睢星言法驾将展省方之盛礼式符僉后之羣心中谢恭惟尊位皇帝陛下广覆尧仁升闻舜德答三灵之蕃祉宣二圣之重光伸孝享於郊丘奠皇只於冀壤既集礼神之馆伫闻宝鼎之歌王度之贞式如金而如玉天道下济固为龙以为光臣等迹远陪銮心驰就列帝车爰止莫参禹会之期日驭将施但效封人之祝

第六表

臣某等言伏以五坛巡祭昭事於汾睢万国骏奔同趋於禹会方恪居於官次莫亲奉於天顔中谢恭惟尊位皇帝陛下诞受丕图钦承宝命致美黻冕而九庙储休洁粢牲粢而百神荐祉帝德广运咸苏僉后之人皇泽如春载洽怀生之类

第七表

臣某等言伏以国家振举阙文讲求縟礼顺蒲人之望幸严汾水之亲祠中谢恭惟尊位皇帝陛下建极临民握图听政方鸣鸾於军道将奠玉於嘉坛谅洋溢於讴歌允飞腾於英茂惟天为大如日之升

第八表

臣某等言恭以国家顺河汾之僉后奠牲帛於柔只诸侯陈执玉之仪多士结望云之愿中谢恭惟尊位皇帝陛下明德恤祀展仪省方历览於图书之渊斋级於静冥之馆大车弭节方严

穆穆之容祥风绕坛将降穰穰之福臣某等恪居官次驰恋皇轩除地给薪莫诣侍祠之列拖绅鸣佩深怀拱极之心

第九表

臣某等言得行在进奏官状报伏承今月某日皇帝躬祀汾阴礼毕者无文咸秩表上圣之寅恭明德惟馨见至诚之昭荐崇龐鸿之大业举旷絶之盛仪降及飞沈率同欢忭中谢臣某等闻乾知太始而坤作成物混元之大化也父事於天而母事於地圣王之至孝也洪惟厚载职彼资生配刚健於运行兆陰灵之正位成周之奠大泽由八变而出地只炎汉之祠素汾升五坛而集神祝若时能事属在昌期恭惟尊位皇帝陛下睿览穆清至仁渊静挺克明之睿德绍累洽之鸿基帝项依仁奉若於天道唐尧稽古於变其时雍声明文物之相宣雍容揄扬而咸若六府既正九叙惟歌向以穹昊储休图书锡瑞奉符展案既增乔岳之封勒崇垂鸿聿大丕天之律已推功於上帝肃昭事於柔只兰台时英稽四巡而献颂蒲津黎老愿万乘而启行丹诏往俞近臣先置圣心?巩而戒事灵物纷纶而降祥若影响之相随明天人之交际及清畿时迈法驾星陈华盖承辰见惠风之和畅黼帷藻野属春日之载阳泊升坛荐鬯之辰受嘉气霏云之应百灵效祉岂惟三烛之神光万祥毕臻不独登歌於宝鼎懿铄度越於千古休烈烜赫於四方岂啻井耕田而不知固跂行喙息而遂性巍巍荡荡谅无得而名穆穆皇皇知大事在祀臣等亲逢旦暮仰颂形容酆宫会朝莫陪於法从明堂上壽即奉於宸严

第十表

臣某等言伏以汾曲禋严已毕奠琮之礼方明朝会式陈班瑞之仪就尧日以驰诚祈舜聪而逖听中谢恭惟尊位皇帝陛下体乾立极抱一居尊齐律度於万殊宝慈俭於六合声教所暨盈溢於天区德泽滂流汪洋於海外故得荐膺景贶纷委嘉符岱岳增封答三灵之蕃祉汉唐亲祀收百代之阙文拥社稷之神休显帝王之能事今者嘉坛袭吉燿燎升烟九壤蒸黎仰太阳之委照上都耆艾俟鸣跸以倾心皇猷已冠於古今令誉更孚於夷夏伏冀皇帝陛下早回仙仗归格神京治庶彙之由庚俾普天之同庆臣等保厘京邑夙夜公家尽瘁之心敢忘於丹臆拱辰之列伫望於清光

第十一表

臣某等言伏以礼崇盥鬯既颁赐於汾祠孝享园陵适亲临於洛邑矧王畿之接畛迎制跸以倾心中谢恭惟尊位皇帝陛下怀柔百神同风三代圣德加乎海内文教溢於天区邇人采诗已供於夜诵诸侯执玉率庆於会朝惟象魏之在瞻谅中外之禔福

第十二表

臣某等言伏以斋礼神之馆已升燎於高雎登颂只之堂方回輿於近甸望轩游而俯迓瞻尧日以欢心中谢恭惟尊位皇帝陛下精洁明禋讲求逸礼素汾奠玉已昭鱼舞之祥温洛受图

更显凤銮之瑞矧休应之纷委属诏蹕以言旋式宴清宫洽皇恩於恺乐受厘宣室凝帝道於穆清

第十三表

臣某等言伏以鸣玉銮於汾水已殫报本之诚荫华盖於洛都载展奉先之孝仰鸿仪之备举肃警卫以言旋中谢恭惟尊位皇帝陛下敷佑四方交修百祀为人祈谷验膏泽於丰年采诗观风知民耕於帝力日驭方回於黄道涂歌先洽於清畿

第十四表

臣某等言伏以礼盛亲祠膺三灵之睠命庆成归格顺万国之欢心仰日驭以非遥望翠华而窃忭中谢恭惟尊位皇帝陛下恢崇鸿业宣畅皇猷尚质贵诚已肇禋於泰折布德行惠复统政於明堂授时之令惟新及物之恩弥广

第十五表

臣某等言伏以方鼎升庖神既歆於嘉享徐銮弭驭诏以示於先期瞻有穆之睟容祝无疆之景福中谢恭惟尊位皇帝陛下丕承圣绪光阐帝图唐尧稽古而聪明高阳洁诚而祭祀察事地之礼嘉生由是均和修颂只之书丰泽以之大赉式臻神贶允集天休臣等目注回輿心驰迎蹕望六龙之御莫及於前驱率百辟之班竚朝於近甸

第十六表

臣某等言今月二十五日龙图阁待制查道至伏蒙圣慈以车驾还都特赐诏书抚问者伏以方泽奠琮礼成於严祀皇輿复路诏示於先期辱圣睠之便蕃走欢声於遐迩中谢恭惟尊位皇帝陛下重光御极执象临民怀生被广育之仁制礼尽大中之道济河之日尧承刻玉之文祀汾之初汉膺宝鼎之瑞既协坤灵之荐祉俄瞻日驭以言旋臣叨荷宸衷俾司留务无涓尘之微效有葵藿之至诚荐沐鸿慈俯颁芝检捧觴泉之緑字赍大帝之宝文闻效驾於和鸾固踊跃之无极藏赐书於巾篋实荣耀以难偕

第十七表

臣某等言伏以瑞气宵凝既显坤灵之荐祉欢声雷动式当诏蹕之言旋凡属照临悉同欢忭中谢恭惟尊位皇帝陛下帝德广运人文化成顺万物由庚之宜考太一省方之义抚空桑之瑟已降於地只清甸师之畿即回於云?俯兹青陆更拥鸿休

贺五色云见表

臣言伏审今月二十日圣驾至真源县有五色云见者徐銓夙驾总驷於名区卿霭晨敷流晖於紫宙繁禧允集率舞咸同窃以云物凝祥简编攸载帝鸿纪事肇采於官名虞舜协华賡歌於瑞命盖太和之积粹畴至德以呈符仰属昌期愈彰丕应恭惟尊位皇帝陛下参侔邃古率育黎蒸绍隆累洽之基懋建太寧之化宝图候日丕显於灵猷真祖在天茂昭於道荫式举朝修之礼弥臻顾諟之祥当恭馆之斋心有非烟之效祉纷纶绚采散赤水之余霞焕衍腾文凝吉云之晓露聳羣瞻而庆异垂信史以弥芳昭万壽之遐龄迪三清之景佑某限居【原缺二字】宜从鸾旗仰听殊尤唯增拚蹈

贺奉祀太清宫礼毕表

臣某言伏觀诏书今月某日奉祀太清宫礼毕者茂典庆成繁禧允集照临所暨拚蹈咸同中贺伏惟皇帝陛下寅畏时中惠和逮下丕承帝籙绍举於皇仪钦奉真游躬闻於道海爰徇黎元之请?趋仁圣之祠达精意於萧茅荐鸿名於宝册诞受聿怀之福允济雍熙茂昭善贷之仁永宣至治

贺尊皇太后表

臣某言伏奉某月日勅尊太上皇后为皇太后恩覃日下欢动天中中贺伏以皇太后坤德合符阴灵表庆化光宫职道赞国风伏惟皇帝陛下仁圣宅心文明恭已尊承孝理严奉慈颜献宝綬於内朝宣玉册於中禁彰明后顺知陛下就养之勤表正母仪见陛下归安之盛万国所系四方是刑台臣之悬愿既申品物之欢心斯洽

乾元节贺表

臣某言伏以鸿明代照累洽於昌辰景贶游彰亲逢於诞节书文所混欢拚攸同中贺恭以皇帝陛下渊德日跻圣猷天纵灵承道荫只率貽谋后箴诵之广涂游文章之奥府驱除微孽分判於忠邪遴柬材臣将明於宪度总周文之九德兼虞舜之大功絶俗来同縣区作义後天献祝咸庆於兹辰拂石迎祥永隆於大业臣顷持荷橐久事龙潜贫贱难工孤寒寡援百城剖竹徒倾就日之心万壽称觴莫预在庭之列精?禱愿倍百常钧

又

臣某言伏以燕禴启庆神告昌期虹渚流光天垂景贶当真圣挺生之旦乃炎灵累盛之朝罄率土以倾心效华封而献壽臣诚欢诚拚顿首顿首伏惟尊位皇帝陛下躬膺骏命寅御宝图纂隆三后之基冠映百王之表属正阳之纪月迺甲观之诞辰庆叶千龄欢同万?臣攀鳞最旧补衮非工方守钥於留都阻称觴於秘殿帝晖有赫遥倾就日之瞻宸算无疆仰极後天之祝

贺立皇后表

臣某言伏覩进奏院状报今月十八日立皇后准勅十一月三日行册礼者?组撰仪谷圭展礼统宸闱而有典佐景命以无疆凡在怀生不胜大庆中贺臣闻易赞坤厚所以配乾元诗咏关雎所以始王化涂山登而翼夏妣汭降而兴虞盖资内助之勤式尽外刑之美恭惟体天法道仁明孝德皇帝陛下眇观振古为宪太宁追孝祖宗务严於裸献观象日月用广於照临考坠鸞之美祥卜倪天之异表金螭玉检载严徽册之容瑶爵褱衣将助太宫之荐臣久违表着远守封圻委佩在廷莫陪於螯拚凝云入户但仰於輦仪欣戴之诚倍万伦等

贺皇子庆诞表

臣某言伏审今月五日皇子庆诞者吹铜御和郊媒毓粹受震主器宗庙增威凡预?生罔不载跃中贺伏惟皇帝陛下德泽渗漉神施丹青軫上仁於九围袭太和於万有时应积累之祚仰寤炽昌之符瑞启前星祥开一日华封祝圣协多子之善辞太姒续徽腾百男之嘉颂臣方司謫戍远驻边屯阻陪辨色之趋上庆重辉之美

贺皇太子授官表

臣某言进奏院状报伏审皇子授守太尉忠正军节度等使封壽国公者宸闱集祉天序飞荣书轨所臻人只交庆中贺伏以帝出万物苍震效乎长男龙见大辰前星表乎世子盖知有国之重莫越元良之尊允属熙辰宜崇钜典伏以皇帝陛下眷徽百度为宪太宁忠厚以布淳风吉蠲以修明祀万国被泽溥洽於至和三圣在天日监於盛治以是璿源濬发真荫诞章義御吉祥天枝毓粹洪惟初载之美丕显徇齐之姿仰尊宗庙之威颇缓景风之拜是稽礼制肇启国藩袭惟帝之旧封承曼壽之遐祚瑞发文象欢震华戎凡在有生率同大賚臣出司边警方谨秋防阻诣太微之朝仰庆少阳之德望云载跃倍万欣荣

留司官吏贺表

臣某等言伏覩进奏院状报十二月三日册婉容张氏为贵妃者扬命外朝讲仪中禁褻进天妃之贵顺承宸极之尊盛典惟行羣生共庆臣等诚欢诚拚顿首顿首恭惟尊位皇帝陛下穆清居位濬哲在躬舜治无为禹功不伐既格太宁之化允资内辅之贤申勅柄臣奉将册礼分采章於六服冠品列於九嫔弥增轩曜之光实亚坤仪之位用宣阴教永助帝猷臣等幸预通班获逢熙运仰宫闱之多庆倾海?以同欢

文庄集卷四

卷五

钦定四库全书

文庄集卷五 宋 夏竦 撰

谢加承奉郎表

臣某言今月某日进奏院递到勅牒一道伏蒙圣恩加臣承奉郎仍放朝谢者告瑞公朝获三篇之秘牒覃恩庶品降五色之乾文宠耀踰涯惊惶失次中谢臣闻魏开宸历阶号爰分唐据帝图散官攸设所以旁昭等列下懋勲庸在我良时郁爲华贯恭惟尊位皇帝陛下元功无际灵贶荐臻馭万国以器名励羣臣以禄位苟非久历年所克荷官常则命不虚行恩无妄受如臣者学惭多士官忝属丞素微横草之功获被如春之泽敢不盟心白水誓节青松请纓当効於终童求试愿希於贾傅庶倾尘露上答苍穹

谢直集贤院表

臣某言蒙恩以本官直集贤院者北门禁省给青简以试言东观直庐降紫泥而命职莫追假人之器【案此语疑用左传惟器与名不可以假人之意但与莫追二字文义乖隔考宋文监器作刺又与假人二字文义不贯疑当作侯人之刺用诗曹风意以自谦则与莫追二字文义相属矣但无别本可证姑仍其旧】式彰遇主之荣中谢窃以承明设待诏之官实汉朝之芳润丽正啓修书之院乃唐氏之英华濬图书之渊敞龙凤之署自非弓裘继世章句名家通授義畀舛之灵篇闲书笏珥彤之故事则何以继成康之嘉颂考宣武之懿文陪法从於甘泉奉宸游於属玉况当圣日允属简求如臣者学不传经文非近史青青子佩虽见刺於劳心翹翹错薪亦滥期於刈楚筮仕胜衣之岁荐名象日之畿方博带以观光遽墨衰而沿牒寻遇国家诞敷尺诏增广六科方栖枳以徒劳遂上封而自荐始交文於螭苑旋试可於鼎司亟趋文石之墀遂忝延英之问击轅度曲敢望於九成萦带分墉俄登於百雉陞象河之属吏佐分虎之方州爰受代於瓜时遂归朝於幄坐典陈陈之粟閱山委之丘区从九九之车总丝棼之案牒暨还衡雕壤舍爵太宫既谐引籍於金闺将佐于蕃於熊轼又虑沉迷簿领废坠简编负公朝振举之科辜圣主详延之意遂杀青而奏技果出紉以推恩禁林俾试於雕虫书殿遽令其抱槩闕上帝之册府目眩星辰登道家之蓬山足践云气奉长者之余论与先生而并行分直石渠地接严更之宇纵观金匱门连着作之廷载惟蝼螳之躯莫报乾坤之赐恭惟尊位皇帝陛下事寝庙以至孝奉灵祇而克诚流鸿藻於絶垠铄景炎於往号以文明而行健体柔克以居高纵观唐汉之大猷备举黄虞之故实睿藻和而六同韵天章丽而五佐飞恢崇务广於斯文獎擢不遗於小道遂使至孤之士获尘非次之恩东陵遽拟於西山羔裘遂登于狐腋歌卫风而合雅鬻齐紫而杂良诚当洁节於素丝敢不盟心於白水益三思而出话弥九复以穷经永永渊惕励之心奉日月照临之鉴庶追素餐之谤仰酬明主之知媿惧所深兢惶不已

谢赐昭应宫判官兼赐章服表

臣某言伏蒙圣慈赐臣勅牒一道官告一通授臣本官充玉清昭应宫判官兼面赐章服者钦承恩渥俯积兢荣中谢伏念臣幸会亨期最爲孤进自先臣之尽节始治牒以效官折腰初佐於县庭承乏遽参於州幕偶六科之选士趋三府以试言擿埴索涂误攀於僞轨以蠡测海谬对於圣题才叨上第之荣遂忝属丞之命佐凭熊於丹峤属抚玉於云封亟迁秩於芸局旋侍祠於汾壤由是升华仙室引籍於朝闈较艺禁林振纓於学馆践宣猷之近省备太史之後陈紬百氏之格言缉两朝之大典兼总金刀之务俄尘諫诤之司顾蹇蹇以无闻但容容而自愧矧属旧臣居守特预於宾从元辅朝修爰司於奏记念践馱而无取荷束擢以尤深书言动於宸幄总勾稽於会府夙宵一志虽坚金石之诚尸素十年莫着涓尘之效此者伏遇尊位皇帝陛下?尊道奥祇若灵心奉三境之真文绍九重之圣绪体密都之神丽扩恭馆之穆清地有宝以皆呈山有材而必効聿举庆成之典载严置使之规皆眷命于公台式尊崇於宪度仍分衆职肃奉攸司载惟倅事之臣允极当朝之选尤谓博求鸿硕登用僞良岂意颺蒙误膺推择授之纶綍宠以金章锵瑶珮於绛台复希於仙品奉藁书于紫馆絶异於慈荣重念臣本以孤平素无伎艺微近亲可以仰给乏先畴可以取资唯赖鸿私妄阶荣路爰从乐育以跂甄陞未有秋毫不由帝力天高地厚固报德以无阶恩重命轻誓竭心而有素敢不服勤官次祇事真庭永坚寅畏之心上副钦崇之旨

谢知制诰表

臣某言伏奉制命特授臣尚书礼部员外郎知制诰依旧玉清昭应宫判官同修起居注同管勾景灵宫公事散官勲赐如故者紫微秘掖获书命之司丹屏仪曹叨奏疏之任仍兼载笔尚赞殊庭恩獎特隆心顔无措中谢窃惟二帝常典以雅奥成章两汉训辞以深厚爲体上则记言于国史次则视草于台郎洎当涂应期建通事之职至天监在御有知诰之名命令攸资选授殊重李唐之盛良士继登奉四禁于鎖闥总六曹于画省在夫掌画尤耸殊荣况属昌辰弥彰异举自非丰规茂识瓌质明姿则何以藻润帝谟晖华时望如臣者文非近雅材不逮人幸对昌期最爲单绪而自諫科赐问学馆升华抱槩宣猷类芳尘于往躅汗青史阁颂鸿烈于先朝由是分校钱刀佐司筦籥遂叨书于言动仍迁掌于勾稽日就月将仅成于注记朱出墨入才辨于纲条伏遇国家观象密都奉符恭馆适庆成而置使俄倅事以叨荣矧属壽域欢康飈輿降格广太微之宪度昭事于九皇集灞会之威神钦崇于五镇遽膺明命并预攸司夫何琐微有此荣庆敢不斋心紫府竭虑清场仰体精衷肃祈灵鉴然而颺愚难变震栗倍增未尝苟悦于人亦无微忤于物重念臣艺文至陋资地素寒衡门本乏于官荣先父止供于传遽在臣所得揣分已多虽白首以不迁亦甘心而知幸岂谓尊位皇帝陛下仁深昭远道极包荒濬发鸿慈主张孤进特预传于密旨俾先示于试期仍亲择于近题用曲全于懵学拔之羣萃置在清华玷郎选而甚优?王言而斯重暨兼修于衆职实茂耸于荣观特達之恩固无阶而可报恳激之意惟刻骨以自铭誓当更効涓埃倍怀霜雪秦官汉表博考于旧仪周诰汤盘铺观于大要或奉真之暂暇即温故以求新庶逃彼已之讥上答非常之遇

谢授户部员外郎表

臣某官伏蒙圣恩特授臣尚书户部员外郎依前玉清昭应宫判官知制诰同修起居注同管

勾景灵宫会灵观公事散官勲赐如故者兰台约史本无尘雾之劳画省分曹遽进版图之职顾增华於清禁实交悸於营魂中谢伏念臣胄绪单平艺文浅陋而自父兄早世族属无依弱冠自公但冀寒宗之有後遗孤聚首止期寸禄以代耕岂意逢辰复踰始望翠绣华组早齿於贵游秘掖殊庭继尘於清选既容容而昧进故碌碌以无闻乃者伏遇国家颁次先猷总裁大法获编联於注记或是正於疑譌最处後陈莫効覃研之力尤爲未至曾微岁月之勤讎期金匱之成书将预龙纶之第赏况臣近叨殊渥盖未踰时犹夕惕之不遑何宠灵之敢覬岂谓云雷播泽靡间於寒蒺日月分晖遂通於幽隙载循非次实媿徽荣此盖尊位皇帝陛下昭式孝思俯矜微物察其遇主本不因人申九重特達之知开四海孤寒之望靡拘常牒务表鸿慈敢不更励疲顽仰承丹采心非木石固举族以衔恩命等蜂蛾奈无阶而报国唯誓夙宵之志仰禴煮育之仁

谢授礼部郎中诸宫观充职表

臣某言伏蒙圣恩特授臣尚书礼部郎中依前知制诰同修起居注充玉清昭应宫判官同管勾景灵宫会灵观公事散官勲赐如故者恭馆庆成方均于大賚严宸第赏猥及於无功闻命已还揣躬增惕中谢伏念臣材质弩下门绪寒微金马之中乏葭莩之薄援赤墀之右无蟠木之先容不谓逢辰误尘清选殊庭倅事已聳於荣观禁掖代言更踰於始望每励省循之志深怀止足之风此者伏遇国家挺尊祖之鸿徽载崇於秘宇奉奠方之明德并进於严祠既成大壮之规载洽斯干之咏爰曲覃於茂典特进秩于中仪揆景僦工既非於已力偷荣昧宠实媿於朝伦此盖皇帝陛下乐育羣材主张公道怜其遇主本不由人曲持特達之恩用慰单平之望天高地厚欲报德以何阶蘖苦冰寒但誓心而有素周章感惧倍百常钧

洪州到任谢上表

臣某言伏奉敕命就差知洪州军州事已於今月十三日到任礼上乞者孤宦沉迷累更於郡组隆恩横贷复序於藩条惟忖已还心顏靡措中谢伏念臣天资浅薄门绪倅寒幸会先朝误阶荣次?遵孝治冒触寬科戚既自诒孽将安追仰赖天宥尚剖左符继典五城连更七祀眩瞽滯疾圈养自安孤苦余生零丁滋甚徒索累鍾之奉絶无横草之勤窃自忧惟合从澄汰岂谓伏遇尊位皇帝陛下哀矜庶品保有羣生躬奋乾刚肃持威柄恩丰漏日贯余党於铜山礼重斋心登正人於玉铉剗除弊杵崇起化枢事无善而不旌材有长而毕录而复勤哀旧物澄洗非辜太和洽於萌生广照钧於隙穴岂意伤摧之末猥叨擦拭之私载锡装钱就升州寄矧兹洪井实表重江襟带七闽咽喉百粤使驿相系军府是司地望颇雄禄廩殊厚敢不重苏肝胆罢怯於虚弦再整筋骸渐图於实效永期糜溃少谢恫矜

辞起复知制诰表

臣某言伏奉制命授臣起复知制诰者私门凶咎余喘仅存上圣矜嗟隆恩猥及闻命交悸悼心靡图臣某诚哀诚惧顿首顿首伏念臣门地素寒父兄早世而自操觚学舍结绶仕途唯母与臣更相爲命遽遭靡依之痛何胜罔极之哀而况宅兆未安杯圈如在蒙慈幼之育凡四十

一年报免怀之恩止二十七月岂可遽亡【原本缺二字】亟袭衣纓自顾余生弥增钜痛伏望圣慈念臣执丧日短报国日长许事几筵俾终祥禫永将躯命仰答恩私

谢起复知制诰表

臣某言伏奉制命特授臣起复尚书户部郎中知制诰散官勲封赐如故者哀纪称情未报劬劳之德宸慈念旧忽膺图任之恩祇【原本缺一字】靡从拜受增惕中谢伏念臣如弦谬直伺兔本愚不知巧宦之方但罄朴忠之节先皇帝怜其若是愍以至孤俾入事于龙潜实久趋于鹤禁单平寡援间隙易乘由是出守一麾连更六郡九年电击万里火驰层阙连云止期于梦到残骸吊影敢冀于生还适属咎积私门悲纏陟屺爰扶旅櫟远泛重江四海无家指都畿而归葬六亲聚首顾生计之屡空毁灭未能饥寒是迫岂谓伏遇尊位皇帝陛下体天育物爱下延慈记藩邸之旧臣轸穆清之圣虑特颁赉赠俯恤哀惻方祇奉于几筵且渐营于宅兆冀终丧制式罄孝思岂谓皇帝陛下再轸宸衷俯矜微物特降夺情之命曲乖牵复之文戴重施以何胜还故栖而增感谨当书心誓节刻骨铭肌

谢皇太后表

臣某言伏受制命特授臣起复尚书户部郎中知制诰散官勲封赐如故者寝苦垓室方深在疚之哀书赞紫垣遽奉夺情之诏仰膺恩典靡措心顏中谢伏念臣胄绪单平艺文浅陋孤寒寡援唯尽力于公家愚直无谋但竭忠于臣节果由譴累出守藩条奔走九年既无于替日艰难六郡敢望于生还爰属偏亲奄终暮齿式遵治命归葬近畿绕繚风波偶存于性命零丁贱累共迫于饥寒命也奈何计将安出岂谓伏遇尊位皇太后陛下圣谟天纵睿照神资洞察下情勤哀庶物念臣夙怀忠鯁仰事先朝知臣粗守行藏絕无资计特颁赉布大济穷涂方卜葬襄冀终祥禫岂谓皇太后陛下复排羣议再简慈衷俾起授于前官仍靡容于固让枯骨复肉死灰重燃爲恩甚明举族难报敢不盟心金石励志雪霜上酬覆载之私永誓蜂蛾之命

辞加食邑表

终堂之戚卜吉祭於在辰连土之封荷彝章而锡宠拊哀怀而靡置拜嘉命以不遑臣某诚哀诚恳顿首顿首伏念臣迹本羈孤器惟隘薄误被先朝之眷早陪禁闥之游更领左符粤在外服比丁衅罫俯就丧居幸逢继照之期曲沛夺情之命复司言之旧职参进牋於近庭仰懿律之惟几敷迓猷而靡告继升枢府预赞前筹年谷既升方及外除之变树风不止弥怀欲养之悲敢谓伏蒙尊位皇太后陛下特轸慈襟曲推渥霈因祥事禫安之始锡采邑陪敦之荣念制爵之匪私矧谢朝之有典冀获收於涣汗庶无重於忝踰然念臣猥以刍微甫参柄任导夙夜之基命虽昧善谋承日月之末光已惊荣会矧兹名物之设厥有等数之差苟曲泽之荐沾亦多言之可畏实祈惟睿终赐保全干冒鸿慈臣无任祈天沥恳激切之至谨奉表陈谢以闻臣某诚惶诚恳顿首顿首谨言

颍州到任谢上表

臣某言伏奉勅命差知颍州军州事已於今月十二日到任礼上讫亲见吏民奉宣温诏因望京阙乍远迺顔中谢伏念臣世本孤平业惟文史先臣尽节以忠孝传家真庙临轩以贤良中选洎职数十次效官三十年四海宪章编研稍备三朝史策颂次继成虽无可纪之勤颇励当官之志而自一陪钧轴再贰枢廷固欲罄述远猷极陈时弊不惟事有深隐於衆意之罕同而又职在参裨终大议之难立但务爱君竭志率职励精辑理军防裁处边奏详言正色?检於武臣潜计密谋周旋於兵要耻捷给口吻以揣摩上心耻结托朋游以自爲身计七周年龠三奉禮燔顾每速於人言亦屡移於病告既无显着之效大妨贤儁之涂赖圣鉴之保全得列城之息偃陪京匪远庇族颇优此盖伏遇尊位皇帝陛下念臣早奉龙姿最爲旧物怜臣逮事先帝本是常材惟天地之至仁务从善贷记犬马之前效特出异恩省过以还感极以泣乍遥旒宸方事米盐保庇之慈虽君亲之是赖孤危之迹誓寒苦以自强冀集涓尘少裨海岳

青州到任谢上表

臣某言昨奉勅差知青州充青淄等州军安抚使已於今月十四日到任赴上讫中降命书外迁侯服循涯已过铭骨殊深臣某诚感诚忤顿首顿首伏念臣本以孤生早尘上禄不自揆度强学古人之爲何意遭逢遂蒙圣主之眷尽忠图报无意他防勤劳一事以未成谗嫉万端而已构盖朝伦之共弃独天造以曲全假以清资付之近郡始再更於年龠遄就改於州麾素称表海之雄乃重抚封之寄事权增大职业夥繁此盖伏遇尊位皇帝陛下至德兼容大明回照察臣本由直道知臣不避衆嫌每闻譖毁之辞常加庇护之意矧推异渥复委要藩臣方知向之所存果非失道死而後已誓不改爲永坚愚愍之心上答睿明之施

辞刑部尚书表

臣某言今月二十一日三班借职张守珍到州伏蒙圣慈赐臣勅牒官诰各一道特授臣刑部尚书依旧知青州军州事并赐诏书示谕者当官无状议赏误加载自裁循交深震慄臣某中谢伏念臣本惟孤进逮事先朝分珪组以虽多絶涓尘之可录昨以东秦旧壤仍岁阻饥猥奉诏函就分使指既营救之无策徒奔走以爲劳所赖天意照临圣谟优假漕陕右之粟西下於洪流泛淮甸之舟东浮於沧海出良嫌於御府祷嘉雨于灵祠经费已充丰润斯洽至若賑恤贫窶禁止寇攘靡敢便宜动皆奏列唯奉行於宸旨用祇率於列城虽岁谷之遽登每简书而是畏岂期误宠猥及无功僥开多幸之涂恐滋流竞之俗重念臣名品已峻齿髮甚踈毗益无闻满盈甚惧岂可暂驱使领便欲侥求贪朝廷之功以爲吏课掠州郡之効上冒主恩何待人言固当自讼伏望尊位皇帝陛下俯哀旧物深軫上仁终始大恩保全孤迹听辍出纶之命俾安据蒞之忧如此则赏必及劳有光於国体臣无虚授免瀆於朝经斯实至诚固非文饰言瞻白水可誓丹衷陨越战兢期于得请

谢授刑部尚书表

臣某言今月二十六日进奏院递到诏书一道赐臣伏蒙圣慈以臣上表蒙恩授刑部尚书乞辍恩命宜不允者宠章非次成命不回祇受以还震惶无措中谢伏念臣人品至下天幸何多

先皇初置諫科臣獨膺聖選陛下未離宮閣臣首事龍潛自以介拙無徒孤寒多難歷職二十
許任效官三十余年奔走四方周旋二府入朝見嫉固自古以難逃直道而行信安身之不易
非先皇始終顧遇難立於危踪非陛下特達保全豈至於今日報國絕一毫之效竊祿有五鼎
之殮敢以無功更當誤賞每露章之至懇終睿旨之靡俞跪啓詔封交流愧汗此蓋伏遇體天
法道仁明孝德皇帝陛下識臣面目察臣肺腑罔恤人言動由宸斷上則極至公之道昭勸於
勤勞下則推求舊之仁敦厚於風化望九重而正遠恨萬死以莫贖敢不更勵朴忠俯安疲
勉圖來效少答大恩

南京到任謝上表

臣某言祇荷寵私伏增感懼中謝竊念臣孤寒多難憊直無謀頃事先朝首依東禁當內合始
開之日識太陽初出之輝抱槩和鉛皆真皇之密命解衣推食盡陛下之深恩式屬重熙仰緣
前愛猥蒙誤寵擢預近司再貳樞衡一陪台鼎粗守爲臣之節載傾許國之忠三侍禮燔七
周年龠羣情寡合多咎其非才天鑑察微獨憐于守拙獲均勞逸盡出保全一昨海表荐飢
飛蜚肆孽猥分使指宣布朝恩上賴皇威獲清寇劇道途至遠嘆旅病以無醫歲月屢遷望
威顏而莫睹方欲少須涼景拜露章求換郡於京西冀遵途于闕下一對當陽之法坐少
陳東夏之遠圖退就蕃宣永藏頑鄙豈謂伏遇尊位皇帝陛下俯憐際遇尚記姓名遽錫
詔函俾司留府惟茲劇地實首庶邦佳氣春陵夙比真人之里青雲洛水聿興王者之
都漕引江吳控制淮海使驛系路雖駟馬之畢迎廚膳闕供顧雙鷄之不腆況臣筋骸
疲繭踪跡單危懼速多言上孤親選愿察守株之拙更寬如地之容永誓糜捐上躋
覆露

文庄集卷五

卷六

钦定四库全书

文庄集卷六 宋 夏竦 撰表

辞户部尚书表

臣某言今月十九日马递到府伏蒙圣恩赐臣诰勅各一道特授臣行户部尚书散官勲封赐食邑如故者私悃再倾宠章误及俯循涯分罔措心顏臣某中谢伏念臣获事两朝仅逾三纪中外更践微半策以堪书阅阅自闕絕寸长之可録幸尹兴王之壤矧兼主餽之司地望甚高朝委尤重但以孟诸之泽旧为卑湿之乡向夏载涂方冬未燥年光若是疾势可虞是以甫及再朞恭布危歎冀更爽垵以避郁蒸盖仰恋於清宸望苟延於余喘岂期天造特改地官载惧凿墉甚於据蒺藜若乃庆恩均霈久次例迁伏限通规所宜祇授而况臣东秦进秩岁始三周睢水书劳官无一善岂可因求僻左邀取恩荣倡侥幸之风坏廉耻之俗輿情共骇自讼何安伏惟尊位皇帝陛下旰食九重励精百度梦卜得於贤佐物色访於良臣方精汰於否臧难误施於爵赏伏望陛下识臣面目察臣肺膺念臣稍涉艺文粗知廉耻乞却还於旧职誓永守於别都庶当责实之朝免累及劳之典天鉴在上公议盈庭傥不由衷必有余戮实非矫节愿赐允俞

谢授户部尚书表

臣某言今月六日进奏院递到诏书一道伏蒙圣慈以臣上表为授户部尚书乞且守旧官宜不允者涣汗难收丝言俯谕仰惧再三之瀆实增俯僂之慙中谢伏念臣本以诸生滥登制举始踰弱冠即玷清流倖事殊廷代言禁掖解衣推食辱先帝之深恩抱槩和铅首东朝之盛选入奉温文之德实逢初载之先进锐疾颠宠深多忌一辞雄戟日倾思幄之心六换鱼符孰有赐环之请伏遇尊位皇帝陛下膺宝命祇拥萝图总揽大猷博寻旧物锡飞毫於神笔推夺礼於墨衰遽还复於故栖骤参陪於庶政织縑难比对来宠以凌兢垂翅自伤听虚弦而陨越曲承大庇得守外藩东夏往绥方摇於寇窃南都内徙交湊於川涂以倖狠之姿处繁剧之地还顏方隔浮议易乘所赖陛下察臣朴忠哀臣孤立委曲明辨特達保全非赖此恩岂至今日百生尽节九族捐躯细自忖量亦难报塞岂可因祈便郡更冒殊荣载念满盈甚於焦灼是以露章车府布歎宸闈出綍已行虽莫回於成命誓心至确固可质於明只祇被宠私伏增感泣此盖陛下育材示惠图旧敦风广真庙之遗恩丰壽藩之前爱力排羣议特简圣衷将俯劝於事劳故靡循於功次敢不竭心文札况瘁米盐益励志於桑榆庶酬恩於萤雪

谢授三司使表

臣某言伏奉制命特授臣依前行户部尚书充三司使加食邑五百户食实封貳百户散官勲如故者宠章非次衍食有加载省愚冥实难堪克臣诚惶诚惧顿首顿首伏念臣本由孤进仰

会先朝掌右掖之赞书奉西清之密议真宗皇帝以臣父没身报国最为忠义之家以臣制策登科粗识古今之体察臣持循少过知臣忧畏小心当陛下潜跃之初首东朝陪侍之选解衣推食最承逮下之私抱槩和銚日奉重晖之德适属先皇违豫邪党擅权六改郡符十更年會但尽心於民政已絕望於朝廷伏遇尊位皇帝陛下出震承祧大明继照猥思旧物远锡飞毫出自宸衷擢阶近辅当母后临朝之际是权臣恶直之时更互留身婉转腾谤以漂山之巨力害如线之寒踪非仰赖於保全已坐成於糜碎又念全齐旧壤连岁荐饥贼盗纵横公私困竭臣猥分使指躬按海壖昼夜兼行须鬓皓白未容殫於薄効已先着於流言此际若非陛下断自不疑察其非实力垂明辨几至倾危以兹重叠之恩未申分寸之报旋玷南都之寄式当万国之冲水陆往还是非薮泽上酬厚禄唯竭节於公家曾忤柄臣已灰心於荣路止期退伏远避猜嫌岂谓陛下深恻上仁力排羣议念臣孤寒多难察臣介直无徒简自圣衷擢司邦计破朝端之旧党极天下之至公祇受以还感极以泣惟当恭勤夙夜策励疲弩直剖肺肝少裨听览誓毕桑榆之景仰酬天地之仁

永兴谢上表

臣某言伏奉制命特授臣奉宁军节度使知永兴军府事驻泊马步军都总管泾原秦凤路安抚使已於今月二十四日於本府上讫斋坛授受拜丽泽以惟优外阍临戎望严宸而乍远寄付尤重感惧增深中谢伏念臣出自孤生误登制举既踰弱冠亟掌训词抱槩和铅首预东朝之选解衣推食独承先帝之知但以赋性至愚立身多难权臣共恶衆口争非自揣单危分甘捐弃伏遇尊位皇帝陛下睿明继体仁愍象天軫黄屋之非心记青宫之旧物擢参台鼎再贰枢衡耻巧宦以依人惟朴忠而自竭仰蒙圣庇获守近藩旋以东夏抚宁南郡居守三腰郡组六换年华每怀襁被之行敢有赐环之望岂谓陛下力排輿议召委计司爰当视事之初便主摘山之议羣情向背密疏纵横非上赖於辨明已立成於祸患寻以禋燔下诏赏赉均恩为国尽忠虽明神之可谅入朝见嫉鉴前世以堪惊尝因赐对之间曾沥由衷之恳候终考秩傥议迁除只祈都省之便安或预译塲之润色庶未从乎外补得时望於还顔况臣自忝三司始踰八月惟自勤於本局敢辄预於朝经实无片言偶侵上位矧伤弓之最甚惟敛翼之是图岂意羌戎妄为狂孽不期公论误及非才遽由端右之资擢授元戎之寄臣出於将种粗读兵铃誓竭素心仰瞻异遇其如边防务重京阙路遥动繫帷幄之指踪方遂藩篱之固圉敢祈睿哲更赐主张俾成横草之功免累知臣之德

辞忠武军节度使表

今月臣男都官员外郎安期到州伏蒙圣慈加食邑七百户实封二百户余如故者关塞宿兵未殲於寇剧藩垣进律遽改於旌麾自揣非功岂当虚受臣某中谢伏念猥承人乏擢总戎昭再徙军屯连更岁會千金空费曾无拙速之谋数级未闻方省不能之请甘从吏议以避仕途敢谓恩章亟迁土宇虎符龙节韬郤室以生辉画戟油幢拥和门而增壮然念兵氛尚盛外寇未攘田井惊骚藩篱震荡戎亭在望交湊於边烽斋钺空存未涂於衅血岂宜爵号更及庸常此盖伏遇皇帝陛下任人不疑虚已求旧镇以大体责其成功猖獗异谋固非一日仓皇守备恐失万全乞更赐於主张庶渐图於翦灭南标铜柱素尚於伏波西出玉关敢希於定远臣无

任感天荷圣激切屏营之至

谢授忠武军节度使表

臣某言伏奉诏书以臣所上表为蒙恩授忠武军节度使乞且守旧官所乞宜不允即断来奏者西遐叛寇未即灵诛南夏奥区误更宠爵恭膺诏版倍积腴颜中谢臣闻汉疏国封由远近为别唐制藩郡以雄望为差逮於本朝参用前典量次舍之遐迩当功伐之重轻非服大劳岂容妄受如臣者比从省禁出守边屯虽乃志厉怀霜力图尽敌终以不知兵革空骛岁时讫无毫纖称报恩效衆讪以之盆涌名论由是顿衰方乞避藏式蔽蹇短岂谓遽颁制命进改使麾骤加衍食之荣横窃景风之拜此盖伏遇皇帝陛下勤哀旧物深恻上仁念戍役之甚艰愍关防之云远特访攸司之议曲推外徙之恩责实靡闻无功增诮重念保边之吏再岁以还或换郡进资或书劳加秩兵卫职重止拜廉车勲威地尊但加留务臣独涓刚日诞告外廷再刻印章重制旌节向则卿省并授是以近而为荣今则边琐递迁矧以远而为贵超踰侔匹度越等威不谓孤生冒此殊渥敢不根心励下毕力防秋冀效涓埃仰酬覆载

泾州谢上表

臣某言伏奉诏勅就差知泾州充泾原秦凤路沿边经略安抚使兼泾原路驻泊马步军都总管已於今月二十八日到任上乞祇奉选抡岂容胜任中谢伏念臣孤寒多难愚拙自持効官三十八年临民十有一郡尽心报国竭节首公未尝自叙勤劳苟求进用亦不潛附朋党暗作阶缘谗害至多颠危不一上则赖於圣世次则恃於明神况已及於暮龄誓不移於前节伏遇尊位皇帝陛下照齐日月道法乾坤辨臣子之忠邪察人情之真伪念臣逮事先帝早奉东朝知臣静退不争察臣朴忠有素向者一离枢府六换年华陛下召自别京俾司邦计主摘山之议较射策之文定赏给之科设禋燔之备动畏入朝之嫉始踰半岁之期陛下察臣孤危力垂保庇属填边琐付以戎昭矧关辅之不宁泊边防之少警臣兼程到职庶事创图奏牍实繁盖欲细闻於圣听当官不顾实恐有误於朝廷所赖陛下远布宸聪力排羣议念臣不为身计务答主恩罢陝右之剧繁付回中之边要诏函俯降使駟继临过赐抚存俾安惊惕惟临泾之孤垒控西鄙之要津贼境不遥烽烟在望戎事久废楼櫓未完敢不特创规模渐加绥葺又须陈请上浼穆清乞倍赐於主张庶早平於猖獗皇天后土实鉴丹诚

永兴再任谢上表

臣某言伏奉勅命就差充陝西路马步军都总管兼经略安抚沿边招讨等使知永兴军府事已於六月三十日到任上乞全秦地重分陝寄隆私窃忧惟实难堪副中谢臣闻忠臣结绶之始皆欲图报於本朝义士执卷之初尽期有济於当世或则封陲彻警拳勇无自试之涂或则贵要盈廷寒素絕干进之望鹄鸾困於羈縻琬琰屈於煨尘眇观旧编代有遗叹如臣者偶承人乏出守军屯蠹戾逋诛暄凉改序连营谓之无勇邻城诮其不能数级未辰何顏自处方祈退伏式避劳能岂谓遇尊位皇帝陛下图制国经召还枢辅尽以虎臣之职付兹虫篆之材俾摠轅下之勤得宣闕外之力上可以建明策虑裨宗社之谋下可以进退否臧拯生灵之患而

况并护诸道总摄列城要骈组於关中宾从动色陈赐金於庑下营府相趋渐倚办於官联或有成於天幸是则追芳往躅获有竹帛之藏没齿九泉免均粪壤之朽敢不愈张胆势益厉忠戎警遂清儆擅三明之猛恩章尽在岂徒七宝之严惟冀庙朝更寬籌策察持边之至重念善後之为难庶毕铖分上醺覆焘

谢授宣徽使表

臣某言今月某日男开封府推官都官员外郎安期到府蒙恩赐臣制告勅牒各一道授臣依前官充宣徽南院使者外廷敷告近禁升荣赏异及劳感深沦髓中谢伏念臣性慚弦直识本榆瞑列仕籍者四十年贰柄臣者十五载一昨六周东夏式荷於赐环八月计廷未遑於温席委朱墨而提剑褫绅佩以属鞬急骛泰关旋驱陇道四迁岁景顾蓐寝以何尝三徙军屯恨胁疽之犹滞宿师有日斂策未辰岂图不次之恩误拜宣猷之宠入则奉承眷旨切近中枢出则统率戎昭总临诸道铖分罔效名数太优鸡忘失旦之愆灰有再然之异此盖伏遇尊位皇帝陛下记怜遭遇矜愍孤寒推东禁之旧恩缘先朝之雅意念臣省闈并命止攀满岁之郎边琐例迁独授远藩之节天心不忍圣造曲成置於五府之後陈俾参四贵之荣缀武非将表诚乏於雄棱形在目中誓平於蠹戾庶阶尘雾仰谢照临

宣徽使乞换文资表

臣某言伏以文武设官所以审材用小大制禄所以辨勤劳仰属昌辰岂容冒处中谢伏念臣本由孤进幸会先朝以直谅备史官以忠实供言职斥奸邪之党比减土木之修营以至外补江湖内迁藩郡剷除疾苦赈济困穷累奉诏函继褒吏课爰遇圣神出震聪哲宣慈靡替前恩远颁宸翰旋由起夺入备论思力抗强臣独持公议建明国制修定刑章无一事曲佞宫闈无一言陰结朋援帘箔之内睿听熟闻台阁之间正人具悉而自出司东夏六换流年救海岱之饥生存之命亿计平黄腫之盜安帖之城十余爰就改於别都亦粗修於治迹以是景佑四祀进掌版图宝元初年召计金谷摘山奏格齐议论於参差备物成郊均赏賚於丰约适属羌豪背惠武旅乏人遽董戎旃出填边琐谋皆凿空事必创图躬冒险艰常废寢食若乃再临鄴霸继戍泾鄜新断川涂肇营楼雉申严守备耻较力於干戈禁止交关谋困贼於岁月图上之策非一采择之言亦多天地谅臣尽忠吏民哀臣竭节但以数奇罕偶衆少难分不能饮马河源灌烽陇坻徒施固圉之力克谨边防讫无汗马之勲能书竹帛逮终更而罢使叨善止以作藩勤远至劳积忧成疾是以恳祈内徙求复故栖虽叨中豫之迁尚冒西陲之职露章屡上温诏未从坐窃隆名又兹踰岁惟经费之犹广享厚禄以何安矧夫四贵之崇实均三事之重当任英武入宣圣猷至乃六纛启行万钱赋禄自非勇冠行阵功载旗常眇覩前闻未始虚授詎容铅槩之士久私玉帐之荣此者幸遇尊位皇帝陛下茂育时材哀怜旧物责实羣后分治九围伏乞念臣忝事两朝早更二府罄输忠款恪奉官箴在公四十余年夙宵匪懈临民一十五郡勤拙粗施冀以省闕前资计廷旧职近司印绶两镇节旄改职文资俾安危恳誓竭当官之效仰酬从欲之恩

再乞换文资表

臣某言伏奉诏书以臣所上表乞换文资宜不允者优容过分震悸交怀中谢伏以四贵联华礼次丞弼十连作长宠冠公侯若乃擢从武人迁自勇爵固当永锡车服遐佩印章其或素隶简编蚤备台阁偶缘戎警特假将麾逮於终更理当罢使而况幅员至广经费实繁亭候虽虚租更尚阙在於供拟犹减旧常岂容具臣横叨大禄矧惟五府实总百工象枢极之运行系宗社之轻重端朝体国礼絶地尊詎宜州郡之寮妄厕岩廊之列伏望尊位皇帝陛下矜怜衰老軫恤孤寒念一介之常材有千载之荣遇録四方奔走之效记两朝夙夜之勤采子方哀马之言形汉宣求剑之意倍推恩於前奏俾归节於上台幸及桑榆之陰再登鵷鹭之序傥或全於危仆誓更竭於朴忠俯俛彷徨期於得请

蔡州到任谢上表

臣某言伏奉敕命就差臣判蔡州军州事仍放朝辞取便路发赴本任臣已於今月二十七日到任上乞垂死余息特许生还陪京近藩仍容卧治再造之赐九殒莫酬中谢伏念臣谬忝艺文妄干仕进先帝临轩之际独首於六科陛下出阁之初最先於诸傅每惟际会敢不矜修其如资性庸驽赋分蹇薄虽圣君哀其拙直而多士嫉其愚狂出入两朝当官者四十余载周旋万里典民者一十五城夙夜在公固鬼神之可谅进退维谷实孤子之无依向者才入三司始踰数月属河湟旅拒关辅绎骚首得戎麾往填边琐肇谋器备创设模经始关防召募军旅居则饮食无暇出则昼夜兼行本先固圉之谋冀成长轡之馭其如衆议罕合物论易喧朝廷切於平凶搢绅惜其殫费所以未能出师陇首饮马河源尽阬豺狼高筑京观以致对分将阨远戍边屯冒暑中乾饮泉内冷药石无效支体将堕惟力疾以临戎誓捐生而报主式逢例罢就委藩条方敢自陈仰句余喘伏遇尊位皇帝陛下仁深念旧德务含生察三载之勤劳辨多言之虚实念臣年光老暮知臣踪迹单危深恻上仁俾迁中豫京畿颇近医诊易逢倘或稍驻桑榆未填沟壑誓竭狗马之效仰答天地之私

乞守旧官表

右臣昨再上章乞守旧官就移汝蔡养疾今蒙圣恩移判蔡州已奉表上称谢乞所有乞守旧官仍奉朝请者三岁终更方求医於便郡万钱赋禄尚均宠於近司深自忧惟不遑启处伏念臣出於寒绪幸会昌期偶缘岁月之劳叨尘文武之任向以小羌旅拒西鄙绎骚特换戎旆往填边琐仰贪误选曾不固辞谓天幸可以横逢谓战功可以妄立岁时骛过诛纳无闻仰荷寬恩止从例罢爰以饮泉感疾伏枕踰时形容已枯支体将废命轻恩重既报国之未终福过灾生固徼荣之可畏以是恳祈旧职望改近藩冀遂养颐或苏朽瘁伏遇尊位皇帝陛下曲矜老暮深愍勤劳中豫名区已更於郡组元戎重器尚假於戎麾矧乃宣徽使名所以表率诸将节制禄赐所以宴犒三军当羌事之未平顾经费之滋广若以拓边之宠犹私卧治之臣深屈至公岂容虚受望并俞於前请庶克济於余年梦寐旁徨仰俟开可

谢诏书不允辞宣徽使表

臣某言今月十八日进奏院递到诏书一道伏蒙圣慈以臣三上章乞守旧官不允者爰下并

容尚假无功之宠量能自媿弥增有腴之顔拜受以还局蹐无地中谢伏念臣早缘薄技偶预辞林仰际休明宠重文雅以是沈迷篆刻况瘁简编寤寐经营止於粉墨出入闻见不及弓刀岂意误列将坛谬分阃寄三周岁律四改军屯备历艰危躬践劳苦怅靡逢於天幸莫少振於军声罔养终更忧虞成疾荐叨藩卫之便获遂药石之求曲被矜怜已难胜负岂容更参四贵犹长十连隳多士廉退之风索县官经给之费以是屡罄肝胆乞上印章仰干本朝安敢饰避伏遇尊位皇帝陛下记怜旧物勤恤外徭不责犬马之劳务推雨露之施特颁诏检靡辍使麾渗漉之恩诚为优絶支离之质何以遑宁敢不励志米盐精心医砭抚养贫细安聚荒饥冀策励於阬残用仰禱於烹育

许州到任谢上表

臣某言伏奉敕命差赴本任已於今月二十五日上讫出自保全伏增感泣中谢窃念臣人品弩下世绪寒微事国四十余年临民十有五郡言行无取政化靡闻空度岁时动成嗤鄙策励之心徒切顽闇之稟莫移昨以守塞终更濒涯养疾求还使节未奉俞音蒙降侍医仅存残喘日慙厚禄内讼无功安敢萌心更欲希进不图驿传猥赐诏函职尚备於藩侯地又遥於边琐敢稽召节预述无能爰夙驾以载驱将晨趋而沥款有烦公议合真简书一则臣尝假戎麾首图羌事三周岁龠四改军屯惟竭虑以保边靡出师而尽敌一则臣久从外补罕遇时英或但采於风闻未深谅於衷悃分甘弃置式儆庸愚伏遇尊位皇帝陛下察臣朴忠念臣孤苦以遽申於避逊况匪自於干祈力辨羣言听还本任望宸居而至迹瞻幄座以无由伤弦之感自多沦髓之恩难叙都门迴首雨涕交颐敢不深务省循永怀兢畏更励当官之节上酬衰老之仁

亳州到任谢上表

臣某言蒙恩就差知亳州军州事今月十四日到任上讫辞繁就逸冀保於阽危竭志服劳未禱於再造深自惟忖讵敢遑宁中谢伏念臣少失父兄长无师友守简编之陈迹昧台阁之远猷谓委分可以率天真谓直躬可以成世务独任蹇短动至颠跻一昨罢使洛郊卧疾蒲阪恳祈中豫就访良医幸残喘之偶存实荣望之都絶不图星使忽降芝函敢稽就日之行仰废出纶之旨岂谓都门始入遽隔中参诏字未乾亟还本任矧惟旧许实首近藩控亭传之要途多衣纓之贵胄漂流之际间隙易乘在涣汗之尚还何飞条之难集式属近臣致政便郡濒淮老物可憎傥知慙而匿迹来宠将授或观过以回心爰布恳私上祈开可伏遇尊位皇帝陛下哀矜恤下仁愍好生察羣议之忠邪照物情之真伪幽枉斯達务昭责实之明穷蹙可怜特徇换州之请载惟涡涣之下适当湟潦之余敢不修谨米盐缮完图籍励伤摧之晚节苏震悸之羈魂永罄涓诚仰禱大庇

河中府到任谢上表

臣某言伏奉敕命就差判河中军府事今月二十日到任上讫十月期归将终远戍三年更尽获改列城仰荷保全敢忘循省中谢伏念臣本阶平进逮事两朝攀仕涂者四十春陪时政者十五祀大劳虽阙薄效粗陈向者六载徂东班条盖久八月主计座席未遑亟自省闡出分将

鉞军屯屡改年龠四迁徙历险艰未殲蠹戾又以谋皆凿空事或创图利远效迟望轻人嫉多言坳涌沮议丛兴每下列章尚寬薄责弥深策厉冀塞矜容由是寢食外亏精爽中耗毒炭熏目双瞳斗昏边风切肌两臂将废惧戎谍之闚间常力疾以治戎夙夜在勤人神可谅矧惟阃外之得失实系天下之安危一毫或差九殒焉赎倖便文而自卫固罔上以非忠况复功名良繫运命援臂不耦必难立於乃勳虎颈飞行将有待於来者是以常布危歎冀解剧权伏遇尊位皇帝陛下从欲象天宝慈体道恤繇戍之忧苦察臣下之艰辛因分道以更张俾班条而得请穿杨善止虽谢於前劳有杖勤归差安於衆听僥逢鍼艾之益稍扶蒲柳之衰誓属右橐重趋絕塞庶成来效仰答大恩

文庄集卷六

卷七

<集部,别集类,北宋建隆至靖康,文庄集>

钦定四库全书

文庄集卷七 宋 夏竦 撰表

辞资政殿大学士表

臣某言某月日三班奉职龔显到州伏蒙圣慈赐臣勅牒一道官诰一道特授臣依前本官充资政殿大学士及准中书劄子奉圣旨赐臣对衣金带鞍辔马恩惟图旧讎可妄要赏异及劳岂容虚受?瞻出綈愧极无颜臣某诚惶诚惧顿首顿首伏念臣本以孤生误攀隼轨顷由端右出总戎机儒服治兵易腾於衆诽丹诚许国惟誓於明只而继戍涇鄜尝婴疾疴昼则力疾备寇夜则丸艾灼肤矧夫义重於生固知死且不朽委形骸於马革等性命於鸿毛初无片言曾句余喘终更三岁罢守一麾视事踰时中乾卧病累旬不起九殒是滨况乃萍津计居内地别无戎羌之御遂祈汝蔡之迁蒙降侍医奔捄沈瘵傥未邻於万鬼誓复守於三边昨兹春夏之交获逢鍼石之益尚闻外警临遣辅臣爰拜露章请陪边候但以于蕃之僻左未知异俗之怀来遽烦恩私过极褒宠伏见朝廷待下赏劝从宜臣子立身出处有礼病不任事则请告营医疾既有瘳则首公复业顾无可録是惟厥常又念前春常膺诏召官有拥旄之重礼无俟驾之行不敢豫拜封章力避贤路泊还旧许方悞颡蒙职巨寡谋累国伤体尚蒙寛宥特遣简书而况今者窃处近城宴安自逸求备边琐跬步未前愧不恳辞更贪异渥固当自讼何待人言此者伏遇尊位皇帝陛下躬奋乾刚布昭天律濬发明诏洞判忠邪登用正人曷分枉直陶唐之聖谗说虞舜之察迕言臣方敢备列危衷乞还成命庶获全於晚节更免遂於前非讎敢饰情自昧丹臆

谢授资政殿大学士表

臣某言今月十二日准枢密院马通到诏书一道以臣所上表为曾乞边任蒙除资政殿大学士及有恩赐不敢当受陈乞宜不允者人言可畏实骇虚弦天听盖高靡收涣汗载揆官阙罔措心颜臣某中谢洪惟先朝经始内殿敞访对之地谨备问之员择人甚艰其职多阙臣齿发空悴绩效靡章遭值圣时叨窃荣禄出入宰属尘点皇僚岂宜无功更冒清选而况向者边书挿羽逻骑具装秦陇威兵鄴雍谋帅本朝以年辈最旧勤拙粗施擢於计廷付以戎警力小负重自见甚明就约辞危臣节安在内惟策励誓首险艰四改师屯三周岁龔羌事图上必深料於安危王师务全敢挑取於功誉终更罢戍感疾营医方句近城以捄沈瘵不图诏检促覲宸居权輿?工据岗敢辨季长辞锐饰貌难申省咎归涂逃形近邑监司按其粟错都鄙陈於平条诗会余蚬之文简凝含酖之墨寓趾泮水之罇侧身攢羽之冲分沈死灰趣毕残喘伏遇尊位皇帝陛下宣精百度观象九乾刚健博临高明广照深惟累洽之盛宜杜私党之萌或宗社阻凭干於衆愤则郊庙对越契於神欢中发芝函诞告鵷序开俊止之路戒浇竞之风俾弃私於

所天当首公於王室三辰增焕六合顿清人只阜安道路鼓舞复我醲化曾不崇朝臣方敢自上疾瘳请还边候亟瞻出綍之训翻诒跃冶之羞况夫媿汗未乾悸胆犹破苟遂非於覆辙必腾诮於刑章爰叙忧兢祈寝褒进仰承日月之鉴俯哀蝼蚁之心延登正人访逮公论谅臣孤立察臣前劳观靡盬之篇采勤归之义诏驭幸之柄图劝後之恩敦谕至明拜授斯宠忠臣共慰旅魄交宁期报德於万分誓捐生於百世感极惟涕陈叙罔周

河南府到任谢上表

臣某言伏奉制命差判河南府兼西京留守司公事已於今月九日到任讫偏陪五府历守三都逢辰之荣旷古无并臣中谢伏念臣人品至下门绪素寒孤苦一生迺遭万状岁月迈如邮置筋力困於泥涂谋已弗臧举世诒诮往岁召於中豫入长近枢昧逊让於时贤实格废於成命间者起自涡曲往帅晋阳尝面对於还顔乞永从於外补惧以危迹复玷清时不图再岁之间忽补鼎司之阙遽迁右府逮越周星掌虎旅之伍符宣龙韬之圣略虽矍铄而自勉终遭坎以难工朝多正人日有公议烦黄屋之掩蔽辱丹扆之辨明备位无顔谢负何地而况钜贤让爵哲士辞荣晏然自安亦不知避尚赖伏遇尊位皇帝陛下察臣闇懦止是颡愚愍臣忧劳别无他累力排时论敷告外廷进秩师垣均劳洛邑俾其休逸保乃衰残息偃无营冀渐生於髀肉责望不及将永脱於风波誓输乐职之勤仰酬衰老之惠瞻望阙廷臣无任戴天荷圣激切屏营之至谨奉表称谢以闻臣某诚荣诚感顿首顿首

孟州到任谢上表

臣某言伏奉勅命赴孟州本任於今月二十一日上讫班寬大之诏存拊吏民歌中和之诗祇见参佐勉厉衰朽少谢矜怜臣某中谢伏念臣蚤以诸生幸逢清世勤劳四纪险易一生筋力困於泥涂髀骨消於亭隧迄无纖效纪在本朝昨以窃位枢廷均劳洛宅宠冠九域地首三都太高则危暴长将折而况驿传至远迎劳尤艰属本镇之缺官爰露章而布欵伏遇尊位皇帝陛下宝慈体道求旧敦仁老马力殫靡忘前效伤禽胆破知避虚弦特允三城之求俾纾四体之责然而据河山之要控魏晋之冲古多重兵代委名将方今租庾至阙闾里尤虚浮梁有蹇焚之役长堤乏为榘之备生以馭福实銜佚老之恩职思其忧敢怠匪躬之节唯期夙夜仰答照临

辞兼侍中表

臣某言今月十八日侄女壻权国子监主簿高直温到西京伏蒙圣慈赐臣制命官诰特授臣依前检校太师兼侍中仍加食邑实封者拥旄本镇已俯遂於厥诚参乘东台实迴踰於初望闻命震恐啓处不遑臣某中谢伏念臣近以衰残迫於迎劳求还近便之任止避旷殆之愆向或所镇并边郡将无阙稍涉毫芒之幸敢萌迁徙之求况在前章备陈丹款实无一字少饰片言其或外叙衰残内怀希凯有腴顔面更睹士流设追典刑当有阴罚不图圣眷遽锡制恩若以念旧均慈则臣累官已重若以畴劳第赏则臣宣力无成伏况朝廷要官挑取者难久天下公议巧避者愈彰恍诒有隧之深讥将累挂车之善止此者伏遇尊位皇帝陛下慎徽百度精

汰庶官赏必计功禄无废德矧乃纳言之重当图汗马之劳岂容蒲柳之衰更窃金貂之赐伏望陛下哀臣介拙愍臣忧危特寝异恩听守前职垂皤皤之发庶无责於时贤伐坎坎之轮免有妨於来宠誓坚廉让之节仰霽覆露之仁

谢授兼侍中表

臣某言今月二十二日伏奉诏命以臣所上表蒙恩特授检校太师兼侍中乞守旧官不许辞者芝函睿札谕旨於十行蝉冕要官升华於一品顾兹非据何但若惊臣某中谢伏以参乘东台纳言内幄访延密政出纳大猷制爵至崇兼官尤重或以尊懿戚或以馭战功近世儒臣罕得超授如臣者材品至下门地素寒偶阶片文仰会先圣冠制策之亲选预东禁之精求夜寐夙兴更中外者四纪兴利除害贯险易而一心若乃赈汉右饿殍四十五万余口屏江西巫覡一千三百余家屡承纶綍之褒颇首循良之寄伏遇尊位皇帝陛下重晖继照求旧推恩擢参垂箔之近班实罄戴君之亮节泊乃海隅聚寇责以救宁关内治兵委之经画偶无愆素粗得全师圣念畴劳召长枢府又以并汾帅满起付戎钲赵魏卒骄就更边戍载严军律稍契前筹宸慈记功命亚台席终以久供外役罕接隼游靡恤寸长务责全德一则以聚羌远塞是臣尽敌无能一则以雨土中都乃臣治边所召乞放还於旧任泊追返於涣恩上赖陛下谅臣朴忠愍臣穷蹇力排羣议特追简书断自穆清裁於宥密伤摧自悼矍铄何堪寻蒙进秩师垣均劳洛宅而又密涂交会右族盛强寘法未能废刑岂敢至有诬其加箠构以凭輿复赖保全为臣辩雪再念臣本镇甚迓郡将未除爰叙艰危求换繁剧得请之日被赐已深如脱樊笼顿解繯锁岂谓游颁明制误赏无功补外常仪靡谐於三让发中温诏促预於七车敢不策励羸軀矜持晚节毕桑榆之暮齿答穹厚之鸿私

谢男安期加职表

臣某言伏蒙圣慈特授臣男安期龙图阁直学士知渭州者公朝误赏私室叨荣言念衰迟岂胜感慰臣某中谢伏念臣族本寒绪世无显官阙食采之旧封坠满羸之前训属公台慎选之日实縉绅精汰之辰黄发何堪视维师之隆器贱息无算迁内阁之近僚继承优假之私岂殊前後之拜此盖伏遇尊位皇帝陛下睿明稽古信厚记功以为造武公之衣周王所以旌善职封降戎之檄汉帝所以显忠臣断自土心疏兹宠爵赏延於世既横被於恩荣义重於生誓共期於报塞

文庄集卷七

卷八

钦定四库全书

文庄集卷八 宋 夏竦 撰表

谢天庆节御筵表

臣某言元符纪序恭馆示慈仰戴恩荣俯增震栗伏惟皇帝陛下齐心灵宝结念洞章结真绪之延鸿敞密都之神丽顺发春之初吉荐有帝之强名奉镂玉之珍文秘凝云之峻阁言旋诏跸式属庆辰乃眷攸司爰颁宠宴挹流霞之醇旨咀芳?之馨香虽共遂於属厌实愈增於寅畏誓更勤於淬砺用仰答於照临

谢赐御制真游颂表

臣某等言伏蒙圣慈赐臣等御制真游颂一首者中禁延真诞章於宝绪西清绎思濬发於乾文仰荷宠颁伏增荣感中谢伏惟皇帝陛下渊明天纵睿哲日新达虞舜之四聪茂周文之九德元符申锡丕显於眷怀盛节交修宣臻於明察是以皇穹报降真祖下临谕长发之遐源示聿怀之密命简册肇崇於徽称樵蒸式展於上仪崇庆节以载严肇真宫而克谨洪惟秘殿实伫仙游将永纪於鸿禧必载垂於金刻臣等不量浅识窃贡陋闻愿裁雅奥之辞用广钦崇之意果蒙睿造俯徇至诚罄钦翼之清衷着游扬之嘉颂叙乘云之妙化述感电之明灵昭两仪是辅之祥显二圣克开之佑将载刊於穹石爰出赐於下臣日月竝明降鸿辉於圣域河洛开舆分宝字於私门宠极朝伦荣深望外顾恩私而莫报惟拚蹈以增荣

谢赐御制真游殿颂表

臣某等言伏蒙圣慈赐臣等御制真游殿颂一轴者碧輦乘风载临於夙禁宝跗摘藻濬发於云章仰荷颁宣俯增荣惧中谢伏惟尊位皇帝陛下多能攸纵典学惟新法尧帝之安安体周王之翼翼赤文緑字申锡於元符苍璧黄琮交修於盛节虚皇乃眷飏御下临议积累之遐源示顾怀之景命协吉肇尊於徽册升禋式荐於明诚纪庆节於令辰肇灵宫於福地洪惟秘殿实降元真仙卫虽回天香尚霭亟徇封章之请庸增栋宇之规遂易鸿名式新题榜躬着游扬之颂诞昭钦翼之心叙驾羽之至神赞合符之明德宣二圣缉熙之道播两仪顾望之祥将再勒於坚珉爰出颁於近列臣等亲逢旦暮曲荷恩私列纬成文方腾於圣域庆云垂彩忽被於私门徒瞻倬彼之明莫测焕乎之盛唯珍藏而知幸固图报以无阶庆拚兢荣倍万伦等

谢赐御制文表

臣某言云汉之文肇加於铨次图书之府遽奉於颁宣实典守以为荣固宝藏而斯幸中谢伏惟尊位皇帝陛下灵承乾则钦翼帝图当四貉之来同顾万几之多暇叩真枢而访道辟艺囿

以游心爰时敏於厥修用克昭於将圣由是博观篆素包举艺文当乙夜之凝严遇西清之闲晏必宪章古昔嘉叹祥祺导励翼之清衷美光华之时景宏敷睿藻亟发宸章屡移银箭之声继竭金壶之墨用发挥於九德实经纬於两仪玉音常溢於绦台藻简载盈於绿蕴暨合祛鲁岳奠瘞魏雕述祖佑之鸿猷叙天人之元命纪山川之胜势赞仙释之神灵潜运天材并驰宸翰银书金刻烂云景於名区玉龠朱弦播咸韶於乐府令辅臣之拟议俾史氏以编联辨六乐之音容序五辰之躔次公车奏御方载饰於芸籤册府爰颁俾分藏於金匱臣等叨尘近职获备攸司被慈旨以知荣啓宝题而窃拚并羲文之象系永镇书林冠尧舜之典谟遐光圣域载惟庆幸倍万常均

谢和御制诗表

臣某言景毫灵区再登於嘉瑞薰弦妙韵遽播於宸章叨下济以知荣奉乃赓而增愧中谢伏惟尊号皇帝陛下寅威密命诞服庆基祇接真游诞膺於宝海丕承道茂集於繁禧眷惟指李之乡昔构犹龙之馆将洁诚而严祀爰先置而戒期伟兆有开柔灵献祉仙桧重芳於福地嘉苗再实於良田矧兹刈获之家允叶圣真之绪载敷神唱恭述灵心焕彼简编永着自天之佑荐於郊庙遐宣治世之音臣幸预近司叨颁睿藻私门传宝仰钦云汉之章燥吻微辞谬续柏梁之韵共循荒陋弥积兢惭

谢宣召观圣像表

臣某等言真驭俯临载形於绘事宸慈曲被俾预於荣观载瞻章汉之文共积逢辰之幸中谢伏惟尊位皇帝陛下钦顺景灵务昭於翼翼绍宣先烈载极於蒸蒸自备受於元符实交修於盛节皇穹是辅密命有开降云於中宸谕璿源於太古简册肇尊於徽号樵蒸式展於鸿仪而睿志弥精心允迪爰令哲匠恭写睟容玉相金姿凝严而如在瑞云仙卫炳焕而咸分爰形美述之文祇叙降真之蹟用极形容之妙诞昭积累之祥臣等获总枢机亲逢旦暮曲荷圣明之睠获瞻绘素之仪载仰威灵共增荣感更誓自公之节少酬逮下之仁

谢赐御制册府元龟序表

臣某等言伏蒙圣慈赐臣等御制册府元龟都序者东观紬书用成於国典西清覃思濬发於乾文革旧日以垂鸿冠羣篇而作范共循荣遇孰可称言伏惟尊位皇帝陛下审听高居继统扬业多能天纵仁圣之事既该嘉言日章帝王之道大备总六经而观法宗四术而教人贵敦学之风右藏书之府补缀漏逸修起废遗礼乐备於朝廷弦诵盈於庠序施温雅之号令四方唯宁垂深厚之训辞百工用乂顷穆清之多暇稽雅故以铺观考邦国之大纲见君臣之往躅纷纶寡要沮劝无章将区别於源流俾辨明於淑慝爰发圣诏申命下臣陈广内之图书给兰台之笔札发凡起例当类聚以羣分原始要终必备言而广记旌小善而咸録遏大恶而勿扬极惟聪垂教之适太上立言之体而臣等艺能浅陋颂次颛蒙但祇稟於圣谟莫建明於大义至於旧章参互衆意异同旌别遗方摧扬乖当皆赖发挥之旨方成伦理之文既岁月以滋多顾简编而仅就恭惟序引实总纲条苟非述自宸衷加於艺圃则何以炳皇王之轨范昭臣子

之楷模遂列奏於公车愿飞英於圣域果蒙圣造俯徇羣心摘章汉之睿辞振经天之懿律兼条总贯致远钩深纪烈祖之灵图叙神宗之大训辑羣元而精密敷奥理以昭融典谟立而书教宣乾坤设而易道备恭闻睿旨克畅先猷盖曩处於震宫爰日趋於幄坐钦承淳诲丕阐宏规将以考历代之遗音建一王之茂范着於编纪昭示劝惩惟圣作之有开属昌辰之善继周武能述式广於丕图陶唐乃文弥恢於至德而乃特纁宸虑肇建鸿名昭鉴戒之大猷显钦明之精意首青编而有耀题绀帙以惟新岂独翰墨之荣俯加於多士固乃文思之德永被於生民凡同侧管之闕共积逢辰之幸欢呼拚蹈倍万等伦

谢宣赴龙图阁观芝草慈乌表

臣某言赖乡先置并献於千祥内阁荣观首私於四近殊尤夔异叹诵何胜中谢窃以芝产九茎闻彼汉房之典乌生八子传诸秦桂之歌詎有时万凝祥方冬载育盖式昭於茂祉实允属於昌辰伏惟尊位皇帝陛下?巩临民寅威顺帝法陶唐之稽古专讲於旧章体高阳之洁诚宣臻於盛节接真游而允穆尊妙道以尤崇眷惟指李之墟昔属犹龙之馆灵心有睽方致於精衷黎首聿臻愿修於明祀爰咨近辅经始神区当备物之初辰变载阳於爱景天和茂畅地宝交腾茁彼灵芳丛生福地固弥川而亿计亦赋象以千名矧返哺之慈禽竞营巢而乳鷇宣昭協气茂发鸿禧亟披艺而考祥遽置邮而承献肃陈中禁既凝穆而载闕严召近司俾周旋而审覲示休嘉之砰隐彰见象之日昭臣谬备枢衡亲逢旦暮共膺丝旨仰奉睿祺瞻菌蠢之英如游於台岭俯毕逋之状若对於羲轮盖盛德之眎分感殊徵之蠡涌祇迪天人之际实惟明圣之符拚蹈欣荣倍万伦等

谢赐大酺诗表

臣某言伏蒙圣慈赐大酺诗者尧酒推恩诞均於纯锡舜弦流韵祇述於繁禧遽叨拜赐之荣实积逢辰之幸中谢伏惟尊位皇帝陛下惠和洽物恭俭爱民祖武宗文绍宣於馨烈尊道贵德丕显於大猷惟上帝之顾怀感真游之降格示克昌之诒训谕长发於鸿源阳位升烟聿修於严报中衢置酒务洽於多欢属煦日之载临考旧章而斯啓玉龠均和珠躔宣丽昭三神之景佑洽万国之欢心臣幸豫近司叨颁睿藻闻韶率舞徒钦善美之音测管仰闕莫达高明之体惟铭藏而知幸固补报以无阶

谢批答允赐御书表

臣某言玉宸观像肇啓於殊庭云汉分晖仰承於俞诏中谢伏惟尊位皇帝陛下参侔闔辟包举艺文陰偶阳奇玩義文而涤虑天五地六宪周德以宣英鼓圣域之芳风骋书林之珍驾流徽金石铺藻缣緗妙万化以为言布羣方而成诵矧清都之载敞惟上士之咸依但瞻曲密之规未识昭回之采臣等幸逢嘉会误备攸司再竭丹情仰祈睿制荣河开奥预降於丝言恭馆凝祥将藏於凤藴仁导迎而協吉唯舞咏以知荣

谢赐御书表

伏蒙圣慈以臣所乞御书特蒙颁赐者昭回散彩方谢於颁宣雅奥垂文载形於敦谕捧窥荣拚循省震惶中谢恭惟尊位皇帝陛下上德渊冲圣谟光大体雷雨之甘润象日月之昭明成兹既富之民被以乃文之化每裁制於物力致蕃衍於货财窃惟内府之兴实自先朝之画皆以节用於已图俭於丰收六尚之羨赢为九年之备预至於优赏降附梟翦寇戎厚庆赐於勲劳广鸿仪於祭享国有经费民无暴征允属昌辰益隆先训况复方隅罢警年谷顺成货殖阜通京坻饶衍务省乘輿之服御愈丰帑藏之资储爰命增修以登输委复徇史臣之请特摛神笔之文述储峙之通规昭祖宗之懿范鸾龙奋藻云汉为章固宜刻石填金并三辰而垂耀经天纬地冠九德以流芳成汤篆刻於盘盂夏后镂铭於箕箒莫拟范围之妙徒居象系之先臣叨备攸司误蒙殊眷惭对天而测管固游圣以无阶自庆遭逢弥增踊跃遂奏尺牘以陈寸诚岂谓鸿私俯颁优诏穹旻不宰惟下济於光明蝼蚁无能难上躋於覆露但持顽朽少效涓尘

谢赐生日羊酒米面表

臣某言函诏垂文簋羞异数循惟荣会内积感惊中谢窃以宴飨之私殮牢有等本周官五数之给及汉酎上尊之良务劝贤庸俾从礼食矧近庭之备列繇诞日以将恩事出先?名存彝范如臣者起於羈藐早窃盛名以斐章而润帝言以浅识而参内务不稼而取禾百亿每媿素殮县弧而有志四方洊逢嘉序感念肯堂之训聿深转轂之悲岂谓伏蒙尊位皇帝陛下曲礼空屠特延賚及降使璫於禁闥辍膳具於君庖鼎?踰丰觴疊有衍会里中相爱之旧共喜属厌备俎间决胜之谋何阶补职惟誓竭忠之効庶为图报之期

谢赐衣着银器表

臣某言今月二十一日伏蒙圣慈特赐臣衣着五十匹银器五十两者鸿私俯及蕃锡有加拜赐已还循涯增愧中谢伏念臣幸逢运会误玷官常自对问於严宸泊备员於谏省最为孤进尽出异恩常感慨以无从冀倾心而自効服勤夙夜况瘁简编仰诵睿文?遵圣诱顾颡蒙之有素终篆刻以非工近者法御戒涂真区荐玉获掌坤仪之奏谬裁帝子之章属辞虽极於寅恭足意莫臻於平彻静思芜累靡敢起居岂谓伏蒙皇帝陛下逮下敦仁包荒着象虑冰渊之积悚颁器币以推恩辉耀里闾荣周族属敢不竭心竹素誓节松筠更增时螳之勤仰答菁莪之育兢惶感忭倍万常均

谢皇太后赐生日礼物表

臣某言星闈遣使芝检申恩恭拜颺以怀兢仰逢辰而累拚中谢恭以国家推宴好之式用广惠慈念臣邻之劳克先体貌加礼有陞廉之峻陪餐从壶豆之差务致使蕃用为旌劝伏念臣本惟材譾夙稟性愚滥窃清阶屡登华贯误备国枢之选得闻君幄之谋属中火之在辰協左弧之记日温言嗣獎厚饩旅陈芬庖具於七牢湛醑醇於九醞此盖伏遇皇太后陛下深矜昧进俯注神襟谓先圣之旧?本於慎守眷迹庭之备位亮乃无他曲沛褒章实为荣遇坐累茵而不逮但感恩亲食四簋以加丰弥衍序旧敢忘尽瘁庶用竭忠

上太皇太后赐生日礼物表

臣某言伏蒙圣慈以臣生日特降诏书赐臣羊酒米面者使駢临泣诏语温纯出上赐之便蕃溢家庭而焜燿中谢伏念臣适时无取择道不明仅有小忠误叨大任滥赋千鍾之禄未施四体之勤敢谓皇慈记其生旦预颁分於居第俾难老以在庭恩厚不貲命微莫称此盖伏遇太皇太后陛下至诚好礼以道任官顾新政之方行虽旧仪而不废因加多物曲示隆恩君赐有余恐奉亲而莫及公朝无讳誓报国之为先

枢密院谢宣召宴游表

臣某言仰承严召久侍中宸共戴慈荣伏增感拚中谢伏惟尊位皇帝陛下诞鍾嘉会懋建远图祗遹谟茂昭於孝德钦膺秘籙交举於盛仪既朝曲里之祠继毕圜坛之礼蕃禧允茂大庆方均当春日之载阳属万几之多暇遽宣慈旨式诏近司趋广内之层闈仰先朝之睿札金滕乍启畏轩台如在之灵帙载瞻契周鼎卜年之数加以圣明善继琬琰垂文列典籍以星繁播声诗而玉振亟由亭榭再历岩峦睇层阁之相望瞩羣芳之鬯遂奉威顔之睟穆从天步以迟留屡承列席之观爰奉流觴之宴肴藪沿洄而继至龟龙刻鏤以载浮投芳饵於文竿对丛枝於采檻移晷共聆於雅奏洗心载仰於宸章矧奇石之羣分有睿辞之徧纪或垂金版或丽翠珉昭回之采交辉清越之音相入而又示慈琳殿拜赐琼跗法酒九行奉宸欢而愈洽昼日三接承宠睭以弥隆泊复私门悦如宵寤昔壶中严丽长房但举於甘肴帝所乐游简子止闻於广乐何亲逢於旦暮且事絕於名言共揣庸微曷胜优暇咏鹿鸣之什既誓於尽忠歌天保之章更祈於报上兢荣感媿倍百常均

谢赐御书并御宝表

臣某言今月五日入内内侍省内侍殿头杨余懿到州伏蒙圣慈赐臣御书文字御宝封全者孤寒际会早奉於龙潜睿哲哀怜远颁夫宝篆兢荣拜赐感惧交怀中谢伏惟皇帝陛下典学生知圣能天纵自东华之毓德亶先圣之诒谋博贯七经诞彰百行仰属代明之始弥隆继志之心躬决万几兼该六艺矧乃飞毫之妙尤精拂素之书回鸾凤於笔端越天人於意表俄成宝字远锡旧臣念犬马之前劳慰江湖之远宦斋心仰止若对於威顔举族自量何胜於圣念

文庄集卷八

卷九

钦定四库全书

文庄集卷九 宋 夏竦 撰

表

进和御制丰年歌表

臣某等言禁苑登丰於首种薰弦濬发於宸章媿非臣和之材猥奉帝庸之作中谢伏惟尊位皇帝陛下惠和布政勤俭化人式昭务本之心克谨授时之教唯丰地利以厚民天将远察於农时在近观於穡事顾金华宥密之地有鈎盾宴游之田申命攸司播时宿麦瑞雪屡滋而吐秀景风潜扇以垂黄乃驻乘舆临观刈获嘉如坻之倍获知率土之咸丰爰均赐於近臣遽诞宣於睿唱昭覆载至仁之意播咸韶尽美之音臣等素乏艺文误尘清要幸奉缉熙之德猥叨赉载之荣游圣无阶但仰昭回之象镂冰旷日仅成芜累之辞将瀆凝严预增惭?

和清水木连理诗表

臣某言嘉瑞荐臻方深於庆拚宸章濬发忽预於赉扬载省庸虚惟增陨越中谢伏念臣等艺能肤浅性识颡蒙幸会休明误尘甄獎日奉好文之德亲承善教之言在刻志以弥勤顾遣辞而愈拙此者伏遇尊位皇帝陛下钦崇六艺顾諟三灵法陶唐之率常稽夏后之象物钦修圣统昭式天才昨自玉牒上封金枝西祀鸿休四发瑞命纷纭灵祲下流嘉生茂遂矧兹奇木载擢祥枝当献岁之良时式符於熙盛对清心之秘殿雅契於隆平用丕显於景灵遂宏宣於睿唱回五辰之藻丽缀四始之芳蕤固将金字银书遐光於篆素朱干玉龠永被於声歌臣等幸预荣班叨闻妙韵遽命巴歛之作载赉韶濩之音虽牵率而仅成固涖堙而仰止况翔阳之下久销萤磷之光岂建木之陰可耀蒿莱之质预增愧慙尤切兢惶

进和御制占城国贡师子诗表

臣某言瑞兽来庭薰弦发唱获继帝庸之作实非臣和之材载省疎芜但增惭慙窃念臣叨尘官序际会文明莫勤日益之功徒奉化成之德此者伏遇尊位皇帝陛下言惟妙物道实通微懿文德以经天靡圣风而柔远复兹荒服承献灵猊用昭式於休光遂敷施於睿藻协箎弦而振律润竹素以垂鸿造物之功寻楷模之可究秉阳之象仰躔次而可观臣叨奉恩私俾令赉载但覃研之精爽唯罄竭於顽弩用缀芜音少儻天獎上尘旒纁唯积忧兢

进河清赋引表

臣某言窃覩祀汾陰经度制置司陈尧叟奏黄河清於保平军者伏以惟德是辅三世其昌俟

河之清一旦斯至光昭宗社之庆焕发天人之符臣某中谢恭惟尊位皇帝陛下茂大中之功隆太上之德本支百世磐石非坚壽考万年南山未永制礼作乐类帝禋宗六龙将幸於汾祠九曲载清於陕服儒宫献颂学馆陈诗臣虽典豆区叨亲简谍极言中选曾叨多士之间奏赋歌诗敢继大夫之後仰干震耀惧切冰渊

上景德五颂大中祥符颂引表

臣某言准中书劄子奉圣旨依奏令进景德五颂并大中祥符颂者下臣有请倾匪石之丹心上帝曰俞降如丝之睿旨震惶无所欣愧踰涯臣诚感诚惧顿首顿首臣闻灵鸟升歌告汤孙之景贶昊天着颂美周室之成功被以管弦荐之郊庙振明光於万世昭茂实於三仪尔後王道陵迟颂声雕缺非旷大夫之职岂无博士之官盖成命未融则斯文不作我国家圆方右序中外穆清拨五代之乱离继三皇之昭夏黼黻冠冕正列采而象乾坤控楫埒簏广德音而事祖考恭惟尊位皇帝陛下春秋鼎盛圣睿日跻御天球及河图受元符与黄瑞英声蜂涌惠露春流承龙翼於咸平致鸿钧於景德北戎震叠泥首幽并左蠹雍容朝陵巩洛着训农之懿典颂劝学之彝章泽浸幅员仁翔海外文武际天而接地灵只流庆而发祥介瑞星辰告休符籙冠黄虞之故实掩唐汉之声明道通九夷执玉万国考典坟而未有极翰墨以难名巍乎皇乎广矣大矣当是时臣工清庙詎可以美形容金牒玉函岂足以昭姓氏太史珥笔不暇纪丰功良士在庭未能歌至化岂臣庸昧敢颂清明盖念胄绪孤平艺文浅陋遭逢陛下拔擢流中爲万乘之门生登六科之丙第隶官膳寺将命南州虽竭虑以安民奈无阶而答禄临文振袂抚剑驰魂幸齿发之未衰冀君王之可报以是区分簿领刻念典谟极精爽之再三颂猷徽之万一欲输尘露少拟声诗遂昧死而献言方伏膺而待罪恭惟陛下恢崇至圣敦劝素风无言不讎无德不报回曜灵之列景照时藿之至心特降纶言爰从奏请敢不拟子渊而匠意倣吉甫以裁章饰陋雕顽间旒纛纒伏愿皇帝陛下念臣尝叨天獎曾近帝晖当垂拱之余时遇观书之暇日曲回宸鉴少听芜音寬樵斧之严诛軫昆虫之微意百世斯幸万死甘心抑又闻英主难逢良时罕遇河图不至宣父兴嗟岱岳未封相如驰恨臣常自庆生实逢辰既踰弱冠之年便遇泥金之礼在於今日万世一时苟不能目覩陶匏足升坛墀以斯爲士曷若无生今陛下丕奉珍符恭行大典适遂羣生之欲岂违庶品之诚愿令臣随一礼官执一祭器舁拚徐銮之後骏奔缙骑之间瞻云瑞於封中听神声於岳下伴禽鱼而舞跃随耆幼以讴歌时颂鸿徽上畴灵泽是则死当不朽生有余荣永念丹诚有如皦日臣无任瞻天望圣激切恳祷之至

进王中正神道碑表

臣某言伏奉圣旨令臣撰赠镇南军节度使王中正神道碑者密命开先实异人之杰出温珉纪事顾懵学以非长将仰瀆於穆清但预增於震悸中谢伏以王中正早缘灵契仰对真游通宥密之嘉言启龐鸿之圣佑继成慎默稽往哲以难偕茂实殊尤考前编而未覩盖邦家之累盛感奇伟之间生昭纪遗芳合归鸿笔如臣者文非约史学不传经当先臣尽节之初才沾一命泊制策叨荣之後方越十年获起草於东宫参代言於西掖虽编研而自励终弩蹇以难称每慚菲薄之才孤奉文思之德在於昧进久已逾涯岂谓伏蒙皇帝陛下不以疏贱弃遗不以颡愚爲罪过垂慈惻曲记清衷旌彼功庸忆其姓字是颁慈旨俾勒琮跬展一人特达之知固

千載爲儒之幸虽磨鉛而仅就顾刻鹄以非工重念臣最处孤平加之拙直唯竭心而答禄耻令色以从人夙夜端忧莫避入朝之嫉圣明大庇独承如地之容敢不倍勒箴铭更探油素誓毕蜂蚁之命仰禱天地之仁

进谢恩物引表

臣某言伏以崇真齿胄云构相望纪事披文天章益焕典司知幸荣庆交深中谢恭惟尊位皇帝陛下天纵多能通微作圣鸿猷备举极孝奏之仪典学日彰布睿明之德昨以钦崇秘籙肇建殊庭敞神丽之规旁临东阙奉馨香之荐仰伫左飏爰以贤王方从外傳肇堂皇而密迹庶祉福之来同而皆躬运宝跗亲裁宸制叙九清之道?允罄於精衷稽三善之格言但敷於宝训继刊金刻并建龟趺羲舒之彩交晖咸韶之韵相入是知百灵潜卫永镇於皇居太一下观将传於紫笔臣仰逢亨会早窃殊恩忝预攸司亲逢能事虽乾坤惟大固无可报之阶而芹菽至微或尽告?之愚兢惶拚蹈倍万常钧

乞与修真宗实录表

臣某言伏以缉熙盛节先圣之鸿徽紬绎信书孤臣之旧职冀殫薄技少谢遗恩仰瀆諒陰伏增震悸臣某诚恳诚惧顿首顿首窃念臣材命奇薄门族悴寒顷事先朝最承华宠对问轩陛擢自诸科第念庸微久陪法从旋以上封纳爵诣理代亲事敢自明谊当引罪先皇帝恻矜孝养昭式礼经抑去空文比用寬典裁令出守趣使知非臣敢不梦寐惟忧夙宵咎痛使食当去亦冀改爲悅心可铭不难自克庶伸尺寸渐积岁年赎一眚於前辜答万分於再造何图凭几遽迫遗弓云补无辰攀号罔极恭以真宗皇帝躬训慈俭颺讲艺文拓邃古之皇衢剡叔世之霸轨泽浸九域雨润而云游威憚四夷风翔而电照临民先愀怛之吏防边後忿鸞之臣恭默道枢偃仆武节长养万物休息羣生由是瑞命荐臻上仪交举纪姓垂鸿之典焕衍於苍珉候日畴圣之符充溢於金匱仰对在天之烈莫先垂世之书必当遴简时材章叙实录礼文至盛注记尤多诚须博集简编广分卷第宜有冗吏以备後陈重念臣顷在往年常参史局太祖皇帝大功美业幸预於编研太宗皇帝盛德嘉猷继叨於颂次成书未几急景难留当时史官迭爲异物唯臣与晁迥二人尚存臣虽出典五城连更六祀弃置刀笔奔走泥涂温故无由属言多废若乃先圣发明之类别朝家经济之规模靡敢暂忘粗能追忆悦使编聯事实系叙日时庶能上给英儒广资鸿笔宣赞风美焕烁古今式効涓诚仰禱余烈伏望皇太后陛下布昭宸鉴祇遘谄谀哀报国之危衷委容辉之末照念臣先圣宠綏之日振拔爲优皇帝潜跃之初遭逢最旧特垂开可许以报投詎敢銜鬻非材微冀误宠悦俯容於竭力乞靡预於畴劳才获成编即求爲郡永罄朴忠之节仰禱简照之私

乞御制君臣事迹序表

臣某等言臣闻易象始备文王作乎系辞典诰既删宣圣制其书序矧发挥於大典实繫赖於睿文将瀆凝严预增战越臣某中谢伏惟皇帝陛下惟聰天纵将圣日跻围范二仪博通於机会宪章六艺妙达於精微崇四术以化人鑑百王而立制考藏书之阁坠简咸收颁劝学之言

素风大洽顷以西清多暇乙夜无遗览篆素之前编见君臣之往躅丝纶悉纪惩劝罔分濬发宸衷诞敷圣谕命近臣而紬绎选多士以刊修类聚羣分各从於轨范彰善瘅恶永别於否臧固懋德之洪规实经天之至训臣等误膺甄择俾预校讎虽抱槩和?共勤於素业而兼条总贯动禀於睿谟至於衆议之未通旧文之多误损益之非当褒贬之失中皆自发明方成义例顾屡迁於时序将甫就於编聯爲圣代之大谟垂千龄之彝制窃惟序引实总渊源若冕之在躬爲服章之表如茧之抽绪开组织之端苟非睿辞岂容轻议其君臣事迹伏乞圣慈特赐御制总序加於编首式昭下济之辉永播化成之教岂独儒林之荣观实爲圣域之令猷愿回从欲之恩特允至诚之请

乞降御制御书於昭应宫表

臣某言窃以殊庭肇启载严曲密之规上士咸臻未识昭回之采合仰祈於帝制冀永暢於真风臣诚恳诚愿顿首顿首伏惟尊位皇帝陛下学本生知圣惟天纵布安安之化率育於羣黎宣郁郁之文绍隆於先志而自增高云岱报本河汾朝气祖之晬仪历省方之靖馆感鸿禧之茂委敷睿思以诞彰凡属神明之区徧垂金玉之刻至若颁宗范於藏书之阁纪元符於锡瑞之门刊宝训於东庠叙嘉猷於内府发慈悲之大愿着告戒之宸辞篇溢西清卷盈东壁固以发挥经教疏暢化源激雅俗以还淳道怀生而底善况灵宫之既就繫羽服之攸依苟共遂於瞻?实倍增於荣庆伏望圣慈特赐御制御书曾赐臣寮者各一本於玉清昭应宫集禧殿左右铺挂收掌许道衆观仰是冀钧天秘邃常聆九奏之音紫府深沉永焕八龙之篆精?恳至实倍常钧

乞依谏官抗议表

臣某言伏奉圣慈赐臣诏书示諭爲谏官上言任福等陷没臣指踪不明乞降官序朕方责以後功寢兹抗议者偏师失律方沮军声秘检延慈犹寬吏议感深沦髓愧极无顏中谢伏念臣出自书生罔諳羌事误填边琐再徙军屯既陈力之不能屡上封而请代不图宸造靡讯无功俾旋关辅之故栖尽付边防之重委主忧臣辱在寢食以皆忘恩重命轻誓死生而必报以是经营战守约束偏裨令极五申心交万虑适属犬羊侵境貔虎聚营十舍相遥虽指踪之匪及一时极选顾授将以颇精何期临敌贪功无谋应变隳我鵞鹳稔兹豺狼职在於臣咎将谁执爰露章而自劾祈雨事以绳违岂谓伏遇尊位皇帝陛下深轸上仁恫矜旧物念臣本由误选察臣颇厉朴忠特辍简书式垂诏諭抑谏垣之说论寢司败之成科仰戴宠私交流愧汗余生再造九殒莫禱然臣尝豫近司粗知前礼既有干於公议即难废於常刑当保边扞寇之秋非屈法申恩之际而况军行三载日费万金既未能逐敌踰沙又不能全师守律偶麾手策略挫羣凶过有若斯理宜无赦矧复士心未振兵势尚分逆党益骄谋将全乏臣五能已竭十驾方疲将何善後之机更总防秋之算实忧误国非敢顾身愿颁黜罢之文免累安危之计又虑朝廷以臣职当引咎意在辞难则街亭丧师孔明削其丞相西陵纵敌羊祜降爲平南望举旧章以澄不武侯成来效渐冀功除

明堂乞朝覲陪祀表

臣某言伏以皇王宗祀邦国之大猷陪鬯致恭臣子之荣愿敢殫就望之歎仰祈照临之私中谢伏念臣早以诸生寝承显遇乏涓埃之微效冒文武之崇名逮事两朝猥叨法从仰此缉熙之礼复遭亲祀之期聆诏綍以驰诚怅藩垣而系迹阻肩鹭序获奉天仪伏望尊位皇帝陛下闵以衰迟矜其悞悞特颁开可之旨俾瞻稀濶之容甫讫侍祠即时还任

代谢生辰礼物表

臣某言伏蒙圣慈特差某官某押赐臣生日礼物具谢上表者鸿私俯逮蕃锡有加拜赐已还揣躬憎惕中谢伏念臣叨承宝胄仰托皇闈早列郡封靡阶功绪顾以年方蒙稚性异温文周寝问安徒谨鸡鸣之候虞庠就学未通背诵之规岂意宸衷曲记生日特令近职肃将朝恩钿器织文荣颁於御府兼衣骏驷宠集於藩房载省无能曷胜慈獎此盖伏遇尊位皇帝陛下钦延真?允迪天门迺眷本枝务隆恩典九霄流庆虽无报德之阶亿载承颜但罄因心之礼周章感惧倍万常钧

代辞兼中书令表

臣某言伏奉制命特授臣某官者上仪交举方毕於严禋纯锡诞均遽叨於茂渥省循所至震栗交深伏念臣性异生知识惭幼悟但以早承慈獎昭启郡封已视秩於三阶复兼劳於八舍加以七经初授方励於愚衷百行未彰动烦於圣训岂谓此者国家奉天尊祖祇荐鸿名类帝禋宗聿成大报祺祥方茂恩獎误加进左相之崇资广爰田之食赋唯仰延於真?实俯媿於无功伏望尊位皇帝陛下察以由衷軫其非据特颁朝旨追寝命书是则国体至公靡厚家人之爱材臣知劝免腾乡校之言恳激周章期於得请

代谢兼中书令表

臣某言伏奉制命特授臣兼中书令加食邑一千户食实封六百户者精真降佑茂集於上仪蒙幼何功首均於大庆恩章继上温诏靡俞仍俾断於来封难重烦於睿听拜受祇竦荣惧交深中谢臣闻昔者顺天以制官信赏以懋德所以西台之重观象於紫微右相之尊比崇於黄阁在於加邑亦用畴庸自非闻望素高亲贤莫贰含中履洁积行累功则何以登翊大猷出纳明命仰惟亨会弥慎隆名如臣者性本颀蒙才非秀峙壽街着辩曾未显於天资甲观分荣徒早承於圣?由是升华近卫列爵上公爰建节於近藩遂疏封於吉壤量能既浅昧进尤多而况年甫胜衣礼方就学忠孝惟宝初佩於格言经籍是娱未通於奥旨此者伏遇国家讲求钜典涓选灵辰镂温玉之秘文荐清都之丕号祇见祐室拜况阳郊既舍爵以策勳遽出纶而锡命俾冠八貂之列仍加五等之封真食兼增宠章尤茂窃自惟度深积腴慙继伏奏於公车愿追还於恩制嘉言都穆洵形敦谕之私渥泽频繁莫寝已行之命黽勉祇荷后处无从此盖尊位皇帝陛下茂拥天祺博延道?宠帝光之宝绪丰膝下之深仁是推不次之恩用表曲成之造敢不励诚夙夜逊志诗书鸣玉内朝永奉问安之礼承颜幄坐更勤侍膳之心庶渐称於慈衷用仰矚於宸造感拚之至倍万常钧

上谢恩物引表

臣某言伏奉制命特授臣某官者恩典有加拜受祇栗伏念臣仰承国庆幸托天枝爰在幼龄夙尘隆宠今者猥蒙朝命特启郡封进秩近司肇颁於美号兼荣右相仍广於爰田退省何功实繫鸿?此盖尊位皇帝陛下高明垂裕右飨延恩允彰宣哲之灵丕显在天之德务克昌於圣绪用诞降於多样是致童蒙昧兹优渥唯当率遵方谷恭载宸慈诒厥之谋敢忘於对越聿怀之福更赖於宠绥祇报之仪具陈别奏周章恳激倍万常钧

代贺水清木连理表

妾言今月某日伏覩後苑奏有两处水清木各连理者鸣鸾展采瑞木聯芳仰观孕禧俯增大庆妾中谢窃以象輿载育表异於天资平露惟乔效祥於国政盖德风之醇畅致神物之蕃渊况在平柯尤彰美应伏惟尊位皇帝陛下绍宣鸿烈懋建远图天人之际已交禁园之芳挺异云枝内附茂昭混一之符华晷载阳式协中和之德焕珍图而有耀宣景铄以无疆妾限守宫闈莫陪警蹕仰明休之允穆增率舞以攸深

接驾谢抚问表

妾言今月日某人至伏蒙圣慈特赐传宣抚问者星轺爰降丝旨旋颁仰戴鸿慈俯增丹恳伏念妾获尘中壺幸会昌期属法驾之省方已回銮而复路爰趋近甸恭候先驱遽承郁穆之言俯谕眷怀之意荷恩荣而有耀醞覆育以无阶

第二表

妾言星使俯临丝言载谕祇膺睿造俯积丹诚伏念某幸托宸闈仰逢亨会属真区之巡祀诏法御以言旋爰诣近畿恭迎制蹕遽被出纶之旨俯推乃眷之恩荷慈渥以何胜顾兢惶而靡措

谢进奉回诏表

妾言伏蒙圣慈以妾所进特赐诏谕者皇明通烛帝綍垂文祇捧已还兢荣失措伏惟尊位皇帝陛下寅威瑞命顾諟灵谋言瞻景毫之区式效襄城之驾斋心靖馆方菲食以矜庄荐鬯嘉坛将迎真而展采妾限居椒掖莫奉玉盥?修贡献之仪仰瀆鸿明之德遽奉发中之诏茂宣逮下之慈顾曷称於褒优但俯增於战越

楚王谢恩表【奉勅撰】

臣某言伏奉制恩特受臣天策上将军行兴元牧赐剑履上殿书诏不名依前守太师尚书令依旧在宅养疾余如故者恩制诞宣徽章载峻仰戴加崇之典俯怀非据之慙臣闻隆器大名

必先於有德殊榮異數豈及於无功如臣者托體宗枝承暉寶萼乏間平之令譽異周召之元勳位冠中台任隆西省總鈞陳之近衛分列軫之奧區禮徒厚於賑膳效罔階於塵霧唯賴寵私大庇友愛曲成宴處安安俾階於養素夙興翼翼莫展於在公常自省循尤爲冒昧豈謂伏遇尊号皇帝陛下德綏九族惠育羣黎誼常切於展親化方深於教睦繼先猷之久大丕显於孝思紹真緒之延鴻務均於道?式稽良日爰賜命書備褒寵之殊猷極优隆之貴范葭莩至薄荷敦叙以何勝麟趾實繁顧徽榮而特異未遂內朝之禮但銜右戚之仁感拚兢榮倍萬仞等

文庄集卷九

卷十

<集部,别集类,北宋建隆至靖康,文庄集>

钦定四库全书

文庄集卷十 宋 夏竦 撰表

代王文正相公辞司空第一表

真馆告成方臻於吉日庆霄垂渥首及於具臣慙震所深周章失次臣某中谢窃以宏父之职邦土是司任惟其人固难求备坐而论道是谓无官自非宣清重之风茂冲粹之德将何以会通九泽监总百工备四近之班应三阶之曜如臣者材质庸菲性识颛蒙禁省代言微深厚之体近司闻政乏康济之谋徒以叨逢圣明过赐丹采岩廊充位华貂有不足之讥武帐承颜前箸无可筹之事至若慎徽五典怀柔四夷率育黎蒸简清流品封崇於恒岱奠瘞於河汾緘秘刻以朝元展钦柴而拜况宣明礼乐之制布昭巡靖之仪惟仰奉於成谟莫少陈於未议泊载均诸赏典常首冒於徽章维石岩岩莫允具瞻之望伐檀坎坎但增素食之讥昨者国家祗若灵猷钦崇秘宇观紫微之法象侔曲密之威神官有居方盖动遵於精意事无愆素则自属於攸司而臣上领使名本无职局未尝面势亲总工庸唯奏格於馨香自肃祗於斋洁岂谓庆成之日首叨非次之恩俾正位於公槐极加崇於鼎席况冬卿之望古制攸难本非虚受之资岂是徽荣之地重念臣声猷寝昧齿髮甚衰师长朝猷岁时滋久忝居揆务命数非轻尸厚禄以尤多妨贤路而斯甚早欲露章车府延首帝阁愿避宠私用全散拙属敦仁之俯逮实布欸之未遑岂可更窃茂恩洊居隆器纵人言之靡畏抑自讼以何安苟昧进以无厌必恶盈而有咎循墙偃倮局地怔忡伏望陛下深测上仁俯矜丹恳特寝出纶之命俾寛据蒺之忧如此则求贤审官靡替及功之赏陈力就列式敦知止之风誓更竭於涓诚用仰禱於大庇兢惶隕越得请是期

辞司空第二表

国恩非据天听盖高既未赐於允俞但俯增於惴栗臣某中谢窃以三公之任庶政是维變顺天和登翊王度所以无人则阙有德乃堪况惟度地之资尤重经邦之寄舜咨伯禹始别九州之封鲁任宣尼爰分五土之物逮兹以降厥制弥艰或宠重於茂勲或旌明於懿行未有不阶人望误被朝章倖成虚授之私实损至公之道如臣者素无微效幸遇昌期陟降凝严周旋机近熙帝之载既乏於訐谟为儒之荣又踰於素望不能早避贤路博衍时材荷大庇以虽深顾伤廉之已甚岂可不能早避更窃微荣况琳宫揆日之初梓匠飭材之际上则蒙成於圣虑次则专达於攸司臣有何功豫兹懋赏苟庙堂之位可以假人则轩冕之恩不足劝下将何以表仪羣后弼予一人

代寇相公谢恩表

臣某言今月一日伏蒙圣慈赐臣官诰一通勅牒一道特授臣前?官者睿造曲成宠章有异载循浅拙不任兢惶伏念臣本以庸材叨逢庆会詎谐人望误简帝心自忝昧於慈荣实频繁於要近既靡扬於吏职固遑恤於人言岂谓伏蒙尊位皇帝陛下俯念颡愚曲推恩庇授之节制断自宸衷矧视秩於公槐抑兼营於台鼎虽竭心而有素实报德以无阶唯更誓於夙宵冀少酬於临照

又谢恩表

臣某言奉符仁里式罄於精衷彻饌真场爰及於大庆播鸿徽之允穆介蕃祉之无疆降及萌生率同拚蹈中谢窃以混元无象判涣於二仪冲用自然周流於万化洪惟教父肇啓真源强分太上之名茂洽有常之德唯降临之胜地有祈福之严祠汉崇文石之坛靡昭於俭素唐制金莲之舞詎极於诚明允属昌辰式扬茂典恭惟尊位皇帝陛下睿明攸纵恭俭式孚祖武宗文昭宣於馨烈尊道贵德懋建於大猷受緑字之元符集紫清之景佑勒封云岱则瑞气成宫展来河汾而祥光烛地遽感通於宵寤爰降格於仙游昭长发之鸿源谕聿怀之密命上仁愈洽盛事弥敦乃眷灵区俯俞勤请命攸司而经始酌洪典以时中神物嘉生溢珍图而继至殊庭大室陈告礼而启行羣后奉仪宝文先道积明诚於京阙宣睿作於洞章爰協灵辰首登徽册百司定列肃陈荐鬯之仪九奏成文亟备升烟之礼凝蹕於省方之馆受厘於颁瑞之庭万?骏奔百灵交庆英声无已腾懿铄於九围道?弥隆庇羣生於亿载叨分留事幸奉严禋仰丁袞吉之辰共积逢时之幸欣荣拚蹈倍百常钧

代寇相公辞官表

云雷之泽曲播於庆霄旌棨之荣误加於琐质揣循斯至祇受诚难臣某诚荣诚感顿首顿首伏念臣本以诸生误阶荣次荷先朝之振擢参近职以频繁罔知退食之规徒益在梁之刺洎偶继明之际过聽图任之私召自藩垣俾厘京室方总货泉之职遽叨钧鼎之荣爰外布於郡条亟入司於留龠逢辰之幸旷世难名其如家世素微年华渐暮虽竭当官之节终无报国之阶况会府分曹已渐於八座陪京出守止望於一麾过蒙帝造之曲成叨践枢庭而承乏奉行成算循举旧章絶无广盛之谟但积祇膺之惧岂谓伏遇皇帝陛下矜其不逮恕以无他特垂踰望之恩用示简心之泽闻命之始局地无从况文武聯荣人臣极致惟圣朝之三叶符茂典者二人赵普以佐命元勲方兼於将相李至以攀龙旧德止拥於旌旄臣也何功妄阶兹宠纵造化独私於浅拙而鬼神必害於满盈仰承保庇之仁但铭於骨髓退思止足之戒实悸於肺怀伏望圣慈俯矜丹恳复七兵之旧列寝六纛之殊恩傥得束带金闺紆绅丹陛再拂桑榆之景重亲日月之光更厉夙宵?服资忠之训庶俾尘雾仰酬任旧之仁

代寇相公谢诏允百官国学观先皇御书表

臣某言睿辞从欲温诏曰俞祇诵已还兢荣交集中谢伏惟尊位皇帝陛下宝慈宣化克已敦仁翼翼因心茂着聿追之孝孜孜典学诞隆载郁之文式眷虞庠肇营轩阁闋先朝之睿迹緘以金籒昭善继之圣谟垂之玉刻俾多方之仰视彰累盛之流徽臣等谬籍金闺未趋璧水爰

祇章而列奏愿澡雪以荣观遽承出綍之言特允叩门之请交趋动色覩能事而有期誓节盟心报鸿私而无地兢惶感忭倍万常钧

代寇相公谢赐还京詩表

臣某言福壤还衡式臻於中禁薰风流韵爰播於永言叨仰止以为荣顾乃賡而增愧中谢伏惟尊位皇帝陛下寬仁逮下寅畏时中顾諟明威绍扬先烈自钦承於道海弥昭事於真源奉緑错之符?趋於仁里奏紫极之舞顺拜於清坛膺介祉而有融霈鸿慈而允洽亟回輿於近甸既饮至於太宫阳位钦柴将修於大报睿文章汉遽发於英声被六乐以和同铄三辰而均丽畅聿怀之景命昭有翼之精衷臣幸邁昌期获颂圣藻藏家传宝顾圭竇以增辉稽首扬言抚么弦而积媿仰尘聽览伏切兢惶

谢宣示绵州进彰明县崇仙观栢木文彩像道士七星仪形表

臣某言今月十日崇政殿伏蒙圣慈宣示绵州所进彰明县崇仙观栢木柱上有文彩像道士形仪分明可高七尺兼北斗一座者美材荐祉灵像成文祇覩以还庆荣交至中谢伏惟尊位皇帝陛下绍隆先志懋建民中罄寅畏以礼神保惠和而育物皇图侯日丕显于鸿猷真祖在天津彰於道?播三仪之善气腾万物之嘉祥矧彼左縣素严秘宇惟丹楹之有觉挺坚栢以含章久伫昌辰适彰瑞理上俨灵仙之体旁分斗极之形审谛无差周旋悉备清衷载考协开元至盛之符羣后仰瞻实治世无疆之应臣等濫尘枢近获邁珍祺忭蹈之诚倍万伦品

代寇相公进和御制升祔诗表

臣某言伏以清庙肃雍既严於尊祔薰弦和雅遽播於声诗叨拜赐以知荣预扬言而匪称载循浅昧伏积震惶中谢窃以周美太任聿着思齐之颂鲁尊先妣爰歌有恤之章盖昭布於信辞用形容於盛德伏惟尊位皇帝陛下寅威景命嗣服庆基诞彰锡类之仁务极显亲之礼近以钦崇先后稽考旧章恭升帝母之尊祇侑神宗之室揆休成而允协荐禋洁以惟馨?敷章汉之文茂述因心之道克谐以孝昭虞舜之大猷焕乎有文宣陶唐之懿德臣幸鍾运会素乏艺文载賡郁穆之音弥显滔堙之累仰尘聽览尤切竞慚

代丁相公贺元德皇后祔庙礼毕表

臣某言鸿仪茂举至孝允孚凡在照临咸同庆忭中谢臣闻鲁尊先妣姜嫄始立于閼宫唐重母仪昭后终迁于太室徽音匪远彝制具存恭以元德皇后作合先朝诞生上圣自别崇于庙享庸未极于礼章伏惟尊位皇帝陛下锡类推仁追恩着德体周文之翼翼极虞舜之烝烝仰惟帝母之尊?纳辅臣之议用钦崇于尊谥恭升配于神宗涓选灵辰宣臻熙事百官承式奉徽册以惟寅万世不祧致明禋而永穆丕显奉先之礼茂昭维则之思先置真祠仰闻大庆趋阙庭而靡及增蹈颂以攸深

代集贤相公辞官第一表

臣某言真驭下临式均於大賚宠光遇被首及於具臣退省何功实为非据臣某窃以汉崇特进实宠於勲贤魏重右曹用司於枢要典章所载名器甚隆允属昌辰尤为大任苟乏当仁之誉必貽虚授之讥如臣者望实非优艺文素浅当先朝之政治误膺束拔之私遇上圣之继明曲荷眷怀之造周全宥密参预弥纶唯仰稟於睿谟莫少裨於帝载爰保厘於洛邑游居守於神臯曾微扈从之勤再奉畴咨之命鸿钧播物但繫天地之仁神鼎调元莫适盐梅之用昧进固踰於涯分省躬每惧於颠跻此者伏遇皇帝陛下奉若景灵祇明妙化感上真之报降昭帝绪之绵长茂对皇穹既严於禋飨诞敷庆渥亟及於近司进二品之崇阶正三台之峻秩乃加并赋并示宠章虽堂陛惟隆务推於优裕顾斗筭至小必至於满盈须倾若厉之诚仰瀆盖高之听伏望陛下俯矜短拙曲示保全濬发宸慈俾收成命如此则公朝之典克叶於无私乡校之言免讥於不称仰干旒宸得请为期

第二表

臣某言宠私非据诚请未俞载自省循弥增陨越臣某窃以受爵不让贤哲之深讥无德而贪典章之明戒矧跃池峻秩执璧崇阶实真相之华资固公槐之异数自非勲懿曷副畴咨如臣者素乏艺能误膺眷倚裁成庶政但倾将顺之诚弼亮大猷莫着弥纶之议唯以幸逢期运频历岁年仰膺图任之私不责谟明之効素飡多媿难逃冒忝之讥荣路久妨每积满盈之惧此者伏遇皇帝陛下斋心体道恭已节神居螭馭以储精宅希微而观妙荐膺秘籙交举鸿仪远至迓安惠和胥洽天明地察报降日彰感真驭之俯临谕仙源之邃远克昌厥後茂奉於景灵永锡无疆诞膺於纯嘏式均异宠首被台司右曹之任尤崇特进之名至重益爰田之公赋皆推德之徽章闻命益惊循墙失措遽倾恳悃固避恩荣而睿听盖高未收於涣汗危诚益厉弥积於怔忡苟昧进而自安必旷官而罹咎况屡干於聽览期特赐於允俞伏望陛下深测上仁曲回久照追寢出纶之命俾寬局地之忧如此则求贤审官式叶无私之化陈力就列免增有腴之慚干犯宸严期於得请

代枢密相公辞官第一表

臣某言真祖肇临茂昭於纯锡宠灵爰被首及於近司退省踰涯罔知攸措臣某窃以汉崇掌武之秩实典於枢衡唐设褒功之名用优於勲绩矧圭田之厚赋皆懋德之徽章允属昌辰尤为异数功庸夙着闻望素高式副金同仰膺眷倚如臣者艺文浅陋胄绪单平始登射鹄之科止窃代耕之禄振纓幕府结绶兰台夙宵靡造於官箴尸素遽通於闺籍爰遇继明之运首膺下济之仁践清切之要司历凝严之近省发挥帝诰莫畅於鸿猷参贰台衡蔑闻於善政固民瞻之匪?惟圣造之曲全载尘侍从之资遽总枢机之务属元符申锡茂礼交修奉先置以何功赞上仪而非允暨荐敷於大庆皆首窃於殊恩忧媿弥深宠光继及遽升荣於鼎席复正职於枢庭责实循名固昧和羹之望致远任重方深颠跻之忧此者伏遇皇帝陛下惠迪先猷寅威神化自钦承於宝籙弥尊奉於景灵守慈俭而化人宅中庸而体道皇穹是辅密命有开始宵寤以符通逮真游而报降简册?尊於徽谥羽髦祇告於太宫钦修茂对之仪用极齐民之意就

阳升燎诞受於繁禧逮下均恩首覃於琐质进台极三公之位兼加懿号之荣益井田五等之封仍增真食之数宠私繁缛进退周章无德而贪诗人之刺斯见知止不殆道家之戒甚明苟昧进而自安必旷官而负愧上累知臣之鉴下貽覆餗之虞须沥丹诚仰烦宸听伏望陛下曲回久照深测上仁俯矜益厉之诚追寝已行之命如此则公朝赏典克叶於程材乡校多言罢讥於窃位上干旒宸得请是期

代东枢相公辞加恩第二表

宠灵非据诚请未俞循省已还周章失次中谢窃以知止不殆道家之戒甚明以荣为忧先哲之规可览伏况臣自叨慎简尤乏訏谟待罪枢庭莫裁成於大政兼荣宰府已臻极於隆名屡省妨贤常虞瞰室此者伏遇皇帝陛下钦承道海祇通灵心效驾真区荐明馨而有翼奉符泰峙严陟配以惟寅臣叨赞鸿仪靡详盛节属均恩之云始膺懋赏以复殊进公府之崇阶广爰田之厚赋闻命而震惶靡措循涯而盈满是虞爰沥肺肝仰闻旒纚若厉之诚徒切盖高之听未回须再瀆於凝严期稍安於陨越伏望陛下俯矜短拙过视保全特推从欲之仁俾寝已行之制是则多言可畏免腾虚受之讥信赏无私允叶至公之道战兢恳到得请是期

谢加恩表

臣某言泰峙钦柴式推於茂渥公车奏牍爰锡於徽章遽荷宸慈俯颁优诏既靡俞於恳恫难再瀆於凝严祇荷宠私伏增荣感中谢伏念臣文非近雅材不逮人幸会鸿名谬阶通显紫宸挥翰莫宣畅於大猷会府宠材止奉行於旧典而属皇穹降鉴景命肇新昭事景灵叨荣於恭馆交修盛节获侍於宝文顾庸昧之无能辱眷怀之特异振纓东掖始均夜拜之荣结绶中台忽贰春官之职泊真游降格睿志寅威贡九牧之良金范三清之晬象导迎将命方体於精衷振拔踰涯俄参於庶政顾乃版图之秩愈增渊谷之忧昨者景毫朝元圜坛报本叨戒先於备物既肃奉於明禋旷怠是虞后居增惕岂谓上仁攸惻赏典斯隆赐八柱之贵勲进三品之崇级上公列爵仍加凌阁之名真户益封兼广爰田之赋念非才之最甚於沥恳以尤深顾涣汗之难收但怔忡而祇受陈力就列益媿於满盈以荣为忧弥增於陨越此盖皇帝陛下责非求备道在包荒观堂陛之言用优於近列播乾坤之德务洽於纯禧唯当退自揣循进思刻励咏伐檀之叶已媿於无功歌天保之章敢忘於报上誓倾勤拙少荅照临

代东枢相公谢授官表

臣某言飏歛降真式均於大庆丝纶示宠并集於微軀爰揣分以增忧继削章而沥恳洵荷圣明之诏靡俞逊避之诚难屡瀆於惟聪但俯增於有腴僊俛祇受以荣为忧臣窃以秦官掌武之司式总王旅唐制懋功之号寔宠勲臣矧加地之徽章皆畴庸之茂典自非澡行浴德履洁含忠绩简帝心声敷物听则何以仰膺眷待允副金同如臣者材实非奇行能无算寡庠序雍容之誉乏丘园洁素之姿徒雕饰於庸顽误陞攀於仕进当先皇之求治在小善之咸收及攘臂辞场始奉命鄉之荐比肩名路洊尘入幕之资固婉画以无闻但食贫而自守岂谓误承陟诏擢典秘文亟临关市之司甚旷征?之职属大明之继照均茂渥以旁流遂通籍於朝闈仍效

官於会府体寬大之诏敢议於烦苛陈蠲复之科过叨於獎与始预七人之列俄居四近之荣丹笔详刑固平反而寡要紫宸擢翰寔润色以无闻但自結於圣心旋陞荣於内禁金銮夜召恭奉於威顏玉垒晨征遽銜於睿旨既抚安於瘵俗式宣暢於仁恩忽膺乘駟之趋俾贰秉钧之烈岩廊建议莫裨贊於大猷边圉折冲詎澄清於远略无劳被遇自讼增慚既騰不称之讥益赖曲全之德迁内殿优游之职冠近臣侍从之班寢食图书方思於肄习总厘枢轴忽荷於倚毗属三边彻警之时是万国同文之日循旧章而进秩无所建明繄睿算以蒙成但知将顺属元符之申锡惟密命之有开克昭右席之灵将展合祛之礼亟司先置於备物以何功首奉殊恩在策勲而加等矧梁陰之降禪报厚地以增基猥奉睿慈曲扬茂实莫极形容之妙洵叨优渥之私暨巡祭於魏睢复钦修於汉祀贊鸿仪而非允锡异数以弥隆载惟班瑞之坛谬奉肆朝之礼复承优假曲被宠光虽盛节纷纶务洽龐鸿之庆而宠灵繁縟益增冒忝之忧方多愧於非材复误膺於爰立枢廷正职詎宣宥密之谋帝傳叨荣徒玷论思之任虽宸衷之靡替在輿诵以弥喧维石岩岩莫允具瞻之望伐檀坎坎但增尸禄之讥昧进居多食浮滋久此者伏遇皇帝陛下祇明至化恢大庆基宏亮嘉谟翕纯而克裕绍休先烈烏奕以垂鸿宝慈俭以化人宅粹和而观妙无思不服诞宣清浄之风有感遂通脗合希微之道酌中庸而立德守渊默以储精馨烈升闻皇穹降鉴感仙游之昭假彰圣绪之悠长诞膺永锡之祥丕显克昌之佑只严简册既荐於尊称焜燿樵蒸爰修於盛典式覃荣渥首及具臣进秩三阶锡美名而益茂增封五等加公赋以尤丰载自循涯岂遑闻命况振景拔迹在超越以难阶苟损实亏名必满盈而易覆顾不能而将止况自见之甚明遂稽周任之言亟效范丹之节虽怔忡失措继倾若厉之心而涣汗难收莫寢已行之诏但周章而祇荷固隕越以无从此盖陛下钦奉景灵诞均纯锡特掩妨贤之咎益推注意之仁敢不刻镂肺怀揣摩鉛钝竭心官次庶逃窃位之虞励节朝端免负知臣之鉴少输勤拙上荅照临

代东枢谢赐宴并御诗表

臣某言泰時庆成方均於涣渥薰弦濬发爰播於声诗叨拜赐以知荣顾扬言而靡称中谢伏惟尊位皇帝陛下顺承天则懋建民中包举艺文化成於绵?肃恭祭祀诞受於蕃禧近者祇祓斋輿朝修真馆奉萝图而展采藏金刻以着诚爰饮至於帝居遽涓辰於郊报園坛备物奉二后以侑神紫幄受厘眷万区而均佑仰体需云之象俯推湛露之恩玉笋芳醪合多欢之允穆栢梁高韵宣介祉之无疆函四始以飞英协六同而振律缉熙王度焕衍帝谟臣等谬备枢机亲逢旦暮章天睿藻幸传宝於私门堙耳庸音媿赓歌於圣域共循芜累预积兢慚

代东枢相公谢生辰礼衣器币鞍马表

臣某言宠私俯被荣锡有加拜赐已还揣躬增惕中谢伏念臣声猷素浅器识非长幸会亨嘉遇承甄獎奉枢机之密命参鼎鼐之崇名循举旧章莫建将明之议蒙成睿算但增忝昧之忧岂谓宸衷俯记生日特令贱息肃将朝恩骏駉兼衣荣增於琐质织文钿器庆集於私门载念无能尤增内讼兹盖伏遇尊位皇帝陛下法天垂覆体道延慈式眷近司务推优渥功微赏厚固无可报之阶恩重命轻唯励自公之节兢惶感惧倍百常钧

谢赐地宅表

臣某言皇慈振惠夏屋定居仰戴恩私伏增陨越中谢窃以齐招贤士宅於康庄之衢汉宠列侯赐之甲乙之第盖国家之茂典寔臣子之殊荣伏念臣世绪单平艺能浅拙岂谓圣明过听简拔踰涯待罪枢庭俾虚於官谤兼荣鼎席莫允於民瞻顷者初玷朝闕肇营私第前瞻太室密迓闕宫常戒前驱靡容呵止然尚忧於器杂或有瀆於靖渊加以寒族渐多聚居颇窄属导河而环水泊倚城而建门仰昭事之载严弥退思而增惕将恳求於更次遂载浼於凝旒曲承造化之仁俯遂萌生之欲特颁爽塏仍俾修营自顾何功重劳庶役矧屡烦於睿旨命催督於攸司曾未踰年於兹成室率六亲而乐止展四体以安居面大道以甚崇近北阙而知宠边陲无事虽慚去疾之辞退避未遑猥奉五伦之赐敢不夙宵誓志后处怀恩永输蝼蚁之诚上报乾坤之施

文庄集卷十

卷十一

钦定四库全书

文庄集卷十一 宋 夏竦 撰表

代宰相谢加食邑表

臣某言褒司进秩实骇於輿情车府露章莫囿於成命拜受只竦凌兢失图中谢窃以昔建地官实司邦教商周之际或在於元卿汉魏以还颢居於三事倡导九牧安协兆人古之多材尚不求备况臣人品庸菲世绪单平不意逢辰遂踰始望禁林赞画微深厚之训辞枢府备员乏怀柔之上略而自参承四近师长百工赞相盛仪布宣能事奉行睿旨既昧於将明循举旧章抑多於忘误虽曲成於大庇终莫允於羣瞻乃者只奉丝言总司金匱约编年之旧体颂先圣之鸿徽广记备言并资於羣士兼条总贯皆稟於孝思臣有何功成兹大法岂谓误膺赏典遽忝从臣载益爰田仍加真食外廷诞告有位震惊诚以名器隆高非假人之物年华迟暮岂昧进之时纵靡恤於羣言亦何安於心曲繇是恳陈奏牋愿寝异恩涣汗难收惧重烦於睿听凌兢载省实交悸於营魂此盖伏遇尊位皇帝陛下尊宠时文褒优近列对越祖宗之德铺观堂陛之言是敦图任之仁靡责当官之效地崇礼絶既有膺以徽荣恩重命轻愈无阶而报国但誓桑榆之景仰醺天地之私

代仆射相公谢宣赐药表

臣某言伏蒙圣慈赐臣抱龙丸解毒丸厌热解躁金露丸苏合大丸白散子共一合者星使俄临天言诞布灵药爰颁於三品微軀曷戴於鸿慈捧受兢荣罔知裁处窃以元霜绛雪纪汉武之幽经五色一丸着魏文之嘉咏谅匪仙风特秀冲气惟和则何以分金竈之刀圭减青囊之铢两如臣者性惟至懵知不及中饮水虽欲於自清负薪素惟於多病万几之务祇稟於睿明四体之勤实慙於疏缓伏惟尊位皇帝陛下渊通妙用啓迪休祥推神农尝药之仁布武王?櫬之惠曲回久照优宠近司属兹清暑之余虑鲜摄生之术九龠之丹甚秘太一之散惟神载加亭育之私併示便蕃之锡玉音是谕温纯深厚以何胜宝剂初开郁烈光辉而尽在仰圣人之修练辨太医之苦良珠颗累累配合欢而蠲忿玉尘皎皎泛华液以安邪岂唯去瘵以涤烦将俾轻身而难老臣以谬承任遇殊乏弥纶荷予赐之斯来实亨嘉之攸会策疲弩而自励顾涓勺以何施慎守靖恭敢忘报

谢赐药表

臣某言钦膺睿旨伫诣於真区祇荷鸿私特颁於妙药兢荣并集啓处不遑中谢伏惟尊位皇帝陛下慈惠临人寅威顺则受皇穹之密命集帝者之上仪式眷鲁邦实惟福壤纪始祖降灵之迹建黎元祈福之宫侔曲密之威神方严於胥宇致中宸之精意将达於惟馨臣猥奉畴咨俾承禋荐实退忧於庸拙莫上体於斋明爰从受命之初以及治装之际过承临照尽烛幽微

顾优假之踰涯方怔忡而靡措岂谓宸慈逮下宠赐洊临绦雪灵腴极太医之上品良金钿器兼内府之奇珍载循臣子之微生曷报君亲之厚意唯誓增於勤瘁用仰副於钦崇感惧周章倍万常等

代仆射相公辞加恩第二表

宠私非据爰贡於露章宸听盖高未收於出綍揣躬内讼局地端忧中谢窃以汉肇仪司任隆於元老魏崇开府宠茂於勲贤泊食采之增封并畴庸之异数自非协宣庶绩登翼远图厥有大劳靡符公议如臣者幸逢运会滥预官常本无异衆之材止窃代耕之禄岂谓圣明过听简拔踰涯用师长於百工俾陶甄於至化蒙成帝力虽靡责於谟明遑恤人言常动貽於官谤此者伏遇皇帝陛下寅威道海包举礼文曲里朝真诏百灵而奉蹕圜坛报本尊二后以侑神治大赉於中区峻宠章於近列顾何功而受赏难昧进以徼荣况臣执秩崇阶器名已重爰田厚赋封食尤多屡省无能方图避位岂可更贪渥綍自速满盈爰稽锡爵之文愿寝自天之命遽膺尺诏未允寸诚须继瀆於惟聪冀稍寛於若厉伏望陛下曲成垂裕从欲推仁申飭攸司追还恩制是则臣无虚受式敦止足之风赏不失劳永叶中庸之道周章恳到得请是期

中书乞免和御制述怀诗表

臣某言宸章寡和继沥於恳诚睿听盖高未颁於俞旨载循浅拙弥积兢惶中谢窃以虞舜股肱之歌才盈数句汉皇日月之唱止及七言故士师拜手而乃赓羣后登台而奉诏若乃圣辞玉振睿思渊冲溢鸿藻於缣緌宣大猷於风雅盖天资之有素固臣和之无阶伏惟尊位皇帝陛下盛德惟新多能攸纵奉先成裕仪孝奏於皇穹典学宣精懿文明於圣域矧属清闲之宴诞彰雅正之音述帝迹之肇基叙真游之降统祖功宗德敷混一之英声帝籙皇图迪重熙之景命至若合祛鲁岳巡察魏雎延颺驾於中宸荐令芳於曲里商丘经邑昭纪於诒谋阳位钦柴只严於陟配敷宣悉备包举咸周陈王业则七月之章告成功则清庙之什载行事则二帝之典记礼容则三代之文理絶名言事超象系爰私传密俾预赉扬臣等幸会亨嘉谬尘倚注覩流晖於云汉已极殊荣继絶倡於阳春岂容轻议况惟顽陋并乏艺能披縢而媿汗交流承命而营魂散越爰恳祈於矜免终未赐於允俞若宝句非多稍知於睿式则芜音是竭仰副於清衷盖以縟彩星繁嘉言天远韵金相而累百画鈎婉而且千捧闕而涉海无津只诵而崇朝未徧冠古今而复出与造化以相侔六乐均和岂待么弦之嗣响三辰宣丽顾容爇火之沈荧庶少息於周章用曲全於蚩鄙扣阍沥恳得请是期

枢密院乞免和御制述怀诗表

宝思渊冲嘉言天远仰圣谟之攸纵固臣和之无阶闻命已还周章失措伏惟皇帝陛下钦明顺则濬哲宣英考古道以建中观人文而化下属垂衣之无事惟典学以游心式运宝跗裁成睿倡序开先之密命昭丕变之鸿基二后在天播太宁之鸿烈三灵锡祉宣善继之大猷若乃云岱勒封河汾展采奉元真於秘殿陈嘉荐於名区画千里之畿纪兴王之奥壤奏九成之舞拜灵贶於嘉坛经纬兼该广大悉备布昭事实坦然尧舜之书丕显形容穆若商周之颂总百

王之能事流亿载之英声爰出示於枢司俾仰赓於帝制伏念臣等遭逢有素讽赋非工虽久奉於文思终莫移於顽陋况震雷之飞响固衆籟之销声岂容燭火之辉更续太阳之耀敢期宸造俯恻非才曲示保全特垂矜免庶靡彰於蚩鄙用少息於兢惶誓坚尽瘁之诚仰答包荒之德

宫使乞降御制御书表

臣某等言伏以西崑之府实祕於帝文小有之天或藏於龙篆惟密都之肇啓而睿制之未頒敢俯罄於?祈庶永谐於传宝臣中谢伏惟皇帝陛下绎清心照濬发天资典六学以宣英总三才而观奥爰自奉符梁趾瘞玉鄴丘按金辂以省方诣殊庭而尊道历上仪而悉叙铺往烈以咸观焕衍苍崖馨香翠琬以至诞敷瑞命挺纪先谟着论辩之格言发慈悲之大愿或冠篇於艺圃或度曲於薰弦横汾水以摘辞坐栢梁而传唱青绡屡溢藻简常盈名以万殊盖百王之能事理惟一贯乃五教之彝伦固已包举国章发挥政本勉谕勤请尝下济於私门敦励时风已载刊於东序岂琳宫之允备而凤蘊之未藏式揆羣心尤为阙典伏望圣慈特赐御制御书应曾出赐臣寮者各一本於玉清昭应宫集禧殿左右严密收掌许道衆观仰今後御制并乞降一本令本宫编次是冀敷宣茂实演畅真詮游钧天者闻广乐之音登阳谷者识若木之采百灵潜卫伫集於颺轮太一下观将传於月笔誓共谐於诚诵期永播於无疆

谢赐御制宠行诗表

臣某言真区将命方戒於修岐鸿藻宠行亟頒於宝句仍容赓载倍积兢惶中谢臣闻承元首之歌有虞所以戒羣后赐威凤之赋太宗所以獎勲臣实旷世之殊荣固逢辰之至幸恭惟尊位皇帝陛下通微作睿宣哲亶聰懿文德以化人积精衷而顺帝昨以仙游报降道海昭彰纪令节以惟寅范晬仪而有穆爰考降灵之地实当保鲁之封仰体密都肇营恭馆庶工缔构方程睿密之规上圣钦崇将達齐明之意臣获膺朝旨恭荐令芳咫尺威顔乍违於幄坐昭回烈采遽賚於云章显尊祖之孝思绎多能之睿意薰风流韵承露均和仍推逮下之慈曲軫遵涂之念沥丹诚而拜赐曷报於恩私竭累气以扬言尤增於战越周章感激倍万常钧

谢御制和诗表

臣某言飞霄宝句方极於游扬堙耳庸音误陈於叹咏曲荷大明之德旁流下济之辉祇诵兢荣罔知攸措中谢伏惟尊位皇帝陛下九功成裕六学宣精祖武宗文允隆於继述尊道贵德务极於钦崇以是景贶有开元符申锡丕显齐明之志讲求希阔之文苍璧黄琮载扬於圣统颺轮藻卫遽接於仙游诞昭长发之祥茂降聿怀之福精衷滋励景命惟新宝缕凝祥肇开於节令玉书先道将欵於真祠载严昭事之规爰着颂宣之作运宝跗而绎思披緑蘊以游心妙神化以为言协洞章而成韵灵场夜诵初贊於纯禧魄宝下观亟彰於美应臣幸斋恭馆获听妙音穆王瑶水之歌意殊於只畏武帝交门之曲事异於朝修载惟渊妙之辞深贯希微之指爰陈陋倡仰纪鸿徽顾芜累以为忧实兢慚而失次岂谓有来斯应务洽於至仁无言不醕靡遗於庶物俯答击辕之响载流章汉之辉昔者继元首之歌但见赓扬之盛赐威凤之赋本无

属和之荣夫何孱庸被此优渥敢不誓心金石竭虑夙宵报圣明尤异之恩尽衰朽顽弩之力
怔忡战越倍万常钧

谢表

钦承温诏靡允丹情仍俾断於来章重难烦於睿听黽俛只戴周章失图臣某诚荣诚感顿首
顿首窃以节制诸侯实隆於阍寄平章庶务允正於台衡苟文武以兼资乃人臣之极致自非
功高命世德重端朝则何以仰副帝俞俯谐民听如臣者行非中矩学不传经爰当筮仕之辰
止冀代耕之禄不意妄阶荣进误践亨衢两朝日月之晖继叨於三接二府钧枢之地并遂於
再登莫广益於大猷徒宴安於高位载惟昧进常虑疾颠方避宠之是图冀变盈之可追岂谓
遽膺纶綍特授旌旄仍兼秩於鼎司复增封於采邑省循所至震悸尤深敢将有腼之颜更窃
无功之赏爰再通於奏牍愿必寢於徽章何期涣汗之难收敢不怔忡而祇受此盖尊位皇帝
陛下仁惟宥物道在包荒简自清衷俯推茂典盖靡拘於常牒用特耸於荣观命等鸿毛固无
阶而报德心同白水唯没齿以衔恩感惧兢荣倍万伦品

谢所撰内藏库记刻於御制碑陰表

臣某言伏奉勅命以臣所撰内藏库记刻於御制碑陰者奋睿藻於鸾龙特俞勤请勒庸音於
金石曲示鸿私仰荷恩荣何胜陨越中谢伏念臣辞惟芜累学不详明幸际会於昌辰获叨坐
於美任昨以增修帑藏诏令撰述记铭遂擗朽以成文遽杀青而奏御恭以国之内府九贡所
登必须镇以乾文千龄共永亟削章而陈请俄出綍而允从伏见神笔金相天才云焕韵六同
而合律懿五色以成章经纬古今发挥造化多士莫闕於圣域下臣敢望於清光岂期尚采庸
虚过垂优假俾録雕虫之作仍刊翠琰之陰虽日月所临燭火尽消於光耀奈英茎在上郑声
愈觉於滔埋念藏拙以无从荷包荒而有素更励倾输之节少酬乐育之私

代人生日谢恩表

臣某言君赐克临私门增耀戴揣庸虚之质罔胜宠异之私拜捧已还兢皇失措中谢伏念臣
时才素浅学术非长徒以际会鸿名叨承枢近岩廊充位但循奉於成规武帐承顔莫将明於
大政实素飡之滋久常内讼以居多岂谓尊位皇帝陛下道广含容仁深亭育体堂陛务高之
意极君亲逮下之心每优假於恩辉庶保全於短拙洎临生日曲记清衷命幼息於公朝奉皇
恩於私地兼衣骏騄既极於殊荣嘉币良金弥彰於异礼曳娄非称捧戴何胜负山而蚊力失
疲向日而葵心自切敢不竭诚夙夜立効涓埃誓坚持节之心遥上捧觴之壽

代人进礼成宴诗表

臣某言伏以福時报终方颁於宴衍宝跗宣丽爰播於珍祺叨仰止以为荣顾乃賡而多媿伏
惟尊位皇帝陛下清明有度聪哲惟新祇奉緑文恭朝於真里钦陈苍璧茂对於景灵方袭吉
於严宸遽示慈於折俎仍播栢梁之高韵式昭宣室之蕃厘焕二帝之上仪总百王之能事臣

等幸陪鹄序获赐云章徒荣测管之闕敢继钧天之韵但强抽於軋思用仰瀆於凝旒腴媿兢惶陪万伦等

代人谢弟端授官表

臣某言伏蒙圣慈特授臣弟端将仕郎守颍州万壽县主簿者庆流霄极宠被天伦感惧所深心顏靡措中谢伏念臣艺能浅昧胄绪单平幸会休期妄阶荣进加以朝无近戚世乏先畴老幼聚居尽资於廩禄甄陞非次皆出於宸恩常自誓以丹情冀少伸於刍効而夙宵一志中外十年纵励顓蒙絕无规益岂合近持私恩更瀆惟聪盖以臣弟端年已长成幼同艰苦先臣尽节顾遗体之可矜母氏垂年实鍾爱而斯甚是用仰援赦令遽奏封章载揆僭踰尤深震栗岂谓伏蒙皇帝陛下曲垂寬宥深恻上仁濬发德音亟延赏典特宠私於微物用俯激於忠规命等蜂蛾虽莫醺於恩重志怀霜雪誓共率於官常庶倾尘雾之诚上报穹旻之施

代人陈乞为父修神道碑表

右臣辄沥恳诚仰干睿听退循僭易俯积兢惶伏念先臣贈某官某本以遭逢累尘事任蒙圣明之过听膺命数以斯隆大化俄临昌辰难恋荷皇慈之恻下丰賻贈以饰终顾荒隧之已封而温珉之未勒将周施於事实必繫屬於时才其神道碑欲望圣慈特命某官修撰所冀幽局不昧俯旌游岱之魂宰木增辉永示漏泉之泽苟俯从於哀恳唯仰戴於宸私激切周章期於得请

笏记

谢恩笏记

皇子新授具銜臣某言伏奉制命特授臣前件官者伏念臣幸膺真绪获奉皇慈大庆方成鸿恩曲被仰荷眷怀之造永坚忠孝之心

文庄集卷十一

卷十二

钦定四库全书

文庄集卷十二 宋 夏竦 撰对策

崇政殿御试贤良方正能直言极谏科制策

皇帝若曰朕克谨承先训惟怀永图期化成於人文实顺考於古道尚虑视听不广心志未明寤寐增勤忠规是伫所以博延髦士庶获嘉谟昔姬德之隆周官爰作建中立极经世惠民乃致颂声以措刑辟王风不竞战国交兴理贵从宜俗多变古炎汉政令十志粗存有唐宪章六典备载既沿革而不一亮损益之可知曲礼三千经礼三百虽难尽举聊为敷陈施之於今往古之事何允揆之於古方今之法孰非当商榷其大猷无自执於小道仲尼之志在乎春秋考旧史之文明将来之法授经左氏发凡变例善恶必显惩劝在兹由是後王遵为彝训至若朝聘祭祀之礼刑赏兵农之政君臣励翼之蹟官司寅亮之辞或可举而行当直书其事惟菁英而是取顾糟粕而罔陈六籍之存日星是喻百氏之说燭火攸同恶实尚华寔繁厥类斲雕为朴岂无其时欲使荐绅之民并宗经术青衿之士专习圣言能黜异端渴闻说论贡举之设茂异斯求爰自唐朝独考辞赋虽云小辨破道壮夫耻为然而定妍否於有司观工拙於作者苟或舍兹衡石诚虑失之毫厘将俾俊乂用章文风丕变其用何术以副虚怀礼有四民农居其一书有八政食在其中务劝力耕亮由薄敛或轻其赋调即邦家之用不充或重彼科役即编氓之力弥困至於榷酤之法关市之征将以惠人亦思省去复虑经费不给游惰浸多盖欲蠲复民租不禁山泽而使野无旷土府有羡财下靡趋於末利上益丰於储蓄必有说也宜无隐焉宰字之任蒸黎所托在乎铨择尤所注怀亦尝阅考绩於明廷听保任於端士暨於莅职继以败官或边幅罔修簠簋靡洁或佩韦罕诫冠虎是侔虽国有常刑然民已受弊今若峻其督责必兴叹於凝脂缓彼简书将漏罪於疎网水火相济琴瑟更张尔其谓何子实翘想缅惟致治诚在得贤每恐下僚寔沈英彦或以类举或自荐陞负廉隅清白之名常从加等驰干蛊端方之誉亦示峻迂然而鲜覩徇公颇闻滥进始由朋党终陷刑章言念於兹夙夜无已欲使怀材者必达荐士者絶私奏牍上陈美恶可复爵赏下降名实罔违极言澄汰之方用资宵旰之虑矧子大夫蕴蓄器业洞明政经副我详延森然就列靡悼後患咸罄昌言

对曰臣闻百王公共不易之道者惟谏而已矣古者致治之君莫不欲良臣在廷忠言日至揭进善之旌设敢谏之鼓太史陈诗以刺百工执技以谏暨汉孝文二年始下贤良之诏开纳言不讳之路延直诚切谏之士访天时之灾异问朝政之阙失国家宅有神器五十年间上无逸德下无遗政而陛下尚虑视听未广心志未明高张六科躬访时事诚臣以济民利国之策干陛下之秋也臣生逢太平幼读方策覩盛衰治乱之际未尝不愤悱而握卷闻忠蹇鯁直之风未尝不激厉而抗节今幸以区区之学应直言之召有司不以臣之不材升之於相府三公不以臣之不材进之於外廷陛下不以臣之不材问之於丹陛敢不抉胷膈之所虑尽耳目之所见谨昧死上对制策曰昔姬德之隆周官爰作建中立极经世惠民乃致颂声以措刑辟王风不竞战国交兴理贵从宜俗多变古炎汉政令十志具存有唐宪章六典备载既沿革而不一

亮损益而可知臣闻周监二代文物周旋姬旦践阼宪章昭备诏六官以政令建五等以亲贤礼行三雍法垂象魏故文武创业而臣工作颂成康致治而刑措不用洎平王东迁皇纲解纽黍离之什下列国风尔後九鼎渐轻七雄分竞强吞弱吐干戈日寻合从连衡谈说锋起至有变衣裳以从俗峻法令以任权轻忠信而重要约坏井田而立阡陌官不择行而择言爵不尚贤而尚贵事叛於古败乱相乘洎秦鹿野死汉龙天飞萧何约九章之法叔孙制縣蕝之礼律历精密於盈虚郊祀周旋於坛塹分郡国以王宗支制歌舞以象功德殊庸茂实际天接地故朝廷之制十志在焉洎三国分土礼乐无主垂数百载而唐有天命房杜议其律令马周陈其法度致太平於贞观制礼乐於开元分爵九等品有正从故职官之制六典备焉今陛下问其沿革询其损益其将有所发於天下也臣愿朝廷鉴历代之所短举唐汉之所长文者损之急者寬之过者抑之不至者进之则古今之美无不济於下矣制策曰曲礼三千经礼三百虽难备举聊为敷陈施之於今往古之事何允揆之於古方今之法孰非当商榷其大猷无自执於小道臣闻先王本太一之道观羔雁之象制威仪三千礼仪三百所以教天下之恭让闲万民之非辟聊敷其要盖有五焉记曰礼时为大顺次之体次之宜次之称次之尧授舜舜授禹汤放桀武王伐纣时也天地之祭宗庙之事父子之道君臣之义伦也社稷山川之事鬼神之祭体也丧祭之用宾客之交义也羔豚而祭百官皆足太牢而祭不必有余称也若穷礼乐之沿革揆古今之得失则上世帝王不相沿袭功成作乐治定制礼虽从宜而立法必师古而可久国家受天承命造我区夏远观八世之典近取开元之制文物之盛流芬简策但太常工师或怠其习朝廷服章未明其列珎璜之声不闻豆笾之器罕用鉴往观来其仪可见今陛下富天啓之资有承平之业固当制礼乐易服色定官名发号令建中於千古之上立极於百代之下则泥金勒玉不足记其功德矣制策曰仲尼之志在乎春秋考旧史之文明将来之法授经左氏发凡变例善恶必显惩劝在兹由是後王遵为彝训至若朝聘祭祀之礼刑赏兵农之政君臣励翼之蹟官师寅亮之辞或可举而行当直书其事惟菁英而是取顾糟粕而罔陈臣闻周室将微诸侯叛命圣人有作王文爰啓发周公之凡例载鲁史之行事笔削既至臣子皆惧故为列辟之彝章王道之準的汉氏有命斯文盛行朝廷诏诰公卿章疏必引经传为事规矩故历祚悠远法度可观尔後中原多故编简不完有国之君不遑逮此国家兴起四方穆清治本建藏书之策立讐校之官陛下旰食视事乙夜观书故下问小臣以大义抉六经之奥秘观百王之明睿臣幼习史氏颇详其学以为丘明之传繁富而诬臣请以经义条对如左臣闻朝以修制聘以结好时会以发四方之禁间问以谕诸侯之志表着以昭序玉帛以修贄考其道则在乎明班制而不僭整威仪而可观动必以礼不失其物臣谨按春秋书春滕侯薛侯来朝者天子无事诸侯相朝书时者美其正也书荆人来聘者荆夷狄也书人者美其始能聘也书介葛卢来而不书朝者以微国不能行其礼也臣闻祭以追养祀以馭神圣人为能飨帝孝子为能飨亲外则尽物而献诚内则尽诚而献礼备其馨香奉以珪璧然则祭不欲黜黜则不恭祀不欲烦烦则不敬谨按春秋书春正月己卯烝者讥其数也书夏五月丁丑烝讥不时也书犹三望者犹者可止之辞也讥其不知礼也臣闻刑赏者国家之二柄也馭其有罪则有刑赎废夺语曰齐之以刑书曰金作赎刑周礼曰夺以馭其贫废以馭其罪懋其有功则有爵禄车服周礼曰爵以馭其贵禄以馭其富书曰车服以庸盖刑者所罚寡而所戒衆赏者所费小而所劝大故古者刑以秋冬象天之瘁物也赏以春夏象天之惠物也然则刑之大要在乎去奸宄奸宄不去则罚失矣罚失则濫濫则民不从矣臣谨按春秋桓公之世经不书王者讥上之不能讨其罪也赏之大要在正礼制礼制不正则劝失矣劝失则僭僭则民不服矣臣谨按春秋

云王使荣叔来锡桓公命书来锡者讥赏不正也臣闻古之兵制大夫有车百乘诸侯有车千乘天子有车万乘所以威四夷刑奸宄也必先教之以礼而後讨之以罪故先王之制甸服者祭侯服者祀宾服者享要服者贡荒服者王有不祭则修意有不祀则修言有不享则修文有不贡则修名有不王则修德序成而不至则修刑於是乎兵有常矣後之王者奉之能行其礼能守其正则得其道矣臣谨按春秋书甲午治兵者美其得礼也书作丘甲者讥不正也臣闻古之农政夏后氏五十而贡商人七十而助周人百亩而彻所以供宗庙备车服必先限之以田而後取之以赋先王之制建步立亩六尺为步步百为亩亩百为夫夫三为屋屋三为井井方一里是为九夫八家共之一夫一妇受私田百亩公田十亩输虞衡之税供车马之赋於是乎农有常矣後之王者奉之不妨其时不失其正则得其道矣臣谨按春秋书新延廩者讥不时而悉农力也书初税亩者讥不正也至若君臣励翼之蹟官师寅亮之辞考於左氏之传寔繁大夫之对然非圣人笔削请以经义言之夫君臣励翼者在乎尊卑不黜上下不僭罪不妄诛刑不妄加兴灭国继絶世春秋之义尊不亲小事卑不专大功谨按经有称人以杀大夫者讨有罪也称国以杀大夫者罪累上也经有书夏灭项而不言何国灭之者为齐桓公讳也春秋为贤者讳桓公尝有继絶存亡之功故君子为之讳也夫官师寅亮者在乎夙夜儆戒靖恭其位贤愚有序贵贱有列安邦国利万民春秋之义用贤治不肖用贵治贱谨按经有书秋公子结媵陈人之妇于鄆遂及齐侯宋公盟书遂者美其有遂事也春秋之义大夫受命不受辞出境有可以安社稷利国家者专之可也制策曰六籍之存日星是喻百氏之说燭火攸同恶实尚华寔繁厥类斲雕为朴岂无其时欲使荐绅之民并宗经术青衿之士专习圣言能黜异端渴闻说论臣闻经纬天地莫大乎六籍诗书标仁义之府礼乐立教化之表春秋五始以载褒贬大易四象以观情伪从之则为正直为圣贤叛之则为奸乱为聋闇万代而下宗为格言然而去圣逾远诸子锋起各因文而述志或希圣而扶经至汉孝成帝时已八十余家矣尔後作者纷纭竞为闳诞违叛正道桢泯斯文致学者之多歧遂务华而舍实陛下注怀坟索将抑百家文明之朝如转规耳然臣以为焚之则为非法不若化之以道教之以正自今而後凡朝廷诏令之文贡举诗赋之目毋用诸家之语必以六经之义上之所好下必甚焉是以辐员之内庠序之间不禁而自絶不令而自从竞讽周孔之言共排杨墨之语谅不数岁尽变其风洋洋乎雅颂之声可以翹足而待矣制策曰贡举之说茂异斯求爰自唐朝独考辞赋虽云小辨破道壮夫耻为然而定妍否於有司观工拙於作者苟或舍兹衡石诚虑失之毫厘将俾俊乂用章文风丕变其用何术以副虚怀臣闻王者不能独治天下必择良能而共之故公卿大夫必选於俊乂俊乂必取於多士四代荐贤诸侯立三适之制两汉求士公府有四科之选得贤之盛无以踰之魏晋已降南北离割其间制度无可纪者隋室立进士之科李唐崇大其选国家龙兴亦循其制网罗贤俊时号得人若辞赋之试声律之限盖非古也而取一时之工焉陛下必欲革之而取茂异又何患妍否之难定哉臣以为今之取士其甚可疑乡举里选之制未尽明察言观德之规未尽复夫乡举里选所以择其行也而寄贯冒籍者有焉察言观德所以择其材也而矫厉虚誉者有焉所以荐贡之始不能皆知其行明试之际不能尽择其文以是爵命之间不能无滥臣愿陛下先明乡里之制次谨言德之规然後试以策论考其康济非经意不得以对非常道不得以言则清浊自分才德可辨文风丕变又何远乎制策曰礼有四民农居其一书有八政食在其中务劝力耕亮由薄敛或轻其赋调即邦家之用不充或重彼科役即编氓之力弥困至於榷酤之法关市之征将以惠人亦思省去复虑经费不给游惰浸多盖欲蠲复民租不禁山泽野无旷土府有羡财下靡趋於末利上益丰於储蓄必有说也宜无

隱焉臣聞語曰百姓足君孰與不足百姓不足君孰與足故先王敷政設教惟務富庶藏財於民取之以道府藏益而國用充元元安而百姓遂國家仁惠周普刑政簡清但財賦未充管榷未罷其故何哉臣以為務農之制足食之本歷觀前世蓋有道焉三代之際其詳闕矣姬嬴而下莫盛於漢臣請為陛下以西漢之事言之夫漢當文景之際民田三十取一而侯王分土各食其租關梁緩征算之制民間有斗酒之賜四方常貢其入至寡而太倉之粟流衍而露積京師之錢貫朽而難校守閭閻者食梁肉阡陌之馬成羣今國家地廣前代履畝而稅山澤舟車之賦鹽鐵筦榷之利一歲之入十倍漢初而用度豐盈未能相當其故何哉豈非游手未去重職未省冗兵未減仙釋未戢曠土未開珠玉未棄游手未去則趨末牟利之弊未盡止重職未省則稍廩供億之費未盡節冗兵未減則糧餉優給之用未盡一仙釋未戢則邪偽蠹耗之源未盡閉曠土未辟則耒耜禾黍之利未盡獲珠玉未棄則梯航掇采之路未盡塞是以南畝之民執耒而耕者无多人矣故陛下虽躬行节俭忧劳日昃而制其岁用则尚有未丰议缓征算则将行复止者良由是矣愿陛下禁游惰以沮劝之典并重职以简易之道去冗兵以稽閱之法抑仙释以正直之规开曠土以优复之令弃珠玉以俭素之教则官府之用充仞而山积亿兆之生敦厚而日富丰食之道又何难哉制策曰宰字之任蒸黎所托在乎铨择尤所注怀亦尝閱考績於明廷听保任於端士暨於莅职继以败官或边幅罔修簠簋靡洁或佩韦罕诫冠虎是侔虽国有常刑而民已受弊今若峻其督责必兴叹於凝脂缓彼简书将漏罪於疎网水火相济琴瑟更张尔其谓何予实翹想臣闻生民之命系乎县邑故进任宰字在乎择人当进者进则法令明政教达奸宄絶私谒息不当进者进则王泽壅刑辟滥邪伪起苞苴行故古者仕不妄进臣不虚受盖恐下民之受弊於匪人也国家之制与古齐圣而州县之吏率多暴慢不求洁白之名罔垂缓急之戒其故非他也盖吏道颇杂贡举未正士则累塲籍以求第而不问其材吏则叙久次以求迁而不问其事未尝择行於三铨但见分命於百里君子或淹久而後进小人或夤缘而先达复循唐氏流外之制盛开百司恩泽之路选调既集皆补令佐蚕食元元干冒宪网详观其弊良不远此况复考课之法未尽行论荐之科未尽至按察之使未尽公激劝之赏未尽重臣愿陛下因革百王详观两汉采诸家考课之法而明其殿最严百官论奏之典而禁其趋附选天下公正之士出分八使之车擢州县循良之吏入补金闺之籍是则黄绶之间竞为良善又何有凝脂之叹疎网之虞者哉制策曰緬惟致治诚在得贤每恐下僚实沈英彦或以类举或自荐陞负廉隅清白之名常从加等驰干蛊端方之誉亦示峻迁然而鲜覩徇公颇闻滥进始由朋党终陷刑章言念於兹夙夜无已欲使怀材者必达荐士者絶私奏牋上陈美恶可复爵赏下降名实罔违极言澄汰之方用资宵旰之虑臣闻王者前旒垂紘无为而治必举贤哲用为股肱故类举之典君子所以达己知也自荐之制英主所以拔寒畯也皆有国之规矩求贤之轨辙然则类举不正则朋党者达自荐不实则僭滥者进必在乎以经义而制之谨按春秋书吴子使季札来聘吴夷狄也称子者善使贤也故进之春秋之义身贤贤也使贤亦贤也又按书云举能其官惟尔之能而今之论荐或非经意保任之法颇重得贤之赏未行夫经以使贤者为贤举能者为能若举状谬者既黜举状实者未旌则贤能之士何以劝励夫贤能不劝则为善者怠为善者怠则欺妄者进矣於戏自荐者权也古者帝王虑臣下妨塞贤路乃为之制在陛下载之而已若类举者道也一日废之不可伏愿陛下所信任者各举所知则栋梁柱石有余材矣然则国家之大柄王者之利器赏罚而已陛下明其科条以驭荐举不容应侯籍橐之请而举胥臣先茅之赏是则怀材必达荐士絶私可以复其美恶而不违名实矣臣诚不佞罔知忌讳叨备清问忧惶局踖但幸遇陛下设直言之科臣应极諫

之召圣策许臣靡悼後患夫贱士之虑思补圣政万分之一惟陛下少赐宸览宽其鼎镬则昧死幸甚臣谨对

文庄集卷十二

卷十三

<集部,别集类,北宋建隆至靖康,文庄集>

钦定四库全书

文庄集卷十三 宋 夏竦 撰进策

议职官

臣闻官必正名职惟守器稽考古道职官惟称自云纪火号之立龙名鸟氏之设则有司存各供王事尧命羲和分掌四岳舜陟帝位官名攸序司空以宅百揆司徒以逊五品士典刑服虞掌上下秩宗以主三礼典乐以谐八音垂若予工龙允朕命夏商官倍其名罕见五长分治万国六卿咸主军事官告陈於左相百官听於冢宰姬旦践阼宪章昭备太宰授之以治法地官责之以教象宗伯主礼司马布政秋官主典刑之任冬官司考工之职凡百有司皆正服位春秋列国陪臣命秩亡秦尚首商君立爵祖龙姁佗多设官名刘氏因缘遂成典故若汉官之制定名於禄百石而上差等十六或中或比颇正序列魏文盗汉乃设九品拓跋乱华爰分阶从梁氏置戎号之官隋室广殿中之任其间南北离割羌戎猾乱兵革荐仍礼乐无度官以渐替职亦旋失有唐启祚创置相因逮其末龄官号滋杂姑息将帅多加使领五代因循官次相迁国家削除前弊稽考故实损益沿革时谓适中但百执承事理有可疑建官分职职与官殊量材受爵爵与材异或隶官棘寺翻司大仓之粟系职青宫乃主关市之征或呼为博士不通章句之学号为著作罔知笔削之事或终年典礼未闻因损之议连岁执法詎有弹劾之号或明於科律不登谏狱之司长於规刺难希谏诤之列或寺人命秩於方牧降人受宠於通籍位以资升或过其材官以久迁或非其事人皆谓官为请俸之具位乃称呼之号名实相违不可以训语曰必也正名礼曰各司其局传曰惟器与名不可以假人又曰一日失职则死及之故宣尼嘉虞人之守官仲康罪羲和之离次盖官不易方守不假器陈力就列臣无虚受沐猴非戴冠之物方枘非圆凿之偶函矢之业不同庖祝之任有殊传曰其人存则其政举其人亡则其政息又曰国家之败由官邪也任官之道可不慎欤诚当稽尧舜之事行三代之法正其官司辨其职掌使上下之位无或僭差彼材彼技授之彼官此职此位付之此事位不以资惟其人迁不以久惟其材寺人可以厚禄而不可以峻权降人可以钜赐而不可以华资若守帑藏仓庾之物主监?督责之局可别制官号畀之典守隆皇宋之礼法敝守文之功业传曰名位不同礼亦异数周官曰以仪辨等则人不越盖任官惟贤不可不择名以出言不可不正择其贤则职举职举则政成正其名则事顺事顺则礼备立政自官始惟陛下悉念狂简寛贷万死则天下幸甚

慎爵禄

臣闻周官曰以贤制爵则民慎德以庸制禄则民兴功盖爵以待贤禄以待庸贤不及爵爵非其贤则民慢庸不及禄禄非其庸则民惰慢则废德惰则无功故先王重车服慎器名崇德报

功以教天下国家鉴三代典章采汉唐故事文质彬彬不远中道在於授受犹有所疑何则王者拨乱反正自家刑国贤哲并起攀龙附凤及其功成治定犹议贤而封计庸而赏岂有守文之君应天承祖恭嗣皇器而藩邸臣仆骤升清贵师傅之官赞佐之吏辅翼之功宜被宠擢而鞭綏之御导从之隶竞乘轺车争受命服岁月之间迁擢非次以新闻旧颇为无谓昔仲叔于奚请繁纓以朝仲尼曰惜也不如多与之邑唯器与名不可以假人其是之谓欤伏愿陛下崇不讳之德采狂瞽之议改立名制垂法万世使日月之光流被子孙

议选调

臣闻古爵五等裂地受封各命陪臣咸思俾乂秦灭六国分为郡县百世因仍遂废古制天下之治归州县州县之治归庶官历代以来实难其选设吏部之曹张铨品之官鉴裁不同处置各异自非毛玠之尚苦节陈羣之建九品山涛之识量任愷之忠直王泰之接待辛术之正明高孝恭之藻鉴裴行俭之博识欲其材器无遗与夺惟允虽悉诚竭力犹将不逮唐室之制入仕多门调选之间转为繁总格式既冗货贿滋丰九流遂失澄清官序遽成陵替国家膺天成命司牧元元分命庶官共治天下铨衡剧地公朝急务长定之格选集之期考课之规各有攸序奈审核注拟出入多涂请求之贿旁午如云令史之门衣冠若市贪夫优游於常调廉吏愤悱於选门能材且患於循资庸器自安於久次以至州僚县佐颇有废事旷官一吏不循千民失所盖吏部不勤慎择多士有旷精求负乘貽灾维鹵致诮纾民济物谅在伊人诚当委注贤明专干铨选竝稽往制择善而从但人数寡少则题品易至赇赂不通则转迁易公如其不逮抑之散地若有上材擢之非次无使恩出私门权归吏手则精麤可别劳逸自分但衆官怀僇俛之心即万国有治平之状

遏权要

臣闻禄不期骄而骄随之位不期势而势随之骄随於禄则请谒者行势在於位则附会者衆春秋则陪臣擅命两汉则外戚弄权或近习怙宠奸阉乱法故士重抗衡人安左宦直言陵折不辜伏次骨之刑回面阿从无功居当路之职魏晋隋唐其弊滋稔自非天生圣君代出良士虽峻其防犹或踰之国家应运革去前弊抑外族之权薄近臣之宠而犹肺腑之属请谒所先贵游之家声势相尚或身栖馆舍拾高科如地芥亲忝葭莩履青云如平地巧言枉道乍要好爵矫辞内任或忝荐绅君子不必以言扬贤才不敢以直进伏遇陛下丕奉天德威扬震耀日月之光洞达幽遐愿观狂言陰察时弊有犯无隐不任战惧

退巧宦

臣闻易曰玉臣蹇蹇匪躬之故诚以君子修身践言策名委质垂绅佩玉禄廩所丰虽夙夜忧勤尽瘁事国犯顔色触忌讳致君济俗犹恨无补况季世浇薄忠信凌迟以巧诈为良图以搢绅为美利司马安四至九卿汉君子耻其巧宦盖官业固殊商贩公朝岂尚谄谀直道事君三仕三黜与夫蕴畜巧心陰射上指致位卿相者岂同日道哉国家选用忠纯精求黎献中外辑睦远迩肃雍奈人心如面不能咸一或用取冗效而乖大体谋私利害而忘公家至有起自贱

微骤登官路强为明敏剖析秋毫事至细微动烦旒宸谋身千计媚衆多涂观古良臣颇殊於是虽陛下法象天道恢大皇纲拯恤齐民招徕谏诤而上下之吏巧宦尚多或滥施刑罚张皇威望修饰厨传沽买名誉或妄献谋画炫耀心计陰行宠赂构求荐举上负国恩下速民谤诚当广示询问深救弊讹抑退纖伪优用蹇谔稽复西汉之制岁驰八使之轮特遣英贤专任刚毅按行方国分验治状明赏信罚以御其下去邪决壅以苏其民使清浊派分远迩绳直则公家之惠膏润四海陛下聪明无远弗届

制流外

臣闻张官设吏求材审能官司攸叙百姓允治古者旁求隼彥周制论辨材能六国谈说受官嬴秦农战入仕汉则孝廉有道之举方正秀茂之科上计之制任子之令魏晋而降取士多门制度云繁官涂益杂唐革隋命因损旧仪置勲品九等自诸录事及五省令史始焉谓之流外由是府胥狱掾垂带拖绅名器忽矣陵迟官府莫之统一国家经始尚循唐制百司伎艺皆收之选网守当之名勒留之号归司出职颇繁有徒一命亲民多乖治状济其抗弊抑有成规盖府寺之吏书算之工因循久次不晓艺文及预官常何知政要可令申命司属各限通一小经选集之期量加试难少识前言往行必知乐善向方不惟文德庆敷由是苍生受赐愿观往古以适时宜

议国用

臣闻四代而下莫隆乎汉汉莫盛乎文景观乎国用亦以足矣古者什一而税汉氏行田或三十税一而锡赉勲戚动以万计牛酒布帛米肉之赐屡至民间是时子弟分食租税罕入县官匈奴寇边诸侯连祸兵革数起飞挽不絶官无盐铁之利门无舟车之算而民不告劳国用滋丰京师之钱贯朽难校太仓之粟腐败不食阡陌之马成羣守閭閻者食粱肉其故何哉国家开拓疆宇幅员亿万东南渐海西北暨戎内无列侯之国岁无民间之赐茶盐金铁之利水陆关市之征履亩而税酒而酤即山铸钱临海市舶一岁之入十倍汉初而用度区区未能丰美非事势不足抑取与之未至也夫民乐负贩俗尚奢泰十夫里居游手太半仙释之蠹巫覡之耗并兼之害吏胥之暴旦夕而有故元元争欲采山煮海执技列肆以邀美利怠弃陇亩未始禁之及其俗弊将若之何夫文景之世贱商贾通关梁上敦俭素之化下无佛老之弊去肉刑举贤良削父子相坐之律除诽谤妖言之罪耕籍田以劝农业降惠令以开民利减服御损郎吏惜百金於露台施瓦器於霸陵代驰道填兰池人无禁锢之律马无食粟之侈采金银珠玉者坐以赃盗论故人人自乐趣本去末服勤穡事百姓足矣君孰不足皇家休息四海五十年间遭遇陛下天意渊默圣敬日跻承二帝之基当文景之辰四夷拭目仰观太平伏愿鉴汉兴之事隆圣宋之业去无益禁游惰择良吏敦稼政俭以率下简以御物俭则用足简则文寬用足则财生文寬则俗阜春秋之义王者体元以居正体元足以御大中居正足以简嗜慾建大中则简自至矣节嗜慾则俭自至矣仿文景之治体春秋之义孜孜为善虽休勿休不十年间则国用充牣风俗敦厚仁义可行法令可措犹将与三代相上下岂止於汉氏之比哉

去冗制

臣闻经国以体驭贤以爵国以体立必也宏远贤以爵贵无或僭滥体国不大则制度丛脞爵贤不正则服位陵替仲尼曰惟天为大惟尧则之大体之谓也又曰惟器与名不可以假人正爵之谓也故善为国者存其大体而削其丛脞用其正爵而去其陵替然则大中之道行於典宪矣国家诞膺骏命奄有万国稽古垂法彝伦攸叙然承唐氏乱离之後拨五代分竞之基冗制因缘或未全去臣闻身被命服即为王臣除官授职必闻赐诰岂有卑品之官州县之职将拜丝纶之命乃输绫纸之钱有识之徒谁不堙郁况军国之用动以万计府藏之实何俟於此忍使壅之王泽责之泉布又闻唐室衰弱兵在节镇麾下从吏官皆假版皇家受命政出天子州郡职员因循旧式岂有笞撻之吏輿皂之役阶叙银青銜称检校或兼乌府之官或假青宫之秩礼制之间无乃僭矣惠爱之道在於此乎诚当特降诏书并削冗事诸如此比一切刊正书之信史垂耀百代

省锡赆

臣闻三年而郊古先王礼郁鬯馨香昭事上帝历代王者功成治定皆谨肆类永怀多福国家圆丘盛礼比隆三代诞鸿恩行庆赐百官舞拊幅员胥悦但兵卫至衆颁赆至多府库之实半供其费中民十家之赋禁卫一卒之赏五代乱离四方多事务推金帛姑息将吏圣宋有开因仍难改去之恐三军觖望存之则支费无量山海之利桑谷之赋取之铢两散之钜亿为国之计颇殊经久古者井田之法率民而战今之军伍禄养所丰旦暮受钱谷暄凉受繒絮居有连营行有骏騄遭遇郊享复覃恩赐夫兵不可富富则骄骄则内顾内顾则战心怠故善为将者使兵无余财今若即更旧制必用厘革莫若别置军卫之名统以将军之号隆杀部伍高下其禄自百至千差为十等始则重加召募便从末部隶名满则岁较伎能稍稍陞其等级不惟懽心浹洽兼使武艺厉精然後限其粮级无使别有觊觎旧兵渐以耗少新士且无规例数十年陰省其费弓劒之习勇悍之气战鬪之心必愈於今然後可以轻赋敛寛筦榷垂遗子孙足为良计

均赋敛

臣闻禹贡之典九州异赋周官之制五地殊征相其土宜平其敛法轻重等而民乐输远迩一而国章立夏后氏五十而贡商人七十而助周人百亩而彻虽皆什一之通制盖有公田之定式国家疆理万国敷同声教务推惠育休息元元而地征之法未尽均一或同都邻高下不等接畛聯疆桀貉有殊或地广而税鲜赋多而田寡或不腴受沃衍之征上腴当淳卤之赋植稻粱而课菽麦无桑柘而责茧税官府由是生奸豪右於焉得志无告之民积於罢弊伏愿陛下霁雷霆之威采狂狷之辞申命有司特着税令辨肥瘠之地定轻重之法分科列目第为九等上田十顷当赋若许下田百亩当税几何分诏能臣颁行天下履其地力裒多益寡断长补短陆耕水耨并正其征沃野敞田各平其敛标列版图百世不易垂之後嗣圣法可观下民之患自除猾吏之欺斯絶易所谓圣人作而万物覩者也

顺时令

臣闻帝德法天地号令象四时八世之君靡不攸行春夏去桎梏无肆掠挺重囚出轻系秋冬征不义严号令察阿党校田猎盖阳德发生育在侯静事无刑以顺景风商气肃杀闭塞成功论狱报罪以准陰德汉制春夏不论重刑新莽盛夏杀人於市万方怨咨不胜其虐盖王者不可违天时违天时则民怨民怨则和气戾和气戾则旱蝗妖眚无所不至矣易曰仰观乎天俯察乎地又曰应乎天而顺乎人语曰惟天为大惟尧则之诗曰不识不知顺帝之则书曰钦若昊天历象日月星辰皆谓王者法天之道也国家应运承统光啓三圣布和行惠泽润幽遐但论决之科有殊经义下臣愚昧私心疑惑伏愿陛下隆守成之规议变法之患详观六籍取法四时颁诏郡国着为定式应立春已後立秋以前不报死刑式符时令俾万方知好生之德天和无伤戾之妖世而後仁诚在斯日

禁淫祀

臣闻圣人之制祭祀法施於民则祀之以死勤事以劳定国则祀之能御大灾能扞大患则祀之非其伦拟不籍祀典历代法制多禁淫祀盖黔黎无识黷神右鬼妖巫凭之诈降灵异元元从之祈禳厌胜且鸡豚醴酌祀无名土木贫者货鬻以供祭赛村聚里闾庙貌相望春夏秋冬歌舞荐仍民产益薄而蚕食滋甚以是而观颇殊至治仲尼曰非其鬼而祭之谄也国家道化风行光被八极鄙远之民尚循流弊诚当峻示科条禁其诡诞杜齐民蠹耗之源抑巫覡妖怪之本若垂之典法乃富庶一端风俗无邪式臻康泰

贱商贾

臣闻周礼曰商贾阜通货贿传曰通商惠工盖成四民之业以通天下之财然则懋迁有无美利三倍游手之民争趋负贩先王之制有以贱之汉兴察亡秦之弊抑浮惰之业应贾人衣锦绣乘车马名田为吏皆从禁絶谪以戍边算比奴婢尚有积货累镪拟封君者况乃贵之乎国家奄有华夏车书万里而经营之制未逮商旅至有持梁啗肥击穀列第妻孥服珠玉奴婢衣纨素昼思积滞之计夕念兼并之术或驾馭州郡颇为豪横束贫民於穀中邀美利於天下在赋役之课优容於农家关市之征姑息於平民衆以为法贱稼穡贵游食皆欲货耒耜而买车舟弃南亩而趣九市臣窃恐不数十年间贾区夥於白社力田鲜於狙佺愿陛下用汉高之制察桓谭之议法贱其类关倍其征立车马之禁限衣服之仪少以抑之则去末反本之心生矣

论将帅

臣闻将者人之司命国家长城将相之任非材不居求材之道斯为难哉若以颁首胼脇为壮则秉钺非角觝之戏以巨觴大炙为勇则建矛非饮食之塲以弯弧提劔为强则上将非一人之敌以遭逢故旧为忠则三军非恩泽之任在观其器能察其性情轻者易恐躁者易脱狠者易激疑者易动骄者易诱弱者易诘刚者易误况其材不同而其任复异任文儒则惧其畏懦任英武则防其跋扈任刚勇则虑其寡谋任庸鄙则恐其败事是则幅员万里殆无将业岂其选任殫乏良规但赳赳之夫良多客气既昧今古孰知成败春秋郤穀为将敦诗说礼战国孙吴论兵文动辞采汉兴曹参赵充国祭遵卢植魏晋诸葛武侯杜预羊祜唐李靖郭元振裴度

或立战功或为名将观其武略抑资文术以是而观可否自分前事元龟後之法则但能精选文臣材兼智勇若多识前贤事迹必资通变机筹授之斧钺临事可裁然後旁选英雄列为裨佐以勇佐谋舒急相济谋者足以制敌勇者足以冠军二者有方则师律正矣

计北寇

臣闻外裔荐食边境为日久矣周道中兴宣王薄伐秦氏孔武逐之塞北虽筑长城终非良策汉高北伐师挫白登奉春献议乃约和亲供给至丰寇掠无厌太宗之年侵軼岐雍孝武穷兵藁街秉律精锐深入摧败丑类甘露之中呼韩歛塞当是之时敌势微弱中国怀御疎密有宜新莽盗汉寇心复戾世祖中兴敌分南北势既携离边防稍泰窦宪总师遂破其种逮及桓灵复患寇钞汉祚綫絶中原瓜割疆毳大盛乱华猾夏周隋之际突厥骄矜戎后外入宗女外降唐室有开边境多虚渭桥之阵文皇盟载虽李靖之擒讨苏定方之破灭边鄙之间不能无害圣宋龙兴廓有诸夏桑谷之赋山海之利勇悍之士金革之物无有远迹皆入县官狎狁之寇犹比汉唐非勇之不足枝梧抑敌之梗於畴昔自幽蓟陷敌之余晋季蒙尘之後中国器度工巧衣冠士族多为犬戎所有迨今六十年间益稔凶狡多诱中原亡命之徒善构塞下生事之辈狼贪啸聚苦於边邑前年冬寇我北鄙暨於澶渊将帅之臣婴城自守生灵膏血腥污原草自非陛下拯救元元亲驰革轂匈奴之气未易当也洎乎天威震耀敌人丧胆遁逃无所献歛归命陛下赦其鲸鲵寬其翦灭要以日月之盟质以丹青之信若能悛变野心永怀至德纾民偃革大为长策诚恐强暴之性不耻贪戾若絶乘虚之寇必有无已之求从之则虚府库而资寇盗拒之则积怨心而起骄嫚为国计者其犹病诸莫若明待以信陰为之图以臣料之非难事也夫匈奴之衆胜兵者不过二十万糗粮不过数日輜重不过数乘长於寇钞短於守御利於骑鬪钝於步战便於弓矢拙於劒戟以其兵则不及中国五分之一以其用则不及中国十分之一以其伎则不及中国三分之一比年寇盗疆场之臣不能扞者岂天时乎抑亦将之不省兵乎夫敌之寇盗无代无之若其败灭固有时矣陛下必欲恢复塞垣清谧边陲在择将帅而後议之

复塞垣

臣闻匈奴以北有陰山草木茂盛冒顿依阻寇虐中州汉夺其地边用少安匈奴过之未尝不泣夫有一陰山犹资敌势况衰晋不武尽割燕地幽蓟云朔良田沃野以之畀敌得无强盛由兹以来转为边患故国家怀之以文而不庭加之以武而不至要之以盟而无信赂之以货而无厌凭陵我边鄙虐害我生灵自尔以来为患非一盖不复塞垣而劳扞御犹张疎罗以隔蚊蚋秦赵筑长城汉筑五原塞因其山谷设为险阻先代之劳後王之利不惟经略有方兼使华夏有限应变无壅深详其理欲为万世之画削匈奴之势莫若复汉故地外铜塞垣复地之谋必资良画诚当计其寇敌选其将帅明其兵政谨其边防制其阃外皆如所言然则阳示畏弱陰整用度命将领之臣修李牧之法训兵利器明赏信罚按行营垒亲视疾病膏之以恩惠劳之以言辞同其苦乐和其上下整其骑乘名其等列习其击刺养其勇锐於是丰其金帛陰赂间使访彼山川紆直之势察彼将助好恶之性相其机而观其变因其衅而发其谋疑其君臣焚其积聚优宠降附抚绥边境令幽蓟之民积思汉之心匈奴之臣有叛主之计乃选一良将

为之谋主陰勒士马出其不意夫今之边界距塞垣裁二三百里匈奴入中国之路不过四五及其险隘不阔寻丈若分骑兵之甲杜蓟门之路出并岱之弩守蜚狐之口然後正兵数道攻城略地先平小邑以沮其气次克大城以观其变匈奴不善婴守救兵无路而至幽陵朔易不降即溃乃命良臣以葺边塞留飞将以扞御复修亭障遵汉旧规则边马之尘罕能南暨矣

禁宦寺

臣闻天地交而陰阳和陰阳和而万物生故牝牡之分雌雄之配鸟兽鱼鳖咸以遂性夫有男女然後有夫妇有夫妇然後有父子有父子然後有君臣故易以咸卦为下经之首诗以关雎为国风之首周官曰以陰礼教亲则民不怨故圣人法天地之体行陰阳之化一物失所以为不可臣闻古者因下服之刑制阉寺之官周礼寺人五人内臣倍之汉初置中常侍二人今之宦者何踰古制又皆平民子姓黜黜丐养无辜遽遭残毁受刀锯之苦失男女之性阻夫妇之配絕继嗣之道上伤和气何虐如之出入殿廷不减百数稽之天道考之古义臣窃惑之夫夏后泣辜伤教化失所汤武解网惧鸟兽罹害西伯葬枯骨天下归心汉文去肉刑百姓称仁岂有令非罪之民受刳割之刑自生至死不可复完伏愿陛下回两曜之鉴推二仪之惠布造化之恩顺惨舒之气峻立宪章一切禁絕则汉唐之弊革於公朝尧舜之心感於天下矣

文庄集卷十三

卷十四

钦定四库全书

文庄集卷十四 宋 夏竦 撰进策

陈边事十策

今月八日陕西安抚使天章阁待制龐籍等到府奉传圣旨商量西鄙事宜者窃以继迁一族本党项遗类居呼韩旧地东薄银夏西至灵盐南趣鄜延北抵丰会迤邐平下辐员千里太平兴国中继迁逃背鸠集万骑屡寇朔方岁发兵夫送粮草每邀险肆掠为害不一至道初特遣洛苑使白守荣等率重兵护粮四十余万遇寇浦洛河兵夫溃走自相蹂籍粮卒并没守荣等仅以身免朝廷旰食关辅骚然太宗皇帝召宰相议之吕端始欲发卒由麟府丹鄜延环庆三路趣平夏袭其巢穴太宗难之且曰三道深入用甲卒几万何人为将帅何人护輜重表里砂磧何处会合须更熟筹不可轻举是时边患方深议者不已至秋遂命李继隆出环州丁罕出庆州范廷召出延州王超出夏州张守恩出麟州五路趣平夏竭内帑之国财罄关中之民力继隆与丁罕合行十数日不见贼张守恩见贼不击相继引还王超范廷召至乌白池以诸将失期士卒困乏而回此际先臣隶於廷召备见轻举之害然是时继迁当兄继捧入朝之後为曹光实掩袭之余遁逃之迹穷蹙可知凉州博罗齐沙州曹延禄皆受朝廷节度使犄角追讨灵州河外大凉小凉河西北藏擦勒等数十蕃族皆有讐怨愿助国讨除尚犹累岁积年不能扑灭太宗又问宰臣曰卿等莫别有擘画当时宰相但错愕莫之能对太宗亦不悦久之先皇帝即位鉴追讨之弊愍关辅之劳惟戒疆吏谨烽堠严卒乘来即驱逐去勿追捕尝出陕西地图自指山川堡塞示宰臣令移兵简费又以泾原地最要害屯兵甚衆命增置钤辖都监以备奔軼此实先帝之圣断远图也然拓跋之境自灵武没之後银绥割弃以来假朝廷威灵聚中原禄赐略有河外役属小蕃德明元昊久相继袭贸易华戎捃剥财用拓地千余里积货数十年较之继迁势已相万其于妄作名器僭制车輿夸咤旃庐跳梁沙幕亦有日矣朝廷待以遐荒置而不问刍豢过饱猖獗遽彰所宜诛夷以塞公议然而兵者凶器战者危事圣人不得已而用之自昔兵家皆欲先胜後战则举无遗策以继迁穷蹙比元昊富实势可知也以先朝累胜之士较当今关东之兵勇怯可知也以兴国习战之帅方沿边未试之将工拙可知也继迁逃伏平夏元昊窟穴河外地势可知也若分兵深入则军行三十里自齎粮糗则不能支久须载刍粟则难於援送师行贼境利于速战悦进则贼避其锋退则敌蹙其後昼设奇伏夜挠营栅师老粮少深可虞也若穷其巢穴须渡大河既无长舟巨舰则须浮囊挽纆苟贼列寨河上以逸待劳我师半渡左右夹攻未知何谋可以扞御臣以为不较主客之利不计攻守之便议追讨者是谓无策若缮完壁垒修利器械约束将佐控扼险隘但辄过于岁月不豫计于胜负是今之常制也则虑体分势异衆力不齐旷日持久军食难继事不先定则有後忧若威以文诰格以干羽胜决帷幄师行衽席必有成算繫于前筹此非臣之所及也臣今但有十策十事列上如左

一今之关塞延安险阻秦州地远易为控扼所最忧者泾原次则环庆泾原莫急于镇戎环庆

莫急于庆州戎人狡猾必不肯舍平易而趣险阻此敌情之易料也古之用兵皆择其精锐先当矢石谓之握奇跳荡是为奇兵其次疲软则以守城壁近年之弊强弱兼用强为弱累战多无功又中国长技莫先强弩近年之弊参以他兵不能专用已长攻彼之短今若令泾原环庆两路各於土兵禁兵或弓箭手内择弓刀枪槊手三二千副之泾原令高继嵩张亢主之环庆令刘平赵振主之日夕训练常如寇至如有警急则令自泾原界望环庆路横絶边徼数百里间往来交击互为首尾传矢持满俟中而发一发万矢三得一中则十发之矢以殪三万余人羌戎犷犷不易支也仍乞立为强弩指挥特升兵额稍增月给以震军声以壮士心但恐贼界闻有此谋必不敢容易窥塞其偏裨将校道路堡寨并委刘平等临时选择处当此实制胜之大端也

二缘边熟户号为藩篱除延州李金明胡继谔二族与贼世讐受国厚恩势必向汉自余熟户如二族者十无一二羌戎之性贪利畏威若不结以恩信憚以威武而欲仓卒驱之御敌汉强则助汉贼盛则助贼必矣其敏珠尔等蕃族又纳质贼境居既首鼠战必倒戈元昊窥见此隙所以勾招打敌胁以锋镝诱以货财国家非不知其若此所宜速见良画深破贼计及早羁束以固藩篱此西陲之急务也臣前後累状陈啓未蒙开可伏乞采臣前奏下臣令勘会逐州部族首领量人马事力授以职名第给禄赐蕃官俸料至微所费不厚若控制有宜得其死力则为利至大或其间向汉不坚即令重纳有力量质子或有自恃凶强招抚不至者则令刘平等非时伺便以强弩屠其种落此策若行足以破贼计而张国威也军志云先人有夺人之心伏乞观此事机早赐裁定

三甘凉首领河西大族继迁赐爵之後德明承袭以来仰恃国威吞噬略尽回鹘吐浑去朝廷地远难收其効惟有吐蕃与贼世仇置勒斯賁住总噶尔对贼巢穴辖戡来都锡据贼上游臣累奏乞诏置勒斯賁进讨破贼之日许以西平之封授二子灵夏节制又乞遣使都锡抚存辖戡令父子和協共力破贼未奉回旨窃虑议者以为元昊既破地入吐蕃则置勒斯賁势大复生一敌此议乃计之不熟者也平夏逆党习于刼掠吐蕃虽衆兵技不敌但欲使且牵贼势必未能尽平狡穴若此际不收实效而徇空言非国家之利也伏乞采臣前奏早赐指挥先朝博罗齐充灵州西面都巡检使尚欲蛮夷相攻遥制迁贼况置勒斯賁向化父子受官不于此时遂其忠愤差之毫厘深可惜也若前议得行必恐昊贼未敢轻离巢窟伏乞圣鉴深察此议【案宋史吐蕃传置勒斯賁始居都锡城既居叶公城徙居总噶尔城後又徙莽沁又徙居青达置勒斯賁三妻乔氏生董戡其二妻皆李立遵女也生辖戡及玛克占觉立遵死李氏宠衰斥为尼置郭州锢其子辖戡玛克占觉结母党李巴全窃载其母奔总噶尔置勒斯賁不能制玛克占觉因抚有其衆辖戡居康古此策置勒斯賁住总噶尔辖戡来都锡与史文不同未知孰是故附记之】四陕西四路兵甲不少但地有险易路有远近寨栅有多少军分有勇怯易防处合减兵难守处当增兵兵之增减即须察其险易量其远近计其城寨均其勇怯使各尽其宜朝廷去边陲远但因逐路所乞差发士卒所以臣前後累奏乞均匀加兵今来伏蒙朝旨许令那移驻泊尚虑边臣占愴甲兵鲜克公共方今西鄙唯泾原环庆最须备御其两路犬牙相入烽候相望分之则势孤并之则势大物理之常也欲乞刘平罢鄜延安抚兼泾原总管所贵表里相助首尾相应张大军势壮励士心亦防边之最要害也

五设使元昊谋犯边境量其事势岂能四路俱来必是择一平易路分并兵冲突其余边界即分三二千骑往来出没牵制我师此贼计之可前料者也今来沿边兵马总而计之数亦不少若各守路分则不足互相策应则最近者虽奉朝旨许令互相照应窃恐缓急边臣执守文义不肯分兵相援欲乞朝廷详酌特降指挥有贼马犯边令四路互相关报分兵策应鄜延可以策环庆秦陇可以策泾原若此则沿边势合军声大振是计傥行固足以预制狂贼也

六元昊旅拒以来陕西加兵所费粮饷不少尚赖累年关辅大稔易为计置今夏稍旱二麦薄熟粟豆苗晚秋成未克设使元昊复称臣纳款沿边亦未敢班师若宿兵塞上边稼不丰持久之谋未知安在所以臣前奏乞令陕西诸州各招置神虎保捷等军各一两指挥令逐州训练精熟却乞那移关东兵马归回有警急则令逐州量留士卒外并勾赴边臣一则关中土兵劲悍耐于驰骋二则减省沿边刍粟三则可为悠久之计

七关右沿边旧俗轻悍喜为寇盗山林深阻难为搜捕加以近边蕃户以藏盗为业若敌骑犯边人情恐动或飞挽稍频丁夫逃溃互相扇摇聚而为盗关中官司不可不预为之计也咸平中陕西转运司曾抄点保毅军六万八千余人防城备边今来西陲安静多年若遽行此法则恐人户惊扰别生寇剧前奏乞添置弓手三两倍及乞置壮丁猎户缓急可以防守城壁把截要害却那得正兵出入野战此实今之寓令也朝廷检详前奏早赐行下付臣当司差官添置候贼平日即却罢遣一则不费供馈坐获其用二则不动羣情易为办集比点保毅军及抄弓箭手利害相万也

八沿边小寨多是曹玮建置常时御备警寨防遏逋逃似有小利羌戎入寇则难于处当分兵固守则州郡势危守御不定则所蓄刍粟翻为寇粮又远近传闻亦是亡一城寨滋益贼气且损军声欲乞宣旨沿边总管司勘会小寨有兵少粮多不关要害先支沿边巡检等军马就食尽粮草所有小寨逐月廩给却令就大寨旋请如有大段警急势必难敌则令并小寨士卒入大寨把隘相杀一则免资寇盗二则并得兵力于要冲之处以御奔冲

九方今备边之计最宜积谷故赵充国云余三万斛谷羌人不敢动矣况关辅税租有限岁时丰俭难常若卒调兵食急赋横斂则秦民轻悍咨怨易兴此不可不预计也近者有诏入粟拜爵须是巨富之民方能佐县官之急欲望朝廷诏关中州县有犯过误连累之罪情愿收赎者许令召保于沿边诸郡入粟赎罪每铜一斤准粟五斗良民救患何止乐输谅不踰年塞下之粟必稍充美寛宥有过误全民肤体足以上副陛下至仁之德又虑议者以为国家全盛之际不当货刑示弱此议亦思之未切也且爵者名器尚许拜授若寛刑赦过得粟便民比之拜爵此为优矣

十候教习劲弩指挥招置土兵添差弓手各有次序即乞委任当司差官拣选沿边冗兵於近里州军及减骑军回关东仍省沿边闲冗吏员古者将帅授命本朝皆假之威权许以便宜使得尽力今来朝廷傥采所陈则乞特依古制借以衔勒令竭疲弩仍乞指挥诸路总管司臣僚今後每事遵禀安抚司指挥不得怯懦自谋妄说事理开奏上惑朝听如有寇贼奔冲并须出兵守险持重伺便痛行杀戮不得披城玩寇放过贼马令入他处如违以军法处分如此令行

下则边防畏懦之臣预谋战鬪不敢只作守城自全之计

右谨具如前伏以国家富有四海重熙累洽物力全盛忠贤间出昔魏有一段干木晋人不敢窥西河江左有一谢安苻坚丧百万之衆以此计之蠢尔羌戎岂敢轻犯边境但元昊资性凶忍轻背国恩鬼得而诛灭亡可待未授首间朝廷之议不得不过为备御然贼境最多奸人尽知缘边虚实料其逆党聚谋必须潜鬬间隙方敢作过若国家处置得宜任人不杂使陕西内外城邑战守有备元昊岂敢容易轻离巢穴自取败亡况关塞防秋古今常事传云无恃寇之不至恃吾有以待之此言诚得守边之要也顷继迁亡没德明尚幼族中亲属强梁者衆德明甚惧仓惶送款当时有司不能裂河南之地封拓跋诸亲令其势分间起自相残贼而乃并锡真命爱一孽童数十年间禄赐豢养资寇粮者多矣至今义士为之叹惋是知此际岩廊裁处不可不深图远算也臣素业刀笔不谙军旅昨蒙推择付以西事虽继陈方略多以迂阔不合廷议进退维谷忧骇可知岂谓天慈更容访逮拜恩沥恳敢不自竭其所陈十事实臣在职见闻夙夜惟忖心虑所及咸罄于是伏乞圣慈下两府裁酌如稍近于理即乞特赐详择施行敢不奉德音渐图远蹟然而成大益者忌小害获远利者无近効方今许国者多言事者衆或不周知利害别议建明事未成间遽有更改则边臣之计惑矣此则须赖陛下倍赐主张左右大臣专主斯议自古内外相维则有成绩羊佑杜预非张华主之则不能平吴石雄刘沔非李德裕主之则不能平上党布在方策较然可知若臣所陈庸昧不远前谈徒烦聪听无足采録即乞早选能吏代臣经略西事别询奇画免误公朝矧将者三军司命国家安危之主不可一日轻付常才忽于大计若西陲失备则他寇相因伏乞朝廷深赐哀察干冒宸严臣无任祈天沥恳激切之至谨録状陈乞以闻伏候勅旨

募土兵奏【附】

陕西防秋之敝无甚东兵不惯登陟不耐寒暑骄懦相习廩给至厚土兵便习各护乡土山川道路彼皆素知岁省刍粮钜万且收聚小民免饥饿为盗代兵东归以卫京师万世利也偕欲以寡击衆殆虚言也【按宋史竦所上十事当时颇采用之其募土人为兵令下而杨偕奏言西兵比继迁时十增七八县官困于供亿今州复益一二千人则岁费不貲若训习士卒使之精锐选任将帅求之方略自然以寡击衆以一当百矣竦云土兵训练可代东兵此虚言也自德明纳款以来东兵犹不可代况今日乎朝廷下竦议竦奏云云偕复奏云自古将帅深入殊庭霍去病止将轻骑八百直奔大将军数百里赴利斩捕过当又将万骑踰乌鰐讨遼濮涉狐奴历五王国过马支山千有余里合兵麇臯兰下杀楼兰王虓侯王执昆邪王子收休屠祭天金人赵充国亦以万骑破先零李靖以三千骑破突厥又以精骑一万至陰山斩首千级俘男女十余万擒颉利以献自汉以来用少击衆不可胜数竦在泾原守城垒据险阻来则御之去则释之不闻出师也竦惧战或败衄托以兵少为辞尔竦言上兵各护乡土自古有九地士卒近家谓之散地言其易离散也第以近事言之合门只候王文恩出师败北而土兵皆窜走惟东兵仅二百人杀敌甚衆以此知兵之强弱不繫东西在将有谋与无谋尔今边郡参用东兵土兵若尽罢东兵亦非计也古人有言非陇西之民有勇怯乃将吏之制巧拙异也今防边东兵人月受米七斗五升土兵二石五斗而竦乃言东兵廩给至厚又不知之甚也竦又言募土兵训练以代东兵且土兵数万须募足训练虽二三岁未得成效兵精犹恐奔北岂有骤加

训练而能取胜哉竦议遂屈今竦奏全文已逸惟本传存其大略谨附録于此以补其阙云】

文庄集卷十四

卷十五

钦定四库全书

文庄集卷十五 宋 夏竦 撰奏议

择牧守奏

伏以今之牧守当古诸侯权有生杀祀有社稷其人存则王泽下流天时无害庶官各守其序四民不迁其业其职废则旱蝗肆孽疮痍徧野政出于吏胥狱成于赇赂故国之股肱莫先其任汉宣有言曰与我共治者其惟良二千石乎国家之制贵尚州牧在显忠遂良于斯为盛而求贤审官或未纯一颇有因缘久次出分符竹结托贵要遂领藩条或得用于虐刑或成名于厨传以是奉法各异为政差殊强者失於猛寬者失于纵謹者失於凝滯敢者失於造次和者弊於党狠者弊於戾或贪而有能廉而无材明于法令拙於化育喜于慈惠疎於防戒虽材不求备难以适中而任官惟贤固宜慎选然则罪莫大於贪暴愚莫甚于闇懦去此而往其失可追伏愿陛下委任台司议新其职明考课之令重刺举之权自非该通学术熟习政事者不得除授仍岁诏尚书省上其殿最明示赏罚若为治有状则即郡进爵但其善化不渝何必三年而代无使人疲於迎送官弊於数易惟陛下念之夫隆守文之业增太平之基不在斯人谁塞其责

择令佐奏

伏以国家安危本乎苍生苍生治乱繫乎宰字之官於民甚亲古者子男之国今为令佐之任故汉诏郎官出宰百里百里之任非材不居国家之制若何轻之春秋之义用贤治不肖用贵治贱方今令佐弊居丛脞或医师画工之诉贫窶或京百司吏之论久次贵游子弟之序资?京朝职官之遭削夺者皆得调授州县之间吏道益杂率多不善文法罕谙政事下有妻孥以牵其心上无清华以诱其望乐於因循甘於赇赂皆曰过且罚不失为同类罪且弃不失为豪民以是而观非用贤治不肖者也况州县之仪苦於庸贱稽首阶墀厮役公府民之疾苦不能抗行州之蚕食不敢力御或牧守非材好自尊大轻视王之命臣不若已之仆御贤者忍耻懒图政事愚者徇财不顾轻辱以是而观非用贵治贱者也夫用不肖治不肖则政弊用贱治贱则民不服以水济水谁能食之呜呼县境相压令长比肩一清九浊尚为多贤比屋空虚百里疮痍伤天之和致时之灾不在斯人谁当其咎伏愿陛下轸念元元垂意令佐择其材能除其不肖贵其爵服去其庸贱合仲尼春秋之义流先王爱民之惠则太平之化可阶而至矣

去贪吏奏

伏以货赂不行之谓公朝脂膏不行之谓良吏公朝正则齐民悦良吏存则善政举故政以贿成传书其罪贪人败类诗刺其奸盖为政者忌贪贪则憎爱憎爱则舞文暴物无所不至故於宪法特峻其科拒其诛剥则泾渭莫分饵之币帛则鈎弦共直铨选之司贪吏先而廉吏後鞫

询之寺豪民直而贫民枉会府不絶于请求棘寺颇闻于市法幸居清要则市甲乙之科覬蒙超擢则买清白之举中官受命率访珍奇武士在官多谋聚歛牧守纳赂于珠金令佐受献于丝谷郡遇督察之官则疮痍累月邑经简稽之使则罢弊踰时或吏蒙其上朝输其货则夕沦受福暮违其求则辰起当咎富者倾资竭产以赴其急贫者质妻鬻子以救其苦苍生虽痛诛求赃吏罕闻败露盖人惧仇讎事微证引旁无纠擿之吏上多容匿之徒君子忍耻而不言有位制奸而寡术伏愿陛下寛直言之罪嫉幸民之弊内择宪台之吏专察百司外选刚正之官分按天下探聽民声稽验政迹无状者投畀荒裔坐赃者禁锢终身庶当仁义之朝皆励廉平之节

厚文德奏

伏以文乃国章国宝文体观盛衰鑑兴亡察奢俭考爱恶莫近乎文唐虞之典辞大意明益禹之谟气直体壮太康失邦五子之歌悲且怒太甲不明伊尹之书戒而諒周德盛而关雎乐王道衰而黍离怨秦风旧而车邻大唐德遗而蟋蟀俭说辞伪而战国乱仙诗邪而秦室坏汉德寛大文比三代义本六经而旁引灾异岂杂霸之道见於文乎哀平之衰?纬乱典迁洛之後其弊风流但着述之文气尚清壮魏晋以降文采胜质江左之风虚澹为工裴子野刘勰之讥諒不诬矣李唐氏作緝熙礼乐多士盈庭辞有雅气迨其叔世旋亦轻靡五代乱离诸侯僭窃辞体巽懦几於坠地国家骏命攸隆王道驯致材为世生文德宏壮四代而下无或比崇而近岁学徒相尚浮浅不思经史之大义但习雕虫之小技深心尽草木远志极风云华者近於俳优质者几於鄙俚尚声律而忽规箴重俪偶而忘训义况陛下睿谋如天圣政淳素若何逢掖之生乃循流荡之弊伏愿朝廷进用醇儒激励浮俗考试之制推先策问非五经不得以对非常道不得以言但以义理为尚不以声韵为限则学无滥进人知向方不数年间文必大变跨东周郁郁之美抑西汉焕乎之盛惟帝念之其道非远

议贡举奏

伏以隋设进士之科唐氏特隆其选岁登榜帖不过三十贤俊之器将相之具在其中諒不虚语然主司慎选弊於回挠豪右角逐之衢是非锋起之場进孤寒则道直而有悔私权贵则道枉而无咎贡举之间因循滋弊国家大设场屋旁求髦俊虽搜贤之礼博於虞夏而登科之士冗於隋唐滥者或辈进材者或旅退荐书未達於冕旒驰声已滿於涂路求夫厥由其弊斯在始则天下州郡荐送冗杂祝谒已先秋赋里选何有至公择官一郡选贤数县铮铮佼佼推为翘楚故大藩动盈百数支郡不远百里一贤无乃多矣次则省试有司优容过当或以三应五上华颠鲐背尝对扬金殿授荐边城皆蒙姑息取预科级明试之道无乃远乎若万方上计肩键贡闕衣冠鳞萃而万数卷轴山积而亿计良楛相杂精粗交半铨品之官不踰五员考试之限不越三旬虽周孔无以施其鑒荀孟无以展其材况主司不一好尚差殊学古者注意於策论修辞者宅心於诗赋简略者鄙其闕衍绮丽者轻其质直鑒裁既纷品题乃惑缁素无常色金土无定价燕雀遇便风则高翔千仞蛟龙无尺水则困於泥涂故工拙之状多乖外望致躁竞之士腾口谤议为朝廷计者莫若改立制度颁下郡国自今本道举人各於都会取解专委输运之使慎择秋赋之官选采良士上名礼部朝廷於是选官十员立限一季先则品题所业

次乃详考呈试不得以场籍年齿御试远人妄分条目滥居等级但诗赋策论俱善为上等诗赋优而策论劣策论优而诗赋劣者为中等自余不逮皆从驳放择材而升不限其数奏名之日则榜列程试合格者自省门而右丹笔题注明下臧否标其警策之辞识其疣赘之语凡於卷末统论得失合送合落各令知悉如有不当并聽言上是则主司无启幸之门薄徒有过之心进人以礼

平筦榷奏

伏以齐桓强主夏盟始议盐铁汉武外事夷狄乃兴筦榷魏晋周隋沿革非一唐氏因之兼增榷数贞元之际复行茶税山海之饶尽於国矣夫天地之利与民共之藏财於民非欲尽取故曰民之不足君孰与足又曰百姓足矣君孰与不足盖君以民为心民以君为体未有心劳而体逸支瘠而身壮者也国家富有徵税充物府藏虽君王之心务推寬大而聚歛之臣竞为苛细刻取羨余不知纪极至於海滨之民食无盐滋山居之人饮无茶味若有负贩必与吏共是网密於平民而法寬於奸猾榷酤之制近年尤急或增见在之课或追已亡之额或明下诏条公相剗夺所入至微而争端锋起州县之狱自此滋丰窃为陛下惜之夫筦榷不可废可以平其法法不必急急则民望於上亦不必缓缓则利归於下在任廉平之官使喻朝廷之意削除冗制务存大体上不虚国下不迫民则政在其中矣孟子曰文王之囿七十里人以为小盖与民共之也夫以利共之以道取之以禁防之以籍正之徧行而不尽虽禁山錮海而民不为怨矣

抑僇释奏

臣闻舜禹商周之有天下文以经邦国武以戡祸乱政以齐民教以导俗故家给人足元元丰厚汉氏陵迟鱼目入珠树黄老之谈导浮屠之源岁月滋深枝????寢茂萧梁之佞象教勃兴李唐之譎真风益广招藏游隋蠹耗衣食诞诞吾民十室而九虽间有钜儒输诚献諫深根固蒂无以拔去国家经启古义深抑流弊狭度人之制峻修崇之禁九州穆若有识交庆而大藩尚踰千人小郡犹登百辈访诸輿议其幸可知皆言京城寺观每岁颇得度人或暂考经业或但闻久次便受戒籙即登名籍四远之徒游手之民皆担簦负币求度輦下诗云商邑翼翼四方之极又曰率土之滨莫非王臣岂有书轨混同宪章殊异又闻其徒豪右多聚货泉因诞降圣辰仰望王泽或徼幸命服或希觐宠号仲尼曰惟器与名不可以假人忍使恩耀光被髡褐求之典籍甚为无谓伏愿陛下恭循典法锡命司存省度人之禁去紫衣之制庶令骄嫚之民罕趋浮惰之业圣朝善政自可遵行仁义何必恢崇释老而後教化式孚区区之言伏待裁择

总大纲奏

臣闻易曰尧舜垂衣裳而天下治语曰无为而治者其舜乎诗曰不识不知顺帝之则非谓端拱黄屋不亲庶政纳进熟之计受蒙成之福盖言圣人劳于求贤逸于得士左右前後股肱耳目皆任循良一人虚心以顺天下则可以无为矣夫天者君道也四时者臣道也君当清明以象天臣当生杀以象四时仲尼曰天何言哉四时行焉百物生焉古先明王靡不由此国家中

外清谧朝廷肃雍陛下临视万几劳神日昃至有论报刑徒简稽卒伍皆抵轩陛实烦清问臣闻百官承式各有司存正则有赏滥则有罚但令恪守条章岂皆取必于上若陛下英睿圣神无得而量至于耳目视听固亦有限日出临朝表奏云集决其大纲奋以宸断犹不暇给况亲其委细劳勤圣躬臣窃恐违上事宗庙下抚亿兆之意愿陛下选任贤达责成官事至于闕罪简卒之比自非国家大计理千政教者稍委之所贵庶政简务清符合太一宸体逸豫永享万壽是则尘露之微少裨万一

谨边防奏

臣闻防边扞寇其要有四远烽候明约束谨关梁慎间谍远烽候则寇钞不至明约束则守御不怠谨关梁则奸覩不行慎间谍则敌情可得不知烽候约束之道者不能无御敌之患不知关梁间谍之事者不能有得敌之利善守边者令敌不知所攻掠奸不知所刺探敌动静之计进退之期山川之势法令之制知之而後制之譬如乘高建瓴方今边邑使领循守规辙政无奇状以警寇心昼日喧呶唯诺昏夜传呼更漏暇则饮醪殽觞急则方陈甲马寇至则扃键城郭受围则坐食刍粟内无奇兵外无相援四野苍生任为鱼肉以此守边殆非良画诚宜选任梟雄列分远镇坚甲精金匀於给授寇来勿纵敌去勿追仍任偏裨经略边境相为肘腋互张声势数年之间深务完葺是则边民既安边用亦足矣

洪州请断祆巫奏

臣闻左道乱俗祆言惑衆在昔之法皆杀无赦盖以奸臣逆节狂贼乱规多假鬼神摇动耳目汉之张角晋之孙恩偶失防闲遂至屯聚国家宜有严制以肃多方窃以当州东引七闽南控百粤编氓右鬼旧俗尚巫在汉栾巴已尝翦理爰从近岁传习滋多假托祿祥愚弄黎庶剿絶性命规取货财皆於所居塑画魑魍陈列幡帜鸣击鼓角谓之神坛婴孺襁褓已令寄育字曰坛留坛保之类及其稍长则传习祆法驱为童隶民之有病则门施符术禁絶往来斥远至亲屏去便物家人营药则曰神不许服病者欲饭则云神未聽飧率令疫人死於饥渴洎至亡者服用又言余崇所凭人不敢留规以自入若幸而获免家之所资假神而言无求不可其间有孤子单族首面幼妻或絶户以图财或害夫而纳妇浸淫既久习熟为常民被非辜了不为怪奉之愈谨信之益深从其言甚於典章畏其威重於官吏奇神异像图绘岁增邪籙祆符传写日夥小则鸡豚致祀敛以还家大则歌舞聚人食其余胙婚葬出处动必求师刼盗鬪争行须作水蠹耗衣食眩惑里闾设欲扇摇不难连结在於典宪具有章条其如法未胜奸药弗瘳疾宜颁峻典以革祆风当州师巫一千九百余户臣已勒令改业归农及攻习鍼灸之脉所有首纳祆妄神像符籙神衫神杖魂巾魂?锤角刀笏沙罗等一万一千余事已令焚毁及纳官讫伏乞朝廷严赐条约所冀屏除巨害保有羣生杜渐防萌少裨万一

文庄集卷十五

卷十六

<集部,别集类,北宋建隆至靖康,文庄集>

钦定四库全书

文庄集卷十六 宋 夏竦 撰上书

上章圣皇帝乞应制举书

景德二年十一月将仕郎守润州丹阳县主簿臣夏竦谨斋戒昧死再拜上书崇文广武圣明仁孝皇帝陛下伏以国家采汉唐故事恢复制科网罗贤俊熔范太平陛下圣政日跻广分条品崇二圣之不绪冠百王之盛事万方文明多士勇进嘉鱼有得贤之咏白驹无空谷之恋臣生逢圣明幼肄简牒久困寒贱不能自达去年秋荐名天府属边障多故羽书蠹午陛下临遣宰臣折冲河朔先臣供传遽之职立矢石之地忘家徇国失身行阵陛下哀臣孤幼任之州县鞅掌之暇服膺稽古欣睹明诏遽释忧虑何则陛下广文武之科而兴文武之治夫铅槩方策文之器也辞藻辩博文之用也御器以道则仁义忠信无所不至矣御用以变则刑政教化无所不逮矣步骑金革武之器也敢毅勇捷武之用也御器以道则奇正威惠无所不逮矣御用以变则盈虚紆直无所不计矣盖古者爱其道而今也爱其器古者观其变而今也观其用故文武之材比及於古者可多得若能临器而知道临用而知变精儒墨者兼之以韬略善攻取者赞之以学术则将相之材去此焉往愿陛下详而察之若陛下必择狂夫之言思纳愚者之虑垂旒下拱渴待忠说则臣愿以贤良方正能直言极谏科召赴明试则贤良之科斯为具体夫贤者智之苑囿良者德之蹊径方者慎履名教正者斥远邪佞直言足以陈时弊极谏足以敷说议时弊既陈则明於体用说议既敷则造於教化明体用者岂昧於六建达教化者岂微於七德故臣之区区尽在於此惟陛下【原本缺二字】所志辨而明之裁而择之若陛下以枕石漱流为达则臣世居市井若陛下以金榜丹桂为材则臣未忝科第若陛下以鸠杖骀背为德则臣始踰弱冠若陛下以荷戈控弦为勇则臣生本绵弱若陛下令臣待诏公车条问急政对扬紫宸指陈时事犹可与汉唐诸儒方轡并驱而校其先後矣伏愿陛下念忠臣之後寬万死之责召诣阙下令毕其辞退就鼎镬死且无恨干忤圣听臣无任待罪战汗惶惧之至臣某稽顙顿首死罪死罪

状

降圣节进奉状

伏以真游降鑒诞启於僊源令节凝祥茂宣於帝祉臣谬尘枢近叨奉恩荣庆东户之期久披於丹质祝南山之壽幸及於嘉辰载惟缕带之微愿续乾坤之德

进瑞稻图状

伏以嘉蔬吐秀黔首告祥初擢一茎异刘欽之界内乍分三穗疑蔡茂之梦中既介祉於清流爰考灵於瑞牒此盖尊位皇帝陛下四方无事万国可封嘉雨霈乎仁恩阳春流乎惠泽河洛图书而并至元符黄瑞以偕臻将让德於岱宗致耀祥於嘉谷足使维扬昔日追媿魯生南海遐方遥慚九熟未让奇於穎麦詎貽谄於两岐掩周祖之维縻陋汉宣之灵稷臣叨提郡印获覩国祺既当列状以升闻敢不奉图而称献天孙助祭愿陪百里之禾清庙荐新敢继神仓之谷

再进瑞稻图状

伏以一茎三穗已告灵休踰月再生益符馨烈祥经阙载鸿策靡闻陋唐侯异亩之祥冠周室盈车之瑞此盖尊位皇帝陛下仪三五之景铄宪八九之明光当时龙半汉以爰飞致嘉谷蕝蕤而荐秀臣敢不重图瑞穎再贡丹墀愿随缩酒之茅广备泥涂之礼

谢宣召入院状

右臣今月某日翰林待诏某至臣所居奉宣圣旨召臣入院充学士者使轩倏降恭被於褒言宸泽旁流擢升於内禁循涯失措荷宠若惊伏念臣本乏异能仰逢昌运先皇帝初临轩陛首赐科名遂结绶於仕途俄滥巾於显次本西垣更直叨预於司言内阁参荣弥慙於备问自尔践更中外迁贸星霜出则分铜竹之符乏龚黄优异之绩入则游龙凤之馆非严乐待从之才去岁以式罢藩条归朝法坐改画省贰卿之列附神臯内史之权輶轂密清盖仰遵於圣训条纲明具实动稟於朝经仅免旷官敢期进秩遽推恩於中旨俾厕职於内庭矧玉府之近局拟金螯之真境论思为重或接於睿谋演润攸施式严於密命岂期辱昧可称甄陞此盖伏遇皇帝陛下上智烛幽纯仁求旧以臣一门遭遇荷异宠於累朝念臣孤迹践扬历清涂於二纪特垂纶渥擢寘禁林谨当仰副文明?修职业虽已临於暮齿亦勉励於琐才奉四境之文谨裁於书诏循三辅之政用肃於都畿报国是图捐躯斯在

谢赐御书诗状

右臣今月二十四日宣和门御阁蒙恩面赐臣御书侍宴诗一首者宸极凝晖方参於进牋奎躔分曜猥奉於匪颁蹈跃相趋庆荣交及伏惟皇帝陛下文明继志刚健承天畅谟训於七经精字书於八体每罢华光之讲即抽路扈之毫载挥鱼网之牋屡竭金壶之墨翻回鸾鹄盈溢缣緡言念侍臣曲记龙潜之旧特推恩賚俾瞻鹤企之踪但传世以宝藏固无阶而报塞欢呼感拚倍万常钧

谢赐马状

右臣今月某日右侍禁张永德到府伏蒙圣慈赐臣细马二匹者战功未立蕃锡载加乘拜靡胜荣惧交集伏念臣本微湊略误委半符关陇宿师赋发滋广河湟伐叛诛纳尚微怅无毫髮之勤稍增营坞之气不图使驿辍赐乘黄事异仲都之能礼厚仪和之賚军容增壮幕府相趋

此盖伏遇皇帝陛下俯念旧臣久居边琐将安戎役曲示眷怀天廐分颁既误及劳之典具装是飭誓先尽敌之行冀效铢分仰禱赏劝

乞修南京大内状

右臣伏覩大中祥符七年二月一日赦勅节文应天府升为南京正殿以归德为名臣到职後躬詣大内谨视筵龠其正南内门上有先朝题其榜曰重熙颁庆之门楼皆损动其下只是依旧双门未变列郡之制虽有两关雉堞又无朵楼内城之中并无归德之殿但是颓垣茂草内有真宗皇帝御制御书南京颁驻蹕诗碑石一片小屋遮蔽未曾建立其东北隅小亭子一座内有先皇御制御书驻蹕诗四首粉版门牖不严尘埃所闇臣职在居守理合奏陈者伏以商丘仰当大火宝势形胜佳气郁葱艺祖肇基之邦圣朝根本之地发祥荐祉应天顺人由七十里而兴天乙是资於景毫累三十世之王文昌始大於岐周用建名都实陪上国与中天而对峙企洛宅以相望至官局廨居咸从改革而乃阙廷宫掖悉未缮修汉启南阳之都唐重北门之馆并资壮丽以示威神况茂陵之余烈方宣真庙之鸣銮未远必欲仰模太紫上宪觚阙备九寝之仪敞千门之式虑烦力役或费财征臣今乞依先朝勅旨只创归德一殿安驻蹕诗版又以宫室之仪门闾为重犹取诸侯之制未成王者之都欲乞於南端辟正门三闔东西增朵楼二座所贵庀工至鲜不日可成仍乞选差八作司臣寮将带工匠到此计度却於东京木场事造材植系棧浮汴赴当京修盖伏望圣慈特赐开可所贵宫阙之度稍合於彝章祖始之基益隆於景命有光鸿祚永贲皇图

王相公谢赐手诏状

右臣伏以凤蘊灵文方承於睿览芝函密诏曲喻於慈衷祇诵已还兢荣并集伏念臣素微材识窃慕希夷猥奉纶言总譬金格尝以三清真境宫室殊名六洞僊游羽仪异品虽沿波而粦见尽物本以兼该因宝藏之纵观有琼编之斯在咸区分於部类可悉数於名称紫府绛台临文而备见云裳藻卫伸纸以咸窥爰奏御於穆清用仰资於钦奉伏遇皇帝陛下祇膺道荫昭事真源遽班温雅之辞俯示褒优之意萃门辉耀永誓於宝藏藁简研覃更期於率励荷照临之莫报积感惧以增深

牋

正旦贺皇太子牋

某叩头言伏以缙管发春清台启历举椒觞而第颂爰表着仪徇路铎以宣风甫新元朔恭惟皇太子殿下明诚渊塞粹性昭融趋帝室以问安隆天枝而继体闾门讲学茂胄席之温文秘籙储休荷太霄之顾諟珍图大定景贶日跻式膺献岁之祥永固重离之祚某肃将明命远托倅车效秋实以无阶望日围而尚远无任拚跃欢呼之至限以守官不获称庆宫庭谨奉牋陈贺以闻某以欢以拚叩头叩头谨牋

启

谢生辰礼物启

伏以函鍾纪律当炎景之宣威大昴储精属鉅贤之命世伏惟某官嘉猷济俗懿业代工渭水凝祥蚤协佐姬之兆嵩高发咏爰逢生甫之辰顾裨赞以非勤唯颂延而增恳有少微礼具如列賸

五月旦启

伏以气正南讹日纒东井当沐兰於楚俗仍聚药於周官伏惟某官任重麾旄功昭彝鼎達宏规於义府聳谅节於宗藩履此令辰倍增休祉岂期台念先示钩函感佩之私不任下恳

六月旦启

伏以候格长羸气当溽暑雨濯枝而泛洒萤化草以流辉伏惟某官金石存诚箕裘济美荷封崇之茂宠宣保鄣之殊勲履此令辰倍增嘉佑特承睿獎先示海函感荷所深不任下恳

七月旦启

伏以西颢司辰素商纪节湛清曦於鹑陆泣瑞露於僊盘伏惟某官寄重藩宣诚坚翊戴著抚封之令望扬分阃之英风履此佳辰别迎殊渥岂期台念先示钩函感愧所深伏增下恳

中书回夏州七月旦启

伏以金方戒序夷则纪辰起越桂之凄风腾楚兰之文露伏惟大王忠规夙茂亮节允孚早膺祚土之封克奉誓河之宠履兹令朔倍纳清休岂谓钧慈先贻台翰感铭之至但切下情

八月旦启二首

伏以律中南吕候及西成渐鸿陆之来宾自雷门之旧豫伏惟某官气鍾间杰任重藩维葛铭鼎之世勲厚苴茅之帝宠履兹令朔倍纳休祥岂谓台慈先贻钧翰感佩之至伏切下情

伏以南吕还宫仲商纪度陟少明而夕月奏幽龠以迎寒伏惟大王保塞宣诚戴君罄节仰奉文思之德茂昭忠毅之规届此令辰倍承嘉裕岂期台念先枉钩函媿佩之私不任下恳

九月旦启三首

伏以肃霜纪候清日扬辉澄楚潦之余波发丰钟之逸韵伏惟某官忠纯挺操屏翰宣威克扬

固圉之劳上奉同文之化届兹令朔倍纳殊祥

伏以肃霜戒候采菊在辰筑场圃以务藏飭衣裳而维则伏惟大王书忠甲令褒宠和门克彰济美之规允奉抚封之寄属兹告朔谅集维祥岂谓台慈先垂钧翰镂铭之至不任下情

伏以肃霜在候无射届辰礼闻习吹之仪诗着授衣之咏伏惟某官真纯秉节英勇传家镂勲业於景锺载忠规於甲令届兹吉朔益迓殊祥岂谓台慈远贻钧翰其於佩服不任下情

十月旦启

伏以候届寒英日纒天驷谨择渔而登赋设朋酒以休农伏惟某官位冠斋坛威宣汉塞仰奉重熙之运载彰式遏之功履此令辰倍膺殊祉

贺冬启

伏以日在建星斗连营室开汉门而候景登鲁观以书云伏惟大王韡韡凝华振振着信茂奉展亲之德永膺分物之封履此令辰倍延休祉

代仆射相公贺冬启

伏以建星底日伯赵司辰发黄锺初九之声孕太极函三之气伏惟大王分辉帝室流誉戚藩早膺选德之封茂奉睦亲之化履兹令序倍纳殊休

代集贤贺正启

伏以黄锺纪律伯赵司辰纪云物於鲁台奏版书於汉殿伏惟大王雍和着誉信厚流徽蚤疏四履之封茂着二南之德履兹令序倍纳殊休

文庄集卷十六

卷十七

钦定四库全书

文庄集卷十七 宋 夏竦 撰啓

贺枢密相公啓

伏审钦膺恩制荣践钧枢天下幸甚恭以某官六学宣精三英毓德锺半千之运为帝者之阿衡着画一之?作海内之明表而自弼谐先圣啓迪嘉谟甄别九流裁成庶务允属继明之治愈隆图任之恩总日月之畿坐康雅俗治金刀之府厘定旧章因是正位岩廊延晖台极来远独陈於大计怀柔允赞於圣功泊申伯于宣藩国暂均於德泽而王商真相戎夷弥憚於威名一昨发御朝真灵区展采亟入司於留龠实简自於帝心果协刚辰诞膺明命正枢庭之重任兼鼎席之崇资延登而体貌特隆咏颂而品流交庆某自陈席幕曲荷陶熔限从朝伦阙司奏记积欢心而夔异属微疹之方婴肩輿已及於东平力疾将趋於北阙瞻望拚跃实倍常钧

贺枢密尚书啓

伏以朝廷巡祭於后祇严配於神壤惠加无际庆洽有生饮至辨仪既行清庙畴庸命爵首拜元臣凡受甄陶罔不欣拚伏惟庆慰恭以吏部天官周礼谓之太宰尚书古职虞典实曰纳言汉仪首冠於列曹魏制统司於选职大则综厘庶政次则品择九流世獎茂勲代无虚授伏况国家崇端右之职须经远之材简铨筦而正司率宰衡之兼总以是望高台铉任重名槐为一人乃睠之资作九服具瞻之地岂止聯曹建礼奏事明光象北斗之枢仪总南宫之喉舌伏惟某官允厘帝载敷道化源左雄奏章动为故事唐约表疏出自手书郭贺仁明子鱼清淨议事务从於寬大临下尽削於烦苛天光自比其丹青蜀劒岂方其明達万事不理谁赓胡广之歌三让弥高屡下邓彪之诏惠加含恤道服搢绅授符则戎后歛关借箸则羌豪厥角四方无事万国可封辅成垂拱之功肇建东巡之议司先置则瑞芝蠡涌纪 鸿猷则丽藻金相暨汾水颂祇扈鸾旗於驰道神光烛夜奉龙袞於方坛礼备元黄功高钟鼎以是职弥崇於四辅官独守於六卿伟齐以仆射兼司平叔以侍中并领比之圣日难望清尘然而晋宠茂先尚开五府轩崇风后合冠三阶冕旒注意以非常珪组倾心而久待某栖投有素欣幸最深其如四海无亲三台寡援生成有路只期文命之昌言荐进非材敢望巨源之密啓

贺枢密尚书啓

伏审祇奉制恩入长枢府伏惟欢庆恭以某官懿文伟望俊德端成常袞为当世才臣魏相练本朝故事告徽宰府克懋赞襄之劳赋政别京洽着保厘之绩会朔方之奸命虚汉幄以须材尺诏亟颁追车肆覲延英入阁特从双日而开上兵伐谋升总万几之秘图任之恩惟旧幅员之系胥同某出自恩门适居塞屏瞻泰符而在远趋翹馆以末期下情无任依投欣拚之至

贺枢密副使启

伏审钦奉茂恩荣参密命伏惟庆慰伏以某官丰规粹远明识周通绋油博達於文经玉帐簠高於武略肇修边好当资出境之材继总戎昭允奉抚封之寄勲庸克着望实弥优果膺丹扆之柬求入赞鸿枢之献纳载隆命数允副金谐某素仰声猷方增慰悵重荷緘封之礼过形撝抑之辞感佩铭藏不任下悵

贺高枢使启

伏审祗膺册命就陟枢庭恩出主知事荣物听恭以某官器涵刚实才贯几深秉忠諒之一心出诚明之正性旦暮圣辰之会翱翔朝弁之华寢竭猷为益隆体貌鸿枢之柄专掌於繁机英袞之司行光於宠拜毕大臣之能事允率土之具瞻某职贰侯封迹遥台座无阶庆蹈有地埏熔

贺西枢相公生日启

伏以函鍾统律方炽於阳暉崧岳降神载生於英哲伏惟某官丰规茂粹懿德冲明猷纳嘉猷翊宣大政左弧纪庆爰偶於诞辰厥篚修诚敢陈於善祝有少微礼具如别牋

贺参政给事启

右某启伏审祗奉制恩荣陪宰府伏惟庆慰恭惟参政穹高生德岳镇降灵服百行以丽躬通三才之懿学矧自便蕃螯禁尹定神臯时厥中庸略去苛细详言照理世咨其清端心在公帝諒其节庶绩思义景命方初官惟其人政将安往果峻琐闥之秩式均鼎铉之尊公枳是维国柄攸属任隗之见重於世杨绀之自化於人凡在有知孰不载跃某早游恩馆幸托鸿钧欢欣所深耸忭无已

贺内翰刘给事启

右某启伏以祗奉宠召劝讲宸闈伏惟懽庆恭以某官道冠九流识包三极辟先儒之塞路首映人师适列辟之旧章寅禔治体外内之猷毕告天人之爵俱隆矧自引避当途镇临巨屏沈规粹范泯崖略於天和鰓议纯诚留矩模於邦直高风益邵清望攸归果当纁服之初显副优贤之命丹书访道礼厚於周臣重席谈经事隆於汉会繫兹旧德翊乃圣谟咫尺威顔世逮华光之对丹青神化伋宣台极之晖凡在有知罔不翘首某幸窥邸报方远师门忭跃之诚等夷增倍

荆南府知府学士李给事启

右某启早由踈隘获簪凝严官修之业无闻天覆之恩未报因代亲而有请爰昧死以陈章冒

禁成愆免官出守山薮藏疾荷先圣之哀矜豺虎食讎仰至明之末減四移使竹六变年灰藐是零丁宜夫湮没某官观仁以过栖爱於情目眚并以拯沈驰飞邮而剡奏抵排羣议申证非辜谓其夙侍清光少知於治体尝司洪诰多识於训辞高议霜明至言金重倬为外举足感上心而安国之灰久寒从兹起焰虞翻之骨非媚虑玷知言佩服所深敷陈罕既

贺司徒侍中启

某啓伏审钦膺朝册增宠正司天下幸甚恭以某官崧极储灵穹高格业任隗沈正鯁议不回山甫将明庶邦是式而自惟新大政首幹鸿枢三后在天仰当於顾諟七月同轨寅奉於寢园送往惟?劳还甫渥遽刊章而避宠示挹道以敦风兴让官师益厚忠淳之俗推恩师傅更隆尊尚之仪果反刚辰聿严厚礼广真封於食采增崇号以褒功诞告外庭布昭盛德凝和宝铉发景乾台万枢藹其休声六幕翔於善气怀生之品载跃攸同某出自恩门久繫余照钦闻明命增拚卑衷伏恨条职所拘不获躬诣台屏某无任欣荣激切依归之至

贺玉清承旨左丞学士启

右某啓伏审华园劝讲奉咫尺之威顔曲密侍祠貳荧煌之台座仰聆恩制伏积欣荣恭以某官峻极降神穹高生德探二仪之奥秘游六艺之粹精而况内天外人含华隐曜方圆詎表其际荣悴靡繫於怀鉴達万情尘光羣累一言不立澄宝海以皆空两半同陞游玉池而甚乐天和益茂心照逾清允副旁求仰裨初载宸帷访逮靖馆凝严荷庆於需恩式陪於鼎辅暂阶隆器行陟近司凡在有生罔不延首某自貽痕玷仰误品题久困泥尘阙通牋记右臂为弹方欣鶚炙之求良冶铸金敢有莫邪之请门阑尚阻梦寤增劳闻命欣愉倍百伦等

贺晏内翰除景灵宫副使启

右某伏审祇奉恩俞荣加命秩伏惟庆慰恭以某官气鍾辰律识贯天渊秉亮节以光朝鼓英辞而高世夙昭贤业茂着师规慎基命之惟新罄訏谟而入告周旋三接导笔舌於天常申敕万几谐笙簧于帝典鸿猷灼叙羣品推高果由岩近之司更益便蕃之数开荣琐闥克重於官聯作貳殊庭载光於使范绅綏动色竹素杨芳实乃眷之是膺俾斯文而有属当阳图旧已旌朱邸之贤絶席奋庸焉避黑头之拜恭承嘉会超絶前闻某屏去周行外司汉竹庆登贤之有命怅申礼以无阶仰系门闥岂任飞越伏恨条职所拘不获躬诣台屏某无任欣跃依归激切之至

贺转运启

右某伏审祇膺中诏显领外台伏惟欢庆恭以某官学术粹精风猷凝峙不侮不畏式是古人以猛以寬济乎中道独出羣公之右允当上帝之心引职宪牀抗棱使斧滨江而北笼货至饶兼刺百城聿当一面方钦闻於调发竚物集於京坻风旨所传欢愉交集某幸司符竹切仰幬帷获在恩庥但深跋跃

贺转运启

右某伏审密命蕃恩外台专领仰要司之简拔实衆志之欢愉恭惟某官清懿饰躬通闕廸望并包淑哲遭遇光华资荣近以久隆副金择而此厚纠?康俗适着於声猷馈给富邦暂迁其毅断即聆高最越在亲严谅伊遐迩之怀并是瞻祈之切某微姿极下大庇方依恋幸弥深志铭无既

贺屯田启

伏以屯田博達文心详明治体揔桑孔之术不议货财斥申韩之谈专讲仁义近徇常牒出倅盛藩兰桂之芬振阳已远牛鼎之器甄擢匪遥惟善顺於天和仁大光於朝议倾依所至愿颂尤深

贺舒州李相公启

右某伏审肃膺鸿沛起殿大藩伏惟庆慰恭以某官沈正秉彝清和懿德经三圣之变紬绎惟深贯万物之仪臣隣有翼曩属先朝违豫臣党兴奸密嘯羣邪阴窥时柄允繫哲辅克殄凶谋防检未萌澄综多辟虹气由是霁止霄涂为之密清精贯三辰赖深百辟终以狎闻蜚语引去上司傳致深文越处南裔孤节弥谅高揖自冲处荣悴之交人言无间失左右之手国体几亏大号继明巨慝咸露狐鼠失其深穴豺虎食於潛人协气云翔皇明电照澄洗司制延即旧臣眷惟襄赞之贤首被优深之渥慰藉良厚毗倚增隆袁安涕洟念深於王室谢傳忧乐望結於苍生虽暂假於镇临必坐阶於密勿至公来复有识相欢荐绅倾耳以聆风斯文聯册而刊美洪惟高范絶出常均某恪守郡条钦闻朝渙不获拜伏车下奔走道周但私庆於单危将永归於埏铸

壽州相公启

右某伏念闕外之邦宜严所守弗当便道增仰贵台托身块圯之钩早繫大庇之托荧煌之坐合謹彝仪恭惟某官纯槩光朝大猷稽古河带山砺预参藏府之盟萧规曹随聿冠宗臣之列席两朝之縟赏塞四海之具瞻虽复暂避繁机出临巨屏长城万里固蒙福於灵河华阙九重率乃心於王室畴庸方切图任有归仁再正於洪区永增辉於盛旦空疎之迹终始是依某无任依栖禱颂激切之至

潭州李兵部启

右某啓伏念某屡窃虎符甚安鳩拙不当便道絶欸绪风逖望朝髦夔分霄壑地颇賒於河润心但切於旌摇恭以某官直道在公懿文饰政入端朝着羣公让於茵冯出总使条舞吏空其囊橐逋民咸复美化大敷然自郡本股肱召莫先於季布治繫寬猛政焉避於国侨倾听旁求用纾劳想炎凉改候葆嗇是宜颂咏之私不任丹恳

贺薛待制知开封府启

右某伏审祇奉制恩荣莅天邑伏惟庆慰恭以某官宏猷体远精识鈎深嘉言奋乎黻聰懿文
縟乎邦宪而自宸帷访逮计省践扬瑞凤览晖仪鸿籓羽体貌之荣虽渥弥纶之业未宣乃眷
浩穰遂兹尹正羣玉上帝之府克峻於官聯太微三光之庭茂延於昼接式夫古训时厥大中
前赵後王方仰追於懿范左辅右弼竚协贊於訏谟遴柬惟新游谈胥庆某出麾外服遐拚吉
音燕厦莫趋鳧藻增跃

正旦贺内翰启

右某伏以书得夏时标物生之令候星回吕纪在岁始之常经恭惟某官履道渊冲炳文宏博
总直轡以高蹈拥大璫而远游通内相参决之谋进扶鸿业代主上深厚之训辉映前图企听
简良居承弼化率是海隅之衆尽调鼎实之和伏想赞翊循经练颐多暇履兹初历倍纳蕃禧
某早饰冗才叨偕巨庇祝颂斯厚敷述奚殫

贺冬至启

右某启伏以南至启辰聯星贯彩闔汉门而候景登鲁观以书云恭惟某官文武兼资勲贤莫
贰仰鍾河岳之瑞聿膺梦卜之求德冠生民道高羣后宗祊倚重方宣可大之功海域具瞻皆
罄履长之祝某式提謫戍久累洪钧阻陪介壽之班唯积恋轩之感依投系仰倍万品流

问候太傅启

自间风规屡移年龠忽坠奔云之翰弥萦摇旆之心伏惟某官懿德远闻芳猷夙茂旅弓白羽
妙絕於等伦玉帐绦宫精通於机会伫奉戎昭之寄式彰勇冠之材六轡方驰清谈尚阻惟希
冲养以副愿怀

问候尚书启

近拜邮书仰通铃阁遽承钧诲实聳朝荣獎饰有加铭藏罔喻恭以尚书浚明着德寅亮成?四
方于宣允叶维周之咏万邦为宪方歌受祉之诗伫正位於近司永流徽於民表伏冀为国自
爱副民具瞻某早荷重知误攀多士衔旧恩而莫报怀深颂以徒增栖倚之诚倍百常品

省副郎中启

右某伏以三阳之律初宣式新庶彙一岁之端肇正爰着前经恭惟某官妙味宅心懿文秉德
越丁复旦洁履仕途计部赞规克谨牢笼之典丹墀诏爵即膺近密之资方属令辰谅延殊祉
某夙叨齿记但积瞻依

回雄州馆使太保启

屡驰丹恳仰瀆清规遽捧报章实铭懿念伏惟某官书忠甲令纪绩太常已久肃於边庭行入
参於枢府方新岁律更顺天和愿颂之怀倍百常品

免奉使启

比膺使指往奉欢盟选授至艰道涂差近况多侑币实济空拳然念顷岁先人没於行阵春初
母氏始弃孤遗义不戴天难下单于之拜哀深陟屺忍闻禁休之音车府露章槐庭泣血王姬
筑馆接仇之礼既嫌曾子回车胜母之游遂辍荷两宫之大庇载三事之昌言退安四壁之贫
如获万金之赐某官力持名教数獎孤寒属商利於摘山阙言心於奏记何图驿置先坠书筠
俯哀蹈义之心不辱资忠之训永唯佩服何但铭藏卑情不任感咽依归之至

文庄集卷十七

卷十八

钦定四库全书

文庄集卷十八 宋 夏竦 撰 启

谢授知制造启

蒙恩特授前件官充职者紫微秘掖尘书命之司丹屏仪曹叨奏疏之任尚兼载笔仍赞殊庭恩獎有加心顔无措此盖某官蚤垂顔采曲借光仪是致鸿钧误甄微物矧蓍龟先见尝昭示於前期松栢後雕忽远流於荣问夫何後进辱此重知顾报遇而未由但衔恩而有素区区之愚莫喻万分

谢起复授知制造启

伏奉制命前件官陈避不允者靡依茹痛瞻风木以陨心图旧延慈俾墨衰而从政未能毁灭惟窃震惶窃念某本以诸生尝阶近侍如弦谬直伺兔甚愚爰六剖於铜符遽九迁於圭龠采兰就养解绶而靡遑陟屺衔哀号天而罔续式遵治命归葬近畿宅兆未安杯圈如此岂谓误传诏版许复故栖三岁免怀乞终于丧纪两宫爰下莫寢于徽章强整残躯再司旧物此盖某官荐延有素保有特深致兹放浪之踪荐游清切之禁怀鈇久废但重学於画脂弄杼非工敢更言于织素唯期尽瘁少谢生成卑情不任感媿哀咽之至

谢某官启

祇荷宠光不任荣惧伏念某器能无算材识非奇幸际会于昌辰亟忝尘於近列徒更寄任莫着声猷窃位枢庭詎弥纶於密命备员鼎席莫寅亮於大谟此者伏遇国家钦奉真游诞均蕃锡加勲臣之美号进公府之崇资兼益户封愈隆命数循涯多媿敢忘周任之言昧进诚难亟效范宣之让虽削章之继上顾出綍之已行但知受以周章固退思而恤墨此盖某官因承清宴曲借余辉致此庸虚荐尘优渥敢不尽瘁事国少逃濡味之讥夙夜在公更竭负山之力感铭之至不任下怀

谢大王启

叨膺恩制载锡徽章祇受以还兢惶靡措伏念某遭逢运会忝冒官常自膺图任之私莫着谟明之效昨者国家钦承真御逖谕鸿源范肖象以惟寅建殊庭而有翼岂谓具臣之幸特膺置之荣仍益爰田尤彰异数顾满盈而是惧实避让而靡谐叨据踰深周章罔踰此盖大王尝因密侍夙借公言致曲荷于宠灵惟仰銜于殊造永言媿佩但切丹衷

南京到任谢二府启

仰承獎擢伏积兢荣窃念某本实庸人妄干荣进早缘误宠亦玷近司上赖保全获均劳逸一昨东秦闵雨下户将饥猥奉诏函就分使竹殊昧救宁之理莫寬旰昃之忧事虽欲於防虞言或多於过切当朝廷责实之际固岩廊精汰之辰襍被自随屏居是分岂谓伏遇某官俯矜旧物深屈至公仰赞恩章俾厘留府典铜鱼之宫钥合银兔之军符周微子之封圻汉酈侯之寄任载惟蹇短曷副坯陶惟更励於弩材用少醺於元化感惭刻着倍百常钧

永兴谢二府启

出自坯陶伏深感恋窃念某人品弩下世胄孤平继典九城荐更三纪无一毫之可録悵十驾之空劳向者召自别都俾司会府服勤徒切析利非精矧从视事之辰便主摘山之议逮成奏格几汗?书爰以细札垂文阳郊错事泰坛备物方畏瘵官斋幄还衡甫宁悸魄摄须稍逸垂翅将安弥仰恃於哀矜冀且参於下吏岂谓伏遇某官因陪漏刻误忆姓名议四鄙之羽书按东曹之边琐拔於端右付以戎昭六纛启行光华籍甚万钱赋禄訾计差温中外诮其何功文武讥其不次载惟求旧深累至公敢不更励忠?上醺元化灭烽未日既耻於家为数级有时或期於天幸指玉关而非远瞻铉府以方遥媿荷依投万倍伦等

授宣徽使谢二府启

右某蒙恩特授前件官者元化均分近司进拜殆非功次有误宠章伏念某偶以孤生谬缘薄技攀仕涂者四十载窃民政者十五城而况兼护将屯悵絶弦之未逐创图羌事慚唾掌以难裁猥陞四贵之华颇玷十连之长人讥多幸自讼何劳此盖伏遇某官登翼大猷矜嗟旧物量衆恩於边琐较前职於省闈昭衡石之至平洒霖雨之余润万金屡费适寬责帅之文十使兼加方切摧凶之效敢不益张睛胆更厉偏裨庶集羣劳仰醺坯冶

永兴再任谢二府启

右某蒙恩授前件职并知永兴军府到任上讫出自坯陶伏增感惧窃念某顷尝占毕素不知兵特假幢麾比长关中之戍亲临矢石俄为陇上之行徒肄业於蟠矛罔追功於横草猥荷向隅之愍犹书守塞之劳箕颍奥区方膺於外徙河潼右壤亟复於故栖实总掇於百城且并获於诸道金印骈组尽兼数使之名玉帟建牙爰当上将之任倚办尤重堪副诚难此盖伏遇某官登翼皇猷布昭元化图殄目中之敌先增阃外之权首念朴忠骤加宠数既腾讥於帅贱将责效于功除敢不只慎戎昭恪遵庙略武畅西海傥横厉之有成生入玉关固哀怜之是望永言报塞敢惮勤劬

并州谢二府启

右某蒙恩【原本阙】西陲用武寸效曾无北道乏人金谋猥及负责斯重戴恩则深咽喉要冲股肱旧地旁连马邑直控鴈门周宣中兴兹尝薄伐汉武怀远此焉观兵屹然形胜之区纷尔转鬪之地思得良士倚为大藩某素无兼才暗於临事精诚内耗齿髮久衰上马据鞍虽自

矜於矍烁登车揽辔尚有志於澄清然念孤蹇多艰功名难偶事方创置谤輒随生孤根易摇衆口难辨指尝戾臂志不酬心尚赖丹宸至明黄合垂庇曲藏?殿勤赐保全勉策暮年俾图後效孟明屡辱定收三战之功孙臆何堪终期万弩之发

回谢二府启

幸会昌辰误尘近列仰荷同寅之德唯增有朐之慙岂谓钧慈曲记生日俯垂荣诲形厚意以居多仰佩殊私镂丹诚而增切所贻盛礼焉敢克当

泾州谢二府启

仰戴坯熔实难堪副伏念某本由寒进妄齿清流三品崇高屡更於都座十城罔养遽剖於军符未尝练達兵铃习知戎警猥奉临泾之役敢辞负羽之行汉惟六郡之雄唐兼四镇之重宜得飞将倚为长城岂谓伏遇某官登翼大猷斟酌元化曲矜嗟於旧物特选补於边屯仍加置於使联俾专司於武旅望岩涂而驰恋抚骈组以知荣惧上累於甄陞益俯加於策励兼程赴治周览根心顾楼雉之未完且租更之甚阙?烟在望固当西鄙之咽喉营壁空存无复北庭之组练愿更寬於警策庶渐葺於封陞愧荷依投倍百伦等

谢魏合使启

伏以太尉先令公维嵩宅粹间气凝祥妨汭降嫔极三朝之眷待台槐袭庆陟四近之尊崇功在旗常政传謡颂仰图英烈允属鸿儒岂谓某官特示哀诚见求鄙制虽早承知獎备熟於音徽而载罄庸虚莫周於事实缉粹音而仅就镂翠琬以为慚敢冀仁明过垂恕察兢灼之至不任下情谨斋沐譔成先令公墓志铭一首随状呈纳

谢参政启

昨以总司帑藏谬纂纲条洎参校於权衡窃审详於钧石岂谓鸿私曲被优诏荐颁将并刻於坚珉庶永传於内府恭以某官丰规冠世明识过人幸久荷於殊私遂仰尘於英聽遽示緘封之礼载形獎与之辞况近列之至崇辱前衔之过重但铭藏之增切顾当捧以尤难悚惕之诚倍百伦品

谢西京尚书启

伏以尚书懿文雅正妙识融明避中铉之钧衡奉西都之筦籥惟保厘之允迪固乐只之攸宜方企旆旂遽承简翰玉音无斲式慰於深心鼎席荐陞伫光於善颂倾思铭佩文不尽言

回大王启

幸鍾运会误玷台衡属当生育之期方积劬劳之感猥蒙钧念曲示诲函仰承仁厚之私俯集
媿铭之素所颁盛礼安敢克当

上亲王启

某启幸会熙明叨尘机近揣分深惭於昧进依仁实赖於同寅式当生育之期方积劬劳之感
敢期钧造特赐荣緘荷眷与以尤深积铭藏而莫喻所贻厚礼焉敢克当

谢枢密相公生辰启

本以非才幸逢嘉会莫着谟明之效但贻昧进之讥岂谓钧慈俯记生日降緘滕之荣问示筐
篚之厚仪载揣庸微固难克受感铭之至不任下情

谢宰臣惠食物启

伏奉殊恩俯颁异味仰惟顾録盖不遑宁伏念某胄绪寒微学识蒙闇无近亲可以仰给无先
畴可以躬耕幸依赖於门阑得叨尘於宫序西崑抱槩遽获於依仁东阁食鱼仍容於庇族曾
无鸣盗之浅术徒恃簪履之旧恩时奉光仪特惠顔色掩愚陋之累耸殊尤之观复念食贫深
矜分薄屡垂赉济俾育孤遗当雨雪之既零知藜藿之不给载形軫恤辍赐饘羞食五侯之鲭
无惭上客持左手之螯宁媿昔贤顾举族以分甘念何门而展効心同白水期誓节以无渝命
等鸿毛冀畴恩而有所退量微忝唯切战兢

回学士启

远承尺牋兼示青编究作者之楷模振古人之风烈况斯文方盛公议有归仁膺前席之求幸
息沉僚之叹感铭所至愿颂良多

回谢学士启

伏审光奉茂恩荣膺宠数?惟某官丰规茂粹雅度淹通龟紫传家允叶芝兰之誉缣緡隶志克
彰黼藻之文而自射鹄飞英衔标擅誉遽升荣於匠署仍关掌於郡条大宣五袴之謡爰上三
年之计果试言於宰府亟引籍於朝闥石室讨论閱緹油之祕遂兰台着譔颺茜绶之光华弥
着清徽允符公议某正深慰悵忽奉緘滕载闋雅丽之辞唯积媿铭之素

西京留台谢少卿启

向者令嗣还台荣緘垂问属常居於赐告遂久阙於报章延企清徽但深遐想近审蓬丘进秩
示獎於耆儒梓府分曹尚优於冲掇谅惟褒命弥耸高风尚远披承更希遵爱

回徐舍人启

某闻太一三光之庭仰昭於天象内史八枋之法实掌於王言聳禁近之荣阶极斯文之盛迭钦承茂德允谓当仁恭惟某官风格粹和识度弥远懿行推於伦党奥学本乎宗师书观麋贤盛有滯留之叹官曹率职累更繁鞅之勤环望流闻渊衷妙简亟试才於槐府俄锡命於纶垣景祚增光有识交庆固将辞成楚宝体变汉风斧藻凝猷鼓动中和之气羽仪严侍翕彰奇异之能忝预朋从忻聆进擢结绶甫陪於迓躅披滕遽沐於芳牋恭窥辨丽之功益仰谦虚之美其於佩服罔罄敷宣

汉东太守司封启

某顿首顷岁从庄穆灵驾尝倾盖茱阳道中二十年矣比者谪官江滨久陪隣好过客翩翩未尝不沐虚獎寻属使节东案淞水大门荒阡特蒙增殖松楸今已成林其为恩旧若此而叠委公函遽兹相外岂以後进骄气未祛是将待小子於名利之交欤幸缘雅素改赐手海庶依仰之有地新葺已拜受讫还源观文敢冀垂借今附云峯二器聊饮从者流晖电?尘事蠹午某限守半章阻越宴坐不胜瞻望感恋之至

集贤相公辞官启

伏奉制恩并加命数载循忝冒实积兢惶伏念某性识颀蒙声称浅昧幸遭逢於期会叨践历於官常遽尘枢要之司亟豫台衡之任循名责实曾无致远之能具位妨贤深负食浮之媿此者伏遇国家钦承天命茂对僊游昭积累之鸿源显顾諟之景佑式均大庆首及近司进执璧之崇阶正跃池之峻秩仍益爰田之赋兼增真食之封受宠若惊顾何功而可报知止不殆将昧进以尤难已沥寸诚?通勅奏愿寢既行之命庶寬若厉之忧伏望某官俯谅曲衷特矜非据因从容於昼接为启迪於昌言傥罢命书永衔恩造

东枢太尉相公辞官上大王启

伏奉制恩并加命数揣循非据启处不遑伏念某器识甚微声猷素昧遭逢朝会忝冒官常践清切之司固慚於润色奉弥纶之议莫効於将明荐膺加等之恩亟列秉钧之任虽思退食益媿妨贤此者伏遇国家至德符通真游昭假茂对式均於纯锡诞敷首被於宠光进掌武之崇资益褒功之懿号仍加井赋兼益真封虽堂陛於务隆示褒优而过分顾斗筭而易满惧颠跻以貽忧已恭拜於囊封乞追还於诏命伏望大王俯矜短拙用軫怔忡因入覲於凝严为特伸於敷奏傥谐诚请永荷恩私

仆射相公辞官启

大庆方均鸿恩曲被省循非据启处无从伏念某器识颀蒙声猷浅昧从政乏靖恭之誉代言无雅奥之辞徒以幸会休明误膺眷獎亟正台衡之任荐尘揆路之资维石岩岩莫允具瞻之

望代檀坎坎甚貽素食之讥此者伏遇国家道化休明圣风醇畅感真游之报降谕仙绪之绵长钦修茂对之仪诞受聿怀之福式覃异渥首及近司琐闥分曹荷宠章之至重琳宫置使奉明命以惟新仍加数於爰田兼益封於真食踰涯既极昧进诚难苟窃禄以无厌必旷官而负媿已陈奏牋愿寝出纶伏望某官曲谅庸虚深矜悃悞因入趋於三接垂特達於一言冀收涣汗之恩用息怔忡之恳

辞官上大王相公启

固避恩私未俞诚请省循过分陨越无从伏念某本以遭逢获谐几近戎亭彻警曾微借箸之勤武帐承顔空备影纓之列每奉承於成算动遵守於旧章但敦臣子之常规无益朝廷之大政岁月滋久尸素居多深怀昧进之忧将避妨贤之路岂谓宠灵荐降命数尤崇令备职於弥纶复正名於宥密揣躬内讼惧貽覆餗之虞沥恳露章愿寝出纶之命葵心虽切天听未回已再瀆於凝严期特收於涣汗伫闻得请用息端忧伏望某官特谅曲衷俯矜非据因奉清闲之宴为陈特達之言傥罢近恩永衔殊造

仆射相公谢授官启

降成命於庆霄靡容辞避集殊荣於琐质但切兢惶伏念某幸会圣明叨承天宠乏胡广中庸之誉昧孔光周慎之规四海同文莫借筹於武帐万钱受俸徒充位於岩廊此者伏遇国家钦奉真游诞昭仙绪式均茂渥首及具臣进秩黄枢寔正秉钧之任列司恭馆肇膺置使之荣复加数於爰田仍益封於真实宠章弥峻輿议谓何深媿旷虚之质获叨进阶之荣感愧弥增敷叙奚悉

文庄集卷十八

卷十九

<集部,别集类,北宋建隆至靖康,文庄集>

钦定四库全书

文庄集卷十九 宋 夏竦 撰书

上巡抚使裴司封书

右伏以国家幅员亿万废古封建州县之治责在庶官用一贤则数十百里有受其赐者用一不肖则数千万屋有当其暴者故朝廷年间屡下诏书切责所在长吏察举良士而吏道益杂贤者益寡不肖者愈衆其故何哉盖荐举之官罔思沮劝事有驱走暴露艰险刳弊无功而多过者非清苦勤谨则不用也事有宴安温润平易整葺无咎而多誉者非亲旧昵幸则不用也皆谓公举受赏不若私举受罚故举制益艰而举状益谬情害於道可胜纪哉使忠信者惕惕自晦什处伍列但以道俟人人不知则俟他人他人不知则复俟他人终不敢以心腹肝胆从人以求知也浙江东西地长千里亦有退伏兢栗茹蔬饮水以待人者待之不得则复待之复待之不得则有中夜而起望象魏而北叹思得贤使者观省南夏按察良苦无何精诚所感陰阳有开果遇执事拥传东下谕朝廷之意劳问高年疎决囚系士之有所待者皆歌忭相庆如早颖焦枯而甘雨垂降诚以执事豁達正直蹇谔刚毅为国家谏诤之冠冕为苍生号诉之梯石终不忍使可以熔铸翦拂者沉滞於下位然则执事慰千耆壽不如退一贪残减万笞杖不如进一贤才贪残退则民不待慰而自安矣贤才进则刑不待减而自省矣贪退贤进民安刑省则执事之功可与太平无为者相上下岂当与钱谷盐铁之官较轻重哉某丹阳一掌版籍吏耳自幼及长闻执事之风恨不能执羈勒於門下以满夙昔之愿今执事揄扬明天子之德慰劳吴会之民故敢竭思虑冒罪宪少布腹心於左右惟执事者裁念之若令诸有待者不复於他人则某之区区百世幸甚某再拜

两浙运使姚铉书

伏以国家之制内外分职内则中书以发号令枢密以掌兵政三司以计国用外则输运之司使领方面其职有六其政有五纠奸慝明简稽察利害平筦榷通商贾重废置之谓六职举贤使能报功恤刑爱民之谓五政六职修则国必丰其财五政举则官皆称其职丰财则无重斂称职则无弊事然则六职之要在乎纠奸慝五政之大在乎举贤能何则若执事之麾下地长千余里官不啻数十百员人心如面罔或纯一贪夫徇利皆曰上官烦剧不暇按省故安於懈惰嗜於赇赂以浼执事果知而罪之则为恶者沮矣廉吏砥节皆曰上官明允有能必举故服於勤恪甘於冰蘖以待执事执事果知而赏之则为善者劝矣然则多纠恶不如多举贤传曰禹称善人不善远矣其是之谓欤故某之有待於执事也非一朝一夕矣某本无他材癖嗜儒学虽不得经指而颇知戒训居贫而固其节临事而专其守勾乙案籍之暇则伏读先王之书日饭寒蔬数十本若牲牢水陆之味而又侑之以钟鼓岁服败绋数千缕若衣文绣纨绮之裳

而又映之以珩佩非不知富贵之可悦贫贱之可厌也盖富而忧不若贫而乐者也尝念事父之日食饫饔糗衣缁厚絮无何近丁家祸墮於徒劳县官日给斗粟数十百钱同爨十余口罄罄然皆有菜色必货什器质衣衾而後充其费穷如是困如是誓不忍学穿窬之盗蠹耗苍生而苟且衣食虽清白之吏忠信之民以心许我而时命艰蹇终鲜知己昨以道干少卿陈公公以一言誉之而未深省也退而度生成之地无出执事之门何则某为童之年尝闻执事豁達正直提幹吾道暨今处麾下复太闻执事荐拔良士尽公无私夙夜繄繄然恨不能负綏执鞭以遂欣慕之心今少卿有鄱阳之命而执事按行常润某之区区如热得濯但恨偶萦负薪之疾不能兴不及稽首衡监之下仰千题品之主岂天复未开某以明公知之乎愿执事哀恤穷滞听察言行若矜其廉慎擢於行伍必能恪居官次守死善道不敢贪慢以累明德若念其愚直举之谏科必能待诏公车对扬王庭不敢佞媚以辱通鉴诗云惟其有之是以似之书云举能其官惟尔之能是则善有所在公其舍诸惟昊天曷日知我之不欺於执事也矣惟执事辨而明之若执事听之以为是诚幸矣若不听之以为非亦幸矣是与非穷与達皆取必执事愿执事不惜一言而裁之於戲日月逝矣功名未立文以足言颇至狂直

上知润州陈丽天书

伏以外诸侯之重二千石之贵唱首太平必举贤隲夫良乐之廐乘黄伏皂工倕之室榱桷在御岂有贤太守之庭而无良士盖知与不知尔伏念某四岁结髮从师执铅槧者十五余载矣去年再践场屋荐名天府方将交辟春闱鼓行文阵属边阵多事简书蠹午遣宰辅折冲河朔先人奉辟请之命供传遽之职发兵间道於戎事帝用追念行加等之赠举嗣袭之典命於柴毀之际固让不听外廷有补以县吏夙心素业堙郁无诉今者岂谓遭遇执事總秉部政威望隆峻铨度人物哀恤孤幼故敢以片言薄技深自媒荐所望执事近观厥言远察其行萧艾之畹可择兰菊鳬鷖之渚亦有鸿鹄勿谓冗官而非秀孝诗云惟其有之是以似之书云知人则哲传曰举尔所知礼称推贤而进達之易谓拔茅连茹故文子之举管库赵孟之出淹滞善有所在人其舍诸然某之所望不敢逮此但觊执事鉴其好学少回惠顾使他人无庸贱之谤公府减奴隶之责令勾乙之暇得和铅弄翰荐举之际许解官就试必能昂首掉尾自求腾蹕上以副先人之心下以遂为儒之志遂得待问都堂扬今古射策紫墀条对急政将不在他人之後以辱公举语其报效则有先王仁义之道在惟下执事者裁之

上开封府廉献书

伏以国家因袭唐制小宗伯岁贡多士率以至公之器裁为慎选之具而尚士流私议泥而不通身处孤寒则望权门而怨豪族名籍礼部则陵後生而幸青紫故贤能之书未上而毁誉之言已滿殊不问其艺如何耳某以为银黄之族不无材智金玉之室亦有忠信夫以乘黄越国岂待十驾而迈逢蒙射鹄何须再发而中是以林居野处不足以自贤三应五上不足以自贵惟善之所在尔但孤进有才则居豪右之上鼎族多艺则冠士流之首又何待略践场屋多历年所而後预等甲英杰者哉故某居寒贱未尝怨肩隲造未尝忧诚以公道有所属也今伏遇执事幹张斯文采擢英特岂敢自昧默而不言伏念某四岁从师读书七岁学诗九岁学赋十有一而学文柰何天陋其辞不能脱穎而出今年甫冠带方敢抱所有冒乡举苟执事照之以

龟监量之以公器哀其说右其技得致师文阵贾其余勇辉焕士林飞跃亨衢则执事之惠非止谓生死而肉骨於戯以先王仁义之道取我者我当以先王仁义之道报之岂敢引蛇雀故事饰为虚言惟执事者裁察之

上晁迥舍人书

伏以先王知文之可以守天下士之可以司文德故择聪明方正之臣居左右侍从之列思得荐进以广儒雅然则旒冕之侧贤者不敢自私其禄皆欲显忠良拔沉滞以自效故君明臣忠而後良士大夫进焉帝宋龙兴奄有万国礼乐之臣列於王庭而陞文章之职居顾问之地十而有一犹比肩也迺者执事步台阁蔚有令誉帝用明试擢居近臣斯文载光远近交庆孤寒之士皆离蔬糲踴翕然有膏粱之望诚以皇上之明执事之忠千载一时不可失也伏念某生长闾巷结髮事师抱六经知谈仁义执刀笔知为纪述先哲之行从政之事虽失其具体而得其枝???其如恹恹京辇间困於尘埃公卿门閼峻如天梯而不可履物不终否有时而泰果遇执事不有清贵惠顾寒贱赐见於清闲之际而勉其劳苦固非敢徼一面之福幸失得之举但念服邹鲁之训累岁月之功不敢自贤以妄进不敢自愚以自退伏冀执事平权衡以榷其轻重开龟策以决其疑贰设鍼石以导其聋瞽使迷途无长往之叹苦学无虚费之劳传曰朝闻道夕死可矣踪迹如是勤拙如是惟明公裁之

答杜侍郎书

月日具官夏某斋祓再拜复书于某官某跪啓温教数四成诵仰銜意爱至感至慰某资性婞很门绪单孑零丁士途孤苦万状恭惟高明素所谅悉不图虫篆之伎猥当斧钺之选戎略方警理不可辞竭忠尽愚深自策励岂意天幸有二成於钜贤内手扪心何阶至此也哉秦川旧都土风豪侈气势相高礼义几废腐儒浅识以为汉唐遗老衣冠旧俗可以三代德教化之过客貽以迂阔相笑小人诋訾或浸淫上闻前史所谓隣城嗤其不能也而执事力庇其非称以为是铄金积羽言下顿消此天幸之一也党项余孽跳梁徼外宿旧亡没靡所咨度加以罢輓无他智术但忆黄卷中一两事若武安之守鴈门谨烽火明斥堠飡士习射数岁不亡失终然破虏羊祜镇岷南各保分界无求细益陆抗以为彼专为善此专为暴是不战而自服也终亦平吴心颇慕之以逐麋之犬尚不顾兔岂有将王师而循小利以一华人易一党项者哉是欲坚壁清野以须远略不求目前首级之效前之所谓边兵皆以为怯者也而执事独护其短饰以威名衆言十七衆誉随之此天幸之二也矧五原塞外地平道阔自古西戎入寇之路临泾孤垒去大虫嶮止八十里无衆将劲兵控扼冲要而贼骑远去高奴山谷纒属地险兵厚谋臣猛将并在一城而逆党窥之无他但勇其难而忽其易谓非材者不能轻重於敌不足顾也其於谨备西北敢不夙夜竭节以奉明戒延安之警沿边将佐皆被朝旨秣马厉兵分压贼境以为声援旋闻贼骑遁去皆如明识之所前料也所恨者未能缚致戎首戮之藁街草壮麦黄尚烦庙筭飞刍挽谷重扰边民梦寤傍徨未知攸济又念本出寒绪不達人事但谓学古入官以为得计焉知以书御马为世所嗤独明公信之怜之岂孔门之道果不負於後人耶何钜贤之眷眷若此乎东望旌棨无任瞻依感恋之至不宣某斋祓再拜

文庄集卷十九

卷二十

钦定四库全书

文庄集卷二十 宋 夏竦 撰论

定四时别九州圣功孰大论

先王之有天下也仰观乎天俯察乎地天以四时为佐故历候不得不正也地以九州为纪故疆理不得不别也昔在帝尧稽法天象申命羲和期三百有六旬有六日以闰月定四时成岁暨禹乘四载分别九州随山刊木洪水无害然皆上古帝王之圣功而有区别焉夫圣人经始万邦劳心百度皆欲先天时而後地道也三皇之季盛德广大陶唐氏虑天时之不顺正朔之不叙节候之失度日星之失次历算之失数人民之失所乃命四岳钦若上天历象日月星辰敬授人时所以明天道也洪水襄陵羣生昏垫夏后氏疏凿山川流导四渎分田壤之等降定贡赋之隆杀桑土既蠹生民粒食所以正地道也夫天时正则霜雪风雨於是乎可信上下经纪於是乎可象芒甲羽毛於是乎茂育政令教化於是乎可期故辰弗集其房而夏君征其畔官火犹西流而仲尼罪其司历盖百王之大典上古之彝训也然则定四时成岁何先乎闰余说者曰周天三百六十有五度四分度之一以三百六十日为一岁余六日三十日为月月行疾又岁余小尽六日故五年再闰以定四时之气也夫地道别则播种耘艺於是乎有常赋役职贡於是乎有典原隰坟衍於是乎定位昆虫鱼鼈於是乎有宅然则平水土何先乎九州说者曰州者畴也言畴其土而分别之也盖闰余不正则历象不叙历象不叙则天纪扰矣田畴不分则贡赋不至贡赋不至则人事废矣传曰太上立德其次立功尧之道定四时而修天纪立德者也禹之道别地利而正人事立功者也功德之际固不同矣

九功九法为国何先论

夫有国家者稽考往制裁为政术故彝伦攸叙万事允治经纬不紊於繁上下皆底于道然则以典故为政者其大有二有九功焉书曰水火金木土谷正德利用厚生是也有九法焉周礼曰制畿封国设仪辩位进贤兴功建牧立监制军诘禁施贡分职简稽乡民均守平则比小事大是也然则致治之本何从而先昔八世之君不相沿袭帝者有帝道而御天下王者有王道而御天下帝道广而大其制也简故其民从之而不拂王道明而正其制也密故其民从之而不违当其陈九功于舜禹之世其言要而其用也普其帝制之余乎正九法于姬周之始其言辩而其用也周其王制之余乎夫万物非五材不用故九畴以五行为首民非五谷不食故八政以食为先不正德则教化不達故书云德惟善政不利用则民事不济故易曰日用不知不厚生则国计不丰故书曰民惟邦本由是善为国者修五材而民用足矣贵谷而民食丰矣正德而天下之心服矣利用而邦家之用济矣厚生而百货之本達矣故六府三事允治然後可以制畿封以正其法辩仪位以节其事进贤才以惩劝建牧守以司察诘军禁以绳纠施职贡以制财简乡民以施教均守则以结信正小大以表礼着为先圣不刊之典垂为百王不易之道盖夫帝制者尚道德者也王制者尚法度者也先道德而後法度则民怀之而从上了若去

道德而专任法度则四海之政官府之事将有察而不胜者矣於戲臯陶周公之心可以知之矣

舜无为禹勤事功德孰优论

天生烝民立之司牧实曰天子天子必张官设吏布德行惠以怀万民驱之四方上下惟其所从在其治一也而其道固不可同矣三五之君其治之至其德之盛际天接地垂映列辟者皆曰舜禹则舜禹可以谓之盛德夫舜以无为而治天下禹以勤事而陟元后然则无为勤事其有隆杀矣夫圣人功业既殊教化皆异其德隆者其功逸其德杀者其功劳逸者合於造化而及於物者也劳者滞於形器而立事者也故言事者劳逸之际不可不察也夫无为者逸也何以逸能任人也圣人劳於求贤逸於得士当有虞氏纳于大麓遂陟帝位任四岳以主内事任十二牧以秉外政任大禹垂益伯夷夔龙以平水土以典礼乐以掌山泽以治百工故可凝旒垂纓而御遐迹当宁深拱而行教化德与天道契乎渊默诗云不识不知顺帝之则书云知人则哲能官人安民则惠易曰垂衣裳而天下治其是之谓矣夫勤事者劳也劳者何盖自任也圣人忧勤以图治躬亲以底绩当夏后氏受帝之命又厥水土乘四载而导江河别九州而差贡赋任其桑土分其土宜闻启之泣而不归栉风沐雨而无倦授元圭而告成功以声身而为律度故能功着万世济于生民诗云弗躬弗亲庶民弗信又云小心翼翼其是之谓乎故圣贤之言舜也则称其德曰无为而治者其舜乎又曰舜有五臣而天下治言禹则称其功曰尽力乎沟洫又曰微禹之功吾其为鱼矣盖德者形而上者也功者形而下者也立德立功之道其殊久矣况禹受舜命而告厥成功乎

曾参不列四科论

登四科者十人而已德行顏渊閔子騫冉伯牛仲弓言语宰我子贡政事冉有季路文学子游子夏而曾参於孔门为達者也不预十哲之选其故何哉夫仲尼生周之末立定哀之间斯文中微不絕如綫乃以仁义之道行忠信之事考其言行采其材智得是十子第为四科以标儒雅之道其选盖至矣而参不列其间者念其道有所未至矣试尝论之曰孔氏四科之选皆有贤哲之具体者哉非各言其一也贤者百行之先阙一不可顏閔非独以德行选也游夏非独以文学举也宰赐非独以言语称也冉季非独以政事择也盖有五常之具德而後列其所尤至者哉故德行者岂无政事政事者岂无言语言语者岂无文学斯互举所长之言也而曾子惟以孝行着闻不能具得能者之体但行其一端故所以不列於十哲者也若孟子所谓伯夷叔齐圣人之清者也言夷齐不食周粟采薇首阳盖得圣人之一清德耳蹈道则未也由是观之则参之事夫子学其道推其心但得圣人之一孝德耳言其材则未也或曰参也孝何以非贤哲夫十子者有四科之德岂无孝乎盖孝在其中矣三千之罪莫大於不孝仲尼之门英贤之选而薄於孝行圣人之心何以言哉或曰孝者百行之先居在四科之上夫孝养之道诚为至性然莫逾於德行故仲尼尝曰孝哉閔子騫而居德行之科盖孝者无以逾於德也是则有其德然後列在其间而参之孝一介之孝也仲尼尝曰参也鲁故为之说天子诸侯之孝以治邦国以及百姓以广其志

开封府试三正循环宜用何道论

先王应天祚敷政令历象为贵因损为重故春秋之义正月居王之下示正朔自王者出也当帝道标季王化资始夏商周之君代王寅丑子之正攸斲夏后氏忧勤而治沟洫禅让而陟帝位以大簇为正簇者凑也万物凑地而生阳德之盛者也其色尚青其乐大夏祭礼尚气牲用骍驹商放桀而取神器惭德而朝万国以大吕为正吕者助阳宣气盛德之中者也其色尚白其乐大濩祭求诸阳时用日中周伐纣而王天下戎衣而威远迩以黄钟为正钟者种也律吕施种而出盛德之初者也其色尚赤其乐大武礼贵兼用牲取騂牲於戏商循于夏不敢居盛而处中周循于商不敢处中而履初故观之正则其道可知也仲尼曰行夏之时又曰吾欲观夏道是故之杞而不足徵也吾得夏时焉盖知夏之律历四气可以平分也三代之季秦以十月为正汉初因其弊而终革之太初已降率以夏正为定典夫阳生于子大人道长羣陰尚壮天地闭塞若政教立而未布文章施而未焕阳渐于丑其气欲胜宇宙凝沍庶物犹蛰若刑政孚而未達化育至而未成阳发于寅其道大振草木甲拆土膏脉起万物喜其嘉会陰德伏其摧剥若道德之教未毕礼乐之文皆至易所谓圣人作而万物覩之时也吁政有大小德有盛衰三王不可以共议三正不可以同道当循环而後知其政德焉故史迁曰三王之政如循环穷则反本国家革五代之弊继隋唐之基谓汤政多惭周业孔武恐不足以表仁义之化宜乎用夏道跻禹德所以同时令齐闰余节春夏之和正历候之始使告正朔于天下而民知其盛德焉君子曰邦有道虽商周之正可也邦无道用夏正将无补

曹参守职论

汉曹参自齐入相饮酒继日惠帝让之参谢曰陛下自察神武孰与高皇帝上曰朕安敢望先帝观臣孰与萧何上曰似不及也参曰陛下之言是也且皇帝与萧何定天下具法令陛下垂拱参等守职遵而勿失不亦可乎吁君之不逮在贤雋致之则尧舜可也已之不逮在道德进之则皋夔可也况世革秦弊时在守文创业之君则兵以诡胜事以时设有刑戮之威而无绳墨之制高皇帝承秦弊而起远近响应数年之间平定四海暨继世之君则当守仁义循法度制礼乐易章服抚内外明刑罚官贤材亲宗族所以基太平而遵王道也传所谓王者必世而後仁故文武之政周公制之成王襁褓而德及三代岂成王之德参於文武乎参上不能致君下不能自强况治民乎君则限以高祖己则限以萧何而不知古圣贤有殊功异代者矣谓天下定而不可复危法令具而不可复易我不扰则天下静我无事则天下定呜呼三城长安役衆百万简易之道邪降灾雨血桃李冬花无为之应邪勿失之职复可在哉盖参祖尚黄老饮酒不治凭托异说以致王室陵迟诸吕弄权实参之自坎

狱市为寄论

夫先王狱以定刑市以聚物刑必正其枉直物必辨其良伪其来尚矣汉曹参起於狱吏执圭而侯以将校之材迹黄老之弊政事之失必以寬晚岁罢齐相属後相曰以狱市为寄慎勿扰焉相曰治无大於此乎参曰狱市所以并容也今君扰之奸人安所容乎吁狱者鞠讯过罪答掠参至奸吏市法出入生死良民受辱引罪自诬大狱一起冤者大半在乎察人情伪绳吏之

深刻先王以明慎用刑而不留狱礼曰悉其聪明致其忠爱以尽之市者聚会民物贸迁有无贪贾纵欲翔贵时价愴民幸利杂良以苦在乎节狙佞於末民戒巧诈於贪夫先之以经制後之以教令周礼曰量度而成价质剂以结信王制曰奸色乱正色五谷不时不鬻於市周孔二君子制礼刊书罔不尽圣人之道絕奸宄之路故姬旦灭商纣诛管蔡而成康刑措四十余年仲尼为中都宰市无二价路不拾遗盖成之以廉耻防之以仁义衣食足而民不爭刑罚举而民不犯也而参以狱市之大并容不扰盖德吏而残人命惠奸而耗民财乱则可期治乎何有後相之语欲知大体参不能以正君臣尊王室审号令提纲纪之道语之反以乱政寄为後患夫汉接秦弊化坟墓煨烬世无所闻而黄老之语在焉苟择其善者从之亦可以少裨政事而参乃入不由户反道乱常得非旧狱掾纵奸为豪暨处上位恶伤其徒凭托异说以惑於世邪悲夫

开东合论

汉平津侯开东合待贤当时诸儒亦有称者近世以为有急士之风美其事者多矣而或不知其意焉夫侯起於徒步屡历显位而指陈两端以惑时议弃背宿约以阿上旨外无别材饰之以诈至於覆布被饭脱粟故买臣难其短汲黯讪其伪自知无功以速官谤故设东合假待贤之名以诱士大夫之誉夫待士者育其材观其能采其谋而行之择其贤而进之故平原下士得毛遂以安赵郭隗礼宾得乐毅而霸燕侯为相六年招待贤儒而史籍所载由其门出者卒无一人岂汉并六国而无贤乎当此之时匈奴寇边诸侯构怨侯未始定一计以安之岂多士而无谋乎夫开合而不能待士待士而不能与邱墟廐库何异焉设使相天下者贤材在朝则进之在野则升之岂开合而後为贤哉於戲严助董仲舒之徒贤人也侯而?之宁有进人之意邪盖善为钓名任诈之术使後世美之惜哉

不教吏职论

汉薛宣不教子惠以吏职汉书备之矣且曰吏道以法令为师何可学也时人以为然夫国之大者君臣也家之大者父子也君臣正则国政行父子正则家道成君明而能教臣忠而能諫则国之正矣父慈而能训子孝而能争则家之正矣石碣教子以义方仲尼戒鲤以诗礼韦贤授之以一经邓禹专之以一艺後世称之夫成童不就师傅父之罪也况父而不教乎盖事莫大於学学而後能其事销金石者不累日揉曲木者不累月若教子以一经之书三尺之法则不止於职也夫吏职者民以寬猛吏以畏爱事以时变教以俗设府寺州县郡国天下虽大小异器而其政一也何谓不可学哉夫生而知之则周公仲尼其人也自兹以降未有不学而成者汉兴则仲舒学春秋而建大议安国学尚书而为通材君明学易而知变稚圭学诗而从政故制断无失宰割有宜厥功茂焉宣谓不可学者盖起於狱吏斗食之下暴历显位不习经义何以语人哉呜呼吏事不能言况大道乎子不能教况生民乎故当宰天下之际官属议其烦碎天子浅其儒术六年无补於政事宜其放弃焉

李德裕非进士论

唐文宗议贡举曰子弟寒门但取实艺宰相李德裕对曰臣无名第不合言进士之非其祖尚浮华不根实艺朝廷显官须公卿子弟自小便习举业日熟朝廷间事台阁仪范不教而自成寒士固不能习也夫治平之器曰政布政之具曰文守文之基曰道行道之夫曰士士之於政由左右手焉故有国之典先夫取士虽沿革异轨而同归求聘之涂古者诸侯荐贤有三适之制射宫选士观五善之节姬周受命文物明备羣吏献贤能之书登于天府乐正论造士之秀升於司马进士之名立矣礼贤之道广矣暨六国行玉帛之聘两汉立四科之选魏晋或表荐而登仕齐梁或版辟而起家故孝廉明经之科秀才茂才之举限口限年之制射策待诏之选损益无常而察言观德之规不妄设也李唐御统艰厥制度立进士之科正名也行辞赋之选从时也而天下之士诵诗书秉刀笔乘仁义之道而进朝廷辟塲屋诏宗伯以方圆曲直而取名材大儒比比而有然诗赋之制非古也古者国风雅之谓诗不歌而颂之谓赋暨三季移统七雄黷武大道既隐正音去矣故少卿五字以叙别邹孟四言以述祖陆谢励锋於晋宋任范治荣於齐梁诗之体失矣颂刺之义微焉若孙卿畅幽惻之意屈宋起迂诞之说相如閼衍以前导扬雄淫丽而後殿赋之体隳矣规讽之旨衰焉唐兴文流愈甚前失执雕饰为规矩正丽偶为绳墨诗则协声而合律赋则限韵而拘字灿然清才而不复质矣譬诸栢梁永明体犹若秦汉之於唐虞也故德裕许其浮华则可矣至於言朝廷显官须公卿子弟斯言之玷无乃甚欤夫诸侯袭封功臣继絶须子弟奉祭祀而爵及世也若其靡恃门阀之贵屈身士大夫之间讲习仁义延揖时誉有缙衣之美成作述之志虽寒士之贤弗可加也若其尚轻肥之饰驰逐豪侠之伍以奢僭自大意气相烁不知衣食之出而忘弓裘之业虽将相之世不可任也哀哉堂构之业多坠嗣兴之贤甚寡若子弟不教而成则尧之丹朱舜之商均皆可君天下也况父母之圣非教不行也国之治非目不熟也臣之良非师保之无功也何教之而不成目不熟而不知保傅而无补哉盖上古下愚之不移也故杨兴说於史高母荐乳母子弟王吉疾其骄骜请除任子之令则知子弟之才非专任之器也诗曰其父析薪其子不克负荷书曰世禄之家鲜克由礼况朝廷崇爵丰禄设官分职治乱之道不在它而在贤愚也子弟寒士贤治愚乱其一揆也然则子弟以嗣?而受禄士以历试而颁爵历试之下黜陟章明故士之不肖者鲜矣至如传说胥靡而兴汤吕望屠钓而王周管仲商贩而霸齐由余戎狄而强秦斯皆历试诸难登将相之任诚不让於子弟也故舜汤不用三公九卿之世而举臯陶伊尹不仁者远矣易曰贲于丘园书曰野无遗贤则岂谓子弟邪若以寒士窘急衣食不能熟习德业则仲舒下帷倪寛带经乃子弟耶若以寒士杜门闾巷不识阙朝仪范则仲尼正鲁国之雅颂叔孙定汉之仪制亦子弟耶夫志士之学也终日不食终夜不寝将负周孔之戈而舂杨墨之喉以圣君之道左之生民之心右之誓销漓薄之器於太平之炉故遑遑然急於行道也虽九经之奥必获仁义之旨载籍之广必取礼乐之制前言往行灿灿在目立於朝无惭色无愧辞也书曰学古入官此之谓欤得士之道不其伟哉诗曰思皇多士生此王国於戏宰制天下代天工也当改正朔易服色制礼乐发号令革裘因损颐指而行何不合言之有苟以选举之制离失中道则以德进以事举以言扬择善而行斯可也苟谓辞赋非古则策以时务问以康济非五经不得以对非常道不得以言则经纬之术宏達之材见矣而德裕以林甫余烈陟位国相知简贤附势之旨无宰制补衮之德而塲屋之下英杰间出缙绅之士勲名相望欲骋材术专国政不可得矣故将隳贡举以杜贤路进子弟以崇私党俾朝廷之人无能杰出已右故宣宗制曰委国史於爱壻之手宠秘文於弱子之身洎参信书亦引亲昵斯乃扼其咽喉而中其膏肓矣厥有朱崖之贬以谢天下宜哉

议

秦乌氏倮与朝请议

议曰王者赏不失功爵不坠典车服有等贵贱有别所以贤者知劝而礼不踰闲也秦负战霸之业窃乘帝王之器下良民而右富商弃礼文而图货殖乌氏倮以繒彩私遗戎王谷量牛马令比封君而与朝请吁非三公九卿之世无平边富人之策徒以交市夷狄畜聚蕃育起於商贩之下而伍侯伯始无一命之重而参朝谒名器两失礼义交丧古者位以制贤禄以畴庸论道经邦以被公衮积行累功以致侯服今兹浇漓淫而不典儒学之道罔敌货贿之力将相之世靡及并兼之家虽天子亲传组绶躬给廩食位不足以劝贤材矣古者朝以辨等覲以颁制玉帛修而后会等威有序而后见今用非辟彛伦丧败银黄之贵而肩豢牧之夫明堂之下而朝畜产之主虽阙廷日定冠冕岁制舆服礼不足以别贵贱矣使耕陇之民游手商贾衷奇珍之货私匈奴之人修六扰之业竞刀锥之利滞货以要君上累饷而驾公族翕然风从以竞末作是则稼政不修蒔器不缉栖亩之粮不暇获吐丝之蠶不及饲卒有凶札之变兵革之急万民罄罄金玉不以餬口六军冻瘡牛马不以挟纊虽欲复农不可得也於戏惟名与器不可假人赏罚自失沮劝则差故礼赐君子小人尚不同日盖慎之也守国之器礼之为大去礼而行何以享国宜慎守之哉

唐免宗人役议

议曰复徭役者地则兵火凋残水旱沴疫行幸所经户籍新复人则乡有善行家无兼丁者预焉斯有国者之典法也李唐氏受命之二载诏天下宗人无徭役吁李氏之姓伯阳之後周距隋季且千余祀姓族滋蔓率十三四焉既高祖乘隋室之弊北起晋阳西图函夏百姓乌合以附成大业者非独李氏也何党之甚欤书曰一人有庆兆民赖之又曰元后作民父母是则天下之亲皆亲也天下之姓皆姓也若诸侯陪臣因王父之字以为氏则天下之民以君为氏明矣而不姓之者不可一也三皇之世则三皇之民也五帝之世则五帝之姓也尧之民比屋可封非独祁氏也纣之民比屋可诛非独子姓也礼曰不独亲其亲不独子其子书曰无党无偏王道平平传曰君子不患寡而患不均斯焉之义何以处之前所谓兵火而免者苏其业也水旱而免者济其艰也行幸而免者蠲其费也新复而免者寬其作也有善行而免者励修德也无兼丁而免者俾养亲也至於同姓而免者余不知其所利焉则天下豪猾之民将弃已氏而即李姓濶耕广种而幸成其私行之不已则天下之姓三分而二冒於李矣

文庄集卷二十

卷二十一

钦定四库全书

文庄集卷二十一 宋 夏竦 撰记

重修润州丹阳县门楼记

县门楼建鼓之所也号令之发始乎钟鼓兴居之期啓闭之节由是乎达故其墉岿如其楼轩如冠厅事旁屋状人之有冠冕若之何毁之今年夏初予视厥职悯夫斯楼积有年所墙败於左木隳其右风雨所陵埃壅所侵官而弗省其谁治之乃役工百余指伐木十余本易其数梁替其数楹涂其墉赭其栏取其壮而不取其宏务其完而不务其华後负练塘前压驿道山阜表其东津梁续其右望之敞然有宫府之风登之廓然有小天下之心使吾民如楼之完善政如楼之新则百里之间可以无疮痍矣後之为政者可不勉之哉

赐杭州灵隐山景德灵隐寺常住田记

会稽之西部吴郡之东境山之美者武林在焉晋咸和初常有梵僧叹其峻极以为鹫峰别岭飞至兹地由是依山起刹名曰灵隐盖言灵山之隐於此也奇迹既彰历世增葺缭垣危磴丛楹鉤檻楼观之华势胜之美首於余杭善巧啓导之师若灯炬以相续精勤愤悱之士譬云雾而毕臻世有人焉其来尚矣国家同文区夏泊声葱雪五天飞锡四海浮盃访道而来解装相继天圣之间有衆七百每结趺聚饭应器如云俱罗之施难充维摩之化靡及爰有上首始议垦田乃献像於东阙请播种於南亩我尊号皇太后恩深外护心等大慈授诸佛之记言布羣生之胜利威光所照物成金色慧力之感地见宝严若夫平决万几将明百志动遵法度慎守典彝以为道释名田禁於创置国之旧制岂敢废焉然吾保育嗣皇绍隆景业素依佛宝孚佑帝躬冀其万壽无疆百祥申锡在诸服玩予何爱焉乃赐直百万市田二十五亩以施之岁输旧赋天下之为公也永充净供福田之无极也彼给孤施园非续命之要妙意设食无宿饱之资若此因缘则为殊胜乘天时以稼获絶水火之虞治防庸以蓄泄靡旱潦之患地种尽墨而可穷此功德无穷恒沙皆宝而可尽此布施无尽诸菩萨僧观是田者应合释迦如来以信心为种以精进耘鋤因田以悟法诸大比丘受是食者应念香积如来以甘露为味以大悲普熏因食而证道然而悟无所悟者正悟也证无所证者真证也无离尘垢以染於净无求寂默以住於空三界不见於身心万法本忘於封境举足所之皆是道場适意而居莫非宴坐夫如是者始可以享斯田施消此饭香报两宫之慈恩续诸佛之慧命也哉臣幸预译场叨观秘藏遐推往记切考兹山能仁出世千载而神僧建寺七百载而圣人施田由是知山川龙象抑有冥数以待圣神乎奉命昭纪刻彼灵区皇太后右序嗣君崇修妙果施夫疆畎教天下之至慈也皇帝尊事母仪布宣圣爱勒於金石教天下之至孝也率土之滨含生之品一切见闻得不踊跃於兹辰哉时天圣四年岁次析木仲夏望日谨记

御书慈孝寺碑额记

慈孝寺成朝廷命史官颂故实将昭铭於金石永垂耀於文象圣上穆清之暇熏衮以观且曰先帝大猷太后圣德备在兹矣非天下之妙翰孰为奇丽之观非朕躬之亲笔罔罄寅威之礼由是上自题额命翰林学士授书文百工相趋万区载跃以为极帝王之能事敦恭爱之大本英华圣域焜耀国经巍巍乎亘千古而不朽者也皇太后叹嘉睿志潜发慈旨申命史氏识诸碑阴臣闻圣人因亲严以教民故能感天地本文治以化下故能纬风俗然则召至和之应成惟几之务垂世烈而润皇业者必繇斯道洪惟上圣天纵多能厥初啓朱藩践震邱典学时敏博志大成及乎集丕统迪谄谋益复研精书林垂思艺圃探七经之奥蹟鉴百王之治乱非仁义不图於政非礼乐不访於朝而又师臣劝讲之余硕儒进读之暇宝附在御昼漏移刻秦峯之篆頔篇之楷倒薤之妙拂素之工出自生知动超神品尝以为开元以降御题碑榜标桐柏以尊道揭丽正以崇儒未足以移雅俗之风恢至要之体故是寺之建也飞白崇真之额所以奉先猷摅永慕昭定陵之遗烈以继文而教天下也玉篆慈铭之首所以宣懿铄阐慈训尊长乐之美业以爱亲而训四海也昔羲画八卦以啓人文禹锡九畴以赞皇极参之圣功偕为盛矣若乃翔翬结宇液金填画腾虬龙於螭首润云露於翠珉映调御之相光阴词臣之妙墨奎躔婉其鈎曲珠斗焕乎阑干固将太一下观百灵潜卫为亿祀君臣之法昭两宫孝爱之德也哉臣忝贰近枢荐拜嘉诏仰钦累盛之懿弥负重陈之怯唯颂次典则勒诸左右云天圣六年八月朔日谨记

青州州学後记

国家制天下肇有十八路京东首焉西起甸服东渐淮海南略洙泗北际河濮关防之要控制之重城闐之大室居之盛青复首焉建隆距明道继政四十有二皆岩庙勲旧台阁材彦方重镇俗严明馭下信孚惠洽吏端刑清润金石藹謠诵固亦多矣若恢教化之原崇学校之美惟丞相太原公有焉天圣七载公委远时柄来牧故乡以平章庶务之心斟酌元化之手裁量一郡丰功懿蹟不容谈矣其最为荐绅所称道者以公顷奉乡书偕郡计冠多士长百工泊偃息作藩雍容立政事必敦本仁不遗旧忠也欲报朝廷而不已德也将流里閭而不竭於是出私俸起官学天子赐图籍掾属制油素三齐怀笔千里担簦鼓篋於朝占毕於夕敦学在焉若夫明大道之本观三千之奥将欲佐人主庇生民经纬天地制作礼乐剗百代之弊定一王之法者可以谓之文矣骋六艺之精练当时之务将欲对清闲之问广漏刻之听高议云台以决安危约史金匱以定褒贬者可以谓之学矣博贯百氏并授五业将欲藻润谏训劝讲帷幄主文以陈谏道托寓以达下情箴规庶官粉泽时政者可以谓之材矣记问之师句读之学饰小辨事空言诟噪相高篆刻自嘉白首弗底於道盈编无益於世者丞相耻之予亦耻之东秦奥区全齐盛府俗渐邹鲁之教人多海岱之灵朝家好文辅臣善诱而不能宝寸阴刻素志扶名教训孝悌建希世之策敷及物之德彼维师赐履於周平津始封於汉果何人哉游於斯者无自局焉建学後三载东土荐饥予猥奉使指谬踵前良且以畴昔政司陪贰台鼎敢勒輿颂以永德音诗云君子能长育人材传云得天下英才而教育之兹学之谓欤堂皇之建职次之设皆备前记此不复书时景佑元年正月朔日记

海雁桥记

顷岁山东旱蝗予被诏救宁下穆陵并潍水出莱阳辙黄睡野无蔬茹市无血膋有客馈海雁六弗忍为膳育於青州之柳亭亡其一後数载予内徙睢阳羣五雁纵之南湖一夕旧客过都知之抚掌桥侧五雁悲鸣飞集围绕膝下至暮恋恋不能去观者为之出涕斯禽受人之恩不过稻粱养育岁时耳尚数年而不忘其主前史有委质事君高轩列鼎而不能尽心於王室者殊可嗟焉国风美关雎之不淫嘉鳴鳩之均一盖有资於王化也因题是桥为海雁桥以旌之时景佑三年十月日记

青州龙兴寺重修中佛殿记

左海濒右岱畎沂蒙亘其南河济径其北厥壤广衍惟青州焉唐以卢水平地置平卢军其城萦带山岳控引川渌气候高爽风物懋盛雅俗杂处修涂四达富焉庶焉东夏之都会也中有佛图实曰龙兴寺旧以为田文之第地势斗絶堀坳洋水之阴楼观飞注翱翔重闐之表东践絶涧径度於闐闐西瞰羣峰旁属乎原野十二之胜尽於兹焉寺中有殿宋元嘉二年建甲子十周栋宇隳圯常坐比邱昼枢化青人得镪三百万以新之又镪以石阶繚以髹檻後增二亭左以荫铭识右以藏鼓格世传孟尝饭客以鼓为节其格存焉载祀寢久木石剝脱但上画飞仙殆非当时器而寺僧宝之以传疑焉或曰佛何为者邪夫太始既分皇衢既远舜禹揖逊汤武干戈自朴而雕自淳而漓奸宄锋起智诈火驰是以天生圣人於叔世分三教以救之九州之载人性淑均道德可以化焉礼乐可以教焉故商武丁时生老聃於濂乡周灵王时生仲尼於昌平流沙之外西戎即叙非威神摄受权实开遮莫能变犷悍胜残虐故昭王时生佛於毗嵐然今古之论罔不折衷於仲尼昔夫子自谓则曰文王既没文不在兹乎於老氏则曰其犹龙邪於佛则曰西方之人有圣者焉以是论之则释老皆圣人之救世者也夫子不之讥焉或曰枢之新是殿有功德邪夫天地者烦恼之毁宅也世界者生死之业流也人之生也与爱俱生忤快乎名利盖纏者嗜欲鸟惊兽骇驰走乎烈焰龟沉鱼跃出没乎惊波翳元明而不知甘衆苦而不恨忤忌而得者谓之能放肆而前者谓之达其生也与梦寐等其死也与粪壤俱圣人哀之故为之御三乘之轮?六度之航以接痴冥以拯昏溺後之登是殿者若睹相好以摄心叹宝严而起信固可以远谢尘垢坐空妄幻若瞻白毫之光悟见精之不动听宝铎之音觉闻性之常寂固可以返照真际旋复本初证菩提心成无上道由是观之则枢之於兹殿有无量功德矣予尝守兹境目枢之勤聊纪胜因以刊石时景佑四年八月朔日记

杭州宝云寺记

宝云寺者吴越忠懿王所建千光王寺也西方之教东流震旦盛衰由於祇劫轻重系於震历五代纷竞诸夏陆梁妙音阻而不通法器垂而将坠惟钱氏之守瀡水也禀天王之正朔受如来之教戒是时吴楚间国号为有道诸侯带江负海列郡十三数世百年干戈不试益以为得大雄法力故竭宝玉崇塔庙具香华鸣钟鼓以事之尝有里人张仁昭者诵薄伽梵姥陀罗尼积有年所感召殊祥摄衢州刺史翁成起闻之欲旌其事乃请於王以乾德戊辰岁春二月创是寺於钱塘门之西建千光王像因以名之其制则台门前辟绀殿中立高楼东建鸿钟屡发案台西峙龙藏常转旁俨像设後引堂构经斋方丈温室云?四百其楹再润而毕面白傅之湖负武林之岫右则鹊巢遗阜左则星陨派峯石怒欲飞松怪如折梵声飘海外香云荫空际清

吹时落纖尘不飞乃朝贵游心之境苍生祈福之所始请睦州九峯山僧环省升法堂谈妙义未几而终复请衢州镇境寺积善禅师义澄登宝座语真空於斯为盛是二师者皆学於郡永明寺道潜禅师悟诸梦幻泡影无有言语文字以心传心深入圆顿故其门听法者朝夕如市焉洎我国家受命之十八年王俶归朝奉图献地皇明所及佛日重光雍熙二年寺僧有因请真命於阙下太宗皇帝诏以今额赐之革伪号也中贵人蓝敏正书之勤佛事也时法鼓重鸣金姿再构赞呗钟磬盛於往初洎淳化改号之明年积善大师西向右脇而灭其徒义隆传衣受法俄亦圆寂懿夫禅源未涸达士挺生於是义澄法师屈知寺住师神彩高扩藏识圆明慈悲以导衆生贞谅以接朝士禅诵之暇务以庄严为意故咸平三祀选日庀工阶砌殿堂悉增前制化清虚於妙乐拟庄丽於只洹为南国之名区作西郊之极观有大善知识作是言曰善哉寺之兴也有五善焉张仁昭之感应翁成起之信重忠懿王之崇建僧有因之请命蓝敏正之书法法之行也有三达焉九峯之证入积善之辩慧义隆之传授足以表名山之昭感示皇觉之遗休若夫撮五善之心证三达之法景行精进十四年於兹者则有法证公焉浙江东西其名尚矣固可书诸金石垂於不朽者也某素肄典坟专谈仁义未穷观於八藏难了悟於三宗奉运使兵部尚书郎江夏黄公世长之命不敢固辞但记其兴置年月传授次第而已若叙顿渐之宗开权实之义破诸有相以至无生盖有格言请俟能者

台州延庆院记

临海济灵江而西越万步至括苍山与真隐山并间有垂流千仞漱石成渊蛟龙宅之而云雨攸生岁有骄阳亢极并祷羣望寂寥无证则邦之守臣帅寮属而禋之荐牲沉玉以请常有云油然发乎湫中暝山暨川雷震风动不崇朝而雨足予佐郡再祀而两往既享既禱絕涧而返至於山麓坦然右平顾之则有浮屠氏之宫在焉道出於侧因憩其所视其榜曰延庆院问其僧曰全议考其兴替索其传记则梁天监初始建为龙山寺至唐会昌五年而废未朞复兴开平中刺史骆延训亲篆榜而改之为龙潭院唐祚不永钱氏据有浙水忠懿王俶始领此郡复新其额为戏龙院皆以还龙渊而得名也国家受命旁宣教象我崇文广武仪天尊道宝应章感圣明仁孝皇帝告成功之岁有诏赐今额焉问其授受则远者不能详矣诘其近则乾化中有僧常一始旁凿灵阜全葺栋宇次传庆仁道进云泰云兴令逢至於全议凡七世矣其殿宇廊庑多全议纠檀施所就也观其巉巖崿嶕溪流沕漭古木怪石偃蹇盘踞云物万状融冶凝结疏篁茂草挺擢蔓衍高下向背宛为灵区嘉遯之室不筑讲学之馆未締竺乾氏方墙华屋即而有之於戏盛哉丽哉既盛且丽控引胜絶四方之中岂独於此予关掌郡事政不专出无明诚以感造化无至仁以召和气雨不时至下民其忧故再走灵湫得请於庙憩於是舍须雨而旋噫岂人至灵而弗神於龙彼裸坛於斋者独何人哉岂修己行义之有所未至乎当以日继月而诚吾志属寺僧全议固请作记因并书而授之俾勒於石使後之识者观斯文知不徒然而作也

台州天庆观三官堂记

台之郡治东出百步且北抵山有古宫室旧传茅盈驾鹤上仙始建为白鹤观既废至唐明皇兴之筑天宝之台於庭书以开元之榜唐命既革栋宇将朽洎天福五载永嘉威仪叶後已之

内人太原大师黄永乾惠然来居始议兴葺凡五十祀乃传内人张日损太和冲融惆悵无华黄老之教择其正而後学药石赴人之急不避风雨时议以为长者上即位之十二载?本郡以礼遣至阙辞疾不起由是远民始知日损有高尚之节会国家降禅於社首有诏改赐观额为护国由是远民始知朝廷有清静之治乃有石湛来俊等献直三十万请新三官之堂以列塑像以广焚修既就予往观之而不知其何神日损曰道家之说太虚之上虚皇在焉分命元卿治於紫微酆都清冷之宫而三元按籍考察天下有猾黠诡异苛忍暴漫险詖隐慝僭妄欺伪者可杀可夺可贫可贱有信厚仁惠恭逊和易谨愿端方孝弟正介者可安可壽可富可貴故上天有命宥密无声疏而不漏如合符契者三官之职也噫吾尝读圣人言有云死生有命富貴在天又云皇天无亲惟德是辅故常疑造化中有主邪其自然邪果如日损言则三官其为主者乎夫位有上真职司造化能使天下枉者直善者安暴者夭仁者壽贪者损廉者益虽尽杞梓之材为之宫备山龙之章为之服罄玉帛之礼为之荐日祀而辰享可矣非谓无名之土木也予结发读书弱冠为吏未尝为恶恶亦不及从今以往益致於善以听阴隲以验三官之说

文庄集卷二十一

卷二十二

钦定四库全书

文庄集卷二十二 宋 夏竦 撰

序

重校妙法莲华经序

三世诸佛为衆生出现证无所证得无所得者一大士而已妙万化而无象应羣有而难名不着世间犹如莲华故竺乾太士集灵鹫遗言曰萨达磨奔荼利迦魏梵僧支强梁接译於交址初成六卷翻萨达磨为妙法奔荼利迦为莲华是名法华三昧晋焜煌僧竺法护译为十卷名正法华分二十七品後秦鸠摩罗什益普门一品译为七卷名妙法莲华随崛郛笈多益药草喻品之半以提婆达多品入塔品名添品法华唐道宣律师叙云三经文旨互陈时所崇尚皆用秦本自汉至唐六百余祀受持盛者无出此经五代以还诸侯僭据字音句读方言多误国家混一寰海圣上尊用三教余家世奉佛乃取世传诸本及化外旧经释文撝句数自参较又以悉曇梵夹傍行右读中原传译始创卷轴讨论重复卷舒繁数因观近世图籍镂刻摹印缀黏成册差便於古由是命工仿则肇制此经庶几学者易为究览此经序品至劝发十余万言贯穿诸宗融通万法或伽陀孤起或祇夜应颂文有广略以接三根机有深浅以醺衆请丧实际者为之譬宝藏执涅盘者为之指髻珠沦世苦者为之谕污宅乐小法者为之演化城辟甘露之门以来衆轨均大云之泽以徧羣生大方无隅则有地墨刼尘之谈至神无方则有眉毫舌相之变会权实之戏论设顿渐之假名使三兽渡河并臻其量五愆凭轼各应其缘讽诵可以殖福田解说可以标慧炬大慈方便其在兹乎至哉清净灵觉廓大虚而含法界光明宝藏消幻想以契真如境既对忘心将安寄见有迷悟体无去来妙本圆常超然独立资始万行孰除其方若乃以解脱为盖纏以照觉为封累掩室摩竭杜口毗耶名言道断思惟路絶则神而明之在乎其人然而能趣百善者信也善度衆苦者解也信解之初必由缘感皦月不能现空器膏雨不能生槁木後学菩萨幸精进而求诸时皇佑三年夏四月乾元节日谨序

楞严经序

夫善言佛者惟性而已矣混成不测况之道乎无方善应况之神乎湛寂精常圆满平等迎之不见其首随之不见其後生生而不生化化而不化包裹万有含吐十方资始衆缘具足万行光明密照而非色灵通潜运而非空世界变迁而不移山岳旋偃而常静现前而惑者不辨日用而迷者不知易曰寂然不动感而遂通老氏曰独立而不改周行而不殆其性之谓欤无始刼来一切衆生攀缘外境忘失本心分为四纏叠为五浊驰而为妄想结而为昏翳聚而为烦恼流而为生死累我真源枉入诸趣如来哀之此楞严之所以作也以衆生苦於奔逸故为之行三观滯於色相故为之指八还误认尘根故为之辩六入妄计因缘故为之谈七大至於屈伸金臂绾叠华巾极善巧之喻拂微细之惑令瞻宝光者知见精之不摇听钟音者悟闻性之

常在若乃本明旋复静慧发生御最上之宝乘游无边之性海顾色身若微尘视太虚如云点彼无始轮转之根亿劫颠倒之见我人妄执壽命浮想若炽炭之燎鸿毛烈日之曦朝露不待思惟已自消释大哉菩提妙圆本始清淨既无妄幻翳於真精岂有身心受彼生死水澄滓去漏尽法除万行不修而自圆六通不求而自澄预於此者非至神乎而是经撮八藏之精要穷万化之根源译之者务简润之者尚辞或使潭研泥於句读故有僧可度为之笺分详略有叙华梵兼该迨岁再周能事方毕後之观者应当返梦想之缘气遗心目之习因了识精之元还独妙之本云驶月运既息於诸旋木尽灰飞亦忘於幻法秋毫不立真理自冥彼求诸佛无漏胜解者幸精进於斯焉时景佑四年二月朔日序

桂籍追荣序

枢密相国太原公次子故卫尉寺丞某字庆之幼而辩悟不乐戏玩始就外傳卓如成人属咏景物动会辞律泊胜衣趋拜风度弥远客卿沉敏若怀将相之器褚陶清谈自得坟典之娱志慕老庄誉等终贾尝耻由官荫刻志缙素曾未卅岁文藻粲然金籀之言发於邹鲁玉树之秀茂於庭阶咸以为天资美才性识早立沐浴圣化被服诗礼固将腾天路摩绛霄超野絕羣一日千里御屏隔坐绍亮隲之荣緇衣改为宣桓武之德於戏天道云远大化难堪育而不苗闻者增歎上闵其幼慧赠綬有加追赐进士及第以成其志有诗赋杂文二十卷题曰桂籍追荣集所以纪漏泉之泽昭夙成之美死而不朽其在兹乎时大中祥符六年十二月日具銜某序

宰相部威重篇序

传曰有威可畏谓之威又曰君子不重则不威况夫应槐鼎之象处岩廊之尊万民具瞻四国为宪固宜资性端重容貌祇肃履有常度居无惰容憚服远夷得真相之体表率羣后有大臣之风所以享高明之宠总裁成之业致远任重而克济焉

将帅部议论篇序

夫好谋而成名臣所以建议无文不远君子所以尚辞降自汉代率勤远略间有仁贤之将克敦诗礼之规洞察蛮夷之情精通军阵之要或图上於方略或钦承於访问辨安危之本明胜负之端硕画是陈远图斯亮用能克济大难式集茂勲垂厥令猷盖可察也

将帅部强明篇序

易曰自强不息书曰明作哲盖强者临机而有断明者遭事而不惑况夫折冲边圉濯征寇戎军政贵平事机尚速故有负英果之略怀撻发之材周知敌情详见疑谬俾奸伪之党畏其聪明貔虎之师伏其雄毅克贞师律用集茂勲者焉

将帅部受命忘家序

传曰将受命之日则忘其家临军约束则忘其亲盖军旅之事安危攸系将帅之任社稷是毗固当以孝而资忠以义而割爱受诏引道初无辨严忧国忘身靡顾私室聳英烈之风槩为忠义之模楷宜乎锡以土宇纪之旗常者哉

将帅部不和篇序

传曰师克在和不在衆又曰安民和衆盖军旅之尚和也久矣夫师出以律顺成为臧固当辑睦兵戎克济勳略其有处营卫之任握旗鼓之要受脤偕出援枹并行忘从帅之义恣兼人之勇专逞其欲不相为谋或大呼於和门或盛气於幕府至有乖异筹画违沮期会反干戈而鬪夺鼓吹以往弃公家之事为仇方之利暨乎覆军夺爵而不悔焉孟子云天时不如地利地利不如人和诚哉是言也夫

闰位部知子篇序

夫知子莫若父知臣莫若君盖父子之间否臧易辩韶亂之际性习已彰若能鉴其诚明遗其外饰闢其好弄之意观以成人之风自还察遐材将焉遁况夫负英武之略应偏闰之位固宜念家国之重审裔嗣之能建为元良付大业而不坠授之事任被谗谤以无疑书诸简编亦王者之懿德也

邦计部贪污篇序

诗云贪人败类传云贪以败官为墨盖贪而不败者未始有也夫小人纵欲弃义贪冒荣侈心甚邱壑莫之盈履语利於市犹为不可况夫宠以车服委之官司总筦樞之任举飞漕之职内度经费外调輿赋詎能避白圭之玷全素丝之洁唯以取舍由己奢僭是图虐下以刑倾衆以势侵盜於国诛求於民聚斂积实不知纪极以至苞苴盈门簠簋不饬罹罪罟伏欧刀而不悔焉於戏子罕云吾以不贪为宝诚君子之格言哉

学校部讎嫉篇序

仲尼没而微言絶七十子丧而大义乖周室道微汉承秦弊春秋为五诗分为四肇名家之学树同门之党自兹厥後异端蜂起奚独师授之不一固亦克伐而相胜其有肄章句之业背和裕之德已之失必缘饰以为当彼之是必掎摭以为误庠序之间权诈腾涌讲习之际讥诋纷错务在摈斥动成仇怨或忿争於朝廷或迁谤於祖裔位上者挤陷於罪罟旅进者潜肆於图害语云道不同不相为谋其是之谓哉

卿监部邪佞篇序

易着闲邪之言传垂远佞之戒况夫职象河海任重股肱固宜采其聪明好是正直若乃阿諛靡媿巧令是图蒐愿庸回废忠毀信行媚以希於上旨献赇以悅於迕臣增宫禁之素规乱礼

乐之旧物用速官谤或烦刑书於戏先王之所以难任人者其以是夫

总録部谗佞篇序

有虞之命则曰塈谗说先圣之戒则曰远佞人盖邪伪可以惑聪明浸润可以间忠信淳素既隐巧諛滋萌义以利迁政由宠放故有行媚於内善谀於朝脂韦其性以悦於上贝锦其辞以潜於下爱同疾异害正忌能挟蒂芥之嫌缘疑似之隙媒蘖其短文致厥辜采苓之刺以兴投杼之疑斯起交乱家国离间君臣职为厉阶无已太甚故君子之恶利口国家之难任人其有旨哉

总録部傲慢篇序

夫傲以取祸往事之明规慢以失官前言之深戒自东周不竞礼度寢微骄倨之俗兴而逊悌之风缺仲尼垂叩胫之戒穆叔着倍赋之文自是以还风流不泯或恃才而陵长或盛气以傲人忽礼容而不修蔑年爵而罔顾至其箕踞而倾倚岸帻以啸咏跌宕适意豪纵乱常招负俗之累婴自貽之戚於戏书云简而无傲诗云彼交匪傲万福来求诚为君子之道哉

文庄集卷二十二

卷二十三

钦定四库全书

文庄集卷二十三 宋 夏竦 撰赋

河清赋

有客谓臣曰朝廷将祀汾南爲民祈谷大河载清於陕之服子尝闻其说而颂其异乎臣曰传遽之吏罕聆朝议愿客摅抱剧谈开我以嘉瑞客曰唯唯盖闻滔滔灵源发自崑仑导於积石出於龙门怀砥柱而势迴播钜鹿而派分三王先之於祭四渎宗以爲尊千里兮一曲浊流兮浑浑乘春则桃花竞涌赴下则竹箭争奔若澄清而变色实千祀而畴德爲中夏之经渎故其应有常通上天之绛河故其灵不测泊我国家秉皇图宣帝力尊百神朝万国光明乎遐絶馨香乎霄极禅云亭而广厚玉简既封祀汾睢而颂祇鸾旗未?西人清候而望幸六官戒期而励翼爰荐祉而炳灵灩澄波之湜湜徒观其祥风荡漾非烟蒙翥浮休气於川上泛荣光於岸侧失汹涌之黄流湛清泠之素液银潢之影横秋帝台之浆映日江练初静壶水乍释监秋毫及纖尘露金沙与银砾神鱼龙马泳深渊而不隐紫阙珠宫扩洪流而可觐合济渎兮安辨委沧溟兮竞碧吉蠲自等於明水嘉号宜尊於清涤可以颂於庙式告元符赞於史以永大謨岂比夫兰叶朱文涌黄灵之籙芝泥玉柙泛帝嫫之图登夏子之巍巍掩汉唐之区区子盍献议外廷上封公车请以水而纪官以瑞而建元然後登歌而率舞岂非士大夫之职乎臣曰客知其一未知其二上之功不可以方策载上之道不可以金石纪感通靡间於洪纖周流罔滯於形器六合而万区肃穆而昌炽元符而景命纷纶而沸渭天地清而陰阳既序边鄙清而干戈不试政教清而无远弗怀刑罚清而有生咸遂道德爲休而神灵幽赞仁义爲祥而富壽攸暨礼乐爲符而上下昭假贤材爲瑞而中外允治乔岳未分则三篇降汾祀将禱则真文至旁无垠而高无际充乎天而溢乎地盖盛德与大业也夫岂河清而已矣客於是色沮魂悸逡巡而退

景灵宫双头牡丹赋【应制并序】

国家升禅之五祀圣祖上灵高道九天司命保生天尊大帝降禁中之延恩殿真宗文明武定章圣元孝皇帝躬欵颺旂祇若灵训璿源长发真?克开建景灵之宫以置祠宫构天兴之殿以尊肖像献而不裸唐太微之仪水以节观周辟雍之制囿廊四注双渠交属植之乔木间以幽石丛薄互映萝蔓相萦固列仙之幽馆实有帝之下都也先皇厌代颺驾上宾圣文睿武仁明孝德皇帝应元崇德仁壽慈圣皇太后哀极孝思礼尊昭事乃建奉真之殿於天兴之左备严像设对越威神宪曲察之规模兼顾成之法度其右则皇帝肃明福之馆其後则太后果佑之廷并为斋居恪奉时享普观六艺眇觐百王尊祖奉先莫大於此是宜灵鉴博临嘉生诞降丕显盛德觉悟蒸黎者哉天圣四年岁次析木甘澍充浹太和丰融惟时季春吉日丙午羽人动色宫吏告祥有牡丹之芳丛拆双跗而共干枢臣谨职以承献两闥传视而嗟异爰命国素临写英蕤仍诏词臣昭纪嘉贐上意以为先圣奉真祖之礼至?真祖眷先帝之意尤显是彰美应发为奇芳臣窃考旧闻仰迪陰隲天意若曰太后以至慈保右嗣圣皇帝以至孝恭顺母仪

总决万几大康兆庶真祖降鉴先圣在天乐兹重熙锡以嘉瑞二花并发者两宫修德同膺福祉之象也双枝合干者两宫共治永安宗社之符也昔棣萼承华召公流咏芝茎连叶汉帝登歌窃比兹芳岂容并日仰应宸旨谨为赋曰 维五行之嘉秀鍾百卉以流形伊牡丹之淑艳实造化之鸿英杂五色以交丽间千叶以敷荣结紫心而函实散黄蘂以传馨干扶疏而四擢枝绰约以相承久潜芳於药録肆阙载於幽经首春华而擅美冠花品以腾名何分丛於帝圃遂得地於殊庭?琪珠之璀璨藉瑶草之葱青润五云之滋液对六羽之威灵吐双葩而并发效神贶以潜呈红纷敷而接萼翠杳裊以联茎较襪纈而不异等高下以无倾若霞裳之对举类凤羽之偕升表两宫之睿圣共一德以隆兴实谄谋之燕翼固道?之章明愿书芳於信史永传美於千龄

正家而天下定赋【以家道居正平定天下为韵】

夫王者刑於国自於家苟家人之居正则天下之无邪男女有宜序君臣而甚迓威严罔懈制刑政以非賒原夫九圣微言六虚元造巽离之象攸设家国之文可考内惟陰正式符顺以之规外则刚中克叶威如之道盖其以威为本者患爱之不孚以爱为本者患威之无余思爱育之不黜在威棱而自居恭谨见嗃嗃之仪故有孚於居极侮慢有嘻嘻之象盖失节於慎初故圣人治家之威刑国之政始亲亲於九族终明明於百姓恭己则人敢不恭正家则国罔不正则在乎聪明御下端谨存诚言必信而无妄行有常以惟贞陰礼可观既闺门之肃睦圣功惟叙则区宇之和平故能亲贤才放邪佞国之定则家之正家之正则国之定防闲不失信君令以臣行教化无遗见姑慈而妇听是则德及荒服恩覃溥天四海为家而肃肃万民如子以平平二女有仪乃虞舜政行之始寡妻可法为文王教令之先是知正於外者先正其中治於衆者先治於寡差於近则失於远正於上则平於下今上审安危慎取舍家道成於亲戚国政行於夷夏易所谓王假有家交相爱也

政犹水火赋

夫济水者火济猛者寬苟水火之功罔拂则寬猛之政堪观盖治不得以常舒舒则民慢事不得以常急急则民残故君子施之以寬纠之以猛式齐离坎之象自合陰阳之境谓晦之至兮将闇必继之以明动之极兮则劳必济之以静是故上善是将炎德其相爱畏之宜迭用文武之道交光九德用宣始汤汤而洊至百刑以正俄烈烈以方扬故能成良吏之功立明王之制或温润以和協或强明而正厉德均烹飪传齐美於和羹道合刚柔易同功於既济然则建皇极合中庸若惨舒之更用类律吕之相从刑久则残故赏於春夏赏烦则弊故刑以秋冬是知物不终衰有时而盛道不终利有时而病在乎酌炎上以求治参积陰而发政羣生不匮如符菽粟之资万事适中奚取韦弦之性盖以水济水兮其德衰以猛济猛兮其政危猛因寬而不暴水因火而无亏故法网明明孰见蹈而死者政经闷闷谁敢狎而玩之我国家宅元功播鸿造流睿泽於润下发恩光於就燥儒有服子产之言愿佐太平之道

藏水赋【以水盛之日藏以昭礼为韵】

大寒陰凝国乃藏冰法上天之历象遵百代之规绳凿诸穷谷之间清声竞发纳彼凌陰之内素彩交腾当其冬气残寒风劲溪壑霜皎川池雪映天子於是度时令齐国政咏卒章於七月知邠国之风观列职於凌人见周官之盛乃睠有司谨而行之将不遗於国用冀无爽於天时纳自輿人委截肪之瑞彩闭之冰室积灵玉之寒姿盖以气肇微和候残严律念积陰之潜伏惧盛阳之侵軼乃凿彼凝沍藏其凜栗红轮引耀遵北陆於斯辰黑柜惟馨享司寒於是日莫不阳威振发陰德潜藏礼虽遵於往古事疑出於非常取不失时斩峩峩之素质用之以道结凜凜之寒光吾乃观其所因知其所以致苦雨之不降亦惊雷之罔起献羔而启既不解於东风治监而成又何归於旧水美夫元功可验至德孔昭不失膳羞之味且无霜雹之妖诗谓春开享祖宗於清庙礼闻下逮颁禄位於公朝我皇上以典故临人以文明继体修时政以施令藏坚冰以示礼故时无愆伏之灾而道光乎祖祚

穆天子宴王母於瑶池赋【以喜逢仙色开宴真境为韵】

穆天子以八骏西巡宾於上真宴瑶池之胜境当甲子之良辰人间之别馆离宫如遗弊屣月际之珠璫玉佩自是嘉宾当其碧落凝寒余霞斂色升綉轂於层路会鱼轩於西极天顔半掩旗翻日月之光凤髻遥分扇侧鸾皇之翼俄而翠华潜驻彩袂相逢择琼瑶之吉地邀桃李之姱容修城而美锦千两供帐而轻绡万重广乐嘉成徧舞霓裳之曲流霞互举争传马瑙之钟是何云雨驰魂笙簧饰喜倦斂霞袂慵凭玉几想台榭於三岛忆崑函於万里鸾骖鹤驭顾天仗以归欤玉惨花愁念芳时之已矣天子乃端冕无言愁临象筵睨文桂而叹喟持玉笋以迁延乃歌曰黄金阙兮红玉泉停鸾辂兮逢列仙别可惜兮阻流年愁玉露兮摧渚莲王母於是低鬟掩面慵闌锦荐盼龙袞以凄凉叩金盘而婉娈乃歌曰琉璃屏兮芙蓉殿接君王兮侍欢宴心不留兮思宇县念秋风兮隔纨扇是何乐极悲来烟销雾开移蹕而鸿飞洛浦回眸而雨散阳台日照龙旗逐骅骝而东下云藏雉扇随青鸟以西回已而怅望空餘音尘渐永藥宫有意以延想函夏无因而西幸春水白兮瑶草芳黯离愁於絕境

吹律暖寒谷赋【以阳气中暖寒谷和畅为韵】

懿彼鸣律中含盛阳激清音於极北暖寒谷於穷荒导太和之恩成其地利发重陰之窟被以天光邹衍以幽谷至深平臯可贵思疆理於旷土冀生成於品彙徧吹六琯乍回天地之心潜运五音大合惨舒之气是何清声激越雅韵冲融足以齐六气和八风歌太簇之声勾芒发外奏黄钟之气和粹积中已而遗响未终朝阳乍满却陰涸以冰释召天倪而风暖具箫韶之响嘹唳凤鸣非孔壁之音锵洋玉管是何元功既着至理罔奸律因阳而煦暖谷以陰而涸寒正累黍之仪既无失度感好生之德足以胜残岂不以惟北者陰极陰者谷因推律以条畅故生物而孕育当脉起之际变沍卤於闲田观甲拆之时享膏腴於百谷是知律资大一声感中和发萌芽之蠢蠢散冰雪之峩峩律本相生自契伶伦之伎军声不竞无惭师旷之歌是知民不干常化犹其上念凉德之可革在仁风之潜畅故声为律兮感苍生克符天贶

白云起封中赋【以至德符通白云祥呈为韵】

汉孝武尊百神朝万国观素云之嘉瑞见东封之盛德英英初起腾玉检之晴光皎皎渐升带金泥之晓色当其大乐从律灵旗逗风登天孙以让德禅梁甫以归功至理旁達精神遂通上帝之命克彰监於君所泰山之云不散出彼封中尔其荟蔚朝隤氤氲载白俄失素於霄露将夺鲜於夜魄贯五色之土辉映银绳透三脊之茅光连玉册徒观其轮囷乍起皎洁斯呈既异赤乌之色应同白鹤之名纷玉叶之浮光低离印玺动苍梧之素影渐过粲盛盖其神造匪谋元功罔閤德有感而必届应无远而弗至当登封之礼上达於天而云物之祥下发於地足以表陰鸷合乾符不羣山以遐布不五采以相踰腾瑞玉之佳色映灵坛之四隅待族以分傍亭亭而郁律崇朝而散临绎绎以芬敷是知白者洁之祥云者和之瑞纪於官而天造昭假歌於诗而德音广被足令八九之主慚降禪之功三五之君媿升中之义於时百辟所视明姿聿分天子凝旒既享其嘉贶太史秉牒且纪其祥云有处士大夫之职者赋盛事於斯文

陶侃梦飞入天门赋

陶太尉之未达也孤藐贫悴折腰下吏奇蹇未脱於常数文武不可以自器於时方隅骚动天下恐悚帝将付晋以大统锡我以佳梦是何天命宥密感通陰鸷曜灵薄暮星芒骈坐营魂慙恍於中夜羽化不知其何术莫不烟昏雾迷雨骤风疾羽翮为吾而驰张心胆为吾而旷逸崛起地表翰飞太虚目不暇而自闕心不暇而自图若飞龙驾云而脱泥涂大鹏乘风而戾天衢势何可止雄莫之当月轮掩映而闪烁明河沸渭而苍茫不知其梦之为梦也践逍遥之涂届恍惚之场但谓其飞之为飞也翔垓圯之墟穷汗漫之荒曾莫知其适从但磅礴而翱翔忽长空之豁开覩天门而在傍吾谓是天也驾元精乘灏气去无不至吾谓是门也排氤氲鼓洪蒙去无不通迅羽而载扬突双扉之八重关键纵横以离立閤閤岌岌以穹崇莫不宵露珠落残霞堕红织女投梭而错?纖阿失轡而怔忡天左旋而且右斗西建而遽东若长鲸之透禹门而烧尾於春雷龙梭之化屋壁而鼓鬣於狂风徒观夫逞雄飞恣心曲吸沆瀣以满其志舞星辰以快其欲女娲仰视而颠仆盘古傍观而拭目方将以造化之气为流而刷其毛羽以混元之窟为巢而栖其爪足何其四方荧荧大明东生余乐熙而未已残梦倏其如惊羽翰虽复於手足魂魄犹翔於杳冥曾虚实之不辨何有无之足冯谓其实也变化之力飞扬之迹则不可得谓其虚也蹇腾所自耳目所记又何如此盖灵符之先睽天命之不移俾我材为大国之器道为万世之利功若举而无所不至命若飞而无所不遂故范逵有吹嘘之象张夔有羽翼之备然则总斧钺之任受师旅之寄三军负羽於左右奇兵翼张於要地实若周尚父有鷹扬之号汉将军有飞将之势则知自地升天者起家居三公之位天门八重者元戎董八州之事岂必若简子神遇帝享之以钧天之乐繆公梦回天锡之以鶉首之次也哉

草木爲人形以助战赋【以草木殊别有成师徒为韵】

壽阳之役兮草木流形陰功化成似代及瓜之戍如屯细柳之营孚甲可观肃前茅之銳气成行不乱陈右伪之疑兵当其天挫强邻神资晋境军容始耀於勍敌木实潜分於峻岭衆和可验尽倾葵藿之心师老无虞未昃桑榆之影由是威加敌国势壮皇都丽地之形莫辨被坚之象何殊不齎三月之粮宁无菜色纵乏五兵之器应有桑弧观其疏旆寒岩洗兵多露累弦而葛蔓争引秉节而松心益固光侵斧钺应迷谢氏之兰影接旌旗乍认将军之树懿夫草昧之

初天开壮图辟峯峦於壁垒变枝叶於车徒欲成横草之功何须破竹自整如林之旅不待飞刍已而甲拆冈陵风生林藪虽因形以赋象亦从无而责有苟宣尼之见美不让刍灵纵苏代之深讥何惭木偶故得尘清肥水席卷秦师逐北而蓬飞晓日解严而柏悦朝曦色似忘忧之类怒销蠲忿之枝庆赐虽行不受分茅之赏勤归莫覩谁歌杖杜之诗盖其德顺人心威乘天讨黎元分君子之林猿臂假王孙之草故能败苻坚百万之军都如电扫

狗盗狐白裘赋【以心计所成知得归国为韵】

智士多机羣心莫知念狐裘之可致非狗盗以难期窃粹白之珍宁宜鼠首杂重【原缺】疑当其禁卫方严珍奇莫得爱凭齐客之计庶买秦姬之力掖垣徒峻虽崇百雉之高宫藏非深必遂千金之饰俄而犹豫心决狐趋计成越虎门而潜伏映麟殿以宵征悄过獬豸之庭无慙狗态默傍狻猊之柱敢作豺声已而内府潜通天阁不阻閤启扃鐏徧搜囊褚疑羔袖之难辨喜豹祛之我与鼠偷既遂乍怀轻暖之资狼顾何忙便出深严之所是知四卫非谨千门岂深既得閤欺之便讵闻夜吠之音渐下螭阶觉忘蹄而有意犹憎桂影知顾兔以无心盖其志在忘身诚思报德潜开篋笥之固果窃蒙茸之色明眸素齿既私狐貉之衣轻盖轺轩遂脱虎狼之国故得鹰扬前席扈从东归犬马之劳既立貔貅之勇皆微关吏难留不媿鸡鸣之智秦谋既失曾无虎视之威则知小道不遗殊功遂济翻因守御之类特作穿窬之计故先王严管龠谨宫闱惧有慢藏之弊

放宫人赋【以宫阙幽闭晓然情悵为韵】

隋失民望唐开帝功降凤诏於丹陛出蛾眉於六宫夜雨未回俨鬓云於帘户秋风渐老失钗鵲於房栊当其凤历频移重门久闭蚁聚螭首帷连彩袂步金莲而共叹无偶对鸳瓦而徒伤失俚花冠不整笼蚕髮以全踈柳带低垂映蜂腰而更细太宗於是矜絶态軫深情旧苑而何伤幽闭新恩而尽放轻盈莫不喜极如梦心摇若惊踟蹰而玉趾无力盼眄而横波渐倾鸾监重开已有归鸿之势凤笙将罢皆为别鹤之声於时银箭初残琼宫乍晓星眸争别於天仗莲脸竞辞於庭沼行分而掖路深沉步缓而回廊缭绕嫦娥偷药几年而不出蟾宫辽鹤辞家一旦而却归华表苟非帝德从俭皇情烛幽又焉得离永巷别长秋指燕赵之归路望荆吴之故州算回程而靨带新喜思往事而眉含旧愁罗衣而颭灑轻云竞归巫峡宝髻而屈盘娇凤争下秦楼或绣辇香车兰舟桂楫指故里以思动涉长途而意慙飞腾自适既疑齐女之蝉梦幻堪惊且悞庄周之蝶已而别馆凄尔离宫寂然动兰烛於残照蔼薰笼於夕烟萧条而竹换筠粉零落而苔侵翠钿天上和风送神仙之二八人间丽日迎桃李之三千美夫入昏主之宫出明君之阙千门而绮焕裳锦九禁而云销鬓髮故宜其贝齿朱唇歌太平之日月

铸金为范蠡赋【以贤臣去国铸金成状为韵】

铸以表德金惟象贤始规模之卓尔俄冠冕以昭然任铜墨之资焉能接武纵银黄之贵未敢差肩昔范蠡以劲卒平吴扁舟去国勾践重念成功乃嘉丕绩兼金非贵将酬霸越之功良冶大开遂展铸顔之力俄而威仪可象熔范斯陈西南之美宝方集卿相之英姿乍振敌国以亡

似避铄金之口洪鑪委质翻从作砺之臣是何烁彼真姿宛成奇状对乌喙之英主映稽山之
远嶂威仪可仰似当麟趾之时轩陛非遥如履燕台之上盖以辞赏逃名嘉猷大成耸千官之
耳目见三品之精英俨端委之仪不惭铜臭处荐绅之列独有金声道契陶熔功符鼓铸交光
而?印垂组晃色而金盘擎露倘满羸之可贵自契韦贤苟一诺之非轻何惭季布是知刚以表
义义以象金观巧冶之非远察常念兮则深我武载扬既示能刚之力大名难掩足彰为义之
心美夫佐命爰来成功而去閱形容而国宝堪仰读史第而嘉名益着始知文种之徒曾无远
虑

文庄集卷二十三

卷二十四

钦定四库全书

文庄集卷二十四 宋 夏竦 撰颂

景德五颂序

景德纪号也五颂美盛德形容之有五也王道兴而颂声作士大夫之职也臣文浅辞陋职卑任远不能尽得朝廷盛事发为咏歌但少叙万分之一式抒区区若以国家成功告於神明荐之清庙臣工之上无媿辞焉谨昧死序进如左

平边颂【并序】

臣闻四裔交侵荐食边境为日久矣虞夏有山戎獯鬻之患成周有昆夷玁狁之难赵筑长城以设险秦驱诸戎而出塞逮汉而下种类滋蕃和之以亲而不庭怀之以文而不至要之以盟而无信饵之以货而无厌疆臣以是发愤王者於焉赫怒至有空天下以事外人夺耒耜而授干盾四海将服而中原随弊英主所以疚心良士所以极虑故汉武震威而损费光武惜费而损威李牧知保塞而不议其久奉春约和亲而不议其叛贾谊陈五饵而不议其贪鼂错论三技而不议其犷班固述怀御而不议其疆侯应计屯戍而不议其守诚哉严尤所谓无上策者也魏晋已降羌戎猾乱或结以姻娅抗之锋镝谋者鲜而鬪者衆偏议多而胜算寡其间羁御之制无复可从五代衰乱跳梁边陲上天有融睠我圣祖疏凿山河重造日月东臣九人南庭百蛮武功文德二帝相继蠹尔戎羯首鼠西北讨之则後服赦之则先叛数十年间兵用未戢我皇帝天地其德日月其明风雨其教雷霆其威陰阳其功造化其智无穷兵之忿无和亲之弱无飞刳輶轂之劳无迎降畜附之费庙谋动於自然成算出於无际戎后请命羌豪献誓北至西归愿备蕃卫臣百世之所叛乱服旷代之所犷戾臣下不知其略亿兆不知其功巍巍乎荡荡乎我皇帝之有天下也得御戎之上策神而化之圣德无名臣谨按春秋僖公四年经书楚屈完来盟於师盟於召陵曷为再言盟仲尼喜服荆楚夫服一荆楚圣人喜之况我平三边降二敌者哉臣再拜喜拚谨献颂曰

帝宋经营戎车四征东南易王西北难庭迁寇河陇戎螫幽并我泽流春我威飞霆去如鸟兽驱若蚊蠱国既底定塞犹栖兵吾皇柔克顺帝之灵元造不测圣功无形戎后歛塞羌种乞盟稟我正朔受我官名弓囊象弭矛偃重英投烽榆塞艺黍戎亭六合无云纖尘不惊日月所到皆被皇明环海为池倚天为城恢恢圣谋洋洋颂声有皇上帝惟德是成莫忧匪国我国既宁莫患匪边我边既平钦哉钦哉永万千龄

广文颂【并序】

景德二年夏六月颁劝学诏於天下秋九月甲寅诏张六科取士广文德而励儒业也臣闻圣

人仰观乎天俯察乎地知文之可以经上下纬邦国正礼乐移风俗於是乎修经籍为文之器立庠序为文之馆植正化之本导仁义之源跬步之间失之则乱故先王谨教劝学博文训士以取辅相以济功业其道充者其文盛其政怠者其章缺盖文者匠天下之器也四代而降文物之制莫茂於汉莫茂於唐自昔周道不融青衿起刺七雄分竞干戈日寻道堙杨墨辞逸谈说斯文中否而汉氏开之洎三国鼎峙六朝南渡义駸僊释辞放轻丽吾道将微而唐氏隆之然则汉乘秦弊去圣犹近学欲博而益专文欲华而自质其取士也故有贤良有道孝茂之举唐革隋命去圣踰远学欲一而滋蔓文欲典而更丽其取士也故有进士科目明经之选夫汉之得人莫盛於策问唐之取材莫精於辞赋虽文质殊轨而取舍齐致公卿之材忠说之臣论议之官博古之士考之二史世不乏人故制度可遵历祚皆永暨五代宿兵汉唐之制废缺垂尽天啓有宋拯我儒德曾不崇朝文明天下我皇帝亲斡文柄指麾万国变为政教发为号令景德之间坐致太平蛮夷柔服天下归心边城夜开五谷被野由是益重儒术专用文章增汉之科式求典则劝唐之学以博文辞传曰周监於二代郁郁乎文哉虽使汉文武两帝唐太明二宗生於今日覩陛下好文之德将震骇而不暇岂敢自量其轻重哉臣叨预荐绅窃闻公议皆愿复三朝之礼定封禅之制告文德之成功终荐神之厚意具瞻圣德不胜区区谨昧死上广文颂其辞云星辰日月丽我天则山川卉木贲我坤德礼乐诗书经我邦国三仪同文羣生茂殖故我皇帝道以文丽吐耀象天含章法地典故周旋朝廷之制儒雅雍容卿相之位既和三灵既庭四方乃监虞夏式?汉唐高张六科制诏万邦敦劝儒学亲策贤良景德之盛斯文有庆励我多士遂及百姓巷隘褒衣涂歌雅咏学馆渐海儒宫越境天下文明洋洋颂声方策鳞萃礼乐教兴翰墨如云环佩盈庭济济多士吾皇以宁多士宁矣纳忠献议封禅未行三雍尚废愿及盛时超行古制帝曰俞哉寔朕之意

朝陵颂【并序】

景德四年春二月皇帝朝陵于巩书礼也古者因山为陵秦始置寝汉氏因而制其礼以晦望伏腊四时上食岁正月天子率公卿百官诸侯王以朝广孝德而尽思慕也三代既往汉氏文明专以儒臣表正邦宪千岁之下垂为旧章自非万国底定天子仁孝则不克行之能行其礼者必有大功茂德格於上下灵泽庆赐流於百姓鸿徽盛事纪於史策声诗雅颂播於弦歌足使昭感上穹光被海外动植所生无不茂育人迹所到无不臣服盖孝之为德也际天地而感万物者也我崇文广武圣明仁孝皇帝陛下圣性纯孝加於亿兆郊祀燔瘞以只事天地春秋蒸尝以昭奉寝庙俎豆牺牲躬自执献竭诚极孝冠於往初景德中天下无事远人内附尘清九围通驿万里吾皇帝亲丕丕之基念祖考之业履霜露以凄怆感春雨而忧惕孝思之心不舍晨夕乃登用汉典制诰有司庀库辂简环卫幸巩洛朝陵寝崇牲醴之礼备韶武之乐六官毕从四蕃陪位锡銮珎佩震响郊圻梯航宝玉骏奔川陆自古庙会祭享之盛未之有也足以冠虞舜之德光炎汉之典昭假鬼神炳焕方策升闻於天则日月星辰雪霜风雨无有不时降感於地则山川江河昆虫草木无有失所大哉孝德之盛也不可得而名之远郡小臣以文受禄无以自效谨献颂曰皇帝丕显孝治四国乃祖有功乃宗有德功业且溥惟帝太祖?刘巨盗建邦啓土德昭且融惟帝太宗表正大中进贤保庸两朝厌世龙归波逝葬我弓劔因山巩地春日熙熙惟皇孝思乃朝陵寝于洛之畿左纛倚天旗旒葳蕤诸侯扈跸佩玉参差和銮锵锵行道迟迟瞻望松栢帝心伤悲亦既至止苾芬孝享吉蠲牺象馨香郁鬯动止心企音容目想

祖考来格歆我追养乐以迎来哀以送往命我考嗣受天灵颺河洛之滨太和氤氲庆泽流春
皇风感人翠华旋归车服振振宋虽旧邦景命惟新孝德不匮永锡下民下民亲亲万物皆醇
歌颂腾文竹帛流芬孝哉皇哉子子孙孙

广农颂【并序】

景德三年春正月庚戌诏颁农田勅於天下二月癸未诏郡国领劝农事崇化源而广农业也
臣闻圣人无土不王无民不君有土地则王业兴有人民则君道立故先王之建国也土欲广
而不用隙民欲衆而不用惰谓地之不辟非吾土也人之不农非吾民也乃为闾里室家以蕃
其生为畎浍封畛以理其田为耒耜钱鏹以庀其器为历象气候以授其时立经制以御之设
官司以教之均工商衡虞之税正车马甲兵之赋於是乎仁义礼乐有所加赏罚号令有所用
三代通制建中经远民以里居地以井受暨秦开阡陌农战相乘汉制名田并兼不息旧章缺
而仁政坠经界慢而訥竞起沿革而下古之制度不可复矣其政何哉盖三季已还五代而上
有天下者或竟不知天下以地为基以农为本以食为源以教为器当其拨平祸乱经始四国
则衽金革简车马计怀柔议聚斂赏勲旧治城邑暨边陲既宁?县既平功业既成府库既盈则
思悉华夏以自奉驱亿兆以从欲有患边幅未濶威武未震则转刍粟事边境有患岁月易逝
容发易朽则招方士求神僊有患登覧未远行乐未极则增台榭丽宫室有患嫔御未广歌舞
未工则渔声色选伎艺有患校猎未快驰骋未捷则广苑囿具毕弋有患巡幸未偏游赏未普
则修驰道飞清跸其间自非负天啓神授之资有圣文灵武之德者则不能训稼穡务储峙舍
派而趋源去末而从本致天下太康家给人足者哉我国家荷二圣基业用三王礼乐足食训
农克立治本吾皇龙飞春秋鼎盛励精百度旁求黎献谓守文艰如创业承平难如治乱深鉴
前世专行王道羈縻四夷而重兵革渔猎贤儒而藏网罟观六艺虚台馆听道德定圣乐功业
之大则成康文景无或比隆河山之远则秦汉隋唐不能齐盛菽麦流衍而红腐玉帛充牣而
露积陛下尚宸居减丽御膳辍声宵衣紫庭清问多士举三王之故实修八世之坠典以为择
循吏守郡国抚百姓善则善矣而未专也於是授之使领设为职司所以循名而责实也颁宪
令经田畴劝耕殖至则至矣而未一也於是编其制度勒为科条所以建中而示法也循名责
实则官不旷建中示法则民不疑诏下之日鬼神称庆太平之风旋踵可待不终日而争讼息
未踰时而淳鹵辟九围之内一岁之间衣食足而仓廩实仁义行而刑罚措大哉炎宋功德降
下教化垂亿万世与天无穷臣生逢圣明叨观盛事谨昧死上广农颂其辞曰

皇哉惟圣躬提天柄亿兆归心三灵洽庆广我田事肇修稼政乃置官名乃颁号令号令维何
分条建规恩斯懋斯流冗攸归官名维何啓职庀司训之导之播种惟时民曰勤止服田力穡
昼尔于耕宵尔无斁千耦偕飞百谷咸殖既艺淳鹵越经封洫官曰涖止纠力劝能庀我钱鏹
疏我沟塍乃能灌溉爰相邱陵污莱以辟游惰用惩赫赫圣谋有作咸覩畎浍四溟井疆九土
沃野万里纵横其亩拥耒成林洒流降雨阳春如膏原隰如鳞我稼既华六合生云稻粱黍稷
万井龙文同我妇子或耨或耘八月其获乃登尔稼滞穗栖原余粮压野盈溢京庾流衍方夏
式歌且谣土金同价百姓足矣君孰不足三百之困九年之畜八蜡既通五礼咸穆藏财於民
所宝惟谷君哉君哉乐事训农炎帝之教后稷之功方我王度明而未融臣之颂之永矣无穷

周伯星颂【并序】

景德三年夏四月周伯星见书瑞应也臣闻日月星辰天之经也国之纪也日以象君月以象臣星以象民炎炎君德不倾不侧仁义文武昭於上礼乐刑政临於下得至阳之体於是乎有日瑞昭昭臣道不僭不忒忠信方正积於内訃谟献替发于外得至陰之体於是乎有月瑞君之灵如日之升臣之英如月之征照临下土六合文明赏罚不滥兵革不试粢盛不害灾沴不作生民熙熙家给户足凿井而饮耕田而食蒙帝之力生育蕃息於是乎上发於天厥有星瑞书云庶民惟星又云天聪明自我民聪明盖星瑞之谓也国家受天成命五十年间法令寬大元元仁厚自克殄并土戎衣不再年谷荐登俊乂旅进我崇文广武圣明仁孝皇帝陛下?巩神器稽用故实光昭百度缉熙礼乐刑赏以御中外慈俭以率左右羣臣有羔羊之洁公族怀麟趾之信郡国州县各杨其职景德中匈奴谨守要约不敢犯边塞无宿兵人用休息齐民之家不忧岁时食饫鸡豚衣厚繒纁耕有余器廩有滞谷扶老攜幼涂歌里咏大哉此时上无失德下无遗政君君臣臣万国交庆虽日瑞于昼月瑞於夜曾不足表吾皇之明朝廷之盛於是乎有周伯之象告生民之瑞见於首夏国家火德之应也躔於角亢人君壽考之象也天意若曰令陛下壽考万年平章百姓隆火德之光明昭上帝之休命愿陛下钦之念之虽休勿休不数年间图书宝玉雪霜风雨山川草木尽为嘉瑞史不絶书故曰阳感天不终日盖天之於陛下犹父子之事也臣叨列縉绅仰观灵祉知在今日斯文有光谨再拜上周伯星颂曰

帝宋三圣功成治定昭融景命承天庆兮周伯焯焯经宵耀云何德之纯感星辰兮吾君恭让德音敷畅盖天垂象介景贶兮我国文明儒风炳灵惟德降祯发鸿英兮东南委照苍龙隐曜徘徊天表光帝道兮考彼典章知我天子享嘉瑞兮上可纪官下可建元法象星躔假於天兮昭我炎宋永御星统微臣作颂歌日用兮

大中祥符颂

崇文广武圣明仁孝皇帝陛下即位之十二年春正月乙丑大中祥符三篇降于左承天门书瑞应也以日者谨天命也以地者大灵贶也臣闻庖牺氏作结绳而治天将有命易以书契龙马负图出於河圣人观之退而画八卦两仪四象吉凶悔吝无所遁其形矣百官以治万民以察後世帝王言大政者自庖牺氏始夏后氏作鯀陞洪水天将有命奠厥山川神龟负书出於洛圣人获之退而叙九畴五行八政休咎威福无所隐其奥矣彝伦攸叙水土俾乂後世帝王言大功者自夏后氏始炎宋氏作三圣致治天将有命昭厥中庸神人奉符降於汴圣人受之退而啓三篇清静简易道德刑政无所藏其秘矣四夷率服亿兆可封後嗣帝王言大中者自我皇帝始大哉三氏之德与天齐盛皆获符书并垂典训混而言之则同参而言之则异同者事也异者道也伏羲以文物未作朝章汨乱天授以图始啓其政夏后以水灾未乂下民昏垫天授以书始啓其功炎宋以太平方至帝道有融天授以符爰建其中是则政也功也中也同为至道考其异则中也可以兼於政功矣图也书也符也同为嘉瑞考其异则符也可以冠於图书矣河也洛也汴也同为灵川考其异则汴也可以加於河洛矣牺也禹也宋也同为上圣考其异则宋也可以跨於牺夏矣故八卦之始画也其象隐晦仲尼讚之乃着於经九畴之始类也其文草昧箕子衍之乃列於典我大中三篇其则不然宛有章句政教出焉天作之天述

之授我皇帝以七六籍以锡明命为万世法故天不敢畀龙马授神龟负於河荐於洛乃命使者奉而降汴魏阙之下禁門之上知天之恭我皇家且异於古也使仲尼复生箕子不死在於今日舞之蹈之犹且不暇詎敢讚之於经而衍之於典者哉於戲千祀之衰也天道何远乎一朝之盛也天道何迩乎盖我国揆五代之乱奄有神器太祖灵武经始於前太宗文明光被於後廷四海讐万灵梟吴馘蜀裂广屠并不二十年?县穆清授圣三叶以致太平今上居以天体化以神声陰阳有愆伏而圣功无阙日月有盈昃而皇明不息故强敌北面而受封羌豪泥首而内附罢河西之戍放榆关之马京洛之间王气聚为宫阙良耜不试嘉谷蕃生於田野韶虺舞咏於道路耆壽沐浴於膏泽桴鼓在庭而罢击桃李垂路而不攀阡陌服车马闾阎享粱肉当是时天虽欲秘图籙爱符命其可得乎然则符瑞之至以五行而言皆有象也臣以列为三章者阳数也封黄帛者中色也时以春者仁也降承天门者承天嘉号也门听政之象也天意若曰王者体阳德御中道行至仁则有图书之瑞应之以承天之佑而听万国之政也臣幼学史氏讲春秋大义以为东周不竞瑞不当至先圣削而不书退有凤鸟河图之叹繫自获麟距国初建隆历二百有四甲子矣贤材代谢而符命不至臣也何幸逢时遇主行年二十有四而叨观不世之瑞上比圣贤自庆多矣故身在沧海之上心驰象魏之下恨无文辞以广称述谨昧死望阙再拜颂曰

惟圣有功功格於天日月星辰炳其灵焉惟圣有道道格於地山川草木耀其祥矣炎宋氏作三圣承平休功无形至道无名莫高匪天莫厚匪地不足炳其灵不足耀其祲三正有神同开奥秘取图河洛裁文五纬爰作受命王者之瑞景德之盛奉之而至先斯吉日神告有密僊服降庭奔精照室苍龙在申太簇歌春素月哉魄朱曦始晨皇帝受之於承天门宿卫咸观玉帛骏奔爰有大夫进牋而言臣知天意敢告於君亿兆欢心宗庙遐福有感於帝化为宝籙文武流光礼乐腾芬上達於天化为宝文表我皇家大中建极三篇未至中道以崇三篇既至中德益隆建元眚灾华裔可封庆赐周旋圉圉虚空一之日荐於寢庙昭穆增燿二之日告於朝廷雅颂腾声三之日達於九土里巷賡歌鸟兽率舞四之日闻於八荒投戈右衽九译来王可以象功制礼修乐三五之事一旦而作可以告成登封降禪八九之功一朝而见史氏书之藏於太室垂厥子孙遐观茂实太师歌之传於乐府荐厥岱郊永告嘉祐素王圣哲见叹河图臣之庸昧获观祥符歌咏功德职士大夫稽首献颂愿继典謨

卷二十五

<集部,别集类,北宋建隆至靖康,文庄集>

钦定四库全书

文庄集卷二十五 宋 夏竦 撰铭

颍州莲华漏铭

夫迎日推策帝鸿之宪天也治历明时成汤之应人也日月有发歛昼夜有增减非在璿不能测盈缩非运仪不能定昏明以是历数起焉漏刻生焉昼参乎晷景夜验乎次舍虽上天之运不能逃矣舜史日永星火者昼漏多也日短星昴者昼漏少也周官有以火爨鼎之制齐诗有折柳樊圃之讥由是观之挈壶之设其来尚矣汉承周秦图籍最备其令甲第六着常符漏品二十四气各为二箭刻日所在并黄道去极晷景刻数昏明中星於其下班之计吏自兹厥後踵事增华逮施於李兰始变古法权器程水以準时刻唐之诸道率循此制至今器有存者而莫能施用唯司天官漏迄今用之参以中星因时升降而置箭之制世不复传上躬至圣之姿极攸纵之美稽古典学励精百度讨论希阔讲求礼术天圣中有今龙图阁直学士给事中燕君肃始考七经载籍作莲华漏于梓潼来献阙下其制为四分之壶参差置水器于上刻木为四分之箭箭四觚面二十五刻刻六十分四面百刻总六千分以效日凡四十八箭一气一易铸金莲承箭铜乌引水下注金莲浮箭而上有司唯谨视而易之为行漏之始又依周官水地置臬之法考二交之景得午时四刻一十分为五正南北景中以起漏焉时予备职枢府弗获熟视君未几作藩青社建兹漏於白楼予出守汝陰亟往代君因得细睹其制精妙参神景佑中君复厌承明求刺于颍予亦内徙睢阳封圻接畛庆问时通因请更为颍漏以广其传君由是再考晷度以梓潼在南比古法昼增一刻夜损一刻青社稍北昼增三刻夜损三刻颍处梓青之间昼增二刻夜损亦如之仍作屋秘漏得天愈密予旧隶史局粗亲此学以为乾体左旋七曜运舍皆动物也赤道横带黄道斜截复有进退夫物动而有进退者势久必差故昔贤制术以天度乘昼夜漏减三百而一为定度以减天度以为明加正度以为昏所以追晷景之实防节气之差然三百岁斗历改宪而异人出焉今燕君其当之乎夫六艺羣书唯天文数术探赜索隐钩深致远最为难明若心所不达虽通人前识詎测其方而世之俗儒或以为非荐绅先生之所称道何其误欤仲尼作春秋每於朔闰发文以宣明历数此圣人之深意也书不云乎敬授人时礼不云乎百度得数而有常後之观者幸无忽焉其漏志一篇亦刊诸左方期於不朽云尔铭曰极星建中黄道营外度有迹遐时有明晦圣人观象古史诒则孔壶为漏浮箭为刻资始巧历稽合小余重黎是司羲和是图秦氏遗法汉京垂制历世弥文旧规加丽玉虬吐水分灌两壶金龙转注下激衡渠天道可观神化无迹日运波澄气分箭易【原本脱四字】都邑屡迁寂寥罔诏世失其传猗嗟燕君文学余力博贯旧章肇新景式象魏既登潼川既营建於青闥作於颍庭五夜持宵三商定夕杪忽无差升降靡息意侔造化数穷天地茫茫有生孰参其知於铄圣宋世祚无疆刊此乐石永宪万方

琼台双阙铭

琼台峩嵒左右如阙直上相等萝交蔓结启闭云气出入日月千流若綫羣峯如屑凌霄压海吞吴跨越

石桥铭

山壤献灵融结推功穹窿石梁飞云架空垂流下激絶岸旁通烟华溟蒙矫矫翔龙朝日曛曛蜿蜒腾虹愿接天孙以助登封

三井铭

石罅山半三井如凿圆不可窥深不可度乱涧四入飞流外落堕石不盈骄阳不涸冷激松桧碧混崖崿山灵所卫神物攸托箫鼓一鸣雷雨闲作【案此铭原本阙今据北宋人小集增入】

洛西铭

商祚不永帝辛失御百神受其嫚?生民堕於涂炭西伯昌既脱羑里之祸陰图王业将欲以利易其心以德胜其暴以为罢长夜之饮却靡靡之乐省其狗马陋其苑囿皆不足以警天下之缺望怀百姓之欢心乃献洛西之地请除炮烙之法紂许之夫以仁义而胜残虐以洛西而易天下万民之心已归於周而独夫莫知之也吁君杀而臣宥上斂而下施者鲜不易地而处矣使西伯先尧舜之世修诸侯之德犹不暇况天子之事乎盖饥者易哺寒者易衣凋敝之民易归乱世之惠易行为人君者其慎德欤君子曰牧野不能亡紂亡紂者炮烙也岐阳不能兴周兴周者洛西也有经其地者立碑以载辞修辞以达意庶千载之後知文王之心哉铭曰独夫骄矜牝鸡晨鸣炮烙之刑虐生灵兮文王翼翼恍然心戚献我疆场去非辟兮紂得其地周得其义兆民之意知险易兮惟洛之右商祸之首诸侯心疚天絶受兮惟洛之西周德之基四海心归天祚姬兮洛郊如砥周道如矢德音不已垂千祀兮

秦东门铭

夫夏之亡也汤得之以仁故卜年四百商之亡也周得之以义故卜世三十周之亡也秦得之以力故败不旋踵盖嬴正以区区之秦闚觐关东暴师二十有六年而削平区夏分为郡县为武之力亦其至矣柰何取之不以道守之不以德信任胷臆慕於权势峻文酷法乐於夸大尝经东海上胸县界中立石为秦东门以表其功业一旦宫车晏出神器失守匹夫大呼社稷綫絶为国之弊一至於此孟子有言曰域民不以封疆之界固国不以山谿之险威天下不以兵革之利诚为天下之道哉後有人经其地而为铭以识其事铭曰

六王伏劒秦道益昏丁男北戍云罕东巡经於上胸薄於海滨立石峩嵒为秦东门刑政不残

鬼神不扰秦无东门秦不为小兵革既丧礼乐既坏秦有东门秦不为大天厌秦荒祸起萧墙函谷不守岂暇四方东门之中天设局鐻纳汉以兴闭秦以灭我经其所块然遗址刻此坚石以识秦罪

焚书坑铭

秦焚经籍尚法令人知其祸而未知其福焉夫舜死陟方则禅受之道缺有夏多罪则篡弑之风起盖受天命观人事而作故君子不谓之暴而嬴氏以区区之秦闚觐关东刮兵剥粮峻刑刻法幸六诸侯之弊盗据神器累世之祸积於宗庙兆民之怨盈於城野炎汉之圣伏於丰沛是时苟能右诗书敦礼乐修人文而黜吏议禄冠纓之士行帝王之术虽累世之祸不得发矣兆民之怨不得泄矣炎汉之圣不得章矣而秦反枕干盾衽金革贵刑名而害仁义官甲冑之夫驰战霸之涂故宗庙之祸得以发矣城野之怨得以泄矣丰沛之圣得以章矣夫是坑也焚於斯祸於斯福於斯焚书也祸秦也福汉也诗书不亡无以速秦祸也未有削平敌国分为郡县不数世社稷鱼坏而不可救者也礼乐不坠无以速汉福也未有起布衣提三尺不数载大统毕集而不可危者也盖文之於国犹水火哉无一日之可暂去也秦失天下也故祸之易也汉得天下也故福之易也君子曰国之将亡文先亡矣未有守文而不能救亡者也斯文之道如天地焉如日月焉覆之载之照之临之非可息也秦之焚书焚秦也文道非可焚也客有经其所为碑以铭其事其辞云

诗书礼乐加於焚燎燼赫地维烟歛天表凝为灾星秦祚以夭融为王气汉德以兆正弃秦祀非弃文德夭祸秦毒非祸王国斯文何损如日月食道不可屈明不可息神契人合嬴不血食【原本脱四字】文乃鼎沸烟复为仁烬复为义大儒蜂午振铎而起心揖神遂口传天意皇皇六籍且经且纬赫若烟燼灿如烽燧斯文之圣因焚而试斯文之道因焚而炽俾我儒德後王之畏不敢侮慢以速祸戾【原本脱四字】吾知可贵秦灭汉王是名铭志

补封狼居胥山铭【并序】

予尝读汉书至武帝即位之二十四载将军去病出塞捕敌封狼居胥山而还纪传皆阙其铭遂为铭而补之云

维汉元狩四年上以去年匈奴寇我北境至於定襄分命诸将耀武穷絕奉行天讨骠骑将军冠军侯去病总十万衆出右北平甲冑鈇钺远饰天怒礼信为器行列毕整精诚贯白日鋭气凌秋霜金鼓相应有不可辱之声旗物相望有不可夺之色矛櫜云靡号令风动约轻齎絶大幕越二千里既俘张渠乃衅车耆追左方之兵历度难侯济弓庐奇兵翼张犄角相向取旗鼓麇酋帅执讯获丑踰七万级埽平区落推扬帝威南辕反旆历于山川遂禅姑衍临瀚海封狼居胥山式表汉德从事承命是为之铭铭曰征朔幕兮振元戎犁王庭兮翦元凶车骑旋兮氛祲空刻隆石兮山之峯永万年兮汉之崇

女怀清台铭

女怀清台秦所筑也寡妇清采丹擅利以财自卫始皇客之为之筑台於巴蜀夫妇以客则非典台以旌则非礼盖王者之客有二曰二王後正三统也曰异域正朔之所不加也国家之旌有四曰贞曰孝以侑民也曰功曰德以砺臣也而妇越闺户预外事是非贞也图货殖忘盥馈是非孝也采丹石弃织紉是非功也抗君礼乖妇仪是非德也客之不足劝贞孝适足教民以慢上旌之不足崇功德适足化民以末作秦嬴之心何以言哉史迁曰岂非富也夫富而客之富而旌之则孤老穷瘁之民受残於并兼之室贞介孝义之妻仰首於豪戾之妇语不云乎放於利则民多怨於戏古之致民於富壽者禁末事戒游惰丹漆金锡之类非贡不入於太府骨革毛羽之物非时不登於器用省徭役薄赋敛循天时广地利君籍田以劝耕后亲蚕以劝织故民仓廩实矣衣食给矣实则富矣富则乐矣乐则和矣和则壽矣哀哉秦之为政也反是贵宝货而贱耕织厌编户而喜商贾妇非所表而表之表贪竞也台非所筑而筑之筑祸乱也贪竞起而王业衰祸乱长而宗庙坠秦是用亡台之罪也客有延想往事勒铭遗基思有以戒之也铭曰童羊无角牝鸡无晨陰不可唱以已徇人戾哉寡妇钩礼亡秦筑台于蜀以惑下民崇台昂昂秦女所亡不守帷薄乘夫擅阳崇台嶷嶷秦民所息怠弃陇亩杯采丹石蚕絕桑死女不务织土乾种腐民不务食婉婉盥馈秦女为仇服田力穡秦民为讎货殖是积玉石是求以要旌表以客冕旒兹台未成秦毒已盈兹台未倾秦庙已平吾恐蜀民以秦为明吾恐蜀女以妇为贞弃德逐利浸润风行故摭秦罪荒址是铭

文庄集卷二十五

卷二十六

钦定四库全书

文庄集卷二十六 宋 夏竦 撰碑铭

传法院碑铭

太宗至仁应道神功圣德文武睿烈大明广孝皇帝以太平兴国七年六月建传法院于太平兴国寺今上体天道法仁明孝德皇帝以景佑二年六月特诏史官追颂先烈史臣某拜手扬言曰唐氏中微五代多故三辰昏祲九服煨烬虎争龙战糜沸云扰我国家题五精之期起千岁之统祛天地之否隔拯夷夏之涂炭翦寇剧以靖摇乱诛僭剧以遏横鹜太宗皇帝张天弧顺斗极驱除邻敌驾馭髦杰制礼乐於已坏振文武於将坠奉艺祖以造大业由太弟以纂鸿绪归马论道投干讲艺覆露所及辙迹所到罔不辟皇衢剗霸轨一文轸齐量衡者焉泊乎六幕谧寧中宸闲晏披蠹简访幽经观天人之交探神明之奥补缀漏遗讲求希濶朝夕之议必稽於典册小大之政咸本乎根柢尝谓佛法之至也百王不易历世弥盛中原之区宇絕域之种落户讽其书家图其像一睇窅堵一嗅薈卜或因受以悟法或睹相以趣善感照以应羣动广大以摄万有裨德教省威戮其来尚矣先朝乾德中临遣僧行勤等一百五十有七人各赐装钱访经西域今继有还者嗟其翻译之废载祀二百非国家削平多垒奄宅四海通道夷貉暨声葱雪大事因缘畴能复之会鄜時守吏王龟从上中天竺印度僧法天梵学比丘法进所译经又北天竺三藏天息灾与其受具母弟施护各持梵夹来献符帝雅意天实启之乃遣内侍郑守钧肇营兹馆赐息灾法天等宣译命光禄卿汤悦等润文法进等笔受缀文义学苾刍慧达等证义高品王文壽等监译由是宪前轨稽秘藏依金刚界扞种子坛书字源布圣位三成藻饰四事庄严三藏主译於坛北梵僧证梵义证梵文义学僧证义刊定华字于左右润文东南以资笔削监译西南以肃仪律新经既成制蹕临幸賚物有品诏赐金额岁给殮钱一亿六十万度僧十有一人翻译之制大备於兹御制三藏圣教序以冠经首息灾赐名法贤又诏择京寺童子得惟净等五十人令肄梵学每大电纪辰贝多启译经成奏御召对赐坐进见甚宠观者荣之真庙绍文鸿徽累盛舞羽而清河右再驾而羈幕北銮旗驻於兹馆篚币班於法席泊乎勒圖封禅梁址上仪交举盛节咸备拥九清之嘉佑访三空之真谛祇适先训布昭睿藻作圣教序以赐之又诏参知政事赵安仁等并所降制诏赐名大中祥符法宝錄复以宰臣丁谓王钦若充使以宠重焉圣上慎徽祖服光启宗范长养容覆极两仪之大德睿哲广运总列辟之能事尽美乎万几宣精乎三教悟然灯之授记当弥勒之嘱累以无上之知觉建大中之教化述三宝赞以冠藏錄衆圣欢蹈羣生依怙雨花芬都金光照烂恩深归救之本理极名言之表无量功德非思议之可及也自兴国壬午距今乙亥五十四载宠灵积累妙因殊胜有若今右仆射同中书门下平章事吕夷简以师臣上袞博达空理奉制兼使今参知政事尚书吏部侍郎宋绶以宏材硕德了悟真际被诏润文有若故枢密使同中书门下平章事王曙参知政事张洎赵安仁枢密副使杨砺翰林学士承旨晁迥李维翰翰林学士朱昂梁周翰杨亿皆以学通儒释继司译润上哲清流尽在兹矣翻宣表率则有三藏五人皆赐朝散阶累迁试光禄卿始法贤次法天次施护并刹帝利氏深穷秘密傳通华竺功成顺化恤礼尤异又次法护

比天竺憍尸迦氏始隶毗尼事修禅诵先朝以其至自西遐该明法要令嗣译度次曰惟净故
吴王李煜之犹子七岁依师选习梵业真皇以其不游西度精晓贝文特命主译天圣中法护
请还身毒惟净求往阙塞累表不允今皆际会昌期宣隆教典者焉其监译内侍则自文壽至
今内藏库内常侍陈文一御药院入内供奉官阎士良印经院入内高品朱若水十有七人皆
简擢恭恪以干院事其笔受缀文证义等僧则自法进至今文一法凝鉴深慧涛潜政清漏善
初义崇慧素存行及梵学僧文涉道隆慧灯七十有九人皆妙择行业以塞朝选其贡经五印
度僧则自法军至法称八十人取经还华僧则自辞潮至栖秘一百三十有八人皆克遂至愿
赞此大缘宠赉之数咸有差次其贡献并内出梵经无虑一千四百二十八夹秘之院阁译成
经论凡五百六十四卷续於藏室娑婆之界以语言文字作佛事【原本缺】体貌丞相宠数
尊异其诞辰翻译瑞场启罢并命两府衡弼传香赐会着为永式夷简等进诗称谢有诏刊石
译馆之荣於斯为盛说者云译者释也交释华梵对传句读办佉楼之笔简韦陀之辞本政因
以建之糅杂句以文之广陰入之津梁续痴冥之灯炬宣我象教功孰大焉然而拟於法者空
几於真者静染空尚垢知静犹障若夫遗照觉度禅定应现无方圆明具足者岂有髣髴於其
间也哉但以千觉度人始自言语八藏垂教必假文翰双林示寂鸞岭罢谈五百年中皆称正
法三十四字广衍右行充溢诸天靡迤东土非传释无以达华夏舍润色无以足言志凿五蘊
之牖破三毒之网塞颠倒之涂决苦恼之海俾衆生竭爱流灌毁宅味甘露以清凉大士悟始
觉证法身护神通而游戏其六度之本源乎万行之因地乎宜固谛方言练横字审缘起正思
惟贯穿宗极以了密义涉猎苍雅以定华文备而不繁直而不略诃四病之微细拂二见之邪
执洒之海墨则诸佛下观咏以潮音则百灵潜听使广劫之下知朝家崇建之美叹圣上尊向
之仁不其伟欤臣早游史阁尝预译场终以钝根求补外职地如亭历有生之累犹多笔若须
弥衆妙之门难尽上勤哀旧物俾图懿铄谨奉宸旨靡敢固辞议者以为圣上之建斯铭也昭
貽厥之谋周文之追孝也尚记事之美陶唐之有文也光大度门能仁之悲心也守护正法有
帝之鸿誓也宣是四美垂厥无穷乎龙天降格神祇叹誉永锡百禄大庇中区皇哉焕乎谨为
铭曰西方圣人万化幽赞兆启於周法至於汉森沉天禄古经肇焕?蓀甘泉金人耸观机缘合
应梦寤通灵腾兰东入愔景西迎甦像可传绘事初形具偈难解译法肇兴魏晋泊唐正闰十
九变梵成华翻传代有篆隶兼该典坟旁究八备咸精三难尽剖正元以降国步多艰戎箠沸
路盜戟横关悉县罔学雷岭谁攀法器几堕慧命将殒明明上穹启我有宋尽殛残暴并苏愁
痛神武拓迹圣人垂统四貉同文五天底贡皇灵有赫法宝增光精庐再考译席重张半满交
显疑伪兼详六义垂范万颂裁章竺典岁臻华经日续液金赍字雕琼丽轴思文祖祢尊善导
俗克昌厥後介尔景福皇帝孝思对越无极碑颂休烈载刊金石铺昭上乘博济含识惟皇壽
考时万时亿

慈孝寺铭【并序】

维天圣四载冬十二月洛苑副使入内内侍省押班江德明被旨治故燕国英惠长公主第为
佛寺资福於真宗文明武定章圣元孝皇帝始圣上以皇太后濬发鸿誓祇廸净因图创美名
永昭慈训三事之臣相与进曰陛下以聪哲广运承燕翼之谋太后以寬仁勤俭膺顾托之重
垂帘访对斋居听政雨露均泽荣悴毕沾日月并明忠邪洞判阳郊再卜岁历五颁六幕晏清
百嘉楙育此太后至慈以佑嗣圣景贶博临陛下至孝以事母仪黎苗欢服在昔名寺方册具

焉或以纪年或以盛德今愿以慈孝为名庶称道於无穷晖映於前代有制可之仍命近臣铭於乐石臣闻东汉已还有天下者继体承基尊祖亲祢黄流玉璫观盟之享严高燎清坛外宥之容备属象余烈顾慕遗恩奉先之典有终欲报之哀无极或以佛国追福或以释像荐灵旁行不流厥惟旧矣唐氏中微五代短祚寇剧摇乱羣雄纷扰载祀踰於二百历世几乎三十文辉昏祲山川圯裂空庐生荆棘郛郭成煨尘大块之载欲空下民之命垂尽我国家天人合应祖宗重光并翦鲸鲵再造畿夏胜残去杀解百王之弊纽题期立象拥五精之王气宪洪范顺乾则置国以建永图剗霸轨拓皇衢纳民以遵大道功有震叠輝耀格天光表而太山之高未增德有旁魄曼羨蒸云润海而梁父之基未附上帝储蕃祉而有待先圣膺宝命而惟新其宅藩房踐储邸则三鷄问寝四时省膳周文之孝德也尹正京穀宠綏都畿有虞之历试也其步天阶御神器则攸纵多能宣精道艺陶唐之文思也躬案六师外攘夷狄成汤之圣武也大哉以日躋之美承天赞之业仁经之义纬之根本於道德粉饰乎礼乐信以来远忿鸞之兵寢虚以受人鯁亮之臣进万景以之昭晰元化以之綢繆包举大寧参侔遂始故能延颺驾席萝图萃坤珍辑天瑞纪官立制克称乎神物升中降禪不显於上仪郊丘颂祇曲里尊道秩无文以拜祝篆名山而纪迹均大賚赐明宥复太素宣至和子黎庶之恩丰宾万灵之礼洽方将祓靖馆斋大庭而思帝所以甚欢厌天下之为累彻琴瑟而弗怪倦輿马而罢游圣人入侍兴居冠带不褫太后亲尝药石夙夜必躬靡爱性牲徧走羣望载罄圭璧并植三坛屑琼蘂而无功淬玉灵而罔效於是祈竺乾之秘教舍沁水之名园行冀有瘳即程庶役靡获梦龄之感终稽彤日之报弓遗髯断荆山之鼎空成钟?酒清钧天之游不返宇宙惨怛人神震动六宫攀号万国縞素皇帝起初载临宸极章明百度履德包元以仪形乎风烈皇太后恭遗制保重熙平决万枢博照兼览以对越乎威神以为能类帝者圣人善飧亲者孝子乃缘先朝之意寢讲昭事之文以真皇之受元符膺秘记层宙之顾怀也始严安圣之殿於玉清之廷奉諄诲迪璿源六羽之监观也继作奉真之殿於灵景之馆又以洛师吉壤艺祖降灵有应天之院睢阳奥区王业资始有鸿庆之宫四范睟容并安宝宇尽汉祖龙顏之妙增开元玉石之华皆衣冠是游旒宸如在荐櫻献鮓驰传相望濡露履霜因时增脩又以为禴祀极乎礼异幽赞之宜哀戚竭乎情无名助之礼乃复畴近职命有司申述绪言继成曩志即凤台之余址建鹿苑之精庐因旧垣而不广虑民居也鳩庶工而惟简形人力也【原本阙三字】祇植之园设像兼顾成之庙岩洞隐饰疑堂邑之山林讚呗传闻变平阳之歌舞回廊四注飞观相临落斯干之雅章成春秋之遂事以五年冬十月诏择练僧三十以奉重修置净人二十有五以给洒扫设官守之局俾德明以董之议尊奉之制命太常以参之先置禁中肖像文考是月壬申乃率还臣戒宗室导自天章之阁至於会庆之殿紫幄奏香空歌达旦翌日羣后晨谒百灵备从申命上公奉安於寺之崇真殿緇黄先道仪卫清路幡华旗旆左右相见鍾磬笙簧前後问作帷帟设次簪绂在廷太史候辰攸司错事言瞻殿榜出於宸翰飞毫举凤拂素腾龙孝德圣能并焕兹日甲戌上运法驾率公卿以奉馨荐越翌日太后御琯輿总嫔侍以献令芳都人隘涂轩车击鞞或鼓舞蹈德或感泣怀恩望帝卿之云惨凄共色听鱼山之梵讚叹相趋先帝付受之道光矣後圣恭事之礼至矣书所云克笃前烈诗所云聿追来孝者也史官奉诏谨为铭曰有宋赫赫两宫明明慈昭神育孝总天经思文真皇悲哀罔极鲁馆方虚给园斯辟斗城北望广路东披采楹丛倚紺瓦翬飞宝网罗空金绳表道满月光明青莲相好有殿中峙实奉先朝雕云丽幄绮栋陵歆隆準如生清辉若在祇荐馨香疑闻警欵供帐咸具服御毕陈履綦虽远手泽犹新闲馆旁连藻局相属庭有寓龙山多叠玉严卫岑寂灵游往来雨华纷馥颺馭徘徊日监孝思永锡纯

嘏时万斯年在宥天下

文庄集卷二十六

卷二十七

钦定四库全书

文庄集卷二十七 宋 夏竦 撰碑铭

大安塔碑铭【奉勅撰】

有宋封禅後十祀建大安塔於左街护国禅院从尼广慧大师妙善之请也今上宝元体天法道钦明聪武圣神孝德皇帝在宥之十有七载诏史臣书其事从尼慈懿福慧大师道坚之请也妙善长沙人姓胡字希圣母既孕不茹葷妙善胜衣志求事佛马氏之乱略为姬侍尝被毁逢怒忧在叵测默诵普门名称舍利见於额中马氏异而礼之国初宣徽使兼枢密副使李处耘南定湘川得之郡邸尝以素誓未伸断谷谢病梦异人曰我文殊也汝第食胜缘近矣明年处耘捐馆遂依洛阳天女寺剃髮受具往来两京高行着闻太宗皇帝以椒涂之旧锡以懿名被之华服大姓袁溥舍第起刹赐额妙觉禅院令妙善主之自是肃禅仪练律学给瑜珈之会演华严之说五陟岱山一泛泗水皆中贵护送傅舍供拟皇帝巡狩河朔刺血上疏玺书褒叹是时万年中参恩爱异衆宸闈进见礼数踰等赠中书令忠武公李继隆每以保阿尊事尤谨泊元符降格法御上封妙善即朝日之郊卜布金之地讽甘露法品祈东禅灵佑帝意嘉之赐名护国天禧元年湘东邃谷有钜石重累数十百丈屹若浮图昔隐今见诏遣使案视建寺度僧以旌其异妙善志往瞻礼有大弟子道坚以师腊既高衡阳云远恳留不已先事以闻翌日妙善请告南游真宗曰汝老矣何遽远适如来性海随处现前倘有至诚皆可供养妙善遂求建今塔特诏许之会江宁府长干塔成绘图来上促召妙善於护国将赐之道坚在妙觉地近先至访对称旨受图以归首事创规实始於此由是涓日置臬肇基宝甃冶金砬石作於地宫将秘庄献明肃太后所赐驮都逮妙善曩得佛骨会妙善示灭尽以塔事嘱累道坚妙善享年七十有六尼夏五十有五宫闈震嗟赙赠加品建坊立刹赐额宝胜以道坚兼主之道坚尽礼苍皤入谢扃禁且陈妙善遗誓云此塔今世不成来生愿就先帝惻然赐以潜邸珍玩三千万直仍命内侍分董其役明年春法坚制金衬宝函纳前舍利等入奉於内道场赞呗三夕两街威仪导自滋福殿帝荐香以送之季商协吉藏於石室五年继赐乘輿副物货镪万缗以供余费乾兴初又以塔心殿栋须合抱修干既选未获贯於皇帝上方以天下为公且重违其请庄太后时为皇太妃乃以奩金五百万输於内府市材以施之天圣改元内出明德太后宝器价二百六十万泊庄献服用千余万付之公帑易金铜铸轮盖以施之美哉四门九级岌嶭天中十盘八绳晃曜云际道坚又以圻壤虽毕丹采剖剗未完徧募檀信获缗一万八百泊法坚稟给余赀三百二十万以偿其工上继志有严奉先惟孝宅心凝觉追福太宫由二级而上命奉安祔庙至宣祖皇帝四室神御并列环卫拱侍左右自余缘塔功德未具者皆省服御成之由是贤刼之象萨埵之容五佐星纬八部人天分次峻层罔不咸备七年功毕诏赐兹额金榜始严闕輶临视谈赞五尼赉紫方袍并赐近院官舍九十区僦直充供明道二载上给白金五十鎰俾营献殿先有陈元?舍僧伽像张延泽施罗汉像颇极精巧道坚复建二殿夹峙於塔以奉之又营讽法华孔雀经二殿以次之景佑中上赐钱千万创二楼於塔前右安特旨所赐龙藏作香轮以转千函左挂庄惠所舍钟树雕格以维九乳其斜廊壁绘罗汉迦文像亦庄惠之施

粵自營創建夫圓成則有宗藩施三门泊无量寿像邓国贵主施报身像尚宫武氏施法身像朱氏施药师像何氏施下生像晋国夫人张氏施工绘献殿壁颍川郡君韩氏舍圃於西戈水杜航舍地於东及其季尚继献金録壽春王文献缙钱义学比丘端琛指教相文字比丘惟俨着塔録吴门应德兴为匠石皆道坚愿力所召共周能事者也厥初妙善尝梦塔相止於双足谈者以为上足善继之祥也塔成忽一日远望如失灵只环遶之异也道坚故通事舍人杜志儒之女母明德从父姨再适故殿前指挥使武成军节度杨信封陇西郡夫人道坚生九岁即斋素十有一求舍家兴国八年剃度得戒明年赐紫伽梨十有六授慈懿师名嗣掌妙觉月给俸料三时赐衣岁度僧荐紫各二陇西夫人随子剃染朞月归寂道坚天机警悟资性严整有大丈夫风槩尝诵法华千卷华严首楞净名圆觉皆数百过记忆教藏该通大义塔之规模尽出智匠总三院之务安数百之衆以慈悲摄嗔恚以精通摄懈怠故能念举而物应身动而衆随羣蠡表异纖鳞示应作大因缘终始圆就明道中诏加福慧之名尝谈经於观文殿有旨赐尼衆食料道坚以为出家分行折伏骄傲赴请之饭犹起诸漏彷徨移晷切辞仰给每院但受月廩作糜米十斛闻者与之谓其知分夫以柔弱之赋婉孌之姿其间具明淑之德习师傅之训不过佩服诗礼蹈履谦祗体苹蘩之柔洁法山河之容润而已其能断弃爱染脱离尘垢以坚固为佛事以勇猛趋实际潜发心华坐空蘊树者何其伟欤古之后族出入宫掖憑藉声势狃怙恩泽外交王侯旁出姻援不期骄而自速靡美侈而极怀载之前闻为鉴来轍者有矣其能委远光宠杜絶徼望辞荣於宗属等志於贫贱以喜舍化俗以高洁自持者抑为难哉宜乎万乘待遇六宫景慕成支提之上缘到无生之彼岸者也於戲是塔庀功二十年规平三百尺高二引有六丈经用一亿旁庀佗舍无虑五百楹自非景祚和平累朝信奉设有大愿乌可成邪是知诸佛慧命其待时而兴也夫议者皆以为圣上於是塔大美者四中出宝币形民力也日就胜因畅先谟也敦劝於下使趋善也命书厥劳庸展亲也所宜鬼神潜卫海域延仰永集纯嘏施及怀生者焉臣早预翻经尝更约史仰被台札靡敢固辞谨按塔者梵云窣堵坡此云灵庙在於诸天则藏佛爪髮衣鉢在於西度则记佛降生经行演说圆寂之所一以表人胜次以生地信三以报重恩四果之位能超三界故有初级至四级者如来出十二因缘故极於十有二级焉迦叶灭後婆罗奈王起七宝塔为作铭记岂非刻石之识抑有初邪或问古今哲王之导黎庶不专讲六艺而参用三乘岂其大抵同归於善乎臣尝试论之夫有生之源本始清淨寂则絶待於一物感则资始於万缘至灵无方至虚善应觉者则圆通罔碍湛寂自然内不立於寸心外无累於羣境不为世界之所流转不为幻妄之所变移迷者则奔驰万有昏翳五欲习动而不能静入业而不能舍失本明而不知沉诸趣而不恨所以能仁愍之出现於世法不广大不能包种性喻不善巧不能破根蘊穷理而至命象系之旨也率性而达道中庸之意也好生恶杀仁义之均也防非致和礼乐之则也圣人以为外可以扶世训佑生民内可以澡心源还妙本所以崇其塔庙尊其教戒自东汉以来历世多矣其间执分别之论起归向之疑废之而逾盛毁之而逾信岂非言底乎不诬理冥乎至当者哉昔有人云百家之乡一人持戒则十人淳谨百人和睦夫能行一善则去一恶而息一刑一刑息於家则百刑措於国以此观之则斯法之来裨我之治盖亦多矣上具大智慧有大威德神道以设教文明以化人晏坐黼帷铺观贝牒信解出於天纵悟入自於生知指曹溪顿門则言高达摩览竺乾半字则义中悉昙实玉毫之化身托金轮而救物未阶铺砌孰望清光而况投笔端闥属鞬远戍据案受简摩盾操觚但缘外护之仁少叙重熙之德谨裁二十有四颂以勒铭云

於铄帝宋氏睿明继临照百度恢大功三归崇正法辰居宪紫微东郊配苍震有大除僮女肇
营晏坐场九级缔层楹两朝施宝玩八觚回日月百寻切云霓七佛俨金容四圣崇晬表琰刻
具千觉图绘周万灵钩槛?璇题高檐幕珠网龙天乍来去烟霞时蔽亏我闻上帝宫昔在庄严
殿八万窗牖柱衆宝极雕饰曷若佛灭後随缘崇庙貌设利罗如芥苏偷婆如果有盘若枣叶
有像若?麦其福已胜彼无量千百亿况惟此聚相密迹於国城楼观相飞注康庄四通达宰官
引饶吹公侯聯旆旂都人集袂帷王姬传车水流景启清旦行月丽中宵幡影铺九衢铃风闻
百里我愿瞻仰者应起大乘解悟此见闻性充满於十方我愿供养者应发菩提心觉此烦恼
焰本是清凉源我愿扫除者应生精进力反此尘劳身径度禅定业我愿旋遶者应作三昧观
转此颠倒想顿入清凉慧寂念以为地般若以为基正受为花鬘解脱为宝篋藏此无价珍非
空亦非色远谢修证垢并祛照觉?水澄滓乃去火尽灰亦飞法缚既解除神通自游戏若於权
实际犹有一微尘欲求见如来尚隔须弥聚佛祖秘密印华梵微妙言语默及思维不越於此
义後之登塔者应知建塔因盖表调御德起发净信心掩日不为多聚沙不为少但能复本觉
即成无上道朝家光四叶尊重於宝乘真祖创妙缘鸿禧昌厥後吾皇授曩记成此殊胜果寿
考亿万年永庇大千界

祝文

明庆殿谢雨祝文

皇帝祗嗣庆基恫矜庶彙昨以农时在务膏泽未霽仰罄斋明聿伸祠祷骄阳尽弭羽孽爰销
亟成丰稔之祥大洽冲和之气是?良日躬欸殊庭?奏飞香仰酬真?皇帝伏愿璿源益濬寿岳
弥高祉福纷纶更茂隆昌之庆苍黔安泰永臻富庶之期

祈晴祝文

维天圣四年岁次丙寅六月乙卯朔二十日甲午嗣皇帝臣谨遣推忠协谋同德佐理功臣枢
密使武宁军节度管内观察处置等使开府仪同三司守司空检校太师兼侍中充景灵使兼
羣牧制置使行徐州大都督府长史上柱国鲁国公臣曹利用谨上启圣祖上灵高道九天司
命保生天尊大帝伏以方回溽暑肇戒青商大田垂丰茂之期积雨有滯淫之惧比修馨荐?冀
灵休精诚溥伸感应如响

紫微殿祝谢文

皇帝寅威宝命率育怀生昨以膏泽愆时飞螟暴稼精哀既祷果蠹疾之咸消嘉雨频沾遽丰
穰之倍异是用载严法御祗欸清都亲荐馨香恭酬祝施伏愿灵心鉴佑道?延鸿拂石为期遐
增於睿算梦鱼献兆常遂於有年

文庄集卷二十七

卷二十八

<集部,别集类,北宋建隆至靖康,文庄集>

钦定四库全书

文庄集卷二十八 宋 夏竦 撰祭文

中书祭故太尉尚书令王文贞公文

炎正宣精昂灵储粹载降英贤允怀明懿心有常照材无定器沉寂内融矜严外贲润色謏训藻丽词丰周旋枢近识茂言忠爰裨袞职克亮天功畴咨熙载若时登庸虑善兴谋协中布画靡恤人言务均王泽内靖九流外清四貉画像云台镂勲丹册萝图锡祉懿御延禧梁阴让德雕壤奉只朝元景毫荐号真祠交闕秘藏首赞鸿仪懿彼嘉猷邁兹亨会旷古难偕前良罕对异宠云游隆恩泽霈礼絕地尊功高贵倍封踰万室位冠三阶忧民瘁志体国劳怀辞荣中铉进秩东台叩阊斯切出綍终回洊陟上公靖颺司馆霜露增忧龙蛇起叹玉尘停挥瑶琴罢玩疹积膏肓身悲梦幻青霞难挹琼蘂无徵太医连袂中使盈庭载纆诏蹕深恻皇情拖绅犹对逝水俄倾痛极殲良哀深抚几制服推恩易名进美宅兆将安涂舄既备衢巷辍春都城罢市某等早陪伊鼎获奉萧规情条共惨嵩恒方隳徘徊素馆顾慕容衣恭陈宿奠永隔清徽

行状

故金紫光禄大夫行尚书工部侍郎致仕上柱国彭城郡开国侯食邑一千三百户食实封四百户赠刑部侍郎朱公行状

曾祖起皇唐大理司直

祖泌皇唐夏州安抚判官检校比部员外郎父葆光皇唐江陵府当阳县尉累赠户部郎中

潭州衡山县紫盖乡云峯朱昂字举之年八十三

公世京兆涇陂人唐天复末烈考避地穰中梁太祖革命与唐旧臣顏充李涛等数十家南趋衡岳下每冬至岁旦必序立于南岳司天祠前北望号恸日月昏暝天地凄惨殆二十年沦丧垂尽唯李涛一族北归公以家世儒业与进士熊若谷邓洵美力学有朱遵度好读书人谓之大万卷谓公为小万卷时中国多故四方幅裂躬侍老母急於禄养尝与友婿张恽间行路出庐陵遇道士谓之曰非久中原当有真主混一天下公仕至四品安用南为遂北游江淮遇周世宗南征招讨使韩公令坤至扬州公杖策军门告以治乱方略韩公器之使知永真县事兵革之际逋逃过半公便宜绥辑归者七千余家韩公表授永真令秩满南归太祖皇帝即位故相国李公昉以给事中出使湖外物色异人公与东平吕夔入谒传舍李公延见甚喜尤加赏

识譔南征錄云朱吕二君甚可语道泊李公就知衡州奏公为錄事参军秩满调授襄州宜城令寻除太子洗马知蓬州又就知广安军时渠州妖贼李仙聚衆踰万劫掠军界公设策擒之果台渝涪四州之民连结为妖者一切不问賓人遂安时宰相薛公居正谓公有断而识体迁殿中丞知泗州太宗嗣位江表初平李氏銜璧吴越献地使駟系道舟车蠶午共亿饷馈仓卒毕给聚淮滨流屍三千为冢瘞之有戍卒谋乱公止诛首恶悉贷枝党人感其惠淮南岁漕米三百万石公督其程运左右漕事朝议美之就迁监察御史充江南转运副使职满知鄂州未几加殿中侍御史充峡路转运副使就迁库部员外郎充转运使受代归阙太宗问以夔峡边事敷奏称旨命直秘阁面赐金紫时年六十有五在职二年以衰老求郡出知复州宰相李公昉洎文馆近职皆以诗送行到郡朞岁上表乞致仕不允次年郊祀改元至道迁水部郎中复乞致仕太宗谓宰臣朕知此人可召赴阙既至再命直秘阁又二年兼越王府记室公雅正好礼王甚憚之真宗即大位越王封雍王公亦改雍府记室明年迁司封郎中知制誥兼判史馆时上以馆阁旧书编简散坠命公同内臣皇城使胜州刺史刘承珪与判昭文馆集贤院完缉残缺区分部类事毕上其目加吏部郎中职如故明年以本官充翰林学士周岁公年七十七矣叹曰少值乱离老遇清世被知獎顾邈畴列草枯木朽其将奈何遂抗表请老便殿召对敦諭再三志不可夺乃授工部侍郎致仕翌日命合门祗候内殿崇班张士宗就第赐器币旧制致仕官授讫放朝谢今刑部尚书薛公映时知制誥上特命映就公第召对从容献纳漏下数刻将退复曰卿闲居多暇无忘公家或有章疏可附递以闻又问以归老之地公奏以尝从事江陵有敝庐可以自蔽翌日命赐全俸公恳让数四方允其请勅荆南官吏曰朕以朱昂素有儒学方居内庭拜章退身其志不夺授貳卿之秩表尚齿之恩斯为贤臣实可嘉獎仰本府候朱昂到日常切存问有表章附递以闻仍诏公候秋凉戒路发日命两制丞郎三馆臣寮祖道於南薰门中使赐宴於玉津园冠盖盈路供帐甚隆荣动中外光震都国明年开封府秋试进士遂以玉津园宴送朱翰林归渚宫为诗题为时所贵尚如此旧相张公齐贤泊渚近臣有诗五十三章礼部尚书知开封府温公仲舒有长韵诗一章和者一十三人朝野荣之公始至家病疴复有诏抚问之曰卿阁笔螯禁挂车渚宫言归当隆暑之时行迈有长途之役谅因劳止暂染微疴况卿自乐高年素知善摄宜加颐养以就痊平眷顾之怀寢兴无已疾愈但闭户静居不交尘杂专以读书养素为乐深達释老之旨自称退叟所居东偏有官隙地数亩诏以赐公遂建二亭一曰知止一曰幽栖有仲弟协时为主客郎中佩服金紫以书招之协亦请老来归时人荣之比汉二疏数年着资理论三卷凡六篇上之论时政赏罚得失及言天下至广尤须贤才以为治具若限以常牒则英隽之士沈於下位上嘉之降诏獎諭曰卿文学俱优践历斯久竭节已彰於躬行退身自保於安宁犹勤爱戴之心以备讨论之典颇资理道深体纯诚勉顺休和宜知颐养其书仍付史馆同州观察使李公士衡为荆湖北路转运使以公所得卿相餞行诗刻石於承天院今龙图给事中陈尧咨守荆南日视揭榜以公所居里为东西致仕坊景德四年公豫撰墓志月而不日以季夏二十三日捐馆朝廷哀悼赙帛百匹钱十万米酒麪有差赐孙适同学究出身非常典也门人私謚靖裕先生礼也先有廖图者与弟凝侄融居南岳皆工诗有名于代世有家法公娶图女封姑臧郡君至次子正辞之升朝也赠太原郡太君公赠刑部侍郎公善诲子弟博贯儒术男五人长正彝进士及第仕至光祿寺丞次正基今为殿中丞同判彭州次正纪今为潭州湘乡令次正用今为左侍禁知钦州次正辞年十九进士及第今为太常博士江南西路提点刑狱劝农使赐绯鱼袋侄頔进士及第今为司封员外郎知随州正旬进士及第终江陵府监利县主簿正臣进士及第仕至太常博士三司户部判

官诸孙用荫见任殿中丞县令主簿者五人女二人长适故左正言直史馆兼直秘阁夏侯嘉正次适今尚书右丞集贤院学士冯公亮其积德至盛有如此者公操履方重志节清白历官四纪家无余财淡於荣进深耻流竞为太子洗马十有五年未尝屑意在禁林非公事不至两府所得之物取三之一散购奇书躬自补缀是正文字及其退居有书万卷太宗皇帝之在位也制九弦琴七弦阮多士献颂第公首下诏褒美真宗皇帝初授徽册公奉制譔文辞体深厚尤为大笔其余述作甚多常锤爱今太博以为绍我家事者此子公没後太博历官皆有能声孜孜为学编次公平生所着为三十卷今相国司空太原公序引冠篇见镂版行於世夫绂冕在躬饰表所以招累公历事三朝讫无玷毁其清慎者也血气既衰入朝所以忘返公恳辞近职甘於退伏其高尚者也死生之变智者忧焉公豫决大期顺物之化其达生者也家庭之训昔人难之公躬导诸子厥後甚大其善教者也举是四节足为名臣恭叙遗芳敢告太史谨状

贈太师中书令冀国王公行状

公之先周王子晋之後世家太原唐末高祖讳遐随曾祖冀公倅江西廉幕始占籍新喻祖郑公生而警悟三岁冀公教诵书日数百言七岁遂熟五经伪吴顺义初赐童子及第弱冠伪唐调伪授本县尉屡宰剧邑阴布德惠专以寬刑利物为意诸郡累表为戎佐仕至常州都团练判官检校水部郎中通判军州事归朝终于濠州团练判官父晋公幼有志节刻诵坟典江南明经登科选限未选复举五经与故龙图阁学士刑部侍郎杜公镐同榜擢第特授本县尉治有风迹秩满而终初晋公侍郑公任鄂州通判日秦国夫人有娠就蓐之旦江水暴溢将坏廨舍亟迁于黄鹤楼既夕生公或言汉阳居人遥望楼际若有气象公幼而秀异资性机敏六岁丁秦国夫人之丧十二鍾晋公之戚哀瘠以礼有如成人初秦国夫人疾啓郑公曰此儿生时颇有异将大王氏门户愿爱之郑公视如子保育于鲁国夫人教于家庭不就外傳涉猎书传词笔早成郑公之在冀幕也公甫十八太宗皇帝吊伐大鹵譔平晋赋论献于行在而还郑公益奇之待以宾礼郑公移濠梁公应进士举将拔覃怀解郑公三止之曰吾年七十有三恐不逮汝之返也公既行踰时郑公忽一夕沐浴易衣会家人置酒夜分疏记後事且曰吾历官五十余载慎刑罚活人多矣後有兴者其在吾孙乎遽舍笔就枕而薨府中闻乐声冷然公淳化三年第十一人擢第释褐试秘书省校书郎亳州防御推官励精吏职属朝廷遣著作佐郎直史馆曾会中使李知信察近郡风俗吏民状公政迹会等上之有诏褒谕就迁防御判官加文散十阶尚书屯田员外郎舒公荐公艺文可称温裕有素特改秘书郎司市征于淝上真宗即位就迁太常丞时大统初集急于用人诏近臣举转运使副三司判官给事中乔公维岳首以公应诏召赴阙主判三司凭由理欠司赐五品服公抗疏请尽蠲宿逋用广寬惠辞甚详切上嘉纳之未几命宰府召试孝为德本颂授右正言知制诰历判大理寺审刑院赐服金紫三年权知贡举召入翰林为学士时蜀寇始翦反仄未安朝廷切于绥集以公充西川安抚使寬宥枝党蠲去逋租驿奏便宜大愜上旨趣遣使召还授左谏议大夫参知政事明年郊祀加给事中景德中契丹寇北鄙驾将幸澶渊特加工部侍郎判天雄军兼兵马都总管并参豫如故敌骑引退王师凯旋公以台席不协恳退时柄迁刑部侍郎上特置资政殿学士员以处之有司定义班在翰林学士之下?充南郊鹵簿使礼讫撰鹵簿记上之改兵部侍郎充资政殿大学士位在翰林承旨之上寻知承进银台司兼门下封駁三年迁尚书左丞知枢密院事修国史明年瑞命集於东阙改元大中祥符泰山父老请纪云岱公首建大议将明上志遂以公充封禅

制置礼仪使兼判兖州礼毕加礼部尚书受诏撰社首坛颂加户部尚书从祀睢丘加吏部尚书并掌机密明年加检校太傅充枢密使同中书门下平章事有诏仍带天官之秩九皇降格加检校太尉七年罢枢要以吏部尚书奉朝请再典银台之务未几复拜枢密使如故九年典校道书毕加检校太师兼羣牧制置使明年改元天禧上玉皇宝册礼毕加右仆射寻兼判礼仪院充会灵观使亟迁左仆射兼中书侍郎平章事监修国史明年充景灵宫使都总管判祥源观事三年授太子太保判杭州岁余召还复为资政殿大学士加司空制授山南道节度使检校太师中书门下平章事判河南府舆疾还第除司农卿分司南都今上即位改秘书监分司如故旋起授太常卿知濠州迁刑部尚书知江宁府天圣元年九月诏还制授司空门下侍郎平章事充玉清昭应宫使昭文馆大学士监修国史真宗实录毕加司徒二年郊祀封冀国公三年冬十月兼译经使赴上于传法院归第感疾请告踰月诏使国医相望于道十一月丙午圣驾临问赐白金五千两戊申薨于东京永定坊第之正寝遗命归葬濠梁从祖茔也翌日皇太后车驾临哭出涕制赠太师中书令辍朝三日遣起居郎直史馆修起居注李仲容摄鸿臚卿护丧内侍省都知雅州防御使韩守英副之官给经费十二月乙卯上内殿成服哀荣之礼近世无比公五子并先公而亡次子从益仕至赞善大夫第三子庆之终于卫尉寺丞追赐进士及第女二人长早亡次适大理评事张瓌故参知政事洎之嫡孙也孙女一人适太子中舍陈执礼故尚书左丞恕之子也外孙女一人男一人并幼遗奏之上嗣男将作监丞寅亮诏授大理寺丞诸父比部员外郎判尚书刑部司农寺仲微素负吏干累更事任特授司勳员外郎余戚属授官者九亲信録用者十五人夫人李氏世本名宗允怀淑德累封崇国夫人公尝言往岁曾行圃田宿村舍夜起视天中有赤文成紫微二大字光耀夺目使蜀还褒城路中遇异人视刺字乃唐相裴度晋公告公以默定之语而隐公之贵也遂留心羽化之事凝神云汉之表多用道家科仪建坛场以礼神朱篆紫微二字陈于醺所以余俸修晋公祠于圃田自撰文书石以纪其事永定在御真荫方隆谒欸神灵对越天地尊尚道德布宣符瑞创图访对多自于公注意沃心无与为比若乃颂祇睢壤奠璧瀨乡扞恭谢之坛增耀魄之号公皆为礼仪使法驾之展盛容也奉宝文以先道公继为天书礼仪副使同天书仪卫使路寝之尊景命也披帝籙以肇宣公为读天书礼仪使良金之范真仪也公为迎奉圣像礼仪使温玉之勒乾文也公为天书同刻玉使前後所赐手诏玺书无虑二百函奉和御制及御和赐所进歌诗仅三百余首初罢参庶务备问内殿特赐宸章辞极褒贲西镇洛师南抚瀡水皆有睿作宠行荣冠一时事超千古逢辰之盛理絶名言尤善笔劖势甚峭劲自成一家老而益壮好奕碁以自娱尝奉诏撰集翊圣保德真君传三卷先天纪三十卷五岳广闻一百卷与诸贤同撰集册府元龟一千卷彤管懿范二百卷又奉诏撰僖祖太祖太宗謚册今上徽号册文汾阴朝覲坛颂西京应天禅院大原资圣禅院碑铭天书祥符赞彤管仪范序广孝泉崇真桥记冉耕封东平公赞皆为大笔或藏秘馆或行於世公出入两府时将二纪敏于见事详于敷奏智术过人慎勤无及朝廷大议帷幄潜虑或造膝以言或密封先达诡词焚藁世莫得闻其茂功懿绩藏在盟府景行嘉猷播诸物听谨次官阁敢告良史谨状

墓志铭

故金紫光禄大夫检校礼部尚书右神武卫大将军致仕使持节康州诸军事康州刺史充本州团练使上柱国开国伯食邑七百户赠镇南军节度使太原王公墓志铭

夫天人之际畴德以交神明之後因圣斯启故在汉则太一下降着画法於寿宫在唐则气祖有言告鸿绪於仙李帝祚炎宋真荫在天挺生异人潜达灵命清徽既往故可得而纪焉公讳中正字平叔本名捷汀州长汀县人也其先缙岭疏源将兵者三代太原辨族世禄者四方累紫重金实繁於京洛分枝辨叶或播於瓯闽礼让传家乡闻观法至公曾祖安卷道怀宝洒落尘迹与物无累越世自高乃後李氏据有江表急於聚兵王父靖以州里之豪屈致戎校伪置百里指挥使烈考成以事继烈军始终於伪置宣猛指挥使累赠左屯卫将军然皆命不逢辰职非所好绰有繁祉茂启後昆公资气淑均秉性淳质幼失怙恃旁无周亲逮於成人勉率贾用杂良以苦既不忍为欲赢恶器终非其乐以咸平初祀憩星子故墟偶会羽人实姓赵氏一见如旧叵测於灵契信宿後别徵有於绪言迨及其冬再遇茅岭长房奉酒虽未入於壶中君贤负笈遂同游於江介继市铅汞对成白金乃访奇草於沂阳辨灵液於庐岫五图金纪授以采掇之名九井玉横传以合和之要仍别付灵方环劔絨滕之书戒曰非遇人君慎勿轻述宝海方毕烟驾俄隐公乃累诣京室求见无阶还过上饶佯狂自异坐抵常禁谪戍岭南艰危之中颠沛之际保护所授不敢少懈未几灵游荐至慰其忧虞复取神劔絨书且云当候异日时供奉官合门祗候谢德权适总巡兵颇闻异述及公私还轂下置对有司德权时方在朝奏请免释乃礼之私第链成药银上献帝宸遂解军籍德权乐公之道欸待累年制伏之珍尽畀而无吝秘授之事万计而不言一夕潜归追及於路灵颺幽启睿听有闻始命景福使新州观察勾当皇城司刘承珪案问之【缺】甚隐惟坚请於面陈物色可知固潜与於心会承珪因为改名中正俾诣登闻始得召见於龙图阁下云井之瑞备对於绮窗栢寝之言悉验於金刻乃授许州散掾留止京师多与道人偶语於市承珪诘之乃曰即授法圣师也王君既来遂容於请见金母将至亦有於传言遂以景德四年降皇城司廨舍纱厨中戴冠佩劔服皆青色玉文云?虽亚虚皇之尊紫羽华衣迥异上卿之贵时承珪新堂方构灵御频格金童列侍咸佩於印章天官时来若校於名籍承珪窃聆旅语始知乃司命真君焉国家每欲究皇仪展帝容受乾文袭黄瑞公皆密致真海有开必先所以荐玉钦柴祥兆咸报超图溢牒见象日昭泊夫登岱勒封昭姓纪氏刻日千里之外时无纖尘陟降万仞之上安若平地非元真幽赞百神奉涂则孰预於此粤以大中祥符三年加上圣号曰九天司命天尊擢授公银青光禄大夫神武军将军致仕乃给全奉环列为重方比於钩陈奉身甚高弥富於天爵四年春薨性腴上荐礼后皇金辉发於大河伟兆腾於冀壤舄奕嘉应觉悟蒸黎乃授公本卫大将军领高州刺史赐勳上柱国加金紫光禄大夫阶五年冬宫龠既严夜漏将半彤霞采雾上属庆霄芝盖云装下临秘殿縣縣圣胄长发其祥翼翼帝心聿怀多福乃奉上号圣祖上灵高道九天司命保生天尊大帝赐公爵平晋县开国男食邑四百户七年春仁里肇禋嘉坛大报徽册登陞而密雪罢零法驾在郊而烈风遽息肸鬻之际昭报甚明乃进公爵开国伯增邑三百户俄以本官检校礼部尚书领本州刺史兼御史大夫会稽未还尝承衣绣之问辽东远别甚慰华表之思八年以分刺之权兼荣有日诸武之卫久次当迁遂改左武卫大将军康州团练使皆使任如故若乃国家举增高之典以扬鸿徽展颂只之仪以答颺施荐混元之号以尊妙本侔曲密之规以事上帝法太微之制以昭祖德肇五门之宇以崇岳镇新六寝之位以壮宸居在展案之初庆成之始咸有灵命以药金银为公贡献者累巨万数辉彩絶异不类世宝灵喻於方丈价倍於朱提岂止丹砂可成方为食器太山所出遂铸?蹄然自高真之降格也崇奉之际唯承珪预卒後玉清昭应宫资善堂都监崇仪使入内内侍省押班周怀政以慎重齐明嗣掌其事皇城司新堂遂改为元符观及承珪私第曰东宅公之通济坊私第曰南宅皆碧輦停飀之地太霞顿轡之

所琮干素羽藻卫常严玉籟云钧遗响相继唯公得奉见给使恭侍左右焉九年秋霜露纏忧龙蛇起叹王人临视太医承诏使者半道帝梦於来言玉馆在庭公知其独召有加之际真海复宣曰慎密类汝者少塑形於景灵宫为吾辅勿忧初公居甘泉坊第徙居南宅疾亟遂还甘泉坊以十月乙亥启手足享年五十五上嗟悼久之命怀政监护葬事赠镇南军节度使仍塑像於景灵宫天兴殿之左达巷之香显十旬之异特吊之客有双鹤之奇以十二月甲申窆於开封县之汴阳乡槲罔村娶渤海施氏累封吴兴郡君以公昭增加等特进封本郡夫人夫人生於景胄夙茂於闺风同穴之言尝盟於皦日偕老之痛盖极於帷堂子四人曰世宁世长世昌世融并任右班殿直学礼而立象贤以成既冠胜衣已闻於警悟作室肯构伫见於蕃昌女四人姆训甚严淑德皆备奉宾庆旅未闻鸣凤之祥率礼公宫将奉采蘋之祭而皆靡瞻頽泣何怙衿哀孺慕无时柴毁过礼有後之美岂曰诬哉公通简有常慎默无比自肃祇真睠传致灵心非覲至尊未尝轻泄至於黄冶所就靡敢忘施贡献之余则周济贫乏崇奉僊释时论善之哀哉隙驷难留藏舟易失青乌卜宅虽示於归全太阴练形未知其化去佳城既啓远日有期虑宰木之将折惧芳猷之或坠仰承中诏俾勒坚珉铭曰

灵王之穆世烈滋芳誓淮猷吉解佩归祥奕叶弥繁异人挺出性易言简体放心逸仰缘灵契夙契元真潜通密命昭启昌辰庆发祥流礼交乐举三境开光百神合序朱房七映密侍睟容丹经九籀潜侔化工官重训齐任隆环卫忽痛兰摧尽疑蟬蛻将坛追宠仙馆留形重原既卜幽隧爰局草茫茫兮风烈烈素骖断兮哀笳絕岸之曲兮水之阳露寒泣兮秋云苍繄夜台兮叵测唯令誉兮弥彰

文庄集卷二十八

卷二十九

钦定四库全书

文庄集卷二十九 宋 夏竦 撰墓志铭

故保平军节度使同中书门下平章事驸马都尉赠中书令魏公墓志铭

方国家东禅之七祀上朝景亳驻蹕睢阳肇为京都纪兴王之壤永怀祖德思逮事之臣以忠武军节度使驸马都尉钜鹿公亲旧兼崇勲贤莫贰内出明制进位中台赴上於鼎司接武於诸相进退体貌无与比焉越明年冬十月上斋居宣室勤恤万区以全魏近藩朔垂右地边圉之势胜京师之屏翰士马雄壮非元功不足以镇重遂以公判天雄军府事政治寛简狱讼衰止吏民守阙请立石而纪颂嘉穀生境方优诏而旌美不幸起龙蛇之叹罹霜露之忧天禧元年正月国家奉有帝之册荐尊祖之名祿鬯庙祧升烟郊兆天子均聿怀之庆举先亲之典制授公保平军节度使相国如故且诏赴阙肩輿就第中使相望虚中日望其有瘳搢绅方咏其多福无何秋气始至疾疹增剧载紆诏蹕慰以圣言俾加勉膳之勤尚期勿药之喜仍赐白金三百斤天不慙遗福善则虚七月甲子以不起闻上抚几震悼临哭出涕书忠甲令弥念於良臣画像云台方追於英烈呜呼哀哉真命世之贤佐生人之间杰也公讳咸信字国宝其先大名献兆屯固流祥西汉肇高平之封东晋启剧阳之土冠冕奕世谱牒联华公之远祖始家汲郡唐失天命祿去王室曾王父楚卷怀琛宝遁世而长往累赠太师兼侍中魏国公曾祖妣郭氏追封燕国太夫人王父韬袭善以处躬含和而味道累赠中书令越国公祖妣李氏追封晋国太夫人烈考仁溥仰承积德生蘊明略往佐周命厥有大勲爰立鼎司兼崇枢府金印双导盖极宠露之威火德应天首宣欣戴之力嘉谋懿范国史详焉公之受脤於藩登庸继业屡奉明祀载洽鸿禧有司累赠烈考尚书令追封秦王諡曰宣懿母李氏封秦国太夫人继母李氏追封韩国太夫人公韵宇沉邃资质丰硕积怀衽之善教聳公侯之奇表话言详雅动止有度初补宣懿随使都校建隆初起家授朝散大夫右春坊太子通事舍人先是太祖启运立极英武睿文神德圣功至明大孝皇帝龙德在潜人望攸属秦国太夫人获奉昭宪太后太后亦降秦国之第公在幼□不乐戏弄瞻视审谛有如成人太后奇之始议姻戚洎乾德五年五月太宗至仁应道神功圣德文武睿烈大明广孝皇帝方尹京邑遣判官刘鼐至第语宣懿以昭宪雅意翌日召公於南宫延见海谕久之八月复召公亲引对於讲武殿太祖谓曰知善弓马命射四十余发太祖嘉之命太宗赐酒食太宗且谕之云既精射御当留意文学公由是刻志坟索耽味图传五经十七代史尤其该总复得三式风角之妙後太祖频召对命射常称其善五年三月复召赴讲武殿令带御器械党进钦等四人同射以较其能薄暮方罢未几太宗再遣左右陈信召公谕以选尚之意四月复召公於内中就食厅引对於万岁殿赐袭衣玉带鬘装鞍勒马七月永庆公主出降特授检校尚书右卫将军兼御史大夫驸马都尉赐安定里大第一区夏屋千余间园馆台榭备焉仍分御沟水以灌池沼六年加检校尚书左仆射吉州刺史太宗即位加检校司空超授本州防御使仍备环列之职太平兴国元年并寇未宾寅库再驾赐公白金三百筋以治装公擐五属之甲从六尺之輿左右不违晨夕匪懈太宗既平大鹵直趋卢龙乘百胜之气逐乘亡之敌将幸山北尽埽区落公与驸马都尉王承衍从容献谏太宗

纳之三年郊祀加检校司徒四年加检校太保六年特诏常奉外月加给钱十万七年授镇州观察使雍熙三年以獯鬻犯边王师薄伐朝廷旰食冀方绎骚太宗分命懿亲藩屏近甸迺以王承衍镇大名驸马都尉石守信守河阳而澶渊要区喉咽之地慎择能臣无易公者遂命公往抚之赐白金五千两是年冬公以河水湍悍旧堤回曲备御告劳科率为患迺径凿新渠二十里以直水势繇是十余年间无衍溢之患端拱元年朝廷扞青坛修黛耜将籍千亩而郡界河水清彻见底味如甘醴迺盛以银缶因公主上之中外称贺礼毕超授彰德军节度使寻诏兼本州马步军都总管淳化元年正月驿召归阙公主改封齐国九月澶州河大决坏城壁断浮梁垫居民阻边奏物价踊贵太宗召公於崇政殿谕以方略令驰传而往面赐白金万两今上时为壽王赐宴於含芳园公下车之日抚疲瘵赈乏絕境内以安先是朝廷命内殿崇班阎承翰修复河桥比公视事久之功犹未集太宗令健行亲事官日賁诏书催督公与谋之而承翰执谊以为方冬聚凌如山水势涌急难为施力遽入奏乞俟来春公既餞承翰回鹄集诸工自乘小舸截巨浪排层冰紼纚造舟是日亟就乃遣健步上状承翰方入对陈难成之势而公奏继至太祖大悦顾谓入内侍省都知李神福曰朕选魏某果能集事翌日公主入贺太宗复嘉叹有晋武孟津之赏密赐珠玉金宝时都大提点河堤崇仪使刘永恭大庀役徒修筑堤塞盛寒鞞稼人皆苦之公列上其事乞至春初太宗遣健步賁诏自京一日而至亟命罢役五年春将修长堤当役夫二万公自保程其工省去大半太宗令高班内品李信宣旨命公图上减工在所寻降诏依之时境内田隰水退皆填淤加肥而民漂?之余耕无首种相聚愁叹坐待流亡公奏贷麦数万斛是夏大稔民乐输还官繇属不絕由是人皆处业贫者更富又以州狱久系逋欠官物又保任之民资产已竭追偿无出公将上言并诏蠲免今上即位加定国军节度使公主封许国长公主咸平二年八月讲武於东郊诏充在京新旧城内都巡检十月郊禋充旧城内巡检十一月以控弦入寇边城晏开革轂将行羽书狎至命公充贝冀路行营都总管初无辨严时方镇各控重兵以自卫公至天雄军始得步骑二千以随劲敌之垒烟火相望公左实右伪虚振军声倍道兼行直抵边郡敌亦惮公威名辟易而退寻命公男昭亮传诏召赴行在景德元年上亲握武节北守澶渊公扈从星陈以及凯入二年郊祀加武成军节度复以西兗奥区旧俗豪悍乃命公知曹州先是广济渠两岸积水居田千顷民用匱乏莫输其租公乃度其地宜置水门导之入河人获其利州下先多为盗逆旅之舍皆日暮扃户赁宿者巾屨难保至公之治也民不敢欺无夜吠之警上朝陵巩洛诏从车輿四年曹南耆壽列奏借留朝议方以三城右地股肱剧郡经读所控屯兵甚多遂辍公镇河阳民吏望风畏惮刑罚罕用大中祥符元年密命开先珍图游降上让德云岱归功祖祢公屡陪近辅夙侍严祠礼毕加检校太尉二年敌使至阙宴豆屡颁上知公善弧矢命公伴射赐予加等所以旌絕艺而威远人也三年禋祭睢壤合答后祗西巡之路颇遥北门之寄尤重乃命公知澶州兼驻泊马步军都总管提举澶濮齐郛等州德清军寇盜公事赐银挝大剑各十上幸瑞圣园射弓命内侍宣旨卿每苦臂痛今日之宴不可辞也公奔驰赴召射中银缶上亲解之赐鬃装鞍勒马非常典也四年礼毕就加忠武军节度复召归阙尔後真輿昭格鉅典交修宠命便蕃礼数尊异以至开公府正台极岁给公用緡钱加至七百万任兼文武宠冠勲戚窳固之久居大位每被访於边事杜预之既立战功唯耽思於文籍泊出临魏郡也豪右屏迹囹圄屡空雅歌投壶有儒者之乐轻裘缓带得名将之体泊染疾归第恩礼勤渥殚太医之妙伎极内府之良药命也不淑奄归窆窆享年六十九诏废朝三日贈中书令命内侍省部知蚩州刺史窆神宝营葬事太常博士秘阁校理李垂摄大鸿臚监护太常考行定諡发引之日有司具一品鹵簿鼓吹太常博士

秘阁校理慎镛遣奠於顺天门以十一月丁酉葬于河南府洛阳县贤相乡勲德里从先茔礼也公一历东朝一践环卫八临藩服五换旌旄累阶至开府仪同三司策勲上柱国进爵为公食邑至一万三千九百户真食四千七百余户加凌烟之号为推忠保节同德守正翊戴功臣禄位宠荣并极人爵若乃自刺史陟防秋由廉车正节钺皆靡限官序度越等夷斯又国家急贤之恩於是乎在也恭惟许国长公主太祖皇帝之第三女也淑质纯茂柔仪肃祗处约惟勤在贵能降唐襄城之礼度为诸亲之楷则汉平阳之慈爱享累世之崇重先公十九年而薨尝献瑞牡丹一丛花皆千叶色润殊絕太祖命以一枝着金壶中盛以玉盘令待诏黄居案图之以赐公主至今存焉男三人长昭易任内园使顷持使节远聘穹庐中涂感疾先公而没次昭亮今任东上阁门使恩州团练使器宇不羣识度殊远太宗以其与王承衍男世隆皆嫡外孙特爱之幼岁召入并赐坐以昭亮好学命吟赏花诗立成特赐緡钱御酒命共游於後苑初未名太宗一日御笔书二名赐之曰从训昭亮令择名焉起家授如京使自是每令昭亮押赐公加恩纶告两聚贵族继赐白金万两以充六礼之用泊公正位国相出临魏郡昭亮往赐生辰礼物贺席方半而驿置俄至特降纶綬授昭亮恩州团练使仍兼上阁之职闻者荣之然而昭亮生於贵戚雅好儒术妙達时务详练旧章受诏同定闔门仪制广溢甚多箕裘之业蕃昌庆大人皆望之次昭侃今任内殿承制风度清粹操履温重夙稟谊方蔚为德器女二人长壽县主率礼公宫式瞻贵里副笄之日太宗赐白金饰肩輿重七百两亦以嫡孙特恩非常例也适内殿崇班阁门祗候张士宗早亡次女蕙问夙闻薤华易落适右班殿直闔门祗候王从益而逝孙一人东头供奉官余庆学稟诗书德茂兰玉孙女二人长适故左领军卫将军致仕赵保勲男宗奭次在室皆从训保阿照言图史盖宣懿之积德累仁公之常善齐物厥後繁衍奕叶隆昌者焉及公之薨也朝廷追録大勲诞推延赏授昭亮四方馆使团练如故昭侃迁礼宾副使侄殿中丞昭庆迁国子博士左侍禁昭用迁西头供奉官赞善大夫昭文迁殿中丞左侍禁昭素及孙余庆并授合门祗候初遗奏之上也昭亮以事非礼制独不列名又虑国恩均被遂上封预辞乞居丧制恩旨允之斯又忠孝之训有後之美也如是公资性方严秉心纯一至诚待物正色在公其出奉民政也决事明敏嫉恶如讎强暴讐服冤滞毕達所至之地人皆爱之是以历事三朝宠眷日隆太祖日於巩洛道中命御龙官以金盘盛含桃赐於马上太宗尝因寒食日遣内侍岑保正赐御笔令召王承衍等习射於家园并赐银缶腥飢等後公镇澶渊太宗射於後苑翌日以御射中银缶命公主赐公令书於家信曰朕昨日赏花射弓甚思卿故有是赐其恩宠尤异也如此然公虽幼享崇贵深承顾待而每鉴前代之戒小心兢慎过自修抑故出入五十余载终始无玷加以忠厚之节发於天性一物之异不敢家藏太祖幸洛公以园第宏敞奉表献之又世有芙蓉丹砂一枚重将一鎰以承隙日则室中皆明後令壽光县主以服饵法献於太宗旋降御笔褒之赐黄金器五百两近岁国家新宫阙之制令昭亮恳奏愿纳奉入以助经费上优诏不允论者美之又仲兄太仆少卿某之疾也自澶渊乞赴阙侍疾及其有加也上章乞授少卿长子昭度一官寻授太常寺太祝其弟悌皆此类也每好夜坐召儿侄辈諭以君子立身之道雅合经典之意自感疾至薨气貌不衰精识自若人皆以为修德之报焉佳城既卜远日有期诸子以某备列西台久尘吏职稔闻世德尝奉绪言见索斐辞以识徽烈让不获已谨为之铭铭曰

炎正启运帝赉忠贤九功并建百度勤宣下宁海域仰清垂象教化之重倚之国相内抚方岳外清边尘军旅之要付之将臣允显魏公位兼文武槐鼎登庸节旄分土左右王室事上以忠

股肱右地待下以公叡圣之心念功惟旧白水攀龙湛恩克懋惇叙之典立爱惟亲秦台降凤
宠睠斯勤佐国承家谓之世德閎闕之勲載於金石安人去患谓之民政藩屏之治播於謡咏
密谋潜虑莫际其涯献赞帷幄惟圣用嘉高风远度莫闕其奥仪表绅冕惟贤是倣哀哉良相
百福宜全呜呼彼苍何夺之年桃茆临丧密章加秩帝极哀悼礼赠优恤寒风慄兮愁云暮鹵
簿陈兮班劒布卷组帟弓空烟俨灵輶兮戒路哀笳咽兮楚挽悲邛之麓兮洛之湄从先王兮
魂不昧掩幽窆兮夜何其有旗常兮令名不朽有琬琰兮英威可久繫似续之良贤兮永蕃昌
於厥後

故守司徒兼门下侍郎同中书门下平章事充玉清昭应宫使昭文馆大学士监修国史冀国
公赠太师中书令谥文穆王公墓志铭【并序奉敕撰】

天圣三祀岁次星纪黄鍾布序丙午建辰皇帝御珰輿诏金蹕出景龙门幸永定坊北第视大
丞相冀公之疾赐白金五千两戊申丞相薨于位享年六十有四两宫震悼皇太后车驾临哭
尽哀天子素服三日不视朝以太子中书令告第大小歛遣尚宫吊祠法贐加等有司谥曰文
穆命左史摄鸿臚卿副内侍太监送丧官给经费具本品鹵簿以明年仲春之壬申归全於濠
州鍾离县广德乡西原之祖塋有诏侍臣书其徽烈公讳钦若字定国其先缙山远系颍阳茂
绪武冈睢陵之材启国於晋永寧清源之德胙土於唐本居太原世为鼎族高祖讳遂以巢寇
之乱避地江楚喜玉筍之岑寂惟厥田之沃衍始家宜春之新喻遂生遐仕至江南西道盐铁
巡官遐生郁幼而警悟不乐嬉戏徧诵五经伪吴童子擢第释褐本县尉诸郡累表为戎佐视
秩台郎关决郡务归朝为怀冀濠三州判官郁生仲华夙有志尚刻诵坟索为唐明经中选又
以五经登科复尉本县时议荣之公即濠州府君之孙新喻府君之子及公之贵三代皆赠太
师尚书令兼中书令曾门封冀祖庙封郑祢室封晋皆为国公恭惟郑公当五代纷竞仕伪唐
之僭据转侧江介间关世路而能治尚清约志在平反爱愍孙以字升卿高门间以容驷马克
祚厥後何其盛欤公聪识早成性资强敏六岁丧母十二而孤郑公爱之保育於祖妣鲁国太
夫人教于家庭不就外傳道艺兼该辞笔赡逸弱冠初拔进士解淳化中策高第试吏芸局从
事譙幕加倅职再毗戎务被举迁秘书郎典关市于澠上升朝为太常丞理通欠於计司以右
正言历掌内外书命授左谏议大夫再迁工部侍郎并参大政以刑部侍郎充资政殿学士改
兵部充大学士繇尚书左丞三转至吏部尚书皆知枢密院自检校太傅再加至检校太师行
尚书右仆射并使东枢实兼宰职俄以左揆兼中书侍郎监修国史对掌魁柄以太子太保判
余杭归朝再为资政大学士寻拜司空未几视秩维师兼荣鉉府节制襄岷居守伊洛輿疾还
第左迁司农卿改秘书监并分务南都起授太常卿典濠州转刑部尚书知江寧府召还复序
正司再升中书兼门下侍郎充昭文馆大学士实首台席遂作司徒乃封冀壤勲阶爵邑名数
咸极初永定在御宪章大备以駟牧之重领于枢臣公尝为羣牧制置使肇玉清昭应宫以事
有帝崇景灵宫以奉真祖营会灵观以礼岳镇并建职局综於两府公继为三宫观使惟公事
三朝相二帝嘉猷亮节深图远筹秘诸信史此不获书若夫建隆以还万国上计辟名既辨断
盗未偿领于司存列之辞案人生有讫吏责无穷公抗疏切陈援赦蠲弛深達国体克称上仁
注意之求实自于此咸平初寇剧缘间摇乱益部偏师致讨剗削厉阶武臣尚威伤斩过当余
孽亡命反仄靡遑公往宣使指悉贯枝党处置机事彼方遂寧召参台衡刻印以待景德始边
城晏开羽檄四驰烽火相照公感愤激节慷慨请行并护将臣克全魏壁泊乎元符候日奉高

望幸三事优游而未决礼官希濶而难讲公首抗大义先置乔岳芝英醴泉之品裔云叶气之祥图素写形使驿言状旁午亭传觉悟黔黎此其昭昭者也若乃尊事神只专精斋祭寅威妙本校正真科交集上仪莫匪嘉虑是以再长枢轴三陟正司中外迭居左右更践体貌无比论议必从宠冠一时年踰二纪至若薶牲膳壤徐銮曲里登魄宝之号熙报况之坛奉贞像於琳宫宣宝文於路寝宫继掌礼仪并持使印又若明禋藏事珍符先道聿严容典奉以金輿公三职仪卫殊庭考阁常籙是藏内出丹书勒於瑶简公同司刻玉并兼置使之重益为希代之荣祥符之间天下大治制有破觚之易法有漏鱼之寛太和陶蒸善气回袞云物绚色羽毛粹质百嘉茂育万瑞毕臻天子好文挺睿辞以昭绍惟公顺美着嘉颂以游扬前後赐御制属和并御和赐歌诗仅三百篇若夫入干庶绩出抚近封铺陈密议条对急政所受诏荅将二百函又奉命纂集翊圣保德真君传三卷撰进先天纪三十卷五岳广闻一百卷鹵簿记三卷与诸儒同集册府元龟一千卷彤管懿范二百卷又封祀既毕归尊宗庙承诏撰僖祖太祖太宗谥册神圣纂服初受鸿名奉制撰今上徽号册文及前後被旨撰社首坛汾陰朝覲坛颂西京应天禅院太原资圣院碑铭天书祥瑞西祀瑞赞彤管懿范序广孝泉崇真桥记冉耕封东平公赞博雅多文尽在兹矣公尝言初晋公侍郑公之任武昌也公母秦国夫人有娠江水坏廨舍徙居黄鹤楼既夕而生公或言汉口居人遥望楼际若有气象然公居景毫行视圃田暮宿村庐夜分偶起见天中有赤文成紫微字使蜀言旋次褒成驿有客为谒具唐相晋国裴公之名告公以默定之期而隐公尝朱篆所见文字及因鄂守增饰黄鹤楼又以俸钱修圃田晋公祠为文书石以纪之常练气於朝霞期脱屣于尘世姚顗承白衣之报子房慕赤松之游参实于斯谅不诬矣雅好奕碁善于笔劄乐醇旨之饮喜清商之乐第有北园叠石为陂甘果美木?庇其下退食休澣於焉游息晚年亲历艰难颇厌富贵延问高释留心真际遂兼译经使二府柄臣送上於传法院梵卿荐香大官具食归第感疾请告累旬侍医盈门诏使系道锡万金之良药殫九折之妙伎天乎不吊命将柰何辍相兴謠见於斯矣夫人李氏山河象德图史时宪哀深惟殡痛极终天送往尽哀庇亲惟睦累封崇许二国夫人有子五人皆先公而亡内次子从益仕至赞善大夫第三子庆之终于卫尉寺丞追赐进士及第女二人长早亡次适故参知政事张公洎之嫡孙秘书省校书郎瓌孙女一人适故尚书左丞陈公恕之子大礼寺丞执礼并懿行美材大宗良配外孙男元壽女壽姐并幼遗奏之上也二宫哀軫録旧念勲并加常制嗣男将作监丞寅亮授大理寺丞瓌迁大理评事充秘阁校理执礼改太子中舍又以公叔父仲微剖竹列成累书吏课握兰建礼实综虞衡兼秋曹之覆刑主大农之平糴特除司勲员外郎充淮南提点刑岳劝农使自余戚属授官亲信叙用者二十有四人呜呼高朗令终宠灵显赫会元公之殯送文恭之丧极人臣之盛公以臣尝豫寮旧屡刊史谍爰有治命请志幽础仰奉宸旨不获固辞谨作铭曰

兵政宥密机轴穹崇惟公再践昭事功兮将钺在庭相印垂组惟公保厘兼文武兮洪鑪造物威柄御人惟公三入秉国均兮龙章在躬庭槐表位惟公经邦极名器兮帝师尊异内枢隆显綈以印章丰赠典兮乘輿缟素笳吹悲鸣送以纁玉尽哀荣兮

故顺容邵氏墓志铭

大中祥符九年春二月甲午顺容邵氏薨于京师太和宫本院之正寝越三月壬子葬于开封

县清远乡繁台村奉先资福禅院之东北原呜呼哀哉顺容讳昭明广陵人也生稟嘉庆赋质柔和泳汉方江动謠於南国规图照史秘景於华宗先圣在潜懿藩初建金房入侍实首於庶姬璿室沉英尝悲于外馆泊攀鳞上汉列职司衣奉裼裘之宜辨采章之品肇封近郡寔启博陵爰以燕寝献功女侍更直佩环异等礼序多仪乃进号於小君实并长於九御被之紫服昭以宠章矧属革轂吊民躬平大鹵宸旒耀武出抚魏都束带从行羽书狎至罄宣懿立以及凯旋繇是赐涂金之裳陞荣于太監辟冀国之壤列位於尚宫肃奉曾闈总司衆职严筦龠於局禁謹琮璽于緘滕法式并修出纳惟允暨夫白云仄代苍震承祧改荈波之邑封奉壽宫之象设西陵极望莫从于神游中禁言旋复司於旧物逮珍符锡瑞之纪号乔岳上封之明年超践宫正之资载疏安陆之国翼宣忠训纠肃羣居闲练典章详明启奏下推耆重之德上嘉该总之能遂开张楚之封特拜司宫之命寔创斯号以旌厥劳然而进退有常终始一志含华凝曜久冠於小星积德累勤继充於彤史上肇崇位置尊獎老成宠以绛袍列於嫔职翟钧九等班亚三妃感泣帝宸赐予加数承顏似幄进见异仪宫掖之荣近代无比旋以忧劳成疹年德寢高深恻上仁迁居别馆勉膳之使承诏之医自冬涉春相望於道呜呼收华丽日丧淑泉局常珍之期不及者二岁向用之福咸备于一时黼帐悼怀椒涂颁賙佳城既卜幽隧将封爰诏左言图徽沉碧铭曰

瑶台降芬甘棠遗庆德茂材淑性资渊令参华六列尽瘁两朝闲练仪范勤劳夙宵徽序方隆余年奄谢结恋昌期衔哀长夜图形藥馆卜宅金园饰终之典永贲重原

皇侄康州团练使夫人吕氏墓志铭

夫人吕氏故丞相赠司徒正惠公之女正惠公之贵也曾祖袞赠中书令祖琦赠太师尚书令其先太岳述职仰悟灵心尚父表海下因旧俗景佑垂世积德在人门生忠贤亦启明淑夫人夙稟家訓幼勤女职动则申礼保阿是咨烝而献功紘緼悉备言念诗史之意步中珩璜之节加以文綉设色必穷其丽哀箏度次尤尽其音国家璿源炽昌仙绪蕃衍选建明德广封连城棣萼相依犬牙错峙上隆惇叙之化下嘉信厚之风扶植基干毕侯支庶崇右戚之惠尽家人之爱至若宗子授室王姬下嫁必选令族以纳多祥楚王亲则帝兄位极人爵宝玉分器芝兰在庭其第四子天水郡公允诚生稟粹和早闻诗礼怀金上序结绶内朝号为宗英特茂宸宠始娶赠邠州观察使潘惟正女不幸早亡宗臣上言礼当继室上乃念正惠之昔佐先帝厥有大劳当綴衣之辰受传圣之命寢丘之封虽远高门之庆未移乃诏申以婚姻宠其閥閱枚卜献吉踰八世之祥大璋纳礼丰六版之数夫人遂以大中祥符五年夏六月乙丑召见汉幄进对尧门象服晖华拜赐于中禁油駟拥从言旋於旧居观者荣之忠臣知劝越明年秋七月辛亥归于郡公六珈盛饰百两亲迎仆御授绥傳姆加景华烛光炤煌煌如昼从者毕袵祁祁若云有司相仪太官供具婚姻之礼特盛於兹泊五月中参三月庙见象揅居手宝翟在衣动止肃雍词气舒婉式瞻贵里为宪宗家若乃荐豆公侯之宫胖载旧姑之室匪鸡之勤儆戒惟丝之求善匹苹藻之意柔洁山河之体容润固已极图传之言岂止率鞶褱之训者哉方将下司封之诏举从夫之典后汤沐之邑增车服之数而薨华易落隙驹难驻德宫永逝虽大化之攸同硕人无子痛芳音之莫继呜呼哀哉以七年秋九月壬寅終於内寝享年十九尚宫赐襚辍朝二日权厝於奉先资福禅院以天禧元年八月己酉葬于河南府永安县南訾乡漫流村潘

夫人墓之西北原从吉卜也诏左骢使澄州刺史入内侍省都知张景宗营葬事以著作郎直集贤院徐奭摄大鸿臚监护歛封有日执紼将行乃命史臣图芳幽础铭曰

降神灵绪赐履遥源间生邦媛选俪宗贤顾史永箴披图问礼德盛年阙华繁实委梁台遣奠
兮组帐烟空文园安宅兮松路尘封哀兰仪之永閼唯玉誉之无穷

文庄集卷二十九

卷三十

钦定四库全书

文庄集卷三十 宋 夏竦 撰古诗

奉和御制看毛诗诗三章二章十二句一章八句

周道洽平声动文成周王弃善俗移风变哀乐异心治乱殊音心发言从影响攸同政行音类
圯箴靡异实教化之所由故能经乎天而纬乎地

生民尊祖时迈告成江汉拨乱鳧鷖持盈四诗之道始于和平五际之变通于晦明宣宥密之
基命?通骏之休声或箴规于阙政或叹咏于芳馨

温柔之教政治之源瞽能诵兮可以谏士不学兮无以言盖盛衰之所系故讽谕之攸存惟圣
心兮垂思永大庇兮元元

奉和御制迎圣像中路获金龙送还茅山

巍巍真像范金成瑞节棠舟远导迎精衷励翼符神贶藻卫威蕤率礼经兰堤晓景涟猗静神
龙报降祥云映双上琼干采质明旁临旌棧灵辉盛台臣祗肃荐华芎承贺凝贞拜露章羲氏
官名高可拟汉家年纪远难方凤盖分陰腾九色蜿蜒共戏云裳侧御天飞跃世空闻瑞德紫
盘今始识騑騑矫首仰中宸丹宸深嘉美应臻紓礼既能畴圣日为霖当使福蒸人华阳翠壑
贞灵地星使送还彰睿志更播云章入管弦昭昭亿载传金匱

奉和御制崇政殿宴从臣

青绮禁门符命锡离珠御府天琛积两仪流庆会休期二圣诒谋归盛德大礼修真猷格懿铄
昭昭兮靡极阜民财形物力圣志乾乾兮夕惕金扉玉宇丽皇居凤藻鸾踪辉乐石龟趺螭首
建灵辰鹄尾龙香奉至神日转翠华临阁道天旋丹仗复鉤陈縉绅茂宠兮踰三接羽卫鸿仪
兮备九宾琼觞传满兮均尧酒栢殿赓扬兮洽汉臣奉若灵心弥翼翼布昭醴化愈淳淳

奉和御制为政歌

黼帟夜分常监寐凤轩端委敷文治肇建元封陟介丘寢寻毖祀临汾水茂烈馨香久际天精
心励翼弥恭已体道推仁洽惠和斲凋归厚蠲华侈怀柔四貉尽来庭边圉无尘似平砥尧德
钦明惇茂族汉条寬大措祥刑永观禹画同文軫更仁虞巡审量衡睿政无为犹日慎布昭谟
训掩汤铭

奉和御制奉先歌

皇家兮仙祖上世兮圣神承云兮分治驾羽兮临民诞昭兮馨烈高陟兮元真载乘土运临三古属象羲农振遐武爰炳明灵陟上苍縣縣圣绪庆悠长既积仁兮累德爰振耀兮流芳罄二仪兮垂佑弥万祀兮开祥巍巍烈祖兮膺宸历御瑶图兮建螯极东征西怨兮振羣黎下舞上歌兮康庶国优游亮直显敦仁锡美休嘉符拓迹四貊名王尺组羈九涯远道安车适圣功耆定实登三方賁骏奔惟旅百赫赫神宗廓帝紘昭广运兮洽和平礼适素青兮沿夏子化归醴粹兮复胥庭宪六学兮昭地纬事七庙兮奉天经震叠威霆兮踰朔幕汪洋惠露兮浹编氓偃节灵台兮黜武漏鱼寬网兮蠲刑三叶缉熙兮隆绍继皇穹右序兮隕繁祉徘徊飈歛兮授元符焜燿樵蒸兮修茂礼思文成颂兮廸先谋多黍申歌兮昭乐岁参侔开阖已无为?巩盈成弥若厉惟寤寐兮符通实天人兮合契降僊馭兮自三清谕灵源兮踰百世遐锡鸿休茂本枝永符盛德昭明类荐徽册致清衷斋明兮显至歟太空告繁禧监观兮斯暨对越兮储精聿怀兮忘寐舄奕千龄播德芬钦崇茂典协经纶神化有开彰密命庆基无际等高旻

奉和御制笔歌

制之精兮汉宫之双管锋之妙兮赵国之修毫自承掌握济羣用觚与槩兮难施劳古今罔不達淑慝将何逃深仰玉蟾均砚滴诘慚金马制书刀颀皇观迹虫篆兴纖端积润八体成写图始告姬公瑞错宝终传路扈名上圣惟聰炳帝文宸章奎画冠生民洒翰翠珉垂睿式珥彤丹地宠儒臣

奉和御制砚歌

南方潜璞出寒溪沉沉紫蔚凝坚姿两仪肖象磨砉异三趾承隅琢饰奇银带参华贡双阙玉蟾分滴润圆池微波澄淡当晴景旌旗半浸龙蛇影轻浮春絮拂犀干微动日华明绮井藁简交辉九禁深玉枝斜照中宵永列璇台兮今得地迹清光兮叶灵契宣丝旨兮扬圣谟赞云章兮熙睿志弥彰盛德冠生民务以文明化兆人

奉和御制墨歌

昔造图书兮纪方志铅黄丹漆兮初为贵後世增华兮迈昔贤松烟布色兮明且妍一枝均赐官仪备九子分形吉礼全写功咏德盈绡帙体物缘情徧绮牋陰山潜璞兮琢金池相须艺圃兮事攸宜湘川青管兮束圆锋并列璇台兮用本同垂大训述微言孔墨之教兮长存腾藻翰赞仪形渊云之妙兮惟精上圣敦仁崇俭约厥篚珍奇诏皆却唯许隃麋岁贡臻式彰文德化生民

奉祀礼毕还京

先天密命启禎期侯日灵文降紫闈恭馆靖冥尊妙化帝居斋祓拥纯禧勒鸿昭姓增梁甫报

本祈年款魏肱真御下临彰日监嘉生诞降示天随丕承宝绪增寅畏惠迪灵猷务肃只国阳
郊报尊天位钦奉后只将合祭仁里爰瞻严父祠徐銓式徇黎萌意攸司经始兮载严象物应
斯兮绍至荧煌先道兮珍符焕衍参涂兮藻卫真場合奏兮笙鏞灵祉钦柴兮圭币三气晬容
兮仰覩八景飞輿兮降格青祺简简兮渊冲瑞命禳禳兮山积合饮譙城洽睿慈仁风溥畅宣
和恠制畿睢水焕先谟惠露汪洋敷润泽纳贾陈诗兮总旧章念功继絶兮昭明德近甸回衡
景念新太宫归格物华春太和充郁层霄外协气周流率土滨穆穆天章腾圣域巍巍道?庇生
民体元化叙彝伦顺则兮穹旻观秘奥守精真谨度兮声身四貉兮来同千龄兮应会甘实兮
积中英蕤兮发外皇哉曼壽保丕基青简遐昭帝者仪道冠周诗心翼翼功踰夏载日孜孜

奉和御制玉清昭应宫甘露歌

祝圣清场初展礼鸿都向晓彰繁祉郁郁纖枝正後凋瀼瀼瑞采俄零委吉云五色比还疎况
是严冬岁律余承以玉杯甘若蜜凝于翠幄皎如珠荐宸居称壽酒宣大庆兮仰归元首香馥
馥旆央央建灵坛兮茂对多祥天心信与人心会诞节将临遽沾霈式昭真?祚君王永锡遐龄
齐覆载

奉和御制宣读天书

赫赫穹符迪庆基巍巍真绪拥繁禧控飈灵御传天意候日珍文告帝期奉诣乔丘彰锡祉胙
壤瀨乡修茂礼宸闈薰祓欵云輿戎候耕耘橐象弭纪号惟新岁历呈三元初吉协休辰徽册
奉天熙事藏丕名尊祖皇仪展太宫荐鬯孝思伸阳位升烟鸿庆远瑞应纷纶百福同寅威宝
命务尊崇布宣精意诚明显申飭攸司宪度隆将披秘蘊昭灵契欲使万方知帝意肆眚端门
诏毕旋灵场预启百枝燃夙陈路寝敷瑶席躬荐真香奏瑞烟三辰淳耀居斋室阶满祥蓂当
望日大裘陟降既登歌羣后延登皆上笏元辅披滕圣训扬枢臣援翰宝文彰有虞出洛龟休
跃唐氏街图凤罢翔辞若洞章皆擿句字如龙篆宛分行森沉虎旆严真卫肃穆珠旒增洁志
敬受丹书岂易侔式旌玉刻诚难继修修羽帐降星辰杳杳飈旂驻圣真庭际烟霞辉晬晬天
中鸾鹤羽旒旒微密妙言爰备举龐鸿盛则已宣臻一一嘉猷保元后淳淳深旨为含生写成
别笈藏密荐献礼周弥袞吉恍恍真心显道枢穰穰景佑归宸历升闻璿宙洽神欢昭纪琅
函为睿式万灵潜卫极寅威九序相趋皆励翼繇?弥隆清浄风虚晨益鑒馨香德岂独飞英冠
百王祗延道?永欢康薰弦濬发南风咏丕显清衷报彼苍

奉和御制幸金明池

朱辂乘时兮出晓烟飞梁承幸兮斗城边幔省?堤兮杨叶闇星旄藻岸兮物华妍珠网金铺兮
豫章馆风樯桂楫兮木兰船象潢仪汉兮澄波远激水寻橦兮妙戏全仁帝晖兮凝制蹕人煥
衍兮欢心逸嘉流景兮延迓臣乐清明兮丽新曲

奉和御制七夕

紫皇宴服出瑶台仗下凉宵水殿开初月上弦光泛灩横河案户势徘徊扇分兰露侵衣滴帘卷天香拂帐来阁道森沉飞绛节龙璈凤吹凌霄发琥车缥缈际烟浔扣砌迢遥望云阙百子池深列宿分九微灯淡纖尘絕云屏轻箠贯双针彩缕萦风势不任露挹琼苏敷碧席明霞照地光无极西汉元封五叶时猗兰云辇会真期何如法坐嘉蕃熟高振薰弦播緝熙

黄鹤楼歌

城上危楼高缥缈城下澄江复相绕有时漾影入中流俯看鱼游仰飞鸟近楼多少未行舟满江落花洒汀洲人同江狎不怕浪登楼对酒弹箜篌大别山头白云起金口渡边雨如洗半鉤新月上孤城还照高楼与江水晴江依旧泻浔阳黄鹤无由归故乡一声玉笛起何处燕扑阑干花影长

文庄集卷三十

卷三十一

<集部,别集类,北宋建隆至靖康,文庄集>

钦定四库全书

文庄集卷三十一 宋 夏竦 撰五言律诗

三月施州进金色小龟

清江涵德泽嘉瑞效灵龟巢叶形偏小如金色最奇玉灵惭异质绎属近幽姿骑置遥承献观图仰帝祺大中祥符七年七月锦州奏天庆观修圣祖殿毕五色云三朶各方丈余见於殿上

仙祠成秘殿远郡在卢阳旭日初流景卿云忽降祥三枝分玉叶五色照琳房元后成真?钦柴报上苍八年正月天庆节上清宫行香锡庆院御筵日扬辉有非烟非雾之云

宝籙标嘉节需云锡惠筵烈晖腾爱景瑞彩拟非烟焜燿璿霄外轮囷绦阙前居歆方屡告伟兆溢祥编

明州进芝草并图

四明开奥壤三秀发灵芝如盖殊形耸无根瑞气滋晨敷台岭异日茂下房奇善气方回复充图献玉墀

奉御制读史记诗【三首并注】

陶唐明历象【尧钦若昊天历象日月星辰】茂气与天通【尧明时正度茂气所生民无夭疫】举正分星度【以四方中星定分至】归余定岁功【以闰月正四时】孟陬名不殄南正道弥隆【颛顼命南正重司天三苗乱德孟陬殄灭尧复重黎之後使典之】自此垂三代循环协大中【三王之正如循环穷则反本】

昭昭齐鲁事千载着良箴【齐鲁报政可为箴规】欲辨为邦体先观布政心【为邦之否臧系政之繁简】变民非远略【伯禽曰变其俗革其礼】从简是徽音【太公曰简其君臣礼从其俗】北面无余意诚因惠物深【周公曰鲁後世其北面事齐矣】

汉武将从禅须如亟释兵【武帝将封禅先北巡释兵于须如】甘泉诚毖祀【武帝至甘泉为且用事太山先类祠太一】乔岳纪尊名【司马相如封禅文云建显号施尊名】加礼崇休祉【武帝上封毕纵诸奇物颇以加礼】修封盖号荣【汉武帝凡五修封封禅文曰盖号以况荣】岂同承帝籙肆覲正权衡【国家奉元符封云岱肆朝覲考律度非汉所及也】

奉和御制读前汉书【三首并注】

酈侯依日月【贊曰蕭何漢興依日月之末光】天漢叙隆昌【沛公初不欲王漢中何曰語云天漢其稱甚美】迈德居三杰【何与張良韓信為三杰】觀時定九章【何攬摭秦法取合于時者作律九章】過因王尉辯【何為民請上林空地地下廷尉王衛尉諫出之】功賴鄂君揚【諸將爭功鄂千秋進曰何功當第一高祖曰何雖有功待鄂君乃得明】終以同心美【贊曰何与曹參二人同心遂安海內】清寧贊後王【曹參相惠帝民歌曰蕭何為法講若畫一曹參代之守而勿失載其清靖民以寧壹】

子房天授漢【沛公常用張良策良曰沛公殆天授】不戰道尤尊【良未嘗有戰鬪功而為王者師】秘法盈編受【父老授良書一編乃太公兵法】危機借箸論【酈生謀撓楚權良借前箸籌之】避封昭止足【良避齊三萬戶】辟谷厭塵喧【辟谷不食谷】莫訝蕭?茂從容有緒言【良勸高祖立蕭何為相從容言天下事甚衆】

高祖寬仁主【漢高寬仁大度】淮陰變詐才【贊曰韓信等皆徼一時之權變以詐力成功】設壇誠有礼【高祖設壇塲拜信為大將】推食本无猜【信曰漢王授我上將軍帥數萬之衆解衣衣我推食食我言听計用】懷惠初顯若【武涉蒯通說信信終不忍背漢】夸功抑殆哉【信對高祖曰陛下不過能將十萬臣多多益善】何如中正者千載仰高裁【贊曰異姓而王者八國終于滅亡惟吳芮之起不失正道庆流支庶着於甲今而稱忠也】

奉和御制读後汉书诗【三首并注】

明帝章朝物【贊曰備章朝物】三雍復旧常【光武建三朝之禮帝始行之】贏金賞西域【永平中復通西域諸國皆遣子入侍西域傳序曰先馴則賞贏金】雅樂奏南陽【十年帝幸南陽祠旧宅作雅樂】拜老鴻徽茂【贊曰臨雍拜老】祈農盛典彰【帝耕籍田以祈農事】珍符昭美應獻壽表隆昌【百官以帝祥物顯應奉觴上壽】

独行懲澆俗【歷代惟後漢書有独行傳序云以事非圓通而風軌有足懷者為傳云】嘉名動遠荒【王烈以德威人居辽東夷人奉之】至誠祈夏雨【諒輔為廣漢五官掾積薪祈請未日中而雨世稱至誠】嚴意勵冬霜【序云意严于冬霜戴就陸續也】果行推陵險【序云蹈于陵險繆彤李善也】丰?嘆履方【贊曰乘方不成注云独行之人乘履方正】孤高惟大遜壽考茂祺祥【李充字大遜有高節年八十為國三老】

昭公詳漢律求比禮三千【陳寵字昭公為廷尉鈎校律令求删除為三千條以應禮威儀三千】刻敝深文息【寵為奏每附經典從寬恕深文刻敝于此少衰】寬平治德全【寵上言愿蕩滌煩苛以全至德章帝納之務于寬厚】芳猷宣輔弼【寵為司空奏議溫粹為相稱職】余庆茂忠賢【寵子忠為尚書令忠正敢言】方驗來嘉瑞仁矜理最先【章帝納寵言除慘酷科禁五十餘事是後人俗和平屢有嘉瑞又云寵性仁矜】

奉和御制读三国志诗【三首并注】

白马当涂兆黄家得岁兴金符威既重玉版事堪凭汉火承前运谯龙合旧徵青云开後叶下武倍兢兢【白马令李云曰许昌气见于当涂高者魏也或遗太祖书曰黄家当立芝曰得岁星者道始兴今岁在大梁魏之分也太祖初封魏王受虎符春秋玉版曰代赤者魏公子苏林曰魏以土德承汉之火汉熹平中黄龙见谯单扬曰其国当有王者不五十年亦当再见中平四年文帝生于谯延康元年嗣魏王位黄龙复见文帝之生有青云如车盖尝着汉太宗论曰尉佗称帝抚以恩德吴王不朝赐之几杖时孙权不服班其论于天下亦不愿征伐也】许昌功未逞江表地初平汉帝居非远吴侯志欲迎壮图虽未遂嘉虑实惟精终阙尊崇礼何关慎器名【曹公都许昌孙策平江南曹公力未能逞以弟女配策小弟匡後曹公与袁绍相拒于官渡策时为吴侯陰欲袭许迎汉帝遭刺客不遂评曰割据江东策之基兆也而权尊崇未至孙盛曰权岂吝名器者乎】

家乘桑盖瑞国富卧龙才汉水神晖彻灵图密命开横天嘉气应继日景云来倪乏英雄器三分亦殆哉【先主舍东南有桑如车盖或谓当出贵人徐庶谓先主曰诸葛孔明卧龙也刘豹等上言曰河图洛书皆有备称皇之文又时有景云祥风从璿玑下来数有气如旗从西至东中天而行必有天子出其方评曰先主有高谊之风英雄之器时与吴魏三分天下】

奉和御制读晋书【三首并注】

安石陵霞致【谢安字安石史臣曰萧然有凌霞之致】清言振玉音【安少诣王蒙清言蒙曰此客亹亹为来逼人】鸿勳济世久【刘裕以安勲德济世】厚德感人深【安新城筑埭後人追思之名为召伯埭】朱组虽然袭【史臣曰安褫薛萝而袭朱组】虚舟岂易沉【赞口太保浮沉旷若虚舟】东山高志在潇洒谢尘襟【安虽受朝寄然东山之志始末不渝形于言色】

李重推清雅初传友爱名嘉言为时发大谊傅经明崇德诚堪慕修身岂易倾留心衆才举千载仰铨衡【李重清雅以友爱着称赞曰嘉言在兹重迁中书郎每疑议参以经典为平阳太守崇德化正身率下为吏部郎羣才毕举史臣曰重銳志铨衡留心隐逸】

士行勤武力机鉴信良哉国赖桓文业人推葛陆才殊祥双鹤至吉梦八门开终始全高节诚因左翼推【陶侃字士行累立武功尝运甓斋外曰吾方致力中原恐不堪事其励志勤力皆此类也侃机神明鉴似魏武忠顺勤劳似孔明陆抗成帝诏曰乃者桓文之勲伯舅是凭初侃丁母忧有二客来吊化为双鹤冲天而去又梦飞上天见天门九重已登其八坠地伤左翼】

奉和御制读宋书【二首并注】

汉宗开圣绪【宋武帝汉楚元王交之後也】得岁与周同【帝初封宋公岁在大火与武王克商同】金石终移律【史臣曰至于金石变声柴火改物】山河始誓功【封宋公策曰永

祚山河】飞名传秘记【河洛?曰二口建戈不能方刘字也空穴无主奇入中寄字也女子独立又为双奴字也】嘉?起游童【童谣曰木亘当北度走入浩浩乡金刀既以克亘亘金城中木亘言桓灵宝也金刀刘也亘亘盛也】能使奸豪讐诚为一世雄【桓灵宝曰帝足为一世之雄】

镇恶才明举英雄想冠时推锋平内侮直指定西陲向使鸿勲就宁忧霸业衰如何丧方召遗烈漫伤咨【王镇恶平刘毅于江陵灭姚泓于长安余寇未殄为沈田子所害宋高祖表之曰镇恶机略明举又曰荆南构衅忧兼内侮镇恶轻舟先迈一朝雾散王师西伐有中原入渭之捷指麾无前实国之方召也殊绩未酬宜蒙追宠赠左将军史臣曰镇恶推锋直指前无强阵】

奉和御制读陈书【二首并注】

猛奴多勇槩大稍事戎征【周文育小字猛奴父荟令兄子辞教书计文育曰谁能学此取富贵但有大稍耳】新蔡凶围陷【文育往新蔡慰劳白水蛮谋执之文育前锋陷阵勇冠军中】鱼梁寇垒倾【初武帝表文育为府司马李傺仕将杜平虏于鱼梁作城文育击之平虏弃城而走】遡风轻古法【武帝拒徐嗣徽将战风急帝曰矢不遡风文育曰何用古法抽稍上马衆军随之风亦寻转】间道贵奇兵【余孝顷举兵应萧勃文育烧栅伪退间道信宿达芋韶据其中间筑城殄土贼徒大骇】懋赏宜开府番禺已尽平【文育平广州以功授开府】灵洗虽骁勇【程灵洗少以勇力闻】忠?詎可轻石城尝力战【灵洗事王僧辨武帝诛僧辨灵洗力战于石头西门招谕久之乃降帝深义之】黦歙本连盟【初侯景之乱灵洗据黦歙聚徒拒景奉新安太守萧隐主盟】京口殊勲茂【武帝授灵洗兰陵太守助防京口平徐嗣徽有功封侯】临川叛寇惊【周迪重寇临川灵洗为都督击之迪走山谷间】既能明号令何惜务寛平【灵洗性严急御下苛刻而号令分明与士卒同甘苦衆亦以此德之】

奉和御制读後魏书【三首并注】

伟哉登国世灵武定戎兵拓土能图大求才实励精公侯新爵重台省旧风清自匪谟长世鸿图岂易成【道武奋其灵武遂启中原拔擢才识宪章故实制爵四等追录旧臣启建台省悉用文士制作经谟咸在长世登国道武之纪号也】

高祖寛仁主哀矜信有余严刑几尽措黎庶获安居旧法躬刊定繁文再剗除既平财谒路清白励簪裾【高祖驭宇留心刑法诏曰参详旧典务从寛仁帝哀矜庶狱卒从降恕京师决死狱岁不过五六置谨法者数百人防喧鬪于街衢使民安其职业命中秘官修改律令旧文经御刊定诏曰门房之诛犹在律策可更议之删除繁酷又遣使循行天下纠守宰之不法食禄者局蹐财谒之路殆絶】

真君昭密命纪号表兴隆瑞着洪河外文成翠石中帝名传祖祢历数感王公三五方兴运明符事亦同【世祖奉天文图录纪太平真君之号五年乐安王范等奏曰臣闻帝王之兴必有

受命之符三五之盛莫不同之今张掖郡列言大柳谷石青质白章成文记国家祖宗讳着受命历数之符王公已下莫不感动】

奉和御制读北齐书【二首并注】

段氏推忠武论兵特造微历朝功并建诸将令咸依重位无矜色高门有德辉当时勲贵族孰不仰家肥【段韶諡忠武善于御衆得将士心临敌之日人人争奋教训子弟闺门雍肃当世勲贵之家罕有及者高祖曰吾与韶论兵殊有英槩史臣曰韶辅相七君志谢矜功名不逾实又赞云韶大其门望以德尊】

咸阳诚赳赳倚任极维师贵势隆门绪忠诚翼帝基享年常戒满避宠或兴咨不学良无媿嘉名已自垂【斛律金为太师封咸阳郡王一门一皇后二太子妃三公主尊宠之盛当时莫比尝谓子曰我虽不读书古来外戚无不倾灭我家直以立勲抱忠致富贵岂藉女也尝以为忧史臣曰金以高祖拨乱之始翼成王业忠欵之至成此大功故能终享遐年位高百辟观其盈满之戒见动之几微者也又赞云赳赳咸阳邦家之晖】

奉和御制读後周书【三首并注】

思道怀廉慎童年类老成郡豪尝讐服边寇亦清平临难输忠节辞荣保令名贤哉蹈仁义举世可为程【泉企字思道九岁类成人授讨寇将军屡破边敌为雍州刺史豪右屏迹忠尚廉慎每除一官忧见顔色至於频辞史臣曰企临难慷慨有人臣之节岂非蹈仁义欤】

南荆推德厚千里远从师奥识通三教清声冠一时就招虽暂至恋本固难移故老称前事儒宗道益滋【沈重字德厚专心儒学从师不远千里仕梁为都官尚书周太祖致书招之令于紫极殿讲三教朝士儒生桑门道士至者二千余人凡所解释咸为所推後表请还梁高祖诏答不忘恋本深是嘉之传序云高祖命輶轩而致玉帛招沈重于南荆史臣曰每闻故老称重所学非止六经故能驰声海内为一代儒宗】

迁哲承华绪深谋事战征艰危思大节慷慨得羣情惠爱均戎旅威名震敌城江陵摧寇势宵遁赖奇兵【李迁哲少仕梁袭沌阳侯慷慨善谋画羣下甚得其情後降周太祖问之对曰世荷梁恩不能死节太祖嘉之拜车骑将军往略巴蜀皆望风送欵与士卒均食亲加医药故军感之人思效命後陈寇江陵迁哲往救乘闇出兵击之陈人乃遁】

奉和御制读隋书【三首并注】

里仁怀远度大雅擅嘉名制礼通时变求书赞治平推心清选举从俭化黎氓终始承恩遇芳猷冠老成【牛里仁为秘书监请开献书之路为太常卿定雅乐议新礼为吏部尚书务在审慎推心任委隋之选举于斯为盛里仁荣宠当世车服卑俭隋室旧臣终始信任一人而已史臣曰里仁怀旷远之度可谓大雅君子矣】荣定诚嘉器攀鳞属盛时赏劳恩特异知足志惟

熙壮节承昭感崇基保燕诒但能思卫霍自可比蓍龟【竇荣定沉深有器局娶安成长公主少小与高祖相厚後以佐命功拜上柱国迁秦州总管逐虜于高越原无水荣定仰天太息俄而澍雨帝欲以为公荣定上书云西朝卫霍东都梁邓宠积骄盈必致倾覆上乃止史臣曰荣定运属时来以功懋赏保其禄位貽厥子孙崇基弗坠盛矣】

子盖怀英断南荒久驻留清通承眷獎恭顺望巡游异宠荣乡党丹诚破寇仇边民思旧爰刻石在西州【樊子盖为循州总管十年授武威太守炀帝下诏曰子盖干局通敏履操清洁又曰宜加褒显以昭獎勵後帝幸陇川宫子盖倾望銮輿帝下诏曰卿夙怀恭顺闻朕西巡欣然望幸是岁朝于江都帝曰富贵不还故乡衣绣夜行耳勅庐江郡设三千人会使谒坟墓当时荣之及留守东都破杨感帝谓曰杨感之反神明故以彰公赤心耳後武威吏民刻石颂德】

奉和御制读唐书【三首并注】

天祚文皇德元成雅道施纳忠裨阙政偃革致昌期宴喜刀方解人亡监遽隳数行遗奏在犹可动神祇【魏徵字元成太宗尝曰徵劝朕偃革兴文天下大宁又宴曰谓侍臣曰徵献纳忠谏古之名臣何以加也解佩刀赐之徵亡太宗曰朕以三监防已今亡一监矣遣人就宅得遗表一纸数行可辨云任善人则国安任恶人则国危公卿之间时有爱憎所宜详慎太宗曰侍臣可书之於笏史臣曰徐邈山涛谢朓比文贞雅道不有遗行乎】哲辅延清问元和致治平从人成庶务求瘼济羣氓务远能无怠求材可倚成乃知虞舜德恭已固难名【元和初杜黄裳为相宪宗问以前代帝王之事对曰帝王之务宵旰以求民瘼舍己从人不宜怠肆安逸事有纲领小大当务知其远者大者固不可代下司职但择人委任责其成效传称帝舜之德曰夫何为哉恭己南面而已】贤哉段忠烈振迹自邠宁动必怀刚毅何尝废典刑英方贯古乐石谅难铭密议初如用艰危岂易形【段秀实初为安西别将节度梁宰怀异图秀实直言折之寻为邠宁都虞候号令严一军府安泰代宗闻而嗟赏之後笏击朱泚遇害德宗褒赠甚厚官为立碑初秀实谏以禁兵少不足以备非常德宗不能用後文宗时宰臣李石曰自古没身以卫社稷者无如秀实之贤】

奉和御制读五代梁史【二首并注】

李唐危汉祚巢寇盛黄巾嘉士逢多难忠言变逆伦决疑归大顺定策戮奸臣宜享崇高赠千年道更新【唐季之乱危于汉末巢寇之党盛于黄巾进士谢朏投迹梁祖说以归顺唐室梁祖曰我意素决又复何疑即日定策戮伪监军使悉衆归顺僖宗授朏太子率更令开平初追赠司徒】

赞贞怀武鸷转鬪历炎凉诚感泉源异兵严士庶康临危见忠愤对敌擅威强终始心无改遗言更可伤【牛存节字赞贞武鸷有大节威名闻于敌境战鬪累载有功初授潞州步军都指挥使法令严整士庶安之为同州节度使岐人迫城城中井水咸苦人不可饮存节乃肃拜祝择地凿八十余井味皆甘淡以为至诚之感病渴且消河北用兵存节忠愤弥笃未尝言病将终戒其子以忠孝不言及他】

奉和御制读五代史後唐史【二首并注】

燕赵生奇士仇方决志平十年常竭节一剑早知名自取河南镇终辞霸府兵飞鹰昭庆路穷达有高情【符习少事王熔熔为张文礼所害诉于庄宗曰臣本赵人事王氏故使常授臣一剑俾臣平荡凶寇愿悉本军诛其逆党庄宗令阎宝等助讨之诛文礼庄宗割相卫二郡置义宁军以习为节度习对曰魏博六州见系霸府不宜遽有割隶但授臣河南一镇臣自攻取乃授天平军节度庄宗十年沿河战守常以本军从心无顾望後安重海不说授太子太师致仕归故里赵州昭庆县飞鹰痛饮周游田里史臣曰符习乃赵之奇士也】

长兴秉钧者子晦道攸隆刚介昌言远忠清茂泽丰懿文常体道妙略早从戎可惜亏同德当年阻建功【李愚字子晦长兴初入相後秦王恣横权臣避祸不暇无敢言者愚性刚介往往形言人无唱和者不治第宅官借延宾馆居之常有疾近臣宣谕延之中堂设席惟莞秸明宗特赐帷帐茵褥尝为文曰仲尼遇顔子壽等篇人皆称之初以翰林学士从魏王征蜀安重海问计皆中後冯道出镇与刘昫同在中书昫与道婚家或旧事不便要厘革者对论不定由是罢相】

奉和御制读五代晋史【二首并注】

子文怀妙识奥学洞天常恬淡游莲幕谦虚践玉堂至仁周仆御大雅变词章慎默诚无怠危机可尽防【崔棣字子文好学博涉经史闲居二十年专以著述为事王瓚表为从事性恬淡不汲汲于荣利为翰林撰乐章新词教舞童歌之高帝嘉之有人借文本写者则曰有前贤有来者安用此端坐寡言尝云非止致人爱憎或干人之忌讳指命仆役亦用礼节盛暑祁寒不使冒犯】

大雅怀忠孝当年效战征询谋无败事临敌有奇兵安陆祚狂殄宗城寇难平察廉能恻下何患政难成【马全节字大雅历博单郢沂四州刺史在郡有政声迁金川防御使会蜀兵攻城出奇拒战贼乃退後为义武军节度国家有所调发朝受命而夕行治生余财必充贡奉事母王氏至孝温清面告毕尽其礼动与幕客谋议故鲜有败事镇中山日杜威奏括民粟全节曰边民遇蝗旱家食方困官司复扰之则民不堪命矣我为廉察安忍效尤百姓称其德史臣曰全节平安陆之祚预宗城之战功既茂矣贵亦宜然】

奉和御制读五代汉史【二首并注】

危邦有贤哲力战镇州平革弊还疲庶从寬悦衆情爱人惟责已徇节几忘生青史惟馨在千年仰令名【王周累历郡守安重荣以镇州叛从杜重威讨平之授贝州节度使移镇涇州前帅张彦泽苛虐部民逃者五千户周下车革前弊逃民复归迁镇州节度稟性寬惠人庶便之杜重威引契丹临城谕之周曰受国重恩不能死战而以兵降何面目南行见人主与士大夫乎乃痛饮欲引决家人止之初守信都桥败覆民租车周曰刺史之过也乃还所沈粟出私财以修之民庶悦焉史臣曰晋汉之际取符竹者多矣其间有及民之惠如王周之阡政盖其优

者也】

求益诚贤牧廉平致乐康欢谣腾近辅盛典茂徽章旧相亲褒记黎民竞感伤丰碑应不朽千载咏惟良【刘审交字求益累任州郡绥抚有术凋弊复苏为汝州防御使汝为近辅号称难治审交尽去烦弊百姓歌之卒郡人聚哭乞留葬立碑起祠诏曰褒贤獎善岂限彝章可特赠太尉吏民所请宜依故相冯道曰知其为人廉平慈善无害之良吏也吏民怀感如此着痛哭词六章镌於碑陰】

奉和御制读五代周史【二首并注】

文懿艰危际虚心自晏宁依违慙问战闲淡贵无刑镇俗惩浮躁尊儒镂典经忠诚亏美諡良足媿幽灵【冯道历相四朝虽逢艰危不易其度怀才抱业者皆引用履行浮躁者必抑而镇之节制同州日闲淡狱市无扰晋祖尝以兵事问道对曰神武睿略须从独断臣本自书生为陛下在中书不敢有一毫之失也命学官刊板流布諡曰文懿史臣曰事四朝相六帝可得谓之忠乎不得諡为文忠文正者盖谓此矣】

文伯怀明识英?世所推济时陈策画急用备论思隘郭爰增广烦音亦改为温恭非不济感遇志如兹【王朴字文伯世宗时言平边策世宗重其器识世宗以英武自任有包举天下之志计事者不喻其志惟朴神气劲峻性刚决有断凡所谋画动愜世宗之意故急于登庸为端明殿学士命广京城靡不由其心匠未几迁枢密使星纬声律毕殫其妙所撰律準并行于世史臣以为太刚不能济之以温恭臣以为朴感世宗之遇急於行事无所顾望故如斯也】

文庄集卷三十一

卷三十二

钦定四库全书

文庄集卷三十二 宋 夏竦 撰五言律诗

奉和御制中和节

中春遭初吉嘉节着芳名习习微和扇欣欣万物荣云融才化鹤谷暖已迁莺朝野多欢日风
謡会颂声

奉和御制会庆殿宴

禁门乘晓会宴豆示慈伸激水龙腾久仪韶凤降频云章流汉筑衢酒洽尧民百辟皆星拱兢
兢奉北辰二月昭州奏正月一日设醮上玉皇表烧钱次有鹤一只翱翔久之西北去

平乐初正月虚晨荐号时瑞塲燔碧帟僊骥驻霜仪烟顶方遥辨星精想下闕天门俄翼去杳
霭瑞烟披

野步

顾步方塘上西郊日渐曛归心临远渡晚色在闲云壠势蜂腰接谿流鷺尾分田歌知有意丰
美谢明君【谨案东轩笔录云夏竦以父歿王事得三班差使然自少好读书工为诗一日携
所业伺宰相李文靖沆退朝拜於马首而献之文靖读其诗有山势蜂腰断溪流燕尾分之句
深爱之终卷皆佳句翊日?其诗呈真宗及叙死事之後乞与换文资遂改润州金坛主簿据此
则沆所见乃野步诗也其改壠势为山势改接为断或东轩笔录得於传闻故有不同耳至厉
鹗宋诗纪事但存山势二句而不载全诗则以未见竦集故也】

秋晓

半庭残月在江郡鼓声初秋气满南国晓云高太虚负霜鸿翼健含雾橘花疎此景无人共朝
阳入敝庐

灵溪

剡东溪溜合一派贯天台白鸟蒙滩下青山倚岸回波心晴景动渡口晚烟开咫尺通沧海千
帆自去来

马跑泉

天驥何年往龙泓此地存空余曳练色莫辨裹蹄?赴海妨苔磴涵虚碍竹轩会当逢禹凿始可见鸿源

天台道中

驱马天台路悠悠渐向晨云开忽见寺山尽偶逢人细雨踈篁长微烟古木春行行遥驿道落吹起轻尘【案此诗原本阙今从北宋人小集增入】

石梁

断涧横幽石苍苔古木陰欹危接山腹迢逢过云心峭壁峙千仞飞流下万寻秦人若驱策蓬岛路非深【按此诗原本阙今从北宋人小集增入】

晚望

雨霁吴城晚谿泉四散流禽归半峯树人在夕阳楼国望分江海星躔次斗牛堪嗟兴废地千载有闲愁

监湖晚望

新霜脱衰叶寒日下踈篷岸细低疑尽波平阔似空桥通越谿水帆带剡川风何处鸣箫鼓丛祠杳霭中

舟行即事

微阳下江树秋叶泛残红鴈背寒塘雨帆争晚渡风寺桥人倒影渔径菊分丛正是承平日轻艘万派通

吴中怀古

览古长江上明时起叹嗟水流吴国苑花入野人家夜气销龙劒秋星见客槎凄凉馆娃树西日映平沙

桐栢观

鸟道寒藤结洞门苍蘚深楼台在山畔松桧出云心土暖春长在峯高月易沉羽衣祠太乙香冷石坛陰【此诗原本缺今从天台山志增入】

喜种隐君授正言直馆

鹤版招幽士龙墀袭茜袍道因闲上得名向隐中高密地栖芸阁清涂历谏曹终南明月夜松桧自萧骚

赠海州使君

天衢未得便假道海边城任大才胜器官闲不称名劝农吟少暇忧物睡常轻见说行春处和风满旆旌

赠县宰

俸轻官且冷君喜在亲民村路不闻犬县城长似春架高书少蠹厅静隙无尘考满留碑去清风励後人

赠逸人

凤鸟来为瑞达人垂羽翰语因希圣古诗为惜名难泰华僊标峻江湖酒量宽孤琴有舜曲留我月中弹

送张学士赴阙

东观尝联袂南州各退飞同倾就日恋先喜赐环归旧业怀铅笔晨装振彩衣离弦有余思凄切寄南徽

送益州同理张殿丞

远指三川路初辞六尚班占星度危栈叱驭下灵关职亚铜符重兵销玉帐闲汉台谁视草应待长卿还

送人出牧

圣主念元元良臣选掖垣紫墀分使节红旆出都门雪浅斜阳路云深晚烧村暮年如报政应许贺新恩

秋日送人南游

几驿苏台路轻装转塞蓬夜船千櫂月寒酒一旗风水闇菰蒲老山明橘柚红算君回首处晓色五湖东

秋日送人西上

旅程看驿道西去兴何如南国秋霖後斜阳树影疎野光飞翠羽溪艷照红蕖好去朝端客人争草荐书

送人

野色兼行色长亭一送君束书登古路重茧踏寒云山过天台小溪临婺女分流光须强学当宁正崇文

留题友人郊居

羣书架寒壁庶事得从容花木移诸寺云泉借数峯积陰春作雨瘦竹老成筇应笑南阳士明朝久卧龙卜筑远朝市着书成岁功长云覆孤木古道满清风地胜花房异山灵雨气通纶巾不可恋鹤版下关东

代村叟

安居近幽谷井赋籍良田圣代无深隐家山不直钱候耕看土脉祈谷赛豚肩城市知何处疎钟隔暮烟

国清寺

穿松渡双涧宫殿五峯围小院分寒水高楼半落晖叶从金地下【寺东北峯有智者金地道場】云向玉京飞【寺之西洞有玉京天】欲问西来意谁传智者衣

善慧师禅斋

是谁名作佛何法谓之禅恍惚起无象逍遥出自然有修皆障碍欲问即攀缘寄语猊牀客心不易传

虎丘僧舍闲望

胜地访灵踪层楼四檻风远陰生旷野午影转疎桐涧水霞凝紫谿烟日衬红可怜秋思晚相倚馆娃宫

文庄集卷三十二

卷三十三

钦定四库全书

文庄集卷三十三 宋 夏竦 撰五言排律

奉和御制瑞雪

朔吹凄寒序繁英降美祥润将膏露接时契圣心彰不夜蟾辉满先春柳絮扬龙沙度北野鹇素失南乡帝苑敷琼蘂神池莹玉塘薰弦俄发咏风雅迈岐昌

宣赐翠芳亭双头并蒂牡丹仍令赋诗

华景当凝煦芳丛忽效奇红房争并萼绀叶竞骈枝彩凤双飞稳霞冠对舞欹游蜂时共翥零露或交垂胜赏回金蹕清香透黼帷两宫昭瑞德天意岂难知

奉和御制玉清昭应宫天书阁瑞应

盛德灵谋协元符宝字披真宫肇高阁精意感鸿禧晓箭传初刻朝阳吐半规祥烟五色丽嘉气九华滋泛灏金光溢扶踈玉叶垂尧心膺眷佑钦翼愈孜孜

奉和御制滋福殿清醮圣祖天尊大帝尊像瑞应

宸闱啓瑞场祗畏感穹苍紫幄威神格清宵景曜彰霓旌承宇列僊骥度云翔肸鬻停霞辔歆馨挹凤觞萝图千叶固山寿万龄昌玉龠流宸唱函蒙播美祥

奉和御制天书道场观神雀

斋明尊宝籙只肃建真场上帝灵心显中宵瑞羽彰入丰惭美应上雍喜嘉祥彩仗留轻迹彤霞混葆章乍冲香馥郁高映燎荧煌云汉敷宸唱繁禧浹万方

奉和御制册府元龟了毕

文德洽隆平蓬山蠹简盈汉金方尽购秦石谅难程稽古承先志宣猷聚世英刊修百家备絀绎十年成休沐当冬日多欢奉相衡岂期颁睿藻何以报兹荣

奉和御制告玉清昭应宫太庙礼成

时巡将顺豫吉礼协休成先道真文肃徐銓瑞气平密都嘉荐备太室令芳呈清越锵金奏斋

庄俨翠纓霏云朝萼蔚花雪夜紫盈焕衍昭繁祉千齡表盛明

奉和御制真游殿成诗

宵晤灵猷显彤庭藻卫臻凤輿回八景龙旒驻三辰太古仙仪接虚皇密诲伸天枝鸿绪远殿翼旧规新宝势承基壮祥辉烛地频丛檻虹带绕彩制玉霄隣致孝常尊祖祈禱永庇民巍巍局禁内亿載奉元真

奉和御制大酺

瘞玉祠真時还衡格闕宫策勲恩已盛合釀庆弥隆法坐临双起清音奏六同羽毛秋色丽簪绂晓光融宠宴均尧酒宸章起汉风羣生遂鳬藻何以报层穹

赏花钓鱼应制

上苑乘春啓奇花效祉新连房红萼并合干綠枝匀翦献尊长乐分颁宠辅臣从游过水殿凝眸近龙津黼座临雕檻文竿引翠纶波香投桂餌萍暖漾金鳞湛露芳尊酒钧天广乐陈多欢千載遇何以报严宸

延福宫双头牡丹

禁籞阳和异华丛造化殊两宫方共治双葩故聯跗向日檀心并承烟翠干孤游蜂须并翼凝露亦骈珠晓檻香俱发晴阶影对铺君王重天貺临写冠珍图

奉直园双头芍药

奉帝名园丽翻堦淑艷新一丛芳葩绽四朵綵跗聯朱李应双结兰釭忽并燃异瓜緜蒂合嘉木翠枝骈映叶交霞袂迎风叠綺钱流祥在图素千載冠嘉莲

讲彻礼记崇政殿开宴应制【赐花内出口味】

幄坐尊儒术华光御讲筵爰开栢梁宴为毕曲台篇法从飞綬接藩房綺组聯賜花均彩萼陪鼎杂冬鮮甘润声诗洽芳蕤注籍传师臣咸拜手归道黼帷前

皇帝听讲尚书彻太清楼锡宴

洛书初罢讲汉苑特开筵将许陪旒宸先容阅简编神宗遺札啓真祖宝文宣密坐瞻尧日凝心听舜弦賜花緜叶綴劝酒玉卮传恩重天难报肌肤岂易镌

观唐明皇山水字流杯石应制

开元留翠刻昭代奉宸游綠酒聯杯泛红泉滿字流澄清涵玉宇潏灩转银鈎霄壑奎躔布龟图洛画浮偃波分密坐垂露直前旒若许铭天德圓青岂易俦

元真殿烧香观太宗真宗御书仁宗飞白书并瑞谷应制

兰炷薰琳殿霓旌映綠莎九青真荫远三母睿慈多阁道陪銮往唐中奉诏过熙陵遗札啓祔庙宝文罗继志颁宸翰飞毫动偃波史臣书绝瑞鈎盾对嘉禾

奉观御飞白书应制

圣德天攸纵慈闈宝训崇飞毫迈古法方丈夺神功轻素飘惊吹长烟叠远空点孤时戲蝶波偃乍腾虹洛画诚难并奎躔或可同猥叨宸笔赐羽翼誓输忠【唐太宗尝以神笔赐马周飞白书曰鸾凤凌云必资羽翼股肱之寄要在忠良】

皇太后恭谢太庙【中书附进】

法宫裁旧典长乐奉春祠牺象华樽设旗常大路移属车朱总备亚裸翟章垂瑶爵因周制金根益汉仪歆馨百禄委斋祓六宫随往训遵三母何阶拟圣时

躬耕藉田诗

广阡承严享东?错上仪纁裳拂黛耜彩纁映红縻内宰登嘉种余夫列縹陂游场玉趾远尽陇绀轡迟蓊蓊训农穡馨香供帝粢匪今方介祉敢续载芟诗

晚晴

万家充积望千里絶纖埃日辗云头上风驱雨脚回乱帆争古渡疎叶下高台啓户晴光入卷帘秋气来山心余霭散地角乱烟堆宿鸟幽丛闌残虹远色开脱蓑人顾步晒羽鹤徘徊菌遶枯林下萍翻曲岸隈名园添旧笋幽石长新苔绮席谁相贺繁弦拍屡催

和集贤相公摄事出郊

台袞承严祀传呼出禁城扞坛将错事总驷暂观耕盈止踰周颂康哉叶舜赓满篝登大穰首种达初萌行饁家为黍要朋户捧罍川长应万耦树密尽三荆有相神休茂多欢国誉荣余粮充近甸遗秉富陪京碓罢舂梁熟机闲织素成休牛鸣笛起会绩远灯明路有遗金在村无吠犬惊熙熙难徧纪徒仰泰阶平

送吴兴使君郎中分务归姑苏

罢郡归南国分曹在别京江山适清尚圭组谢浮名桂楫乡人送云浆旧吏迎夕香薰径远春溜敛池平累去千忧尽中恬四体轻吟斋研赐墨钓渚濯尘缨玉树时方盛金钩庆已成何妨过穀下万寿集公卿

送凤茶与记室燕学士诗

緑葍園规异红滕篆印新争先御府贡初摘建溪春膩滑重苍壁娇黄聚麴尘焙痕连井字凤刻叠龙鳞玉座均芳旨金华宠侍臣斋心分一饼持赠辋川人【公能诗善画台阁比之摩诘】

文庄集卷三十三

卷三十四

<集部,别集类,北宋建隆至靖康,文庄集>

钦定四库全书

文庄集卷三十四 宋 夏竦 撰七言律诗

奉和御制千叶黄牡丹【奉圣旨次韵】

千叶繁英吐异芳中央瑞色蔼清香密攒鸂羽参差折细叠霓裳次第黄雾锁天衣临翠幄露
倾金醖沥霞浆圣明盛事尊长乐亲洒宸毫奉美祥

和御制赏花诗

禁园清蹕赏春时水殿晴阳照翠綏步辇乍冲僊杏叶御衣频拂露桃枝风摇麝粉星星坠日
引芳阴寸寸移帝所甚欢宫漏永宴余仍奉栢梁诗

奉和御制雪

寒风夜傍梁园积花雪晨临宋殿飞歌俪阳春争度曲月承宵幌竞通辉五车洛邑延神御八
骏黄台罢猎围今日云章昭美应眇观千载事还稀

奉和御制清心殿水清木再连理

禁中迟日照南荣瑞木聯祥耀国经合干旧临宫檻密交柯重接帝梧青华平对植行侵陞若
木相辉影满亭况是斋心延祝地愈昭天意答惟馨

奉和御制太清楼屏风栢连理

禁园綺合羣芳茂瑞栢屏开秀色呈托植久依僊杏密附枝俄接帝梧荣非烟结翠和风细滴
露凝华晓日明况是岁寒坚节异亭亭千载表殊贞

四月昌州奏圣祖殿下生芝草一本四茎及面有红光如悦怿之状

昌元远地凝和气真祖僊宫发帝祺穆穆睟客分喜色煌煌宝座秀灵芝已彰日监灵心显更
表晨敷协气滋元后钦崇膺瑞命殊庭荐号答繁禧

五月同州奏牡丹一枝开三花

上圣德风驰率土左冯嘉气袭鸿英疏丛一干迎春茂繁艷三房表瑞呈承献珍图昭美应考
祥花品见维祜帝宸钦翼崇昭报荐玉燔柴极至诚

闰六月眉州奏禾生九穗

眉山远地蜀川西九穗嘉禾忽效祺东极龙枝人莫覩环丘玉粒世空知中和积粹名方异繁
蔚呈祥事更奇自可增封齐北里岂将同颖比繁禧

八月梓州奏广化寺池莲五茎各开二花

梓潼名郡蜀川东忽秀佳莲绀宇中裊裊修茎孤引緑盈盈双蕖对分红绦跗相倚凝新露紫
葍交垂向晚风爰考瑞图观美应柳州嘉产实难同

奉和御制景灵宫迎牌

紫馆成功属盛时道迎金榜耀文思沉沉殿翼弥增丽矗矗圭棧尽中规祇荐宝香清吹裊下
观颺御彩云随羣心仰止兴谣诵永见千龄播緝熙

奉和御制兗州景灵宫太极观牌登路

崇丘紫馆集繁祜躬勒璿题耀笔精藻卫森沉登广路彩云摇?入层城高侔曲密分都号远法
阳寥纪殿名真祖览观鸿庆茂壽山从此倍峥嵘

奉和御制甘雨应祈

少皞九秋当季月成汤六祷动灵心中宵甘澍均丰浸尽日层云结远陰销去骄阳为瑞重招
来嘉应感人深侧身修道殊千古仍叔焉能播德音

奉和御制喜春雨

太液冰销春水生华林气暖暮烟横忽闻甘澍中宵降共庆丰年上瑞呈拂地如丝笼北阙映
花疑雾霭南荣原田脉起承甘润自此嘉生永顺成

上元应制

鱼龙曼衍六街呈金鎖通宵启玉京冉冉游尘生辇道迟迟春箭入歌声宝坊月皎龙灯淡紫
馆风微鹤焰平宴罢南端天欲晓迴瞻河汉尚盈盈【此诗原本缺今从诗话总龟采入】

帝京春日

景阳钟尽唱隣鷄十二都门报启扉一带楼台擎落月万家桃李待朝辉宫槐烟暖鷺犹睡僊
掌云寒露未曦算是五侯偏称意游春车马早如飞

江南春日

江北游人春未回江南春色傍人来茶经谷雨依稀綠花接清明次第开場上鬪鷄金作距檻
前粧监玉为台六朝风物今何在莫负流年酒百盃

寒食

夹城烟淡草霏霏晋俗相传禁火时御苑梨繁花盛发帝园桐嫩蘂初披尘微蹴鞠人将散雨
细秋千索半垂游骑?芳还鬪酒九门謡诵乐重熙

春游

艳艷春风雨半收少年疎诞称春游将军雪散桥边市骑省花开县外楼草嫩玉堤藏墮珥酒
浓金盞滑歌喉谁能借取瑶池马乱踏红尘四百州

初夏有作

玉琯葭灰昨夜吹日华光暖向阳枝东君乱点丹青笔真宰忙挥造化椎红日暗长人不觉好
花偷发蝶先知後园无限桃兼李留待新恩得意时

江城秋思

泽国迢迢枕海涯眼前归思乱如麻清秋泉石无多地残日楼台有几家两岸早霜红橘柚半
汀残雨老蒹葭明时不见投簪客落尽西风紫菊花

华山

三峯森翠倚云棱凝睇烟萝最上层八水乱分秦帝国四关空鏤汉皇陵僊羊未起眠春草塞
马初归放紫藤堪惜圣朝无傲吏夜来风月属闲僧

滕王阁

面临漳水势凌霞却倚重城十万家当檻晓云生鹤岭拂堦残雨下龙沙辞人高宴文皆在帝
子欢游事未賒好是良宵金鼓动阑干牛斗逼檐斜

江南怀古

六朝云物更风流澹澹烟藏古寺楼
敌国漫轻江似带史臣能视橘为侯
荒台有鹿姑苏晚坏阁无香建业秋
到了贤明出中土莫夸歌舞霸南州

金陵

虎踞龙盘委薜萝台城春雨长寒莎
梁家不觉市朝改萧寺只闻钟磬多
云树暮堤攢劒戟风篁虚谷转笙歌
须知王气随明主不据金陵又若何

狼山渡口有作

渡口人疎黯翠烟登临犹喜夕阳天
残云右倚江都树远水南迴建业船
山引乱猿嗥古寺电驱甘雨过闲田
季鹰死後无归客江上鲈鱼不直钱

感兴

流年难驻且从容莫厌多情事万重
深院晚因留客锁小栏春为惜花封
家山久驻偷归梦庭桧清含入夜钟
更有薄游长记得翠钿遗处緑陰浓

洛中春旱祷龙门无畏塔得雨

露盘金索出危岑风卷惊尘扑翠林
五夜清场严佛事一犁甘澍慰民心
圣君旰食忧应减守吏斋诚祷更深
泛灋洛川皆帝力好浮青鲤瑞烟寻

本宫投龙简中使

醺罢层霄鹤吹分夜坛香火镂真文
羽人月笔封瑶检使者星驰下绦云
藥简荐诚川后耸金龙传信洞天闻
再三鹊尾添檀炷为祝虚心佑圣君

僊姬怨

洞口垂杨拂地垂年来期约又依违
红桃不解留人住白鹤何曾覓信归
雉扇对开春寂寂绣衣双卷雨霏霏
无言尽日云边立不许霓裳按羽衣

宫词

柳带分陰接殿基笙歌还拥翠华归
前宫晓赭匀粧脸别馆春红晒舞衣
槐影对笼苔点细桐花西倚夕阳稀
夜来梦上檀香阁犹映珠帘避贵妃

秋日江馆喜弹琴羽人至

水馆凄清天一涯喜逢僊盖驻灵芝烟霞初散海中会风雨忽来江上期琴轸玉寒弹宿露酒
卮金暖对朝曦圯桥书在如相授不独留侯是帝师

喜马少保致政

世机无路恼天真心地逍遥万象新久戍金河归塞客却浮鲸海到家人静封药竈移文火闲
看花陰上舞茵应笑公侯方内热六街奔走利名尘

送江寧相公

六朝台榭好山川丞相遥分造化权两府规模遵故事二南风什听新篇平反庶狱棠廬外约
束诸侯玉帐前莫讶依依恋行色壽藩书命最多年【相国初拜卫翼之命叨掌除书】

送太傅相公居留洛宅

梓泽芝田尊帝里玉符金钥委台司家传旧节居连帅【元帅忠?王昔胙土南阳公复以武胜
节制居守继长诸侯】史作新书赞父师留府橐鞬分骑引都门圭组鬪班辞共惊河洛初开
輿一日龙光四海知【上即位作述多秘禁中至是赐公诗一章宠行天下荣之】

送济南杜郎中

秋树参差堕叶红剖符还过故乡东星分北陆龟蛇内位应哀乌太紫中亭传宛如行部日【
公曾司京东漕挽】冠缨犹带触邪风【公曾历台】寒泉岂是无人塞应待君侯立事功

送修撰杨学士留守南京

画船椎鼓忽东浮留幕宾从候舳舻宫里铜鱼勘门钥府中银兔合军符鸣驺苑路人千骑送
客河桥酒百壶莫为文章还自苦鰲池龙岫且游娱

送王端公充荆湖北路转运

锦衣骢马好还家大别山边汉水斜霜简位高增意气金章恩重有光华几程蛮徼云藏驿一
棹荆江月照沙多少朝簪鬓成雪愿君休访楚山茶

送李殿院知防州

屈草聯芳映法冠亭亭风度耸朝端一麾出守秦城近千里班春汉诏寬引道画旗迎马重褰
帷霜简照人寒都门迴首多离绪宝瑟凄风别酒阑

送苏台守受代归朝

香案当衙拜凤书使君旌节下姑苏宾朋唱和诗千首耆幼扶携酒百壶野树遮藏过建业乱山迎送出江都西风不得同归去红藕花边望舳舻

送新恩善济处士归玉笥

蠲痾妙剂分黄阁驻景僊山奉紫闾太秀山川须长价少微星宿已增辉幅巾不被尘缨缚别笈唯封赐药归唳鹤鸣猿好相候利名无染世还稀

送人游关右

朝曦轻抹柳梢长歌彻邮亭饬去装鹑首右瞻秦分野虎牢西入汉关防温泉雨霁离宫碧麟蹄沙惊塞日黄如访平戎最长策不徒鞭马为诗忙

送人入越

广陵江口柳疎疎自领笙歌上舳舻一片晓山迎越絶数程春水背姑苏莲供晚果蜂房细鱸市朝餐线缕羸他日功成待相访谢家烟月借人无

送人之淮西

五里亭前一送君碧油红旆驻清尘半轩晚日淮西路数拍离歌江上春杜宇有情移别树野花无主傍行人男儿多少畴恩地不欲东风泪满巾

寄张相公

台司金印护诸侯冲气均和耐素秋户牖旧谋方倚重菟裘前计合迟留岂同少傅轻辞汉况有维师永佐周秉烛家园且行乐即应重起济川舟

春日寄陈舍人

浓淡晴霞泛夕阳重重烟蔼护流芳花残远渡晓风急路入层云春梦长结蕙翠光留蝶舞含桃红实驻鸂鶒可怜得意文章客扈跸西园月桂香

题东林寺

昔帝先贤迹未消森沉台殿鏤嵯峨新莲照水香空在旧辇生尘翠已凋夹道古藤看翳日过谿苍蘚半侵桥远公前意无人会空对清风望寂寥

崇胜寺

山当庐阜五峯边地占侯谿好习禅杳蔼峰峦云蔽日参差楼殿瓦生烟僧房宿鸟栖帘外客馆鸣泉过枕前但可登临闲访古西来无法与人传

观夜醮

万条银烛间灵旗一片清香匝玉墀羽帐星辰来不觉僊坛冠帔立多时红桃裊露风初细白鹤迎云月渐迟试托东皇问萧史凤箫应许借人吹

话道

清静无营即自由神僊何必待人求秦皇多诈死犹讳汉武穷兵老未休巨费漫悲徐市药怪书空验少翁牛须知方寸真元意不在层城十二楼

赤城

丹壁排空叠彩虹上真应此驻灵踪烟沉晓日明孤顶云破余霞出半峰岩下法师曾伏虎洞中僊客屡投龙他年翠盖东巡狩玉牒终须受大封【案此诗原本阙今据北宋人小集增入】

文庄集卷三十四

卷三十五

钦定四库全书

文庄集卷三十五 宋 夏竦 撰七言排律

奉和御制龙图阁观书【是日观太宗御书】

切云层阁倚龙城霜素缙油聚壁经严召近臣容侍从载赓宸唱乐清寧神宗燕翼垂貽训地
宝昭彰显瑞形芬馥芸香飘紫禁荧煌金刻照彤庭龟陈洛画开瑶检弦泛薰风出黼局自庆
孤生逢旦暮愧无嘉颂赞明馨

奉和御制奉祀礼成宴

真塲荐鬯方回跸泰時钦柴既受禧璧散九行颁宠宴翠綏三接庆昌期露曦朝景彰慈渥风
扇微和表圣时羽翥动容分广砌旂旗交影上丹墀琼跗拜赐承天意綵羽来仪识凤姿向晚
栢梁传睿唱帝台春箭更迟迟

奉和御制内苑嘉谷

渊圣钦明抚庶氓斋居励翼御彤庭天田播种勤农事云稼流祥耀国经琼粒蕃滋争结稂龙
枝屈曲竞分形摇风秀色交卿霭垂颖余光近帝星茂遂岂同藁叶异殊尤全掩凤冠灵连茎
五七踰成数实表皇穹鉴德馨

奉和御制玉清昭应宫天书阁告成

飀馭告期宵寤协紫虚畴德秘符呈诞膺顾諟营恭馆仰悟威神奉太清密石砉磨鸕郢匠非
烟腾瑞集周祜上侔帝阙规模丽远掩迎年宪度明将闕玉文藏緑蘊载崇金阁对丹城高陞
彩制修梁直永据柔灵宝势贞飞陛缘云弥岌嶮重栾倚汉益峥嵘良辰涓选繁禧茂严跸临
观懿礼成庆赐春流均盛食真香云涌荐明诚薰弦潜发斯干咏丕显鸿猷洽治平

奉和御制玉清昭应宫玉皇大殿告成

三圣重熙鸿业茂百灵申锡宝符彰寅恭清淨函无象顾諟高明顺秉阳法馭省巡修废坠真
宫经始报祺祥栋升文杏觚棱峻殿启真琳玉璫方九帟盛仪陈宴衍六茎清奏助欢康开轩
瑞气凝空碧驻跸晴辉艳赭黄珠树移阴从帝圃霓旌分影自仙乡宸游悦豫同襄野睿藻昭
回迈栢梁黎庶纵观争叹咏侍臣嘉颂极游扬灵休锡美淳风振永播声名浹四荒

奉和御制国学太宗皇帝御书阁告成

神宗濬哲通三变善继文思洽万方高倚丛楹藏凤縕密砉温石镂云章素风畅茂增鸿庆景耀腾凌发美祥回据日畿分宝势远承云路抗飞梁推恩宥帑班中帑式宴朝纓集上庠更仰紫宸敷睿唱夏弦春诵永游扬

奉和御制九天司命降临

缉熙绵?肃边疆蕃祉纷纶显阜昌真驭告期通梦寐严宸精意洁坛塲青烟漏上盈中禁碧輦宵分下彼苍照地辉光蒙鹤?霭人嘉气杂萧芎峒山顺拜鸿仪展太古灵源密命扬载仰金姿唯睟穆稍瞻云躅更辉煌晓霞微动觚棱峻弦月斜明玉璫方丹凤卷旗严藻卫绿车旋轸向仙乡春祺涣汗均流庆睿唱昭回纪降祥万国颂声皆载路巍巍馨烈迈成康

奉贺御制灵应瑞石

沉潜毓粹生嘉石宥密开祥契上穹降圣远期真驭协卜年遐祚宝符同复殊延喜灵珪上诂比昭华瑞琯中隐起玉文非篆隶混成环状岂磨砉弥彰帝历休祺茂永叶仙源统绪隆钦翼春怀敷睿藻巍巍千祀仰惟聪

奉和御制朝元殿朝谢玉皇大帝

三清右序储繁祉万乘钦明答上穹圣化诞敷书轨混僊游昭假地天通灵辉熠煜充丹禁瑞雾霏微翳碧空积累有开鸿绪远顾怀无际庆基隆精心展彩威顔肃法曲迎真睿藻融象舞在庭功复异宝符先道古难同奉朝嘉服只羣后赞帝鸿仪俨上公神爵乍临香馥郁霏云低映树青葱洁粢禋荐升严陛苍璧高蟠照晓风宣室受厘均大賚洋洋春泽浹区中

奉和御制朝谢玉皇大帝致斋夜天书道塲观鹤下临

紫皇斋祓感青冥仙骥徊翔瑞气平百和真香凝玉羽九枝芳焰动星精远辞金阙衔灵命俯瞰瑶台效帝祔矫翼乍侵龙旆影扬音微杂凤箫声应须置祀昭神异岂止登歌纪圣明藻卫仰观皆率舞益知天意合三清

奉和御制奉安圣像礼成

琳宫胥宇象清都金阁丛楹閟宝符昭假僊游彰胄绪范熔真像极规模精衷钦翼明威显近辅恭迎茂典敷美应荐臻书不絶灵期先定日无渝徘徊瑞羽临旌旆夭矫飞龙上舳舻斋幄接神珪璧异景輿迎圣羽仪殊荧煌宝座安三境煦鸿恩下九衢深庆小臣叨奉跸翠綵华组耀微躯

奉和御制先天节上清宫道场香合内获金龙

元真降治佑生民紫馆空歌协吉辰芬馥鹄鑪兰注裹盘紫钿合翠龙臻阴凝珠树飞鳞密影拂霓旌瑞角新月驷云螭徒骏逸碧鷄金马谩璘彬会驂虬輶昭灵异终接飊轮奉圣神愿复水官修篆御纪年何足播芳尘

奉和御制恭谢天地礼成

元真密海惟畴德耀魄灵猷务降衷僊里肇禋尊妙道国阳严配报层穹百神右序储蕃祉羣后寅威仰圣风声震山渊踰日际泽流根叶徧区中考熙茂范登虞舜积累遥源属帝鸿柔远九垓书轨凝凝休千载帝天通赓歌紫禁唐文盛第颂青缙汉德融盛业巍巍心翼翼古今能事集皇躬

奉和御制真游殿告成

均和玉烛成冬夕畴圣珍符纪瑞年八景凤舆临紫禁九微龙燦照祥烟森沉藻卫僊游接睟穆真仪圣海宣濬发璿源开物始密敷鸿荫肇基先良金肖像熔三品宝殿新规度九筵绮栋虹陞初矫尔丹楹丛倚倍森然高侔帝所威神备?据坤灵势胜全云雀向阳明翠羽玉题承月灿珠躔元龟协吉休符茂盛藻迎祥睿志?璧散示慈恩正洽斯千流咏降琼牋

奉和御制与天下臣庶恭上玉皇大帝天帝圣号

皇皇至德召和平茂烈馨香已告成只报元符营紫馆钦崇上帝荐鸿名夤威洁志通三境宥密真游降九清淳耀先期观道秘休成协吉顺天正琼干文彩云幡列金简荧煌玉字呈藻卫导迎扬盛则灵场陟降极精诚縣区率吁民胥悦篆素铺观古未行广乐乍兼箫籥响仙风微动佩环声扬烟层宙祥辉涌称庆斋闈瑞气生道荫符通嘉应集中宸繁贐永充盈

奉和御制五岳观告成

岳镇明神屡降康圣心尊奉礼文扬徽名只荐昭殊典秘宇钦崇报美祥曲沼甘泉秋湛湛浮荣嘉气晓苍苍金釭衔壁流繁影云雀蹊薨耀采章只祓王灵涓吉日密砉文杏架修梁都人雾集鸿仪盛帝御天临絜志彰宸唱茂宣昭峻极春祺纷委显蕃昌升平更属西成日击壤欢謡徧井疆

奉和御制玉清昭应宫成

中宸夜驻飞廉轡东阙朝迎绿错篇只建宝宫朝睟象载崇金阁奉真铨高侔紫极威神异?据柔灵胜势宣轟轟端平规景叶煌煌丰丽圣功全承隅阳马层云隔鸣磬花台晓色先别笈籀緘龙印字清坛香奏鹄鑪烟流泉灌注通河汉列馆回环接洞天玉籟琅璈鸾竞舞藁书金简鹤争传采梁虹指祺祥集银榜星分庆赏延永镇帝居资曼寿五城奚取汉迎年

奉和御制会灵观甘露

岳灵飞观耸神州上圣钦崇德日休嘉露霄零甘特异贞条膏被势何稠崑山宝器今初贮汉苑仙盘昔未浮自可纪年昭瑞应更殊添海助洪流堇荼变味承余润图牒腾芳焕大猷愿采朝华和美玉仰资宸筭倍千秋

奉和御制冬至

汉门候景嘉辰启鲁观书云协气升玉琯飞灰新节应璿霄合璧瑞华凝阳芸初动犹兼雪柔荔将芳尚隔冰繁祉建元名已肇殊庭备物礼将登黄龙甘露诚难拟泰畤甘泉岂足称共庆帝辰延百福巍巍千载庇黎蒸

奉和御制恭谢南郊

高真降佑开鸿业哲后祈禘福下民靖馆斋心成钜典嘉坛报贶奉严禋时遵夏历春当孟礼宪周郊日在辛图籙先登符命显祖宗昭配孝思伸侍祠卿士衣纓列随兆星辰俎豆陈穆穆苍灵潜扈跸寥寥风伯豫清尘再登午陛?诚達三烛奔精美应臻万寿无疆增介祉永蠲牲玉事神明

奉和御制庆先后升祔礼成

事地有严彰至德显亲为重化含生永怀慈景心追孝载举鸿仪月就盈徽册钦崇昭懿铄太宫只祔极诚明黄彝进裸精衷達小吕登歌茂礼成式宴外庭均大庆受厘恭馆洽维禎薰弦远播思齐颂亿载垂鸿廓帝紘

文庄集卷三十五

卷三十六

钦定四库全书

文庄集卷三十六 宋 夏竦 撰七言絕句

奉和御制藉田诗

绍休文祖盛仪陈载耜东耕協仲春冕服远推踰古制须知明主为生民

奉和御制皇太后恭谢太庙

圣慈因心迈古先亲裁礼乐定牺牲裸成文母膺鸿佑永指南山比壽年

奉和御制幸金明池

睿藻昭回侔列纬时龙顺豫体苍旻岂同周穆临瑶水凯乐雍容浹庶民

御合春帖子

金盘晓日融春露黼帟鲜云?瑞香圣壽永同天地久南山何足比延长

冰消太液生春水日上披香积瑞烟乔岳告成鸿庆远垂衣无事永千年

天人道洽真游降禋祀功高帝业昌迎气东郊风乍暖受厘中禁日初长

九门和气冲鱼钥层宙祥飈起鹤云王泽下流慈煦远万方歌舞戴明君

青逵布序韶晖盛紫禁乘春乐事多海域晏清无夕虑斋居宣室顺天和

寒梅吐艳风初应步辇宣游日渐迟道?无涯真绪远永康寰海茂春祺

内合春帖子

青逵布序和风扇紫禁延禧瑞日长伫看亲蚕临茧馆永观彤管播声芳

椒花献岁良时启彩鸞迎春淑气来仰奉帝慈方秀出吹箫看筑凤凰台

东郊候气回青辂北阙迎祥辟紫闱大庇羣生承宝绪永敷春泽播鸿徽

银箭初传暖律延微和渐扇物华妍彩幡红镂宜春字永奉宸慈亿万年
青阳乍整苍龙驾紫宙初凝白鹤云曼寿无疆真?远九重嘉气日氤氲
缙室葭灰飞候管彤闱天路起和风六宫永被河洲化穆穆芳猷佐圣功
三星分曜辉宸汉九禁迎春启令辰仰奉椒闱宣内治湛恩鸿庆永如春
寿春郡王合春帖子

穆穆韶华生紫禁迟迟春箭下青宫良辰已庆加元服大国爰闻拜景风
缙室葭灰飞律管凤闱春色动年芳仙源积庆诚无际永戴宸慈袭美祥
日上苑梅凝素艳雪晴宫柳弄青条已观寿土封东国即看怀金奉内朝
异表英奇非世出惠心通敏尽生知更当淑景承慈煦永奉嘉祥茂本枝
御合端午帖子

续命彩丝登茧馆长生金籙献琳宫百灵拱卫天居峻万国欢康帝业隆
金缕开辰分五色长丝献寿祝千年垂衣日月承嘉庆真祖颺游正在天
僊园采药回雕辇禁殿迎祥启凤闱四海乐康民富寿穆清无事永垂衣
彩丝祝寿芳辰启紫禁凝旒瑞日长亿兆归仁天佑德绵绵真?永无疆
绦台丹笔书金籙紫殿瑶箱献巧衣亿载延鸿资睿算百祥重沓拥宸闱
太官角黍迎嘉节上圣斋居袭美祥金阙鉴观真绪远永延鸿庆庇多方
尚方绶带迎嘉节中禁彤闱纳美祥畴德珍符方瑞圣後天宸寿永无疆
太官角黍初晨启法坐垂衣介福隆亿载昌期方赫奕九天真?永延鸿
赐羹佳事传青简续寿长丝献紫宸帝祉荐彰符盛德圣心勤恤为生民
五色彩丝初献寿九重嘉气颂长生庇民精意方?巩垂拱仁风更穆清

浴兰袞祉良辰启握纪无为圣道尊烏奕嘉祥充九禁冲融和气徧千门
八龙焜燿长生籙五采葳蕤续命丝亿载延长资睿算万区康乐遇昌期
皇后合端午帖子

迎祥竞献双条逵续壽初纏五色丝共仰斋庄隆内训永观蕃衍茂仙枝
璧沼水嬉飞隼渡瑶箱命缕彩丝新亲蚕礼毕无余事夙佩珩璜奉紫宸
千门朱索迎嘉祉九禁椒涂纳美祥?奉黼帷承渥惠庆隆祿石美祥新
千门袞吉縈朱索九禁开晨辟紫闥宫漏正长天睠重永宣芳训率三妃
日记采兰追楚俗化孚流苻诵周诗肃恭懿德垂彤管九御归心百福宜
中闺正肃鸣环节吉日爰逢采术时亿载繁禧同圣壽百男鸿庆茂仙枝
点画诸宫初献巧裁缝中禁又迎祥周南永播河洲化仰佐鸿明烛万方
郡王合端午帖子

对日惠心时共仰沐兰嘉节庆长丝仰承中绪隆天爱永奉祥祺袞太熙
彤闥永奉千年庆金策将封一字王伫向景风承异渥预从佳节纳多祥
五色彩丝颁禁殿千龄嘉庆集藩房玉堂弦诵依真馆日日灵心降美祥
崑山瑞玉题真篆闋苑蟠桃刻印文并献春闺延美庆亿年嘉气永氤氲
淑妃合端午帖子

蕤宾布序逢良月条逵延祥记令辰仰奉椒涂宣内治永昭芳誉冠虞嫔
芳园踏草迎嘉节紫掖鸣环奉鞠衣渥惠日新鸿庆远永隆徽序耀层闥
万?清和当圣日千门采拾邁良辰上真鸿绪宜蕃衍从此高祿美应新
宴寝奉朝鸣采玉良辰袞庆表长丝仰承中壺垂芳裕永播周南逮下诗

廷试

殿上衮衣明日月砚中旗影动龙蛇纵横礼乐三千字独对丹墀日未斜

和太师相公秋兴十首

原上西风马力生折胶时候正凄清功名未立头空白却忆金徽万里行

亭臯危叶乍经霜过尽惊鸿落吹长闲上层楼待初月方壶残漏下三商

萤光照水星星度鴈阵横空字字移何处佳人惜团扇玉堦烟叶动轻颺

苑树残蝉送远愁懒将衰鬓照清流归来自扫东园叶学灌寒蔬备晚秋

水榭凉生暑气销疎萤点点漏迢迢明河案户苍龙转只有匏瓜缀碧霄

沉沉池阁乍凉天坐爱莲薰夜不眠却忆北门曾候对半帘斜月玉堂前

相府新秋宴席开西湖珠履践苍苔白头旧吏方奔走不得抽毫逐上才

遥思汉阙雨新晴天际微云夕吹生沆瀣气凉僊掌?满盘宵露结珠英

河汉西倾火渐流露华微冷透轻裘何当弄凤随惊吹直上层城十二楼

彤管少文堪约史霜戈无艺可防边孟诸苍莽平台远坐对秋光又一年

青州

日上西山舞鸾鹤波翻碧海鬪蛟龙直鈎到了成何事消得君王四履封【此诗见东轩笔录以为王沂公曾当国郑公为翰林学士欲撼之而作原本缺今采入】

江州琵琶亭

年光过眼如车毂职事羈人似马衔若遇琵琶应大笑何须涕泣满青衫【此诗原本缺今从中山诗话采入】

狎鸥亭诗

元化平分荷大钧左符新刻玉为麟南湖特地栽桃李拟伴沙鸥过十春

海鴈桥边绿水深絕无尘土近花陰忘机不管人知否自有溪鸥信此心

书怀

黄阁有贤图国计皂囊无党害边功河湟饮马无难事一点沙尘在目中

到任後作

功兼文武帝师臣久厌崇高乐退身任是东山无限好谢公争忍负生民

西厅

阶除尽日微风度帘幙先秋暑气还莫讶使君临案久雨晴端正见南山

宫词

鬟拢春烟湿翠翘石榴裙幔裊纖腰绦唇不敢深深注却怕香脂污玉箫

新染罗衣翠地红喜迎天仗宴春风歌词若入君王听不惜新声教六宫

古意

重上青楼拂蛛网却匀愁黛对菱波也知新旧争多少敢话机头织素多

渔者

读徧龙韬事可知一竿闲把直鉤垂秋来江上西风急且系扁舟卷钓丝

观藏珠

敏手机心颇自安遮藏有路巧千般主公当面无因见只怕旁人冷眼看【此诗出宋文监原本缺今补入 案墨客挥犀云丁晋公与夏英公会宴斋宫伶人有杂手技号藏擲者在焉丁顾夏曰古无咏藏擲诗内翰可作一首即席献诗云舞拂跳珠复吐丸遮藏巧技百千般主公端坐无由见却被傍人冷眼看东轩笔录载此事又易藏擲为弄盃注皆与文监小异故附录焉】

安抚状元内翰还朝复命再获候迎先附短章以代片幅

两朝西掖旧词臣蘂苦冰寒四十春霜雪满头尘满?自慙重见玉堂人

送张逸人二首

上公诗笔千金重逋客归装一棹轻莫向青山更招隐且留贤哲济苍生
徘徊独鹤翻清景容曳孤云下绦霄朝市山林本无异前贤出处尽逍遥
到任泾州寄长安府学诸先辈

半载秦川令始行论文犹未欸羣英横戈且趣从军乐不及期年待政成
闻劝农二使渡江访胡丞隐居

宅临殷羨投书渚门拥维摩问疾人诏使?舟应访道雨花交影隔西津

咏凤

千仞翱翔览德辉成汤解网四灵归梧桐欲下还惊去悄悄饥鹰掠树飞

闻莺

春光容与晓风高花映金涂见羽毛莫讶绿杨留不住内园新雨熟含桃

咏鹰

获自野罗知性巧饲之鲜食已恩丰下韝未便随人意须是经春更一笼

再徙西都咏青雀寄张昇谏院

弱羽伤弓尚未完孤飞谁敢拟鸳鸯明珠自有千金价莫为游人作弹丸【此诗原本缺今从古今诗话采入又案魏泰东轩笔录载此诗伤弓作轻弦尚作势谁敢作殊不明珠作黄金千金价作双南贵为作与其文小异附识於此】

厩马

万里无尘塞草秋玉轮金轭未巡游上林苜蓿天池水饱食长鸣可自羞

蔷薇

红房深浅翠条低满架清香敌麝脐攀折若无花底刺岂教桃李独成蹊

檻竹

广厦长廊四面围小栏霜雪两三枝帘帷壅蔽无人见赖有中天日照知

花檻【梦中作】

曲檻横栏百宝装春风容冶看人狂孤松瘦栢无颜色只有青青待雪霜

题华严经诗

黼幄思贤已再三诏书将拆紫泥缄嘉言一句利天下何必金文更彻函

寄传法二大卿并简译席诸大士

译案多年润法音性根虽钝信根深无明不起冤亲等应有龙天证此心

润色金文数十函清凉甘露洗尘凡修行不作伊兰计只愿三千尽宝严

雪後赠雪苑师

雪山修道六年成云满长空雪满庭便向个中登觉地何须腊月待明星

玉界琼田万顷平一年光景一番新苑中又见梅花发信手拈来总是春

千嶂崔嵬雪里看东风一夜卷余寒岩前溜玉知多少涨起西江十八滩

老去方知行路难此心正要觅人安室中半偈如闻得便作当年立雪看

偶成

非才徧历清华地悟佛方为止足身浮名浮利莫相试三千世界一微尘

保庇孤根逢圣主矜修晚节顺天机空门自有清凉地不向红尘议是非

燕雀纷纷出乱麻汉江两岸使君家讼庭永日无留事一任啁啾到日斜【按诗话胡旦秋监性躁居襄阳夏英公常师事之及公贵達胡尚以故旧眡公公出镇襄阳一造焉谓公曰读书乎曰郡事少暇比只作得燕雀一诗因为诵之胡自是少戢】

诗余

喜迁莺

霞散绮月沉钩帘卷未央楼夜凉河汉截天流宫阙鏤新秋瑶塔树金茎露凤髓香和云雾三千珠翠拥宸游水殿按梁州【按青箱杂记云夏公初授馆职时方早秋上夕宴後庭酒酣遽命中使诣公索新词公问上在甚处中使曰在拱宸殿按舞公即抒思立进此词上大悦此词大典本阙今补入又树字杂记原本缺以避英宗嫌名也今据文义增入】

文庄集卷三十六